

Геннадий
ГРЕБЕНЦОВ

КОЛМО ТОМСО
КОЧКАЗЬ ПРОИЗВЕДЕНИЯТ

Саранск
Республиканская типография
«Красный Октябрь»
2019



Handwritten signature in blue ink.

**Геннадий
ГРЕБЕНЦОВ**

**КОЛМО ТОМСО
КОЧКАЗЬ ПРОИЗВЕДЕНИЯТ**

1 томось

Стихть, ёвтнемат, ёвкст, пьесат

Саранск
2019

УДК
ББК
Г

ГРЕБЕНЦОВ, Геннадий Сергеевич

Г Кочказь произведеният : колмо томсо. 1 томось.
Стихть, ёвтнемат, ёвкст, пьесат / Геннадий Гребенцов. —
Саранск : Республиканская типография «Красный
Октябрь», 2019. — 384 с.

ISBN

ГРЕБЕНЦОВ Г.

Избранные произведения : в 3-х т. Т. 1. Стихи, рас-
сказы, сказки, пьесы.

Геннадий Гребенцовонь колмо томсо кочказь произведени-
янь васенце книгантень совавтозь эрва кодамо иестэ сёрмадозь
стихензэ, ёвтнеманзо, ёвксонзо, пьесанзо. Сынь алтазь вишка
ловныцятнень туртов.

Г. Гребенцов вечкезь, лембестэ сёрмады тиринь вишка
мастордонзо, чачома велендензэ, сонзэ мазычиденть, тосо эри-
цятнеде. Сёрмадеенть келезэ гайтев, шожда, чарькодевикс.

В первую книгу избранных произведений в трёх томах Ген-
надия Гребенцова вошли стихи, рассказы, сказки, пьесы, напи-
санные им в разные годы. Они посвящены юным читателям.

Г. Гребенцов с любовью, тепло пишет о своей малой родине,
родном селе, его красоте, односельчанах. Язык автора звонок,
лёгок, доступен.

УДК
ББК

ISBN

- © Гребенцов Геннадий Сергеевич, 2019
© МРО ОООП «Литературное сообщество писателей России», 2019

ВЕСЕ МИНЬ — ЭЙКАКШПИНГЕНЬ МАСТОРСТО

Книгась лезды чарькодемс эрямонть, неемс эрявиксэнтъ, явомс паронть беряненъ эйстэ. Эйкакштнэненъ алтазесь чарькодевити седеаяк ламонть. Сон келейстэ панжи вишка ломанентъ икеле эрямонтень кенкшентъ, ёвтни тензэ сонзэ эрва кодамо ёнкстнэде: пертьпельксэнь мазычидентъ, ломанень кордонть (обуцядонть). Эйкакшонъ литературась — паронтень тонавтыця. Вельдензэ пакшатне аламонь-аламонь тонадыть чарькодеме эрямонть. Истямо Г. Гребенцовонъ шкинемазояк. Сон эрзянь литературанть совась 1980-це иетнень ушодовомсто, зярдэ лиссь «Ёжов ур» ёвтнеманъ васенце пусмозо, васняк, кода эйкакшонъ сёрмадей, конанъ сёрмадовксонзо кадыть домка тешкс вишка ловныцятнень мельс-превс эсест шожда кельсэст, чарькодевикс сюжетсэст ды мельс туиця персонажост.

Кода ледстни сонсь авторось, сёрмадоманъ виензэ кармась варчнеме, зярдэ тонавтнесь тиринь Бозаёвсо школасо. Сестэ сон кучнесь Покш Березникень райгазетав эсь веледензэ аволь покш сёрмадовкст. Мейле, Ицялонъ педучилищасо тонавтнемстэ, седеяк кемекставсь сёрмадоманть бажамозо, ды сон тейсь паро сюлмавома «Сятко» журналонтъ ды «Эрзянь правда» газетанть марто. Те седеяк кемекстызе од сёрмадыцянтъ мелензэ — поладомс ушодозь тевентъ. Поладксокс теевсь «Тештине» литературанъ вейсэндявксось, ков Гребенцов Гена студентэсь ушодсь якамо Мордовской госуниверситетэнь филологиянь факультетсэ тонавтнемстэ. Тесэ ушодыця сёрмадеесь ламос тонадсь, кармась домкасто чарькодеме сёрмадоманъ тевень «салавачитнень». Лездыцязоль В. К. Радаев — вейсэдявксонъ ветицясь, Мордовиянь народной писателесь.

Г. Гребенцовонъ шкинемазо келей кода теманъ, истя жанранъ коряскак. Сон сёрмады валморот, ёвтнемат, ёвкст, пьесат. Сынъ весе алтазь эйкакштнэненъ. Сёрмадеесь свал кирпичи мельсэ ловномо маштыця пакшатнень ды сетненьгак, конат ансяк теевить содавиксэкс сёрмадозь букванть, валонтъ марто. Истятнэненъ

алтавить Азбуканзо. Весемезэ сон нолдась Азбукань кото книгат. Сеске редясак — Азбукань теицясь парсте содасы эйкакшонь психологиянтъ, чарькодъсынзе истямо тевсэнть методикань-тонавтомань ёнкстнэнь. Азбукатне сёрмадозь стихсэ.

Стихсэ Азбукась — те жанрань истямо теевкс, кона явови кавто ёнкссо. Сон тонавтомапель ды секе шкане художественной жанра. Веёндю, стихсэ Азбукатне топавтыть тонавтома тев, содавтыть эйкакштнэнь букватнень гайгемаст ды сёрмадомаст марто, лия ёндю — лездыть башка букватнень ды алфавитэнтъ целанек эстетикань ёндю панжомо.

Азбукань теема тевентъ эсензэ кемекставозь коензэ. Улить Азбукат, конатнесэ эрва буквантень алтазь строфатне сюлмавить ансяк эсь ютковаст. Истятнэнь тонавтнемань книгас содавтыть пельксэнь-пелькс. Улить Азбукат, конатнесэ вейке буквань чарькодевитиця строфатне смустень коряс сюлмавить лия буквань чарькодевитицятнень марто, ды, нама, сынъ кодаяк пельксэнь- пельксэв а яовить. Г. Гребенцовонь улить кода васенцетненень кандовицят, истя омбоцетнененьгак. 1985-це иестэ нолдазь «Стихсэ азбуказо» кандови васенцетненень. Эйсензэ теицясь эрва букванть чарькодевити нурыка стихсэ. Сёрмадеесь тонавты эйкакштнэнь аволь ансяк букватнень содамо. Нурыка стихтне содавтыть вишка ловныцятнень зрямонь эрва кодамо ёнкстнэнь марто. Тесэ минь нетяно важдемань вечкеме кармавтома, школань койтнень чарькодевитема, пертьпельксэнь содамо, вечкеме ды ванстома тонавтома, кудонь ды идем ракшань, чувтонь, тикшень ды лия касовксонь содамосо лездамо.

Парсте чарькодеви, мекс Г. Гребенцов покш мель яви Азбукатненень. Сонзэ зрямозо кеместэ сюлмазь эйкакшонь тонавтоманть марто. Сон комсьветее иеде ламо важди республикань тонавтомань системасонтъ. Меельце кемеень иетнестэ — «Народное образование Республики Мордовия» журналонь прявт редактор. Те шканть перть таштазь методикань ды шкинемань сюлавчинть минь несынек сонзэ меельце иетнестэ нолдазь Азбукатнестэ.

Нетъ Азбукатне седеяк сюпалгадсть эсест тонавтомань, художествань-эстетикань ды жанрань ёнксост коряс. Те парсте неяви «Ёжов азбукастонтъ». Книгась панжови «Азбукась лемсэ» стихсэнтъ, конань эйсэ эрва строчкась ушодови ломанень лемстэ.

Седе тов эрва буквантень максови кавто строфань стихсэ чарько-девтема, мейле — содамоёвкс, конасонтъ кекшезь те буквастонтъ ушодовиця вал. Букванть чарькодевтеманзо поладсызь эйтэнзэ ушодовиця вал марто аволь покш валксесь, авань ды цёрань лемтне. Буквадонть кортамось прядови аволь покш ёвтнемасо-миниатюрасо, конасонтъ тагояк вастневить те буквастонтъ ушодовиця ламо валт. Содамоёвктнэ ды ёвтнематне содавтыть эйкакштнэнь ломань ютксо ялгакчинть, пертьпельксэнь мазычинть, идем ракшатнень ды нармунтнень марто, кармавтыть важодемас тонадомо, нузякчинь а вечкеме, пертьпельксэнь ванстоמו. Книганть песэ максовить темань коряс зярыя пельксэв явось содамоёвкст. Сынь тагояк кандыть тонавтомань смусть ды нурькинесэ чарькодевтить ломанень эрямонтъ, кудонь ды идем ракшатнень обучасть, пертьпельксэнтъ. Книгась прядови «Поладынк стихентъ» ды «Содасак-арась пертьпельксэнтъ» налксематнесэ. Сынь кепедить эйкакштнэнь мелест шкинемантень, тонавтыть арсеме. Азбуканть тееме Г. Гребенцовнень лездасть Покш Березниксэ артома школань тонавтницятне. Сынст артовктнэ мазылгавтызь книганть, кармасть улеме паро иллюстрациякс.

Эйкакшонь сёрмадыцясь Азбуканзо теи аволь ансяк эрзянь кельсэ. Ули сонзэ кавто кельсэ (эрзянь ды мокшонь) азбуказо. Мокшонь кельс ютавтыцясь — Рая Орлова мокшонь содавикс поэтэсась. Те Азбукась — паро лездыця эйкакшонь куротненень, косо тонавтневить эрзянь ды мокшонь кельтне. Сон теезь шождасто чарькодевицякс, паро артовкс марто.

Г. Гребенцовонь рузонь кельсэ Азбукатне эсест башка ёнкс мартот. «Стихи Деда Мороза и Снегурочки» азбукась темань коряс седе теине. Эрва букваь чарькодевети аволь покш, ниле-кото строкань стихсэ, кона темань коряс кеместэ сюлмазь телентъ марто. Эйзэнзэ иллюстрациятнень тагояк артызь сынсь эйкакштнэ. Книганть песэ невтевить артыцятне, зяро иест, тонавтыцяст.

Рузонь кельсэ кавто лия Азбукатнень эйсэ тонавтомань ёнксось кеместэ сюлмави эйкакштнэнь содамочинтень ды шкинемантень бажамост марто. «Допиши имена» азбукасонть эрва букваь чарькодевети кавто строкасо сёрмадовкс эйсэ. Омбоцесь кадови апак прядо. Сонзэ эряви прядомс ломанень

лемсэ, конась муеви рифманть ладязь. Те кепеди эйкакштнэнь мелест муемс рифманть, мезесь, нама, тонавты сынст поэзиянь чарькодеме-марямо. «Зарифмуй!» азбукась седе тов кемексты эйкакштнэнь эйсэ рифмань коряс стихень ладсеманть. Меельце строчканть эряви муемс рифмань коряс ладиця вал. Неть кавто азбукатненень, кода лиятнененьгак, артовкстнэнь теизь сынсь эйкакштнэ.

Г. Гребенцовонь Азбукатне — эрявикс сёрмадовкст, конатнесэ тонавтнемась ды шкинемась вейсэндить. Сынть теезь-сёрмадозь эйкакштнэненень мельстуицяс, кепедить тонавтнеманть бажамост, поэзиянь лувонть чарькодемаст. Сёрмадеезь вечки эйкакштнэнь, бажи панжомс сыненст эрямонь эрва кодамо ёнкстнэнь, тонавтомс сынст паронтень.

Кепедемс вишка ломаненть ловномас мелензэ — те эйкакшонь литературасонть, паряк, сехте эрявиксэсь. Трямонь-кастомань тевеськак эйсэнзэ ашти неявикс таркасо. Ансяк теке шкасто свал эряви кирдемс мельсэ: пек ламо тонавтомась-кармавтомась колы художественной ёнкстнэнь. Сехте паро произведениятнесэ сон сельмс а каяви. Аволь свал неявикс, ансяк тагояк питней ёнкозо — сон максы художествань чарькодема, содавты ловныцянть валонь шкинеманть марто. Максы сон содамочияк — лезды эйкакшонтень келейавтомс эрямодонтъ, ломандентъ, пертьпелькстэнтъ чарькодеманзо. Весемесь те парсте неяви Г. Гребенцовонь эйкакштнэненень сёрмадозь стихотворениятнесэ.

Эйкакшонь стихотворениятнесэ васенце таркасо ашти аволь потмоёжось, — ломаненть перька молиця тевтне-валтнэ. Секскак эйкакшонь поэзиясь — те эсензэ лув марто аволь покш ёвтнема. Сонзэ эйсэ сехте неявиксэсь — пакшанть эрямозо ды мартонзо сюлмавозесь. Эйкакшонь поэзиясь ёвтни эсензэ ловныцятненень седе, мезесь тенст малавикс ды содавикс, мезесь сельмест икеле.

Г. Гребенцовонь «Панжовкст» ды «Лёмзёркс чире» стихень пусмотне сёрмадозь сехте вишкине ловныцятнэнь туртов, конатне весе мельсэ бажить содамс седе ламо перькаст эрямодонтъ. Эйзэст совавтозь стихотворениятне содавтыть эйкакштнэнь иень шкатнэнь ды мартост кеместэ сюлмазь кенярксов тевтнэнь марто: телень куншкасто — од иень вастома, сёксенть ушодовомсто — тонавтнеме сыргама.

Кизэсь минек эйстэ яви,
Сёксесь мизолды перть пельде,
Марят, баягинесь чави,
Минек эйсэ школав терди.

«Тонавтнем»

Содазь, эйкакшонь поэзиянтэ эсензэ башка ёнксонзо: зярдо эйсэнзэ кортамось моли ракшадо, — невтеви вейке саезь ракшась лиятнень ёнов а молиця обуцяно марто. Поэтэсь эйкакштнэнень чарькодевиксстэ ёвтни идем ды кудонь ракшатнеде, сынст башка ёнкстнэде:

Нумолкаесь эряза, / Ансяк вельть уш пеляза...
Мурка превей каткась: / Веньперть утом ванстась...
Онгай тюжа кискине, / Мендязь пуло вишкине...
Лейсэнтэ галат экшелить, / Кельме ведте а пелить...

Зярдо стихотворениянь персонажтнэ эйкакшт, невтеви сынст прянь ветямось. Тееви лем марто конкретной образ, конань вельде невтевить прянь ветямонь паро ды берянь ёнкстнэ. Весемесь те максови мельс совиця тевень тееманть ды образонтэ вельде. Аволь стака чарькодемась невтиця образось ды тевесь ёвтневить эйкакштнэнень содавикс валсо.

Школав ильти эйсэнь авам. / Ушось кеци, монгак кецян.
Петя артомо пек вечки. / Сон — художник-портретист.

Г. Гребенцовонь эйкакшонь поэзиясонть икеле ёвтязь башка ёнкстнэнь марто неявикс тарка саи вишкинетненень пертьпельксстэ ёвтнемась, сонзэ мазычинть невтемась. «Сёкссь» стихотворениясонть максови иень те пельксстэнтэ мазый артовкс. Авторось видестэ ды чарькодевиксстэ нолды тевс сёксентень ладиця тустнэнь: «сырнень палят», «тюжа ривезь», «сырнень покольть». Весемесь те парсте лезды вишка ловныцянтень не-емс сёксень мазычинть, кармамс сонзэ вечкеме. Тусонть вельде невтеви сёрмадыцянтэ ёжозояк. Сон валдо, кенярксов.

Сёксентэ невтемга поэтэсь нолды тевс невтемась-ёвтамонь

эрьва-кодат ёнкст. Карадо каршо путоманть сёрмадыцясь саи, зярдэ тешксты сёксенть мазычинзэ: Теке тюжа ривезь, / Ушованть ютась. Олицетворениянть вельде иень шкась невтеви прок ломанекс, кона машты тееме паро тевть: Сёксесь лопат сезнесь, / Сырнень палят стась. Вастневица невтемань-ёвтамонь ёнкстнэ максыть стихотворениянтень лия ёнов а молиция гайгема, теить сонзэ эйкакштнэнь туртов чарькодевиксэкс.

Поэтэсь свал кирди седейсэнзэ тиринь Бозаёвонзо, косо ютавтызэ эйкакшпингензэ, косо кармасть вечкеме пертьпельксэнтэ мазычинзэ ды чарькодеме эрямонь зэменть. Веле юткова чудиця Бозов лейнесь сонзэ туртов сехте мазый ды сэдейс совиця.

Бозов лейнесь — сэнь сурине,
Сон певтеме ды теине,
Жойнезь чуди, колнезь чии,
Сонзэ вечксы эрьва кие.

«Бозаёв»

Сонензэ тесэ весемесь малавикс, весемесь кенярдовты, вिति мель.

Тиринь ёнксось свал максы Г. Гребенцовнень скинемань од вийть. Те парсте неяви сонзэ «Вирень лисьмапря» стихень пусмостонтъ, конадонтъ В. И. Дёмин профессорось кортась: «Минек икеле ламо туссто стазь поэзиянь дневник. Эйсэнзэ мельстуезь ёвтневи велень школадо, косо лириканыть героесь таштась эряmodo васенце содамочить, тиринь кудодонтъ, конадонтъ арсематне кандыть оймень лембе, максыть кемема эсь вийтненень, васенце тонавтыцядонтъ, кинень пшкадят стака шкасто, ялгадонтъ, ки марто ютавтык штапо-кепе эйкакшпингентъ.

Теде кортави седей марто, стакасто лексемавтомо. Кемевтить тесэ эрявиксстэ ды темень содазь кочкавт художественной ёнкстнэ (детальтне), ваньксчись, лия ёнов а молиция вановтось. Сынст прявт виесь — весементень эрямонь коштонть соавто-мась, мазычинтень, мода лангсо эрямонтень кенярдомась».

Профессоронь валтнэнь кемекстыть «Эйкакшпингень лей», «Чачома ёнкс», «Тиринь мастором ды авам», «Чачома веле», «Кудов», «Велем монь седейсэ» ды лия стихотворениятне.

Седейшкавань валсо поэтэсь ёвтасы вечкеманзо тиринь
велентень — чачома ёнксонтень.

Чувтонь, артозь кудот
Стякшность лейчирева.
<...>

Тондеть паро мелем,
Морыть тень цёковом.
«Чачома веле»

Сонзэ свал терди тиринь кудось, конань марто сюлмазь сехте
валдо ледстнематне.

Таго, таго, кудов таго
Течи эскелян.
<...>
Ванан, кедьсэ тень аволи, —
Каршон авам лиссь.
«Кудов»

Сонензэ тиринь кудось — те авазо, эйкакшпингеде валдо
ледстнемат, пертьпельксэнь мазычись. Секскак сынст эйстэ
поэтэсь корты талновтыця валсо, конатне молитъ седейстэ, ке-
педить ёжонь сехте салавань бажамотнень-мельтнень.

Стихень пусмосонтъ покш тарка явови пертьпельксэнь лири-
контень. Тиринь паксятне, виртне вельмевтить поэтэнтъ седейс
валдо арсемат, кенярдомань мельть.

Тундонь чистэ совинь
Тусто вирентъ потс.
Мон симеме коминь,
Перькам — цецяв коцт.
Сэрей пичеть, тумот,
Вант, стясть икелень.
Теке роднякс умок
Сынъ теевсть монень.
«Вирьсэ»

Поэтэсь вейсэндяви тиринь пертьпельксэнтъ марто — сон сонзэ аявовикс пельксэзэ. Тесэ прянзо мари уцяскавокс, тесэ весемесь мельстуиця, седейс совиця ды валдо арсемань сыр-гавтыця. Виресь, лугась, конатне поэтэнтъ седейсэ, мазыйть эсь мазысэ, сынст ули лия ёнов а молиця, сельмс а каявиця тюсост. Сонзэ чувтотнень «шалъть пижеть кайсезь-сюлмазь пряваст», «чинтъ ало кецить, / Сельмезэнь ваныть. / Якстернеть, ожот, / Сэняждицят сынь, / Эждить потмоёжо, / Вечксызь эрва кинь». Истямо мазычинтъ поэтэсь бажи ванстомс, пачтямс лиятнень.

Кода эрямосонтькак, Г. Гребенцовонь лирикасонзо валдо, мазый тюстнэде башка вастневить нусманьчитькак, конатне тагояк парсте невтить пертьпельксэнтъ полавтовоманзо.

Уить пельть мацеекс,
Нусмакадсть ней садт.
Килейтнень юткова
Пиземесь поцердсь.

«Сёксень килейтуло»

Сёрмадеентъ ламо стихензэ теевсть морокс. Истямо поэтической строчкадо мерить «музыкальнойтъ». Стихензэ лангс сёрмадозь моротнень морситъ содавикс артистт ды эйкакшт. Ламо ёвтнеманзо ды стихензэ совасть школань тонавтнема книгас.

Поэтэсь малав иень эрва шкантень-пельксэнтень алты стихотвореният, конатнесэ парсте тешкставить сынст башка ёнкстнэ, мазычись. Сон эрявикс тюссо арты тундонть, кизэнтъ, сёксэнтъ, телентъ.

Г. Гребенцовонь, кода алкуксонь эрзянь ломанентъ, седеезэ сэреди тиринь раськентъ, келентъ, культурантъ кис. Ризнэманзо сон ёвты «Валдо юбилей», «Саранск», «Оякчисэ», «Тиринь мастор», «Эрзянь кель», «Вечкевикс кель...», «Монь келем» стихотворениятнесэ. Тиринь келентъ сон вечксы, бажи ванстомонзо, корты сондензэ лембестэ.

Тон прок вирьсэ валскень эрьке,
Мазыят, вечкеват.

Эрьва валот — авань эрыгтне,
Конатне мештеват.

«Монь келем»

Вечкевикс кель, монь эрзянь кель,
Тон оймеменькс, тон паро мель.
Тонь эйсэ авань ловсонь тансть,
Эйсэть пингень трокс покштям кандеть.

«Вечкевикс кель...»

Поэтэсь терявтни эсензэ стихотворениятнесэ сыргавтомс тиринь келень ды раськенё ванстомань ды сюпалгавтомань мель. Минь несынек сонзэ «гражданской позициянзо» — сон весе вийсэ тиринь келенть ванстомаanzo кис.

Г. Гребенцовонь лириказо умок лиссь келей эрямос аволь ансяк эрзянь, лия кельтнесэяк. Теде кортыть рузонь, мокшонь, удмуртонь ды лия кельтнес сонзэ стихотворениятнень ютавтокстнэ. Стихень ютавтомась — стака тева. Васняк, эряви мельсэ кирдемс, кода ванстомс раськенё эсь ёнксонть, мейле — муемс куншканть мазычинть ды видечинть ютксо. Васенцесь толковави истя: стихотворениясонть невтевить раськенё эрямонь ёнкстнэ, сонзэ келенть вельде ёвтавить художественной образтнэ. Лия кевкстемась: кодамокс теемс ютавтоманть — смустень седе видестэ кандыцякс эли ютавтома кельсэнтэ седе мазыйстэ гайгицякс? Ютавтомасонть а мереви ёмавтомс подлинникенть художественной зэмензэ, ды теке марто эряви ванстомс сонзэ форманзояк. Сынст вейсэндямосонть эрявикс смустеськак. Эрзянь поэтэнтэ ютавтыцяanzo малав педес топавтызь неть вешематнень.

Рузонь кельс Г. Гребенцовонь стихотворениянзо ютавтыцятне — Мордовиянь заслуженной поэтэсь А. Громыхин, рузонь поэттнэ А. Терентьев ды А. Бакулин, эрзянь поэттнэ М. Втулкин ды Т. Мокшанова. Ютавтозь стихотворениятнесэ ванстовить сынст эстетикань-художествань башка ёнксост. Ютавтыцятне парсте содасызь ды чарькодсызь поэтэнтэ сёрмадомань лувонзо, пертьпельксэнь мазычинть невтиця валонзо. Весемесь те лезды теемс истят ютавтовокст, конатнесэ сынё, малав кода

авторось, ёвтнить эрямодонть ды пертьпельксстэнтъ, невтить сынст мазычинть.

Седе ламот ютавтокстнэнь теинзе А. Громыхин, мезесь корты авторонть ды ютавтыцянтъ ютксо кеме сюлмавомадонть, шкинемаст малавиксчидентъ. Нама, те седеяк вадрялгавты ютавтозь стихотворениятнень, лезды видестэ пачтямс эйзэст совавтозь смустентъ ды лириканъ мазычинть. Авторонть ды ютавтыцянтъ ютксо кеме сюлмавомаднеде кортыть «Веснушки» ды «Снежные звёздочки» эйкакштнэненъ алтазь рузонь кельсэ нолдазь стихень пусмотне. Васенцентъ целанек ютавтызе А. Громыхин. Омбоцесэнтъкак сонзэ ютавтокстнэде сехте ламо.

Мокшонь кельс «Снежные звёздочки» («Ловонь тяштентъ») стихень пусмонть ютавтыцязо Мордовиянь заслуженной поэтэсэ Рая Орлова.

Г. Гребенцовонь эйкакшонь стихотворениянзо ютавтовить финнэнь-угрань лия кельтнескак. Истя, Ижевскойсэ 2014-це иестэ лиссь «Нюлэс вотьёс» («Вирень онт») удмуртонь кельс ютавтозь стихень пусмозо.

Г. Гребенцовонь эйкакшонь лириканъ лия кельс ютавтомась корты сонзэ художественной паро ёнкстнэде, вишка ловныцятнэненъ мелезэст туемадонзо, эйсэнзэ тонавтоманть ды эстетиканть парсте вейсэндямодонть. Кода эйкакшонь паро автор сон совавтозь «Антология детской литературы народов России» книганть, конась нолдазель Российской Федерациясо раськенъ литературатнэненъ лездамо программанть топавторга. Антологиянтень весемезэ совасть ведьгемень вете кельстэ рузонь кельс ютавтозь кавксосядт сизьгемень сёрмадовкст. Эрзянь пельксэнтень, Геннадий Гребенцовонь стихотворениятнеде башка, совасть Числав Журавлёвонь, Татьяна Разгуляеванъ ды Любовь Дергачёванъ сёрмадовксо.

Г. Гребенцовонь лириказо, конасонть гайгить кода эйкакшонь, истя покш ломаненьгак тематне, теевсь неявиксэкс минек литературасонть. Сонзэ ули эсензэ тусозо, неявикс башка ёнксозо, мезесь корты сёрмадеентъ ёрокчидензэ те жанрасонть важедемстэ.

Эряви меремс, Г. Гребенцовонь шкинемазо — те аволь ансяк поэзия. Сон терявтни виензэ прозасояк, кона полады поэзиясо

кепедезь мельтнень-арсематнень. Сехте ламо важоди ёвтнема-сонть. Тагаяк эйстэст ламотне алтавить вишка ды од ловны-цятнень. Теде кортыть «Ёжов ур», «Кодамо тюсонь ведесь», «Чиньжарамо» пусмотне.

Васенцесь нолдазель 1981-це иестэ. Эйзэнзэ совавтозель эйкакштнэде, сынст обучаюды, ёжомарямодост кевейкее ёвтне-ма, косо васенце таркасо ашти паро темень теemas тонавтома, покштнэнь эрва мейсэ лездамо кармавтома. Ламотнесэ сёрмадесэ невти эйкакштнэнь ды покштят-сырькаест ютксо кеме сюлмаванть. «Лисьмапря вакссо» ёвтнемасонть эйкак-штнэнь покштят ёвтни ютазь шкадонть, вельмевти эйзэст бажам — содамс, кода эрясть икеле, кодат изнявкст теезельть уцяскав эрмонть молема кинть лангсо.

Ёвтнематнесэ ламо мель явови эйкакшонь важдеманть. «Колянь бригадасо», «Мишань ялгазо» ёвтнематнесэ невтеви, кода школасо тонавтница эйкакштнэ лездыть кастомс, ванстомс ды пурнамс сюпав урожай. Пертьпельксэнь ванстомадонь моли кортамось «Чувтов латко» ёвтнемасонть. Сонзэ персонажтнэ — велень эйкакштнэ — озавтыть чувтот ды лоткавтысь латконть ды лейчиренть каладоманзо. «Ёжов урсонть» вишка ловныцятне теевить содавиксэкс сёксень мазычинть ды эрыза уронть телен-ть анокстаманзо марто.

«Кодамо веденть тюзозо» пусмосонть (нолдаз 2005-це иестэ) Г. Гребенцов тагаяк, эйкакштнэнь прянь ветямонть парсте содазь, полады сынст эйстэ кортамонть. Пусмонть совавтозь ёвтнемат-не панжить вишка ломантнень мелест-арсемаст, ёжомарямост.

Пусмонть совавтозь ёвтнематне кандыть тонавтомань-кастомань смуть. Эйстэ кортамось моли ломанень тевтнеде, конатнень марто содавтовить вишка персонажтнэ, ды сёрмадесэ аламось-аламось, алак фатя, тонавты сынст те темень тееме ды вечкеме. Книгань вишка геройтне лездыть тетяст-аваст туртов эрва мейсэ.

Неявикс тарка пусмосонть сайт пертьпельксстэ ёвтнематне. Эйкакштнэ кармить содамо, мекс нумолось полавты тюзонзо («Сёксень нумолкай»), кода эряви озавтнемс-видемс касовкст («Цецине»), мейсэ пси кизэстэ пиземень леззэ («Паро пи-земе») ... Неть ды лия ёвтнематнень вельде сёрмадесэ бажи

кармавтомс эйкакштнэнь вечкеме ды ванстомо пертьпельксэнтъ. Тенень лездыть ёвтнематнесэ вастневиця лириканы ёнкстнэяк.

Г. Гребенцовонь ламо ёвтнемасонзо невтеви вишка героентъ ды кудонь ракшатнень ютксо оякчись. Сехте кеме сон азоронтъ ды эрва мейсэ лездыця кисканть ютксо («Оя», «Алкурсонь ялга»). Каткаськак, конань сынъ вечксызь ды ванстыть эрва кодамо зыянд, эйкакштнэнень паро ялга («Порксазь кринка», «Лездыят»).

Сёрмадеесь, эйкакшонь содамочинть мельсэ кирдезь, эсензэ ёвтнемань лувонтъ теи сыненст чарькодевиксэкс. Келезэ мельстуиця, сон машты кочкамо эрявикс валт, парсте теи валприсьметнень. Весемесь те кепеди ловнома мелест.

2015-це иестэ лиссь «Чиньжарамот» пусмось. Книгась полады икелень пусмотнесэ кепедезь мельтнень-арсематнень. Тесэ тагояк минь несынек велень вишка эрицятнень, сынст тевест, пертьпельксэнь мазычинть, ялгакчинть, кудонь ды идем ракшатненень вишка ломантнень вечкемаст.

Книгасонтъ муевить од ёнксткак. Те, васняк, вишка ловныцятненень минек масторонь покш читнеде ёвтнемась. Сехте питнеесь сынст ютксо — панжиковонь вейксэце чись. Сондензэ моли кортамось «Изнямонь чистэ» ёвтнемасонтъ. Минька цёрынентень покштызо ёвтни войнаны стакачитнеде, кода сон ды сеть, кить эзть велявто тюреманы паксятнестэ, идизь минек масторонтъ фашистэнь ятонть эйстэ. Покштят-нуцькат вейсэ путыть цецянь пусмо «кевень солдатонтъ» пильгензэ алов, ледстясызь се стака шканть. Сёрмадеесь ютавты мель — зярдояк а эряви стувтнемс те войнадонтъ, эряви свал мельсэ кирдемс сетнень, кить казизь миненек течинь сэтьмечинть, кода стакаль те теемс ды зяро ломанть максызь эрямост сонзэ кисэ.

Пусмонтень совавтозь мизолкстнэ кортыть жанрань коряс сёрмадеентъ шкинеманзо келейгадомадонтъ. Эйсэст пейдемань лувсо видестэ тешкставить вишка ломантнень обуцяст, прянь ветямо, ламонь содамо бажамост. Весемесь те тееви шождасто, мелень витезь, эрзянь раськенъ пейдемань койтнень лангс нежедезь.

Сёрмадеентъ прозань жанранзо сюпалгадомадонтъ корты теке иестэнтъ эрзянь кельсэ налдазь «Эрясть-аштестъ Бузаё-

васо...» ёвксонь пусмось. Фантастиканть, олицетворениянь, гиперболанть тевс нолдазь, авторось ёвтни ломанень обучадонть, сонзэ эрямонь койтнеде. Малав весе ёвкстнэсэ вастневить атянь ды бабань образтнэ, конатнень минь нетяно раськень ёвкстнэсэ. Ломантнень марто вейсэ ёвкстнэсэ эрить кудонь ды идем ракшатне ды нармунтне. Сынст вельде сёрмадеесь содавты вишка ловныцятнень ломанень обучаень эрва-кодамо ёнкс марто. Сонзэ ривезесь, кода раськень ёвкстнэсэяк, ёжов, вергизэсь чавола, каткась лездыця, тувось рудазов.

Мельс туи «Тонавнемантень анокстамо» ёвксось. Сонзэ эйсэ ёжов ривезесь «тонавты» чавола верьгизэнтъ ловомо. Ёвксонть паро тонавтомань-чарькодевтемань смустезэ — эряви парсте тонавтнемс, содамоचितне ды эсь превсэ эрямось лездыть эрва мейсэ.

«Превей чавола» ёвксонть эрясть-аштестъ атят-бабат, ды сынст ульнестъ колмо цёраст. Кода эрсияк истямо ёвкстнэсэ, сехте вишкинесь теєви тенст лездыцякс, мелень ваныцякс. Кавто покштнэ мелявтыть ансяк эсь прыдост, теєме мезеяк а маштыть. Те ёвксось, кода малав весе лиятнеяк, прыдови превень путомасо, тонавтомасо.

Ёвксонь жанрасонть Г. Гребенцовонь те васенце терявтома. Кода сеедьстэ эрси, васенце эскедьксэнтъ теємстэ вастневить казямо ёнксткак. Ёвкстнэсэ улить акемевтиця таркат, конатне марявить аламодо «искусственнойкс». Целанек сон машты панжомо эсензэ персонажтнэнь обучасть, сынст вельде невтемс вишка ловныцятнэненень ломанень обучаень эрва кодат ёнкст.

Ёвксонь коесь ашти прявтокс сёрмадеентъ 2017-це иестэ лисезь «Чавола верьгиз» эйкакшонь туртов пьесань пусмосонть. Теке лементъ марто кавто налксемасо пьесасонть персонажтнэ — вирень ракшатне ды Алиса тейтерькась. Вирень ракшатнень тевест, прынь ветямост коряс эйкакштнэ несызь, кить маштыть важоме, кить нузялдыть. Вирень ракшатне кизэнь перть анокстыть телентень. Зярдэ сон сы, весень улить лембе «кудост». Ансяк верьгизэсь пародо а неи. Сон кизэнь перть яки тевтеме, киненьгак а лезды ды телень самонтень кадови лембе «кудов-томо», вачодо. Алиса тейтерьканть седеезз чевте, сон лезды верьгизэнтень — андсы прякадо, максы тензэ кыргас лембе

сюлмамка ды понасто кодазь пряспутомка. Пьесанть пезз паро. Вирень ракшатне Алисань энялдоманзо вельде путыть нузякс верьгизэнтень «лембе кудо».

Сёрмадеенть эйкакшонь туртов пьесатне — сонзэ шкинемасонть од ёнкс. Сынъ тонавтуть паронтень, ояксчинтень. Корязост путозь спектаклятнеяк, койсэнек, туить вишка ваныцятнень мельс эсест паронь кандыця персонажост, шожда ды чарько-девикс сюжетсэст, эйкакштнэнь туртов ладиця кельсэст.

Г. Гребенцовонь шкинемасонзо сехте покш тарка саи эйкакшонь пельксэсь. Вишкинетненень алтазь стихотворениятне, ёвтнематне, миниатюратне, ёвкстнэ, пьесатне чарькодевиксстэ ды мельстугезь максуть од ловныцятненень эрямодонтъ, перть-пелькстэнтъ ламо содамочить. Те корты сёрмадеенть ёрокчидензэ, эйкакшонь мельтнень-превтнень чарькодемадо ды сынест паро оякс теевемадо. Сон сюпалгавты минек эйкакшонь литературанть од тюссо, максы тензэ од ёнксткак.

Г. Гребенцов сёрмадсь книгат покш ловныцятнень туртовгак. Вадрят. Сынdest кортамось тесэ, косо ёвтневи вишка ловныцятнень туртов алтазь книгатнеде, а лади. Сынст ванносынек башка. Кемтяно, се шкантень сон сёрмады од книгат. Шкинемасо изнявкст теть, эйкакшонь сёрмадей!

*Юрий АНТОНОВ,
филологиянь наукань доктор,
Н. П. Огарёв лемсэ МГУ-нь
финнэнь-угрань филологиянь кафедрань прявт*

Ловтещинетъ

Стихъ

ТЮЖА

Сёксень шка. Чинь перть нусманян...
Арась мелем налксемскак...
Урокт тееме а бажан.
А мизолдозевангак.
Чись лисеме аволь анок —
Стяко ялган инжекс сась!..
Кода эрязкавтомс прянок —
Теде меленек арасть...
Апак учо — гайневтема!
Ды поровтонть лангс чалгась
Рижой Саша — прок цитнема —
Мартонзо Дружок кискась,
Сашань ладсо — тюжа-рижой.
Кармась ракавтомонок:
Пря юхай, пуло выжны.
Паркстомсь-витевсь ёжонок.
Одс ушодынек налксеме,
Ды кода вадрясто лиссь!
Теке вишка нупальсэнек
Таго чачсь вечкевикс чись.

МОН ЛЁТЧИКАН

Верьга ливти самолётось.
Ки пилотось?
Мон пилотось.
Самолётом нармунь теке,
Ливти менельганть «Артекев».
Весе класснэк ливтятано,
Цяпато, моратано.
Ва уш валгтано «Артекев»,
Экшелятано —
Ды мекев.

АРТЫЦЯ ПЕТЯ

Петянь альбомозо эчке,
Се альбомсонть ламо листт.
Петя артомо пек вечки.
Сон — художник-портретист.

Исяк артызе сон кисканть
Ды важоди течияк:
Васня артсы тюжа катканть,
Мейле сеянтъ...
Ды моньгак.

ПОКШТЯМ

Покштям — велень эриця,
Тевень парсте содыця.
Покштясь монь — механизатор.
Соки мода, вети трактор.
Сюро нуи комбайнасо,
Зёрнат ускси машинасо.
Ламо сонзэ эйстэ лезэсь,
Сон чарькоди эрьва мезес.

МЕЛЯВТЫЦЯ ЛЮСЯ

Авась муськи ды шли-нарды...
Люсяк тевень а кады:
Юля кудряв няканть туртов
Мастумарть пидеме путы,
Сты сон понкскеть нумолонтень,
Шляпа — чевтине овтонть...
Авазо кенярды тензэ:
Аволь нузякс тейтерезэ!

ОСКИНЕ

Лейчиресэ налксинек,
Осканок ёмавтынек.
Косо сон?
Косо сон?
Нама, толкун
Ютксо сон...
Кода сонзэ
Таргамс ней?
(Ведесь лейсэнтъ
Теке эй!)
«Кирнявтт мекев!» —
Мерян мон.
Чарькодьсамам-арась
Сон?

КЕМТЬ

Тюмань тетязо-авазо
Рамасть тензэ карсемат.
— Вана, цёрам, кемнеть мазыйть,
Сынь кандтнемстэ ванстомат!
Эйсэст ушов сыргась цёрась,
Теке неевтест ульнесь.
— Косо кеметь? Козонь ёмасть?
— Пильгстэнь салынзе ведесь...

ЛОВСОСЬ ОРГОДСЬ...

Паникудосо Олёна,
Аволь шожда тензэ...
Таго оргодсь чире велькска
Ловсынезэ!!!
Нусманясто укстни Маша
Вишка сазорозо:
«Таго, таго арась кашам!
Ловсось косо?
Оргодсь-чудесь
Сон кияксос,
Каткалевксэнек
Кенярксос...»

МИШКАНЬ АРТОВКСОНЗО

Мишка пек артоманть вечксы.
Улить краскат, тетрадат.
Весть сон тетрадензэ вельксэ
Натой сутямошноськак.

Бобик колмоцеде артозь.
Ней псакантень чиполась.
Илязт тюре Бобик марто, —
Артома лия лопас!

ЧАЧОМА ЧИ

Чизэ налнэсэнзэ дразни
Весе ялган ды моньгак...
Чачома чись — ине праздник!
Казнетнень эйстэ байтяк!

Мон аванень меринь: «Ванта,
Чинть налозо прок эрикс!!!
Паряк, вейсэ минек марто
Кецни монь Чачома чис!»

КОДА КАСОМС?

Алдо ды кашадо ярсан,
Кусялядож мон симан —
Арсян, истя куроқ касан!
Ансяк вана а касан...
Течи кавто вакант сэвинь,
Варштынъ чамаваномас,
Неян:
Секе, секе сэрем...
А учови касомась...
Стяко ламо мон ярсан
Ды сырькаем кунсолан!

ТЕЛЕФОН

Гайневтемам учить ялган.
Цифрань лепштнеме мон карман...
Кода паро! Кода паро!
Натань марто, Серьгань марто
Сюлмасамам сеске сон —
Аволь кияк — телефон!
Эрьва ёндо одс ды одс
Тень гайневтнить телефонс.

ПИЧЕЧУЛЯТ

Вирьга цёркатне якасть,
Пичечулят покшт пурнасть...

Экай, цёркат, кирдевтеметь!
Эсест юткова сёлгадсть,
Пичечулясо ёртнеме
Вейкест-вейкест лангс кармасть.

Истя вана пиче вирьсэнтъ
Сынь ютавтнестъ кежест-псисст.
Кувать те чинть мельсэст кирдъсызь:
Шишкат сынст конятнес лиссть!!!

Кода, цёркат, ней мольтядо,
«Мазый» конят, эсь велев?
Кода истямокс листьядо
Тейтерькатнень икелев?

УСАТ

Чизэ пси.
Кинек — лейлангов.
Уса потсо колозось.
Виолеттань кирьгасонзо
Од эрьгинеть понгавтозь.
Сезян усав колоз састо.
А пупавомс пек паро!
Виолетта эрязасто
Дивси: «Усатне зяро!
Арсинь, ансяк покштянь улить...
Колозтнэсэяк улить!!!»
Тамашадонть валт арасть!
Пешксе пакся усат кассть!

МЕКЕВЛАНГТ

Кичкере пильге овтось
Кармась чеерть кундамо.
Кармась авака каткась
Галатнень лангс онгомо.

Барбос мавкстнеме ушодсь.
Пурькадо ярсыть саразт...
Каня, эрси истямо?
Те тамаша — валт арасть!!!

Стясь весемесь прянзо лангс,
Тунь мекевлангт велявтовсь.
Ары эсензэ таркас,
Зярдю прядови онось...

Ней мон таркасон мадезь,
Зярс мон тантейстэ удам...
Весе дивань неть тевтнень
Онстон нееме вечкан!

БАЖАМО

Улкоть мон покш лелянь марто
Машинань заводсолинъ.
Неинь тамашат мон зняро!
Самосвалсо рулювинъ!
Истямо превей машина!
Сталмо чукади ёнсто!
Кадык нейке мон вишкинян,
Зярс тонавтнян школасо...
Ансяк зярдю покшсто касан,
Улян шофер ёроков.
Самосвалом мон ветяса
Эрьва ёнов, эрьва ков,
Мик васоло масторов!

ГАЗЕЛЬ

Тетянь марто минь ардтано
«Газелькасо» васолов.
Вадря-паро машинанок,
Минек машинась куш ков:
Моторгак,
Рульгак
Ды шинат!
Арась пе кецнеманень!
Уски эйсэнек машинась
Учонь инжекс сырькайнень.

МЕЛЯВТЫЦЯ ВЕРА

Авадонзо а кадови
Вера, шканть тунь а сатстни:
Куклань палят муськи-чови,
Някань тарकिनеть ацни.
Авань лездыцясь вишкине.
Дивазь эрватась мери:
Кода истя тейтерькинесь
Эрьва козонь кенери?

ГАРАЖ

Кардазонок малазонзо
Стявтсть гараж. Ура! рангтано.
Тюсов порсо лангозонзо
Эрьва мезе ней арттано.
Прок картинань галерея
Ули эрьва чиресь сонзэ.
Порось эсь тебензэ теи —
Вана актякшт, ишемть, ёзнэть.
Лиси мазыйне гараж!
Берянь, вейкине этаж...

КАЛОНЬ КУНДЫЙТЬ

Прядовома лангсо сукстнэ.
Чизэ озась веленть экшс...
Калонь кундыцятне укстнить:
Мезеяк эзь понго тенст!
Окойники, окойники,
Кивкал понгавтовсь-кундавсь.
Мейле, вант, ужкалнэть лыкить.
«Ули пек тантей штюрьбась! —
Лёшка мерсь мизолдонь чамат. —
Эштё ветешка кундама...»
Ды эзть кунда...
Ну и мезе...
Течи калось а моли...
Ванды — истяня лисезэ! —
Сюпав кундавксось ули!

СУБУТА

Ура!
Субута!
Вирев ней
Мольтяно Катянь марто нацяс!
Кужинесь тосо
Прок стольпаця,
Кона менельстэ валги тей.
Ялгацек кужинень келес
Минь ютасынек
Цецяв китнень.
Вай, улевельтькак
Таргонь читне
Оймсема чикс
Вейкиненъ пес!

УЧЁНОЙ СЫРЬКАЙ

Мартон кудосо сырькайнем.
Ды, бути пек эряви,
Орманзо коряс сонензэ
Ушоёжось маряви.
Метеосводкась амезекс!
Сырькаем видеть мери!
Монь туртов сон прянь шнамо пелькс —
Термометра сон эрий!

ЁМАВКС

Покштянь марто зыян лиссь:
Васыньканзо ёмасть.
Ковгак тонгинзе? Салызь?
Ёжозояк колавсь...
Варштнесь покштям аксялов,
Моргас, лавсяс, лияв ков,
Шукшонь кептерьскак варштась —
Васоньпеельтне арасть...
Покштям, пиштякась, стувтызе:
Зепезэнзэ сынст путынзе!

**СЁРМАНЬ-ГАЗЕТАНЬ
КАНДТНИЦЯ**

А стяко якан куринакава —
Мон сёрмат кандтнян эрьва кува.
Журналт, газетат
Телеграммат,
Открыткат...
Тевем покш! Ды ламо!
Сонзэ кувалма
Эсь прям шнан —
Тынк лезэс
Парсте важдян!

ЛАВСЕНЬ МОРО

Перька весе-весе
Тантейстэ удыть.
Ансяк варминетне
А матедевить.

Элякалить-лызыть
Чувто юткова...
Лавсень морынесэ
Нурсить весень, ва.

КАТКА

Чийниксэль чеересь чоп,
Мурка сонзэ сеске — цоп!
Сэвизе-нилизе,
Озась вальма лангс,
Пулонзо путызэ
Лापинензэ ваксс.
Пек, чеерть, илядо чара.
Каткась уды, ды сонсь мари.

МУРКА

Мурка понав, покшт усанзо,
Налкси кончкесэ эськанзо.
Мур-мурны, моры морынетъ.
Кашторкс! — чаравты пилинетъ.
А чарькодян, Мурка, вана,
Кода удомсто морават?!

ОНГАЙ

Кискарь кудонть удозь вансты —
Кузтемало тикше лангсо.

А сыргозиндеряй —
Сялыцяненъ — эрямс!

Сезьган сёлмосо ахоли:
— Удозь вана киськетъ коли!

Онгицякс куш невтик прят,
Чей Онгай лементъ кандтнят!

СЕЯ

Течи покштянь вакс а чалгат —
Равжо нусманячис прась.
Тев истямо теевсь, ялгат, —
Пирес сеязо совась.

Часонь перть сон тапась-порнесь.
Ваномаль мельганзо тень!
Вана истяман прягорясь!
Понги покштядон монень...

МЕКШЕНЬ КИРДИЙ

Васяненъ онстонзо неявсь —
Овтось тензэ ялгакс теевсь.
Сась сонензэ инжекс буто,
Кортнеме-аштеме кудов.

Васянь школанъ ялгатненень
Кандсь сон парне тантей медне.
— Ярсадо! Илядо визде!
Мон — пек вадря мекшень кирдий!

НУМОЛКАЙ

Удыть нармунть-ракшат.
Вирьсэнтъ сэтьме кеме.
Ансяк Нумолкайне
Сэтьмечис а кеми.

Штёлкадсь састо сэрясь
Тарад прясто менезь.
Тандадсь Нумолкайне,
Чиезь ношкстась, пелезь.

А эряви, Нумол,
Сэрядо тандалемс.
Эряви, пиштяка,
Удомат явавтнемс.

КУКО

Вирьчиресэ, авасоло,
Пизэвтеме куко эри.
Озы тарад лангс сон яла
Ды «ку-ку, ку-ку» сеери.
«Зяро иеть эрян?» — кевкстинь
Ды ловомсто сельмень конинь.
Куко патясь апак жаля
Сядо иеть кукордсь монень!

ВИРЕНЬ ОНТ

Уды ривезесь кеместэ.
Нумолкаеськак сутямсь.
Истят онт сынъ неить сестэ,
Косо пелема арась.

Пек кежей ракшатне весе
Седей чевтечи кастыть.
Сеельть-чеерть налксить вейсэ,
Верьгизт сеялевкст ванстыть.

Овтось медензэ а жали,
Вирень ракшатнень кавани.

Кужинесэнтъ моли пир,
Тесэ ялгаксчи ды мир!

ЛАЙКА

Лёшкань лангс тон иля онго,
Сускомс тетъ илязо понго,
Лайка! Вечкезь дразни эйсэть...
Сон а аштеви тонтеметь!
Ниле пильгинеть мик, ялга!
Кода чият тон киланга!
Аволь киска, аволь, — ёвкске!
Галбаз тонеть, каванявкске!
Ловажинетькак макстано!
Ёнчинть эйсэть кастатано!

КИСКАЛЕВКС

Вешинь тетянь-авань кедьстэ:
«Рамадо тень кискалевкске!»
Ней минь ялгам марто вейсэ,
Сон ахоли пулынесэ.
Авам, бабам каванясызь,
Сехте тантейнеденть андсызь.
Мельга-мельцек теньгак тейсызь —
Ульцяв чийнеме ливтнесызь.
Кискань кирдемс ней пек модна,
Мелест ваномс эрьва кода...
Вадря улемс кискалевкскекс,
Весень мелявтома пелькскекс!
Ансяк вадяшаса ськамон,
Кудораськем чарькодьсамам, —
Киненьгак а мерян истя!
Кискалевксэм вечкса псистэ!

КАТКАЛЕВКС

Тетям-авам — важодеме,
Школав — мон, а сон таго
Карми кудосо аштеме,
Нусманячис пракшномо.

Сыре сёксь ашти сельмсэнзэ...
Кода, каня, лездамс тензэ?

Берянь Кузянень, апаро...
Монь превсэ арсема чары:
Паряк, тензэ моли парс
Понав ялгине рамамс?

**ЖЕРДЯ ЛАНГСО
«СТЯВТНИЦЯ»**

Гришань пувты атякш ялга,
Скок ды скок сон жердя ланга!

Гриша вадря тонавтницясь,
Лади атякшкенть марто:
Жердя лангосто «стявтницясь» —
Частнэнь эйстэ сех паро!

РАУЖО ПСАКА

Тюсонзо кис а вечксызь пек...
Сон кулов ёнов моли!
Ды ялатеке мазый пек!
Вадяшаса мон яла.

Ды мезе ней,
Ды мезе ней
Равжо тюсонзо эйстэ?
Равжокс улемс ашождыне!!!
Ды мон истяня вечкса!
Сон псакась верка ды превей!
Тюсонзо эйстэ мезе ней?..

КУКО ДЫ ВАСИЛИЙ

Кукордыть куко марто частнэ!
Василий псакась мадезь ашти,
Таймазкадсь ды куроксто — скик!
Ды куконтъ видьс сон пачкодсь мик!
Тонась эль кекшизе принензэ,
Тандадозь ашти пизэсэнзэ...
Се шкастонть кенкшкетнень удалов
Пели варштамодояк яла.
Мельсэнзэ Васька веть ды чить,
Соды, кодат кенжензэ пштить.

ПОКШ ПСАКА

Минь сазором марто вейсэ
Зоопарков якинек
Ды ракшатнень видьстэ кедьстэ,
Видьстэ кедьстэ андынек!
— Ванта, покшке псакась оно! —
Сазоркинем монень мерсь,
Псака марто клетканть ёнов
Вишка сурнэсэнзэ невтсь...
Покордавкшнось, некак, ракшась
Ды мериксэль миненек:
— Чиедеяк кудов капшазь,
Аволь псака мон тыненк, —
Идем катка левкске однэ!
Меремс, тигра аламодо...

СЕЕЛЬ

Кужинесэ
Озадан.
Сэтьмечинть эйсэ
Ванстан.
Илить токше
Салмуксон!
Сынтемест
А сеель мон!

УНЖА

Цецяв кужине куншкасо
Унжа тюжа кухайкасо.
Мадезь кутьмерензэ лангсо,
Пильгсэ лыки нусманясто.
Сон а стяви кодаяк...
Лездадоя куш кияк!!!
Велявтыя унжанть тесэ,
Сон ахолдась сёлминесэ.
Кармась выжнэме мазыйстэ:
Выжж-выж-выж!!! — суюконясь истя.

ИШЕМ

Вандынь чизэ —
Маней кизэ —
Ишемень
Чачома чизэ!

Ансяк кода
Тензэ пшкадемс,
А покордамс,
Кежть а савтнемс?!

Ишемекс
Бути лемдясак, —
Вант, конязот
Шишкат касыть!!!

ВАСЕНЦЕ КЛАССОВ

Туить кизэнь читне-ветне,
Лембе ёжо эйстэст сайть.
Оршасть весе чувтынетне
Мазый янтарень покайть.

Школав миненек молема!
Окойники, шказо сась.
Коштсонть — баягань гайгема,
Икеленек — васень класс!

ШКОЛАВ ЯН

Школав яннэ,
Валдо яннэ,
Тон монь туртов питней-питней!
Тон монь мельсэ налокс цитнек!..

Школав яннэсь
А прядови —
Певтеме кикс!
Сон тееви-велявтови
Эрямов кикс!

КАВТО ТЕВТЬ

Морга э́кшэ ашти Митя,
Икелензэ — каша бли́дя.
Пенчке сэви, кни́гас варшты —
Сэтьминестэ ту́нь а ашти!

Вана ванды «кавто» кунды!
Кода «кавтонть» а кундамс?!
Содазь, мезе ули, бути
Сеск тонавтнемс ды ярсамс...

УПРАЖНЕНИЯТ

Стакалгады тонавтнемась...
Упражненият ламо!..
Зняронть эйстэ пакшань превтне
Иляст карма чарамо!!!

Тонавтыцятненень Миколь
Анок пеняцамс-меремс:
«Кода тынь а нузялдтадо
Зняро кудонь тев макснемс»?!

АПАК ЛАДСЕ ВАЛРИСЬМЕТЬ

Миша яки васень классов,
Тень сон теи пек парсте!
Берянь, арсемалувозо
Аволь ливчанятнестэ...
Сон лазонь пилямо машты,
Колсто чавнокшны эскетъ.
Ансяк Миша ялгинентень
А ладсевить валрисьметь...
Миша!
Миша!
Миша!
Миша!
Энялдтано умок уш:
Арсек-ладсек минек туртов
Пель валрисьминешка куш!..

МЕЛЬГА УСКОМА

Минек классо
Весе парсте
Зарядкаяк
Тейнить валске.

Тейтернетне,
Цёрынетне
Парсте ловныть
Книгинетнень.

Кудов кандыть
Яла вететь.
Содамочис
Яност ветить...

Ансяк, ансяк,
Ансяк Мишка
А токияк
Ве гинишка.

Весень эйстэ
Сон каднови...
Иень перть
А тонавтови!

Тейтерть, цёрат,
Улемс кода?
Мишаньгак
Мельганк ускодо!

Бути сонсь
Мезтькак а машты,
Паряк, ускозь
Седе шашты?

ВЛАС

Минек ютксо ули Влас,
Сон налкставты цела класс.

Баягинеденьт икеле
Сон уш тюрсь ды бант лутась,
Тамарань лангсо пеелись,
Минеть-сюнот рисовась...

Од тонавтыцянтъ озамкас
Салавине кнопка путсь...
Школань прявтонть нупальс якась,
Мурнезь прясо тосто тусь...

Истямонтень — паро ёло!!!
Мик уроксто порсь-ярсась!
Тонавтыцянтъ эзь кунсоло —
Вана кодамокс велявтсь!

Ансяк сонзэ лия классос
А макссынек зярдояк.
Эстенек эряви Власось,
Куш а полавтовияк...

КАВТОС ТОНАВТНИЦЯ

Вася уроктнэнь
А тонавтни яла.
Тень кисэ тензэ
Путнекшнить «гала»!

Илидизь клюка
Тынк истят «галат»,
Илядо вано
Васянь лангс, ялгат!

Понги сон вана
Тетянстэнь тузямс.
Эйкакштнэ — эйкакшт,
Васянок — нузякс!

ЗАЗНАЙКИН

Минек Васянок
Незнайка,
Сонсь пря вети
Прок зазнайка.

Корты аволь весень марто,
Аволь весень кунсолы.
«Колт» сонензэ журналс артыть,
Ды те коесь а коли.

СЕЛЬМЕВЕЛЯВТЫЦЯ*

Ули ялгам, кона машты
Эрьва мезень тееме.
Сельмевелявтыцякс ашти!
Ансяк кенерть нееме,
Кода вейке чинзэ перть
Теи-пряды сядо тевть...
Классонть оят тензэ весе,
Сон эрвантень лездьяк.
Ды эсензэ паронть кисэ
Тунь а веши мезеяк.

*Волшебник

ПИЗЬГАТАТ

Чудить, чудить чудикерькст.
Одс ушосонть ведьпетнямо.
Кода-бути вельть кецнезь
Школав карминек якамо.
Шумбрат, тундыне, шумбрат!
Пургондыть чувтотне весе,
Сынь куроксто вельтить прят
Валдо-пиже пацинесэ...
Ансяк алкукс тундось сы
Аволь зярдо кольги-петни.
Зярдо чамам вельтясызь
Пизьгатань тюжа кснавнетне!

КОНЁК-ГОРБУНОК

«Конёк-горбунок» —
Истя лемезэ,
Сэденть трокс ардан
Ласте эйсэнзэ.
Покштям рамизе
Велосипедэнтъ.
Зняро мельспарось
Монень казнедентъ!
Долксо а улян,
Покштянень ардан,
Ускан «ветинеть»,
Кадык кенярды!

ЛЕЗДЫЦЯТ

Весе класснэк одс мольтяно
Дуся бабанень лездамо.
Свал истя: кода сатано,
Сеске столь экишс озатано —
Паро планонь сёрмадомо:
Теems тень ды теems тонань...
Бабась карми столь пурнамо,
Кенярдомо, каванямо.
Пек сон инжетненень кеци!
Лездыцятне тутмаст эцить.
Чопотемас ярсить медте,
Куярнэде, пурькинеде...
Эно тевесь, тевесь кода?!
Кадык ашти! А оргоди.

ЛОВОНЬ ТЕШТИНЕТЬ

Ловонь тештинеть,
Ашот, чевтинеть,
Менельстэ цитнезь ливтить.
Ловонь тештинеть,
Ловонь тештинеть
Садонок эйсэ вельтить.
Тынь мазылгавттадо,
Тынь вадрялгавттадо,
Тынь а стувттадо киньгак:
Тештесэ кузнэтне,
Тештесэ пичетне,
Тештине потсо миньгак.
Лов ало чувтотне
Мизолдыть сэтьместэ.
Велить тештинетне
Минек покш велесэ...

КОДА САКШНЫ ОД ИЕСЬ?..

Од иеськак курок сы!
Ансяк кода, каня, сы?
Толковизе патям истя:
— Зярс Од иесь васоло...
Сонзэ канды Якшаматя
Казне марто кескавсо!

ШУМБРАТ, ТЕЛЕ!

Шумбрат, инже ашо,
Вечкевикс теле!
Сиянь паця ало
Пакся ды веле..
Якан ялган марто
Туваня сокссо.
Ливтнетяно вармакс
Минь пандо прясто.
Ардтнян, ды лиясто,
Эрси, мон пракшнан...
Те мон теленть марто
Истя шумбракстнян,
Сюконян сонензэ —
Паро мелезэнзэ.

КЕЦНЕВТИЦЯ ИНЖЕ

Ловось цивтёрды сиякс,
Почодови кудо пряс.
Весемьть тапардызе,
Ашо тюссо артызе.
Кие, каня, истямось,
Сиясо пек сюпавось?
Узертеме стявты сэдъ,
Урны верьгиз ладсо веть?..
Ки теизе весемьть,
Прянзо эзизе невтне.
Вечксы телень тевензэ,
Якшаматя лемезэ.

ОД ИЕ

Од иесь
Коданя сакшны?

Ды сон
Эрьва кода сакшны...
Пилотонтень —
Сёлмо лангсо,
Ялго —
Кие ялго якси...
Моро марто
Морыцяненъ,
Сокссо —
Сокссо ардтницяненъ...

Сон чиде-чис
Седе маласо,
Сон сы
Ды эрьванть каванясы.

ВАСЕНЬ ЛОВ ЛАНГА

Раужо ульнесь исяконь модась,
Течи уш Люся неи: вальма вакссо
Прок галат ашо толгат сорновтсть-правтсть —
Копачазь модась пухляня вельтявкссо.

Паксясо ды менельсэ — сиянь пандт,
Чувтотне нувсить, теке ёвксонь кудот.
Эйкакштнэ изнить эень пандо прят,
Алов ардомсто гай пейдемаст чуди.

Ды тейтернесь лембинестэ оршась,
Нурдынеть сайсь ды, кода-бути талнозь,
Кудосто лиссь ды кенкшенть чирес стясь,
Цитний ловонтъ лангс сельмень кончнезь ваннось.

ЦИРК

Цирк сась тенек! Цирк сась тенек,
Минек школав Од иес!
Карми минек пейдевтеме,
Сави пекенек кундсемс!

Ёвксокс эрьва мезесь теевсь.
Клоунось кодамо ён:
Весе пракшность сонзэ неезь —
Истя ракавтымизь сон!

Залось фокусникенть эйстэ
Ойкснесь-вайкснесь, се — прок тол!
А жонглёрось эрьва мейсэ
Истя чаравтсь! Вельть сон кол!

Мейле кужо минь теинек,
Вейсэ кирьксэ сыргинек —
Циркенть марто ялгаксинек.
Шумбрат, шумбрат, Од ие!

Куракшт ашо пухс орши-теи —
Улест пельтнень марто вейкетть,
Чочковтомо, эскевтеме,
Узеревтеме стявты сэдть.

Колмо варматнень кильдезь, телесь
Покш инжекс велев ардозь сась.
Эсензэ нурдонть эйстэ мелявтсь —
Килангонть ловнесэ ацась.

АШО КАРВОТ

Валске марто Мишка стясь,
Сеск ускIZE вальмась:
Весе китне-яннэтне
Ловтештесэ валязь!

Уить ашо карвотне,
Мездеяк а ризныть,
Сэтьминестэ валгить садс.
Мекс, каня, а бизныть?

ДВОРНИКЪ

Виевгали тарьксэсь,
Кежейгали.
Ловшушмось
Прок овто кудобоксо.
Колят-Витят
Мездеяк а пелить,
А аштевить
Кавонест кудосо.
Кадык вармась
Чамаумартъ пупи,
Миненек а стака
Ёртомс ловонтъ.
Кеветее минутадо мейле
Овтодонть
Ме-зе-як
Эзь кадово!

АРТСА САРАН ОШОМ

Мон тынк туртов асфальт лангс
Артан-рисован Саранск.
А валморот сонзэ эйстэ
Уш сёрмадынь — сынъ оймесэ.
Ансяк ручка саема,
Арсезь валон тештема.
Ошом вечкса мон певтеме
Ды анокан чинек-венек
Рисовамо-артомо,
Морот тензэ морамо.
Ламо оштнэде улить,
Ве ве ёнов а молить.
Ансяк минек Саранось —
Сехте вечкевикс ошось.
Варштат — цеця пусмо теке!
Мон каштансто мерян нейке:
Мирэнтъ-масторонтъ келес
Седе мазый а муемс!

ВАСЯНЬ ОНОЗО

Течи Вася «роботась»:
Чувар вальмало «сокась».
Сизесь, мадсь. Ды вана сон
Неи мельстуиця он:
Овтось инжекс тензэ сась,
Стядо якамо кармась,
Нумолкаесь Васянь ваксс
Каштом лангс удомо сась.
Кискат-псакат лейга уйсть,
Калтнэ тандадсть, менельс кузсть...
Зярдо Вася ванды сти,
Таго «сокамо» карми.

ГАЛАТ

Веленть вакска чуди лей.
Тесэ-тосо цитни эй.
Лейсэнтъ галат экшелить,
Кельме ведте а пелить.
Лисить ведьстэ — мазылгадыть.
Моразевить, эрязкадыть,
Киштить, «гигак!» сеерить,
Весень котаст якстереть.

ОНГАЙ

Онгай тюжа кискине,
Мендязь пуло, вишкине.
Певтеме удат, ярсат.
Зярдо онгомо кармат?
Кадык Онгай тонь леметь,
Онгомс тунь арась мелеть.

МУРКА

Мурка превей каткась:
Веньперть утом ванстась.
Иляст эце чеерть,
Улипаронь сэвийть.
Валске велявтьс кудов,
Ней сон, моразь, уды.
Пулозо — алганзо,
Вакссонзо — ялгазо.
Мика марто Зоят —
Муркань паро оят.

АВАНЬ ЛАДСО

Люсянь ёрок сельмтне неить,
Мезть аванзо кедтне тейнить.
Авась сонзэ экшелизе,
Прякинеде каванизе.
Люсяяк экшели някат,
Пиди-пани сыненст прякат,
Мадсти эйдензэ таркава,
Кортни мартост, кода ава.

АТЯТ-БАБАТ

Покштям ризны ды мелявты:

Васоньпеелензэ ёмасть.

— Козонь путынь? Козонь правтынь?..

Вайкснезь аксялов варштась.

Бабам ракси сонзэ лангсо:

— Лисни, кекшизь каткат-чеерть.

Тунь а неят, ванса-ванса.

Кедьсэть мезе? Васоньпеельть!

Кодамо тюсонь ведесь

Ёвтнемат

ЛИСЬМАПРЯ ВАКССО

МИТЯ марто совинек кудос, кузинек лембе каштлангов. Футболсо налксемадо мейле мадинек покштянок ваксс. Эзинец матедеве: чись ульнесь зярс вере. Секс зрявсь кундамс кодамояк тевс. Ансяк вана лембе таркастонть валгомс меленек арасель.

— Покштяй, ёвтнек мезеяк, — энялдозевинек минь.

Покштянок эзь учо кувать энялдомат: витинзе усанзо ды уставась ёвтнеме.

...Ульнесь те 1920-це иестэ. Аволь умок прядовкшнось революциясь. Панинек ашотнень, сюпавтнень. Ней раськесь сонсь кармась улеме азорокс! Велетнева ды оштнева ялатеке ульнесь сюпавт, конатнень ульнесь эсест лавкаст, заводост, фабрикаст, модаст. Сынст лангс вajoдиця кажов ломантне туекшнось азорост эйстэ, сюпавтнэ ялатеке тейнесь эрва мезть, яла снартнесь одс саемс эсест кедьс властенть. Савсь воёвамс сынст мартояк. Ламо таркава кажовтнэ явнызь эсь азортнень сюпавчист, мик чавнызь авечкевикстнень. Аламонь-аламонь фабрикатне ды заводтнэ кармасть улеме государствань, азорокс теевсь сонсь раськесь.

— Ламольть велесэнек кулактнэдеяк, — толковась седе тов деданок. — Сынь истя жо роботавтсть эсь кедьсэст лиятнень, ульнесь ламо модаст. Ине Октябрядо мейле минь курок теवंть якавтынек бояртнень марто, кулактнень марто жо — стакаль. Нать, секс сынdest эрва косо ламольть. Минек велесэ ульнесь кулак — Охань Андрей. Сон тарка-эзем эзь муе се шкастонть. Кода эзь «бушова», минь «оймавтынек». Истя жо ульнесь саезь модазо, весе лия сюпавчизэ.

— Кудонзо пекстакшнызь, нать? — дивазь кевкстинь мон.

— Мекевланк, келейстэ панжокшнызь. Чинь-чоп тесэ пиксесть ломантне. Ульнесь тесэ изба-читальня, ликбезэнь класст. Кодаяк эзь мирая Охань Андрей од эрямонть марто. Сон мекш ладсо бизнэсь, лаказы лакась кежсэ. А весть пецесь кирвазтемс колхозонь кши марто утомтнэнь, эсь икелень кудонзо. Тевезэ эзь лисе.

— Монень ульнесь тынденк кавксть ламо, — кортась седе тов покштянок, — ялатеке якинь ликбезэв. — Сестэ мон эсень асодамочинть кувалма кой-мезе эзинь чарькоде, кой-мезень тееме эзинь машто. Лездасть тень учителенек, изба-читальнянь прявтось. Кортыть ней, будто монгак покш вий путынь Советской властенъ кемекстамосо. Монь мельс леднить ламо тевть, мезе минь теинек ды неинек. Те порас сельмем икеле тундонь се маней чись...

Покштям аламос чатьмонеzewсь, нать, оймсесь, укстась ды ушодсь ёвтнеме седе тов:

— Тундонь маней чистэ, зярдо прядокшнынек тонавтнеманть, сыргинек валске рана лисьмапрятненень.

Сеть лисьмапрятненень вакссо, конат веленть маласольть, кассть покш тикше, певтеме цецят. Минь эскелинек кортазь-пейдезь.

Молинек менчезь яннэванть, лашмова-лушмова. Вармась пувсесь кыргасонок сюлмазь якстере галстуктнэнь. Васов марявсь лисьмапрясто чудикерьксэнь жойнезь чудемась.

— Ванодоя, ялгат! — дивазь серъгедсь Ваня, — киебути кери лисьмапрянтъ вакссо тумонть.

Алкукс. Пилезнек пачкодсь узерьсэ кежей вачкоемась. Кодамо-бути цёра керясь тарадов эчке тумонть. Минь ношкстынек мезе вий.

— Эй-й-й! Кадык тумонть! — сееринек чиёмстэ минь.

Тона ансяк варштась минек ёнов ды содась эсь тевензэ: керясь ды керясь.

— Кадык тумонть, — пшкадинек минь кериянтъ ваксс пачкодемстэ.

Сон ульнесь рудазов, апак нара, кежей.

— Кие те ульнесь? — эзинь цидярдо мон.

— Те ульнесь Охань Андрей кулакось.

Сон кепедизе узерензэ ды таго ушодокшнось керямо.

— Кадык! — кежейстэ меринек минь. — Мезень апаро тейсь теть тумось?

Тона чатьмонежь таго кепедизе узерензэ.

— А максынек чувтонть! — кеместэ меринек минь ды стинек икелензэ.

— Оргодеде икельдем, якстере нуланк марто, кискалевкст, — пеень сускозь мерсь сон, — вейкенъ пес керсетадызь.

Сон одс ушодсь керямо. Эчке тумось коське Охань Андрейнень кодаяк эзь изняво. Виде, масторов аламонь-аламонь прасть керявкст, керявксось чувтосонть покшолгадсь.

— Ялгат, а максынек чувтонть! — серьгедсь Гриша.

Минь курокусто кундынек теус: пурнынек лисьмапранть перька кевнетнень, карминек ёртнеме сонзэ лангс.

«Истя теуенек а лиси, — арсинь мон, — тумонть ёмавтсы чаво пря Андреесь».

— Ялгат, чийтяно велев ломань мельга! — мезе вий серьгединь мон.

Охань Андрей дивазевсь, автордызе узерензэ ды ношкстась веленть ёнов. Минь чиинек зяро вий мельганзо.

— Эй-эй-эй-эй! Сасынек! — сееринек мельганзо чиемстэ.

Охань Андрей чийсь мезе вий, пильгензэак эзть токше модас, мик правтызе узерензэ.

Велесэнтъ сонзэ курокусто кундызь ды ветизь Советс. Миненек эзь эряво содамс, мезе теить зыянонь теицянтъ марто. Эрявсь капшамс тумонтень, идемс сонзэ.

— Куроксто кандодо сёвонь, — меринь мон.

Минь ваднинек сёвоньсэ узересэ керязь тарканть.

— Сёвонесь коськи ды луводи, — мерсь Юра, — эряви тапардамс мейсэак. Сонсь цяторсо сезизе школав якамо панаронзо. Минь кеместэ тапаринек сёвоньсэ ваднезь тарканть ды сюлминек.

— Мезекс эрявсь керямс тумонть Охань Андреинень? — кевкстия покштянь.

— Пенгть, паряк, анокстась.

Ульнесь минек велесэ косто-бути кучозь колхозонь тееме Николай Иванович робочеесь, конань ломантне лемдякшнызь Якстере Миколекс. Покш активистэль, велесэ кулактнень каршо тюрицяль. Нама, сонзэ сюпавтне пек а вечкилизь. Весть Миколь сыль позда паксясто.

Кизень чокшнесь ульнесь опаня. Сон лоткась оймсеме ды симеме лисьмапрянтъ ваксс. Тесэ вана учокшнызьгак сонзэ кулактнэ. Симеме комамсто Миколь ульнесь чавозь.

А стувтнить ломантне эйсэнзэ. Ды кода стувтсак: лездась од эрямонть тееме, тесэ лисьмапрянтъ ванськавтсь, чапсь сруб. Аизнявиця тумокс кадовсь сонськак! Велесэ Якстере Миколень лемсэ ули куринка...

Шкась уш ламоль, сакшнось удоманок. Прядокшнызе ёвтнеманзо покштянокак. Вандынь чистэнтъ минь педепес Митя марто толковинек ялганок марто покштянок ёвтнеманть. Дивсинек, истямо ломанде мезеяк эзинек сода. Курок теде содасть весе классонок. Теке жо чистэнтъ пурназель дружинань советэсь, козонь тердезелинек миньгак.

Минь весе вийсэ кундынек тевс. Урядынек Якстере Миколь лемсэ велень куринканть, озавтнинек эзганзо чувтынеть ды, нама, эзинек стувто тумонтькак, ванськавтынек лисьмапрянтъ, вакссонзо таркантькак.

Ноябрянь 7-це чистэ лисьмапрянтъ вакссо ютавтозель митинг, косо ламо кортасть Якстере Микольде. Покштямгак ёвтнесь сондензэ.

... Сёксень чись лембель. Вармась азоркс якась ожола луганть потмова, пувсесь тумонть тюжа лопанзо. Эчке, сэрей, нардев тумось шождалгавтсь эсь прянтъ: састыне правтсь лопат ды сэрят.

Ансяк васолдо неявисть тумос сюлмазь якстере галстуктнэ...

ЧУВТОВ ЛАТКО

ГРУНЯ патянь кудозо ашти леенть чиресэ. Куринкань эйкакштнэ чинь-чоп тесэть. Пек уш паро таркась! Жойница леесь канды ведензэ овсе сонзэ кустеманть вакска. Эйсэнзэ — ламо калт. Куринканек сакшныльть ульма марто тей. Теске жо, луга лангсо, штюрьбантькак пидсекшнить.

Чить, зярдо ожо чипаесь пицезь-пици менельстэнтъ, эйкакштнэ экшелить лейсэнтъ, кеверькшнить ванькс песоконтъ лангсо. Налксекшнытькак Груня патянь кудо икеле. Тесэ налксема таркась покш, паро. Лиясто прыть оймсеме луганть потс, а неявитькак. Теск цёрынетне тейсть футбольной паксяк. Ансяк вейкесь берянь, оскась свал кевери ды ёми сэрей латконть потс, кона Груня патянь кудонтъ маласо. Кевери тозонь, а мусакак. Тосо касыть сэрей пиципалакст, кирмалавт, пурьгинепалакст, латксонтъ — ведь.

Тундо ланга латкось ды лейчиретне сельме икеле каладыть ды «эскелить» Груня патянь кудонтъ малав. Вестъ, тундонь паро чистэ, цёрынетне сиземазост пансестъ осканть луга потмова. Мейле маднестъ луга потс ды кортасть ловнозъ книгадо, ваннозъ кинодо. Сась ваксозост Груня патям. Витизе раужо пацянзо, нежедсь палканть лангс ды пшкадсь:

— Эйдином, лездадо тень, лоткавтынк латконть ды лейчирентъ каладомодо.

— Лоткавтомс? — дивазь кевкстясъ Костя.

— Кодаяк а лоткавтовить, лопапти сынст тундонь ведесъ ды сынъ эсестэнтъ содыть: каладыть ды каладыть.

— Эряви лейчиретнева озавтнемс чувтот: топольть ды кальть, — толковась Груня патям, — сынъ курок касыть,

неть чувтнэнь нардев ундоксост кеместэ кундыть модас ды лейчиресь а карми каладомо.

... Кизэсь ютась бойкасто, сась сёксеськак. Весть недлячинь валске эйкакштнэ арсезевсть. Кода истя сынсь эзть чарькоде теде! Рана валске Груня патянь кудо вакссо лаказы-лаказевсь тевесь. Тей кандсть коймть, чувткеть.

— Косто сайнк зняро чувтнэнь? — дивсесь ютыщятне.

— Минь чуролгавтынек тустосто озавтозь вирь полосанть. — Лесникесь, Лёша лелянок, лездась, — толковасть эйкакштнэ.

Важодеме эйкакштнэде састь ламо. Тевесь муевсь эрванень: веенст чувсть яминеть, омбонст — кандтнестъ ведь. Вана Ира ды Маша кандсть чувткеть, ялгаст — колият. Цёрынетне састыне валясть чувтынетнень, сялгонестъ колиятнень ды сюлмсестъ карьксесэ чувтынетненень. Ней виев варманеньгак а сявордовать чувтынетне! Таня ды Аня кандсть ведь, «симдизь» од чувтынетнень.

Курок латконтъ ды лейчиреванть ульнестъ озавтозь зяряя вишка топольть ды кальть. Эйкакштнэ мельспаросо вансть «эсест» чувтынетнень лангс.

— Да-а, паро тевентъ теинек, — кувакасто укстазь мерсь Юра, — ансяк касомаст сави учомс кувать.

Эйкакштнэ тукшность кудова. Молемстэ сынъ секе теванность удалов, озавтозь чувтынетнень лангс. Кузтема-лангсо, эсь мандонзо¹ лангс нежедезь, аштесь Груня патясь, мельспаросо ильгась превей эйкакштнэнь ды а вестъ ёвтась тенст сюкпря.

Истя уш лиссь, мон зяряя иеть араселинь чачома велесэнь. Окойники, те кизэстэнтъ пачкодинь тей. Капшазь эскелинь розь паксянь теине, менчезь, пулев кияванть, цецяв луга ланга.

Вана велеськак! Ансяк мекс-бути пек полавтовсь. Телевизоронь антенна марто кевень ды чувтонъ кудот аштестъ сравтозь жойница Штырма леентъ чирева.

¹Мандо — палка

Монень савсь ютамс Груня патянь кудо вакска. Вишките кудось ёмась сэрей калытнень ды топольтнень потс.

Чувттнэнь прясо, косо ульнесть письмаркудот, гайгсть нармунень морот, кизэнь сэтьме вармась кортась лопав тарадтнэнь марто. Пиже пондакш чувттнэнь ало скамика лангсо озадолить велень ломанть, ютксост Груня бабаяк, кона сыредемадонть эль-эль тень содавсь. Эйкакштнэ кенярдозь налксесть чувттнэнь ало. Мон эзинь ютаво вакска.

Чачома велень ломантнень марто мельспаросо кортникек весемеде. Тесэ вана Груня бабам ёвтнекшнизьяк весесень, мезде ёвтнинь тыненк мон.

— Вана истя, — мерекшнесь меельцекс Груня баба, — монь нуцькам кондят эйдинеть (сон невтсь налксиця эйкакштнэнь ёнов) ванстызь ведтенть моданть, тень марто монь кудонтъкак ды тейсть тенек мазыйдеяк мазый оймсема тарка.

САШОКОНЬ ВАЛСКЕЗЭ

САШОК сыргозсь рана. Састыне, сьовордазь кедьсэ нардынзе сельмензэ. Айгизе вальма занавесканть, ушось неявсь потмуракс. Пертьпельга а куш, а каш. Ансяк лиясто каятыль атакшонь вайгель эли кискань онгома.

— Рана стявинь, — мерезевсь эсензэ пачк Сашок. — Панжизе вальманть келес, нупалесь пешкедсь валскень ванькс кошттонтъ.

Вана Груня баба лиссь кудосто, панжизе кардазонь келей ортанть, косто капшазь лиссть сакалов сеянзо, мартост — ревензэ. Марявсь кардаз ортань чикордовомаськак. Ашо коня тюжа Зорька сынст скалось ды зярыя кудряв вишка левкске марто реветне лиссть вейсэ вальмалов, якасть пиже парсейкс аштиця луганть ланга ды жаднойстэ авторясть тикше.

Сашоконь авазо, Зоя патям, ильтясь Зорькань ды реветнень стадань ваномат таркав. Куринканек пансть реветь, скалт, сеят. Велесь ней, паряк, весе уш сыргозсь.

Цёрынесь кенерепакарензэ лангс нежедезь вансь весементь мельга.

Реветне парасть куринканть келес. Кой-кона левкскетне кадновсть аваст эйстэ, секскак човине вайгельдест куш пилеть потомдыть. Ютыця ракшатнень мельга пулесь аштесь стенакс.

— Зоя, нать, цёраткак течи стявтык фермав, — друк реветнень мельга молиция тейтерь-аватнень ютксто марязевсь ёрок Марфань вайгелезэ, — варштака, вальмаванть теке гулька ваны.

Куринкань аватне весе варштасть Сашок лангс. Тона тейсь амарикс, вансь стаданть ды пиже лопава тарадтнэнь ланга ойсезь нармунтнень лангс. Авазо капшазь ношкстась кудов.

— Мезе теевь мартот, цёрынем? — кевкстизе авазо.

— Мезеяк, — мизолдозь мерсь цёрынесь.

— Тонь мезетькак сэреди? — конянзо штюпамсто кевкстясь Зоя патям.

Цёрынесь чатьмонсь.

— Мон, авай, молевлинь мартот скалонь потявтомо, — састыне мерсь Сашок аванзо кутмордамсто, — секскак рана течи стинь.

— Тонеть тосо амезе теемс, мадевлить, пек уш рана стить.

— Монь удомам явась.

Авазо, okayники, согласясь.

Сашок пурнась-сэрянсь мик авадонзо икеле. Сыргасть вейсэ. Цёрынесь авадонзо эзь кадново. Сон мольсь келей-стэ эскелязь.

... Вирь пандтнэнь ютксто кармась сыргоземе чись. Секень вант, кеверезь туи крута пандтнэнь ланга. Вишка яннэсь ветясь садонть малава. Сонгак сыргоземе кармась. Стясть удомсто эрькенть келес сравтозь ведьлукштнэ ды ведьбалягатне. Ашо ды тюжа цецянть прясо вельтявсть весе эрькинетне.

... Фермас пачкодинек курок. Сюракшов скалтнэде калдатнесэ ламо. Кой-конат Зоя патянь неемстэ паразевсть.

— Курок, курок потявттадызь, — кортась мартост Сашоконь авазо.

Вана састь Зоя патянь ялганзояк. Ушодызь потявтоманть. Сашоккак кундась тевс, сон калдасто потявтома таркас пансь скалт, авазо яла кандтнесь ловсо, потявтсь.

Лездамодо мейле цёрынесь, аванзо мереманзо кунсолоть, тусь Штырма леентень. Мольсь сон кельме лисьма чудикерьксэнтъ вакска. Варштат Сарай пандонть прясто те чудикерьксэнтъ лангс ды мерят: те менчезь покш ёзнэ. Ведезэ истямо кельме, ванькс, весемесь неяви прок суликань пачк. Сон пуроми зярыя лисиця лисьмапрясто. Лисьмапрянь ведесь, чарькодеви, кельме. Тестэ вана чудикерьксэнтъ лемезяк.

Чудиця ванькс ведесь симди чудикерьксэнтъ чирева

касыця пиже тикшень, цецятнень. Валскень росадонть лугась цивтёрды чинь струятнень ало.

Колхозонь стаданть уш панекшнызь луга лангов. Сашоконь авазояк пурнась кудов.

— Кудов, Сашок, кудов, — серьгедсь цёрыненстэнь веёндо.

Цёрынесь мельтеме сыргась.

Леень чирестэ вастынзе ялганзо, конат умок налксесть валскень лембе чинть налонзо ало. Капшазь чийсь ваксозост. Сонензэ ульнесь мезде ёвтнемс эсь ялгатненень.

МИШАНЬ ЯЛГАЗО

— **Ш**УМБРАТАДО, эйкакшт! — ушодызе эрзянь келень уроконтъ Ирина Тихоновна. — Ютась кенярксов кизэсь, сась сёксесь ды салынзе тынк экшелямонк, вейсэ налксеманк, ягода ды панго мельга вирев якамонк. Тынь аволь ансяк оймсиде, кеман, важодидеяк. Те уроконтъ карматано теде кортнемяк. Ёвтнесынк, кода ютавтынк кизэнь каникуланк.

Кедест кепедизь весе.

— Таня ёвтнесы, кода ютась кизээ, — мерсь Ирина Тихоновна.

— Кизэнь каникуласто мон ульнинь Краснодар ёнксонь апокш велинесэ, авань марто якинек оймсеме. Тосонь Динской буень «Агроном» совхозонтъ садонзо прок вирть, эйсэст ламо умартъ ды грушат. Сынст пурнамо совхозонь важодицятненъ виест а сатны. Минь авань марто лездынек тенст. Нетъ умартненъ васняяк усксты эйденъ кужов, пичк-сема кудов. Паряк, минек лавкасто рамазь умартнеяк ульнестъ тосто. Лисни, монь кочкавт умардеяк тынь ярсыде.

— Парсте ютасть Танянь каникуланзо, эсь важдема-сонзо сон алкукс лездась.

Танядо мейле лияткак ёвтнестъ эсь каникуладост.

Ламот важдостъ школань пиресэ. Сексак школа икельксэсь эрва кодамо цеця потсо. Пурнызь капстань, модамарень, пурькань норовонтъкак. Тельня столовойсэст кармить ярсамо эсест пурнавт эмежтнеде.

Миша чатьмонсь, нусмакадозь ловнось кодамо-бути сёрма.

— Кунсолосынек Мишань, — апак учо мерсь тонавтыцясь, — кадык ёвтнесы, кода ютась кизээ.

— Мень сёрма ловнат? Тейтерень пельде, — пейдезь мерсь Юра.

Весе раказевсть.

— Алкукскак, кодамо сёрма ловнат? — кевкстясъ то-навтыцясъ.

— Ды те ялгань пельде, — окойники, мерсь цёрась.

— Кинь пельде илязо уле, эряви шкастонзо ловномс, — кортась Ирина Тихоновна. — Кие ялгат?

— Петя лелям комбайнёрось...

Классось велувсо раказевсь. Ирина Тихоновна бажась оймавтомс классонтъ. Вешизе Мишань кедьстэ сёрманть, капшазь ловнызе, мизолдозевсь.

— Эйкакшт, — ушодсь Ирина Тихоновна, — ломань сёрматне а вадря ловномс. — Ансяк бути Миша мери, минь ловносынек сонзэ вейсэ.

— Нама, нама, Ирина Тихоновна, ловнынк, — кенярдозевсь Миша, — Петя лелям тосо пшкали весе классонтень.

Учительницася ушодсь ловномо: «Шумбрат, вечкевикс Миша! Свал ледстнян тонь, вейсэ важдеманок. Монень кувать савкшнось важдемс съкамон ды кшинь пурнамоськак таргавкшнось пиземев читнень коряс. Тонстеметь пек стака улевель. Тонь свал ледстнить минек комбайнёр ялгатне ды мик сонсь прявтось Николай Петрович. Парсте важдемань кис колхозонь правлениясь тонеть анокстась питней казне. Станцияс куроқ пачтитъ од комбайнат — «Ниват», вейкесь эйстэст — минек колхозс. Парсте важдемань кис сон прок казне омбоце иень урядамсто ули максозь монень. Пароль, бути таго савлить! Ансяк ней комбайнась эряви пурнамс ды эсензэ ходсо ветямс тракторонь паркс. Мерть ялгать туртов: тесэ сынъ эрявить. Норовонь пурнамо шкасто важдиця кедтне а сатныть».

— Лисни, тон, Миша, кизэнь каникуласто важдить комбайнёронь лездыцакс, — кенярдозь мерсь Ирина Тихоновна. — Те, эйкакшт, покштояк покш тев.

... Школань баягинесь марявикстэ гайгезевсь. Урокось прядовсь.

Кудов молемань перть Мишань кевкстнестъ комбайнасо важдемадо, сонзэ покш ялгадонзо. Миша мельспаросо ёвтнесь.

СЁКСЕНЬ ВИДЕМАТ

КАЯТОТСЯ баягинень гайтесь. Колмоце классонь тонавтнициятнень тердинзе урок.

— Течи, эйкакшт, — мерсь уроконть ушодомсто Мария Михайловна, — карматано сёрмадомо сёкседе апокш сочинения. Арсинк, кода содави сёксень самось. Мейсэ те иень шкась тыненк вечкеви.

Эйкакштнэ панжизь тетрадест. Вана кой-кинь тетрадтнес теезь уш васенце сёрмадовкст. Ансяк Костянь тетрадез зярс ванькс. Сон, кода лиятнеяк, ваны ушов. Домкасто мезде-бути арси.

Мария Михайловна яки партатнень юткова ды ванны тетрадтнес.

Куш уроконть прядовомс кадовкшнось зяряя шка, сёрмадомаст ламот прядокшнозь.

— Кунсолотано зяряя сочиненият, — мерсь Мария Михайловна.

Тонавтнициятне паро мельсэ кунсолызь Мишань, Колян ды лиятнень сочиненият. Эрьвась эсензэ койсэ сёрмадсь сёкседенть.

— Мезе сёрмадсь Костя? — Пшкадсь Мария Михайловна.

Костя амельсэ стясь.

— Мон сёрмадын сёкс малав сюронь видемадо, — ушодсь цёрынесь.

— Сёксень видеMAT? — абунгадсь Юра.

— Теле лангс кие видни? — сеересть лият. — Вейкеяк лисевкс а неят, якшамось керязь-керясынзе. Виднить ансяк тунда.

— Паряк, лов ало кенери сюрось ды лов потсто кармат, Костя, таргамонзо! — пейдезь мерсь Ира.

— Тон косто сёксень видемадонть марсить? — кевк-
стясь Гриша.

— Велестэ. Сон бабанзо кедьстэ а тукшныяк, — идесь
Костянь Валя.

Весе марявиксстэ ракасть, эзь максо цёрынентень седе
тов ловномо.

— Виднить! — кеместэ, койники, мерсь Костя. — А
содатадо, чатьмонеде! Аламонь-аламонь весе оймасть. Ко-
стя путызе тетрадензэ парта лангс, ды кармась ёвтнеме:

— Колхозниктне виднить иезэнзэ кавксть: тунда ды сёксь
малав. Видемадо икеле сокасызь моданть, изасызь. Мейле
сыть тракторсо видицят. Тракторонть удалов понгавтозь
колмо кувака ящикень кондят, сынъ аштить чары лангсо,
неть — сеялкат. Сынст эйс каить видьметь: розь эли товзю-
ро. Сеялкатнестэ резинань трубкатнева прыть видьмекстнэ,
вельтявить кавшаня, летьке модасо. Тундонь видевокстнэненъ
мерить яровойть. Сынъ кенерить сёксь малав.

Весе чатьмонежь кунсолость, абунгалесть Костянь покш
содамочинденть лангс.

— Улить озимойть, — ёвтнесь седе тов цёрынесь, —
сынст виднить август ковонь прядовома малав. Те улиак сёк-
сень видема. Зяряя чинь ютазь моданть потсто лисить пиже
лисевкст. Бути сёксесь аволь якшамо, сестэ озимойтне касыть
пек куток ды раужо моданть теке пиже парсейсэ вельтясызь.
Кельметне, виев варматне, ловось а тандавтсызь сынст.

Тунда, зярдо солы ловось, озимойтне таго менить оляс
ды кармить седе тов касомо. Кизэ куншкане сынст коло-
зост кенерить. Зярс колхозниктне урядыть озимойтнень,
кенерить яровойтнеяк.

— Паряк, миненекак эряви модемс колхозов. Кой-мезде
кармавлинек содамо, — каятотсь тейтернень вайгель.

— Пек паро улевель, Мария Михайловна! — эрзяысть
эйкакштнэ.

— Истя тейтянояк, эйкакшт: ванды мольтяно экскур-
сияв ошонь маласо колхозов.

КАЗНЕ

ГАЙГЕЗЕВСЬ школань баягинесь. Нилеце классонь тонавтницятне озасть урок.

Курок совась Мария Ивановна. Сон уш аволь од, но сельмень паломасонзо неяви ёрокчи. Зярд мизолды — весе эйкакштнэнень тееви мельспаро.

— Эйкакшт, кие ёвтасы, кодамо ванды покш чись? — кевкстась Мария Ивановна.

— Весе кепедизь кедест. Содыть: ванды эйжурковонь кавксце чи. Те чинть весе тешкстыть.

— Пек вадря, эйкакшт, — мизолдозевсь Мария Ивановна. — Течинь уроксонть карматано анокстамо казнеть минек аватненень. Эрвантень эряви бажамс паро казненъ тееме. Истямонть максомскак мельспаро.

Мезть ансяк се чистэнтъ эзть анокста тейтернетне ды цёрынетне! Валя тейсь конёвонь няка, Маша — цеця, Вера — флажок. Цёрынетне тейсть ракетат, машинат, тракторт. Ансяк Боря пурнась кудыне. Стенатне ды латось — картононь, вальматне ды кенкшесь — ашо човине конёвонь.

Парсте молить Борянь тевензэ. Кадовсь ансяк трубанть педявтомс кудыненъ пряс. Но те шкастонть гайгезевсь баягинесь, урокось прядовсь.

— Эсенк теевть казнетненъ аватненень макссынк ванды, — мерсь Мария Ивановна. — Ёвтадо лембе валт. Тень кис слямс сави тенк седе рана.

Мейле эйкакштнэ шалнозь кадызь классонть, лиссть ушов.

— Адыдо киракстнеме! — серьгедсь Митя ды ёртовсь зень пандыненъ пелев. — Мельганзо ношкстасть лия цёрынетнеяк.

Борянь арасель мелезэ човорявомс ялгатненъ юткс. Сон содась, тонат кармить киракстнеме портфелест лангсо. Цёры-

несь снартыксэль туеме кудов. Но лангозонзо вансть ялганзо, кой-конатне кармакшность уш пеедькшнеме. Боря портфелензэ путызе веёнов ды чиезь кузсь пандыненць пряс.

— Истя а лади. Бути сыть юткозонок — портфелетькак кандык тей! — серьгедсь Егоркань Вася.

Ваны Боря: лиякс тевезэ а лиси. Саизе портфелензэ, озась лангозонзо ды весе марто вейсэ киярктсь пандыненць лангсто. Вечкевсь. Мейле киярктсь омбоцеде, колмоцеде...

Талаень чокшнес киярктнесть эйкакштнэ. Капшамс ульнесь аков. Ванды школав модемс эзь эряво: авань покш чи.

Кадык Боря киярктнемстэ пек сизекшнесь, ялатеке чокшне эзь матедеве кувать: арсесь, кода ванды макссы аванстэнь казнень. Цёрынесь эзь фатяк, кода пекставсь сельмекерензэ.

Валске марто Боря сыргозсь рана. Истя кармавсь Мария Ивановна. Кудопотмось пештязель тантей чинедь. Те авазо каштомсто прякат таргси. Цёрынесь састо, кияк аволизе маря, стясь кроватьстэнтэ. Капшазь оршнесь ды саизе портфелензэ. Тов путозель исень теевь казнесь. Панжизе ды... таймазкадсь. Боря эзь фатяк, кода тусть сельведензэ.

Те шкастонть каштом икельде лиссь Борянь авазо.

— Тон, цёрынем, мекс авардят? — кевкстась сон.

Боря невтсь лепштязь кудыненць лангс. Авазо варштась картононь пелькстнэнь лангс ды вейкентэ лангсто нессь сёрмадовкс: «Те кудыненць казсья вечкевикс аванень сонзэ покш чистэ — Эйзюрковонь кавксоце чистэ. Боря».

Цёрынесь неизе, кода цитнезевсь аванзо сельмензэ, чамасонзо кивчкадсь ды истяк кадовсь мизолкс, конань эйтэ кудо потмоськак теевсь седеяк лембекс ды валдокс. Авась чевтестэ кутмордызе цёрынензэ ды палызе.

— Боря, ёвтака, кодат оценкат кандыть монь покш чинтень?

Цёрынесь таргизе дневникензэ, венстизе аванстэнь. Сон панжизе ды кенярдозевсь. Весе оценкатне вадральть.

— Сюкпря тетя, цёрам, парсте тонавтнемат кис. Те мо-

нень ули сехте питней казнекс, — таго лембестэ варштась
Борянь сельмс авазо ды поладсь:

— Кудыненць кис иля мелявто. Содан, тон бажить
максомс монень эсеть кедьсэ теевть казне. Самай те бажа-
мосонть питнейчись.

— Покш чи марто тонь, авай, — мизолдозевсь Боря. —
Мон седеяк вадрясто карман тонавтнеме, зярдояк а карман
кирякстнеме портфелем лангсо.

ЁЖОВ УР

ТУСТО виресь ушодови Васька мезень кудост вакс-сто, овсе кузтемапестэст. Коля ялганзо марто тосто а лиснитькак. Онгай киска ялгаськак а яви эйстэст. Неть сёксень маней читнестэ пурныть мазый тюсонь лопат, сёксень ягодат. Улкоть кандокшность кептерень-кептерь чевгельть. Течи таго састь пангс. Виресь неявсь аволь уш истямо тустокс. Сёксесь артызе эрва кодамо тюссо. Тумонь лопатне якстерьгадсть, килеенсетне — ожолгадсть... Прыть састо масторов ды вельтить моданть мазый вельтявкссо. Ялгатне эскелить вирьганть лопа потмова. Онгай ялгаст — мельгаст. Ве пангояк костояк а неяви. Цёрынетне палкасо сокарить лопатнень, вешнить пангт. Зярдю муить — кенярксонтень пе арась. Сынь пеельсэ керясызь корёнга ды кептерьс.

— Коля, ванта, пурназь пангт! — кенярдозь серьгедсь Вася ды ношкстась тумонть ваксс. Алкукскаяк, эчке тумонть ало ульнесть ве таркас вачказы эрва кодат ярсамо пангт. Онгай никсинзе сынст.

— Те кияк ламо пурнакшнось, кандомс жо ульнесь амейсэ, — пшкадсь аламос чатьмонемадо мейле Коля.

— Давай сайсынек, — мерсь Вася.

— Истя а вадря теемс.

— Мекс?

— Кие-бути пурнынзе, минь сайсынек. Паряк, сы мельгаст.

— Паряк, савольгак ды сын а муевить тензэ истямо вирьстэнт.

Цёрынетне, окойники, прасть вемельс: явизь кавтов панготнень, кептересткак пештевсть. Тезэнь, тумонть алов, озасть оймсемейк. Анокстызь ярсамопелест ды ушодсть обедамо. Кискась мадсь ваксозост. Аламо шкань ютазь

кискась кирнявтьс ды верев ванозь онгозевсь. Цёрынетне стясть ды чарькодизь тувталонть. Тумонть прясо аштесь ур. Сонзэ якстердиця понась цитнезь цитнесь, пулозо эстензэ покш. Ёндолокс кивчкаесь тарадтнэнь юткова. Зярд цёрынетне туильть цють веёнов, мазыйка урось валгиль овсе алов ды венстиль нерензэ панготненень.

Цёрынетне мельспаросо вансть мазыйка уронть лангс ды абунгалесть сонзэ ёрокчинтень. Ялгатне чокшнес бу вановольть, бути а марявлизь васоло пурьгинень зэртенть, кона сынст тандавтынзаяк ды капшавтынзе кудов.

Кудосо сынь кенярдовтызь эсь пангосост весень. Вейсэ ванськавтсть эйсэст. Цёрынетне ёвтнизь, кода муизь панготнень.

— Истя мертядо, ур ульнесь тумонть прясо, — кортась покштязо. Содатадо-арась, неть пангтнэ уронть.

— Кода истя? — абунгадсть цёрынетне.

— Телентень аноксты эрьвась, — ушодсь толковамо покштязо. — Аноксты уроськак.

— Мезе сон анокстакшны? — кевкстась Коля.

— Сехте тантей каванямкась уртнэнь туртов — пангт, пештт, пичень татышкат. Нама, тельня сынст костояк а мусыть, валявить сэрей ловонть потс. Уртнэ сынст анокстамо ушодыть кизэнь меельце читнестэ, сехте ламо важдить сёксня. Сёксня кенерекшнитькак панготне, пештетне, татышкатне. Анокстыть сатышка ярсамопель ды кандтнесызь ундозост. Кувака телестэнт, зярдо вешкезь-вешки кежей вармась, якшамось пицезь пици, пертьпельга ансяк лов, урось ашти кекшезь ундосо ды мездеяк апак пеле печти теленть.

— Лисни, минь саинек уронть анокставксонзо, — кувать чатьмонемадо мейле пшкадсь Коля.

— Истя, — мерсь покштясь.

Цёрынетне чатьмонсть. Чарькодизь чумочист, кона теевсь асодамонть кувалма.

Икелепелев а эсестэнт а токасызь.

МОРО

ЯЛГА ютксо исяк кортнинец: молемс вирев. Зяро пан-
гот, келя, вирьсэнт!.. Чинь-чоп минь анокстынек.
Мон кептерем анокстыя. Люсянь паргонзо витнизе Боря.
Икелепелев арсинец, кона таркатнень ютасынек, козонь
лоткатано оймсеме.

Зярдо лиссь чизэ, сыргозинь монсь. Капшазь шаштыя
шаршавонть, неинь сыця ялгатнень.

— Мон нейке! — серьгединь панжадо вальмаванть. —
Пурнамс монень кувать эзь саво. Весе оршамопелем анокста-
зельть, стольлангсоль кептеремгак. Каподия сонзэ ды ношк-
стынь.

— Куш ярсавлитель! — серьгедсь авам. — Сырькаем
мельгам чиевтсь пидезь алт, кши. Кортнесь мартонок,
кармавтсь:

— Панготнень керядо пеельсэ, ундокстнэнь илинк
токше. Сы иестэ панготнеде седеяк ламо кармить улеме.

Туместэнец сырькаем поладсь:

— Чиньперть вачомтадо, ярсамопель саиде?

— Саинец! Саинец! — серьгединец вейсэ.

— Морот саиде? — мизолдозевсь бабам.

Чатьмонезевинец, талакадозь ванынец бабань лангс. Се-
ске эзинец чарькоде, мезде сон корты. Шалнозь сыргинец.

— Петя ёвтнесь исяк неезь кинодонть — разведчикте,
келя. Люся — эсь кеняркстонзо, лелязо ошсто усксь тензэ
платият ды «авай» сеериця няка.

Курок пачкодинец вирентень. Чатьмонезь совинец эйзэн-
зэ ды ушодынец пангонь кочкамо. Саша сехте ёроков ютксто-
нок, пештизе паргонзо сеске. Мейле лездась миненец. Вана
пештинец паргонок миньгак. Састо лисинец вирьстэнтъ.

Сиземадонть прянок нолдынек. Озынек лисьмапрянтъ ваксс ды каштмолезь ярсынек. Чись, кона вирев самсто мизолдсь менельстэнтъ, кекшевсь раужо, кежей пельтнень экшс. Пу-вась аволь пек виев варма. Тесэ мелезэнь ледсть сырькаень валонзо. Мон стинь ды аламодо мизолдозь меринь:

— Ялгат, рангстатано моро!..

— Превстэ лисить, — мерсь Валя, — монь кургомгак а автневи, сизинь.

Чатьмонсть лиятнеяк. Тень лангс апак вано мон серь-гединь эрзянь моро.

*Вай, лугась, лугась,
Пижине лугась,
Эх, вай, лугась, лугась,
Мазыйне лугась.*

Эзть цидярдо ялган ды поладызь «Вай, лугась, лугась» моронть седе тов:

*Вай, мезе луганть
пижелгавтызе?
Эх, вай, мезе луганть
мазылгавтызе?*

Моронть морынек весе. Весень ёжост вадрялгась. Менельганть капшазь уйсть пельтне, пертьпельксэсь вал-домгась, таго лиссь якстере чачо чипаесь ды кувака, лембе налсонзо кутморясь минек.

Молинек капшазь, гайтевстэ кортнезь. Вана кие-бути таго серьгедсь моро. Сонзэ поладызь весе. Таго гайгстасть паксянтъ ды луганть велькска моронь валтнэ. Кепедизе сэрэнзэ розесь, виевстэ жойнезевсь чудикерьксэсь, чоль-незевсть нармунтне...

Кудов пачкодинек апак фатя. Пек кенярдовтынек виш-кине ялаксонок, сазоронок вирьстэ кандозь казнетнесэ: цеця пусмосо, мазыйстэ менчезь чувтонь корёнсо. Тетянок-аванок — пангосо. Зярдон мон совинь кудос, кутмордыя сырькаень ды меринь:

— Сюкпря, бабай!

Чарькодсь эзь сон: сюкпрянь мон ёвтыя тензэ пангс туюмстэ ёвтазь паро валонзо кис?

„БРАКОНЬЕР”

МАСТУМАРТНЕДЕ тедеде пек ламо! Минь сыргинек сынст мельга течи рана Саша марто кавонек. Капшазь молинек ёзнэкс менчезь яннэванть. Нармутне, конат стясть удомсто минденек рана, моразь ливтнесь мизолдыця якстере чипаенть струянзо ало минек вельксэ.

Пиже виресь вастымизь каштмолезь. Чувтнэ ульнесь истят сеедеть, арасель натой луга панксеек, косо бу касовольть мастумарть.

— Сави туемс тестэ чаво кептерь марто, — мелявтозевинек минь.

Окойники, вачкодевинек мастумарев луга лангскак. Сэрей цецяв луганть потсто мастумартне лангозонок вансть якстере сельмсэ. Минь капшазь пештинек паргиненек. Кенярксонть арасель пезэ! Ней вана каванясынек ялганок, малавиксэнек. Луга ланга пульзядо якамодонть пек сизинек. Аламоз озынек. Пекетнеяк вачокшность.

— Мольтяно лисьмапрянть ваксс, — пшкадинь мон, — тосо ярсатанокак, оймсетянокак.

Ялгам каршо эзь моле. Стакасто, нузядозь стясь. Пештязь паргиненек марто молинек чувтнэнь юткова пандо ало сиянь ведев лисьмапрянть ёнов.

— Кунсолока, те мезе? — тандадозь пшкадсь Саша.

Лоткинек, карминец кунсолото. Марявсь ведень жой чудема.

— Чудикерькс! — мезе вий мон серьгединь виренть келес.

Капшазь сыргинек чудикерьксэнтэ ёнов. Эчке тумотнень, сэрей пичетнень корёност шлясь те ванькстэяк ванькс ведесь. Чудикерьксэсь ульнесь истя менчевезь, веёндонявсь певтеме ёзнэкс. Ванькс, сэняжа веденть

пачк неявишь потмакссто ашо кевнеть. Озынек аволь сэрей берёконть лангс, нолдынек пильгенек ведентень, кона пек кельмелъ.

Чатьмонеzewинек. Пертьпельга ульнесь сэтьме. Ансяк лиясто варминесь пувсесь-сорокавтнесь лопава тарадтнэнь.

Апак учо марязевсь кинь-бути пильге ало коське тарадонь синдтревема, мелень лопа потмова эскелямо.

Кие-бути сыль минек ёнов, аламодо тандадынек, кун-солоzewинек. Эскелькстнэ шкань ютазь марявсь овсе маласо.

— Те ломань, — арсинек минь.

— Адя кекштяно, — меринь мон, — вансынек, кие.

Паргиненек марто туинек чудикерьксэнтъ вакссто, прынек куракш алов ды истя сэтьместэ аштинек, эзинек лексейк. Асодавиксэсь яла якась малаванок, куракштнэнь вакска, косо минь аштинек.

— Давай, Саша, лияно, — пшкадинь цють марявозь мон.

— Азаргадыть? — дивазь мерсь ялгам. — Натъ, эрямс мелеть арась.

— Адя эно вансынек, — окойники, мерсь Саша. — Паряк, кодамоак апаро ломань. Паряк, бирень саламо сась.

Ансяк пурнынек стямо, кода икеленек чувтнэнь ютксто лиссь кодамо-бути тюжа, понав пря, кавто суро марто.

— Минь пек тандадынек. Саша одс кекшсь куронть алов. Монь седеем истя чавсь, лангсом панароськак натой сорнось.

— Марявсь тенек баягинень гайть.

— Те срасть, — тандадоманть пачк кортась Саша.

— Котёл пря тон, арась светэнтъ лангсо срасть, — кежень сазь меринь тенэ.

Минь чатьмонеzь, прок апак лексе, аштинек таркасонок. Апак учо «срастесь» сырғась. Тусь, натъ, чудикерьксэнтень. Истя улиак. Марявсь ведьга молементэ.

Апак учо каятотсь мукснема. Минь кирнявтынек таркастонок, талакадозь варштынек куротнень юткова.

— Скал! Те скал! — сееринь мон. — Те Груня бабань скалозо!

Кепединек паргиненек, муинек мастордо «браконьерэнтъ» панемс тарадке ды сыргинек колмонек велев.

А Груня бабам, нама, тарка-эзем эстензэ а муи.

Кудов модемстэ минь Саша марто максынек вал кинень-гак а ёвтнемс те тевдентъ. Кудосто мейле кардаз удаловгак а кармить нолдтнеменек, ялганокак раксевельть лангсонок, а Варкань Гриня бу сельведьс пачтявлимизь.

КОДАМО ТЮСОНЬ ВЕДЕСЬ

Миша школасто сась нусманясто.

— Мезе мартот, нуцькам? — кевкстизе покштязо.

— Таисия Сергеевна кевкстимим, кодамо тюсозо ведень?

— Ды кодамо тон ёвтыть?

— Кодамо, кодамо? Ашо, меринь.

— Кодамо тетя ашо? — мерсь покштязо. — Ведесь тюстомо.

— Кодя истя — тюстомо?

— Истя вана, арась тюсозо ды весе. Каяк кедьгес ведь, варштак — тюсозо арась. Эеськак, ловоськак ведь, ансяк кельмезь. Эесь валдо, тюстомо, алкукс, лиясто сэньшть-мери. Бути лембелгады — эесь таго солы ды тееви тюстомо ведекс.

— Ловоськак солы...

— Эно, солы!

Омбоце чистэ Мишка школасто сась кецязь.

— Покштяй, Таисия Сергеевна вешизе тонь дневникеть.

— Мезекс?

— Кодя мезекс? Монь шнымим, тонеть мерсь «вете» путы.

— Мезень кисэ?

— Кодя мезень кисэ? Сон таго течи кевкстнимим: кодамо тюсонь ведесь? Мон ёвтния. Сон кевкстни: кие тонавтынзеть? Мон ёвтытинь. Кадык, мери, покштят дневникензэ макссы.

Покштясь мизолдозевсь:

— Кадык монь «ветень» путсы тонь дневникс.

ПАРО КАЗНЕ

ОЛЯНЬ ванды чачома чизэ. Сон арсесь-мелявтсь: сыть-арась ялганзо, кодат казнеть тензэ казить. Валске кудонь келес сравтовсь тантей чине. Тейтерькась натой сыргозсь тень эйтэ, састь малазонзо семиянек.

— Чачома чи марто!

Авазо венстясь цецят, сырькаезэ — варьгинеть, покштязо — эземне. Миша тейсь конёвсто венчке ды сёрмадсь лангозонзо «Чачома чи марто, вечкевикс сазором!»

Мейле састь Наташа, Дима, Алёша. Эрвась тусь мартонзо казне. Надя — няка, Дима — оスカ. Ансяк Алёша мезеяк эзь казе Олянень.

— Тон мекс, цёрынем, нусманят? — кевкстизе Алёшань Марфа, Олянь бабазо.

— Мон казневтеме сынъ.

— Ули сонзэ казнезэ, — пшкадсь Надя.

— Мон... — Алёша комавтызе прянзо, кортась састо. — Мон ушодынь письмаркудонь тееме, ззинь кенере... — Ды цёрынесь седеяк комавтызе прянзо.

— Те вана ялга дык ялга! — косто а косто эйкакштнэнь ваксс сась Олянь покштязо — Ёгорь атя. — Ззить кенере, вейсэ тейсынек. Сайсамак лездема?

Омбоце чистэ Алёша кандызе апак тее письмар кудонтъ. Эйкакштнэ кувать котьмасть атянтъ марто сонзэ велькссэ. Чопоньпелев понгавтызь письмаркудонть чувто пряс.

Зярыя валскетъ Оля лиснесь кузтемпес, вансь, састь-арась письмартнэ. Окойники, вейке валскестэнтъ сон неинзе сынст — тундонь кандыця инжетнень. Ней ансяк сон чарькодинзе ялгадонзо покштянзо валтнэнь. Седе паро казне, кодамо тейсь Алёша, паряк, а эрсияк.

ШУМБРАЧИНЬ АРСИЦЯ

ИЛЬКА стясь валске — тетянзо-аванзо арасть. Покштязояк а неяви.

— Стить, нармуннем? — кевкстизе нуцьканзо Эвга баба.

— Шумбрат, нуцькам! — совась кардазсто Охрим атяяк.

Мейле Илька бабанзо марто сыргась эйденъ кужов.

— Зярдэ вастат ломанъ, мерть «шумбрат», — тонавьсь киланга модемстэ Эвга баба нуцьканзо.

— Мезекс?

— Кодэ мезекс? Шумбрачи арсят ломанентень.

— Бути максыть тетъ мезеяк эли лездыть, — мерема «сюкпря», — икельдизе бабанзо Илька.

Чопоньпелев Илька мельга сась авазо.

— Шумбрат, авай! — пшкадсь тензэ цёрынесь. Авась мельспаросо мизолгадсь. Весе уш кудосольть, зярдэ совась Илька ды авазо.

— Шумбрат тенк! — пшкадсь цёрынесь совамсто.

— Шумбрат, шумбрат! — мизолдозь вастызь цёрынентъ малавиксэнзэ.

— Тон стувтык: валске марто шумбракстнить? Ней мезекс омбоцеде шумбракстнить? — кевкстясь покштязо.

— Тесэ берянесь арась, — покш ломанекс мерсь Илька.

— Мон арсян весенень кеме шумбрачи.

КАСЫЦЯ СЕРЁЖА

СЕРЁЖА эсензэ классо — санитар. Сон ванны вань-ксчинть мельга, тенень кармавты ялганзояк, кадык а яксить рудазов кедть.

Классонтъ эрва вальмалангсо — цецят. Сынь свал валнозь. Тесэяк ули Серёжань путовксозо.

Течи урокто мейле ютавовсь промкс, эрявсь кочкамс прявт.

— Эйкакшт, течинь минек промкссо эряви кочкамс классонь прявт, — мерсь тонавтыцясь.

Васня весе чатьмонсть, мейле кармасть сеереме, кинь кочкамс.

— Серёжань, Серёжань, — седе сеедытэ марявсь цёрыненть лемезэ.

Истя цёрыненть путызь прявтос.

Кудов сон мольсь Анюта сазоронзо марто. Вастовсь тенст Иван Григорьевич тонавтыцясь:

— Маринь, кочкидизь прявтос. Оно кода тон касыть! — шнызе сон Серёжань ды вадяшизе пряланга.

Анюта варштась лелянзо лангс. Мезеяк а чарькоди.

«Валске мартояк, нейгак Серёжа истямонь сэрсьэль... Кода сон истя кась?» — арсесь тейтерькась. Те кевкстемась эзизе кадно. Сон яла вансь лелянзо мельга ды кодаяк эзь чарькоде, кода истя вейке чис кась лелязо.

ТЕЛЕМАСТЕР

ТИШКАНЬ тетязо рамасть од телевизор.

— Вечкат телевизоронь ваномо? — кевкстизе цёрыненть телевизоронь нолдыця лелясь.

— Вечкан, сехте пек вечкан мультфильмат! — кецязь кортасть цёрынесь.

Телевизоронть путызь таштонть таркас икельце кудос.

— Мон содан, мекс а невти! — гайтевстэ мерсь Тишка. — Тынь стувтынк потмозонзо путомс кинолентатнень.

Апак учне телевизоронь экранось валдомгадсь, кармась невтеме.

— Тон — вишка телемастерат, — шнызе тетязо Тишкань.

Цёрыненть мельс те лемесь тусь, ды сон озась покштнэнь ваксс.

Весе вансть телепередача. Тишка кецясь. Течи сон сайсь мель улемс телемастерэкс. Паряк, истя улиак.

АРТЫЙ ОЛЯ

Ольганень тетязо казсь альбом ды артомапельть. Ней седе вечкевикс тев тейтерькась а соды. Пелешканзо уш артызе альбамонтъ. Эрьва лопантень мезеяк ды тейсь-артсь. Вана авазо панжакайт пани. Сыньгак лиссть прок алкуксонь. Оно лелязо моли школав, тетязо ашти тракторонзо вакссо. Тесэ пондакш каткат, кудынензэ вакссо — онгиця Жучка. Сась шка совавторм альбомс покштянтъкак. Сон ваны велень лишметнень. Серьга атянь кедезэ кувака локшо. Ансяк вана лишмезэ кодаяк а лиси, прясь а тееви. Ольга арсесь, кода улемс. Школасто сась Митя.

— Мезе артат? — кевкстизе цёрынесь. — Те локшо мартось кие?

— Содазь, кие? Покштям!

— А-а-а... Моли ёнонзо.

— Лишмезэ кодаяк а лиси...

— Мон лездан тонеть.

Оля кенярдозь максызе альбомонзо. Митя тусь лия нупалев ды зяряя шкань перть эзь маряво, эзь неяво. Вана Оля стамбарнэ сась ваксозонзо. Митя яла артсь. Оля варштась альбомонтень. Покштясь аштесь лишмес кильдезь нурдо вакссо. Ансяк лишмесь мекс-бути а пек моли лишме ёнов... А сельмть, а нерь, ансяк неявить прянтъ велькссэ пилень кондят.

— Митя, те мезе? — талнозь кевкстизе лелянтъ тейтернесь.

— Лишме, — апак кавтолдо мерсь Митя. — Сон прянзо велявтызе лия ёнов.

ЛЕМБЕ АРТОВКСТ

Валске Катя сыргозсь ды а кеми эсь сельмтненень: весе вальматне артовкс потсот. Кие сынст истя мазылгав-тынзе?

Тейтерькинесь седе курок оршнесь, шлясь, таргизе альбомонзо, ушодсь артомо асодавикс артыцянтъ лувсо. Ансяк кодаяк мазычись а лиси. Ушодсь лия артовксонь тееме.

Панжовсь кудокенкшесь, совась покштязо. Сакалонзо ды шапканзо якшамось вельтинзе лекшесэ, чамазо палозь палы.

— Тон, нуцькам, эзить кельме вальманть вакссо?

— Эзинь.

Атясь молись Катя ваксс:

— Те мезе?

— Те — минек Штирьма леесь. Те — Пиче пандось, — ёвтнесь тейтерькась. — Неят, зяро цецят!

Ладсинзе Катя артовксонзо столь ланга. Сынст ваннозь ледстизе кизэнтъ, кода экшелясь Штирьмасо, кода якась Пиче пандов ялганзо марто. Лембе теевсь артовкстнэде, мельспаро. Кадык эзть невтеве вальмасо артовкстнэ. Эрьва артыцясь невти сень, мезесь тензэ весемеде пек вечкеви.

КЕЛЬМЕЗЬ СУДО ЛОВНЯСЬКЕ

КОЛЯТ-ОЛЯТ — лелят-сазорт. Сынь свал вейсэть, ушососяк, кудососяк.

Ушосо ловось карксамова. Эйкакштнэ седе куронок ношкстасть налксеме. Коля кеверькшни ловпрат, Оляк мельганзо текень теи. Састь ваксозост Ванюша ды Антоша. Вейсэ сынь теить ловняське.

Ней эряви прызонзо мезеяк путомс, — мерсь Антоша.

— Молян кардазсто кептеренть кандса? — мерсь Коля.

— А эряви, покштям мурнесамизь. Сон эйсэнзэ анды ревелевкстнэнь, — мерсь Оля.

— Минек пиресэ ули варяв вакан, — мерсь Ванюша. — Се киненьгак а эряви. Молян мельганзо.

— Пароль мезеяк кедезэнзэ максомс, — мерсь Коля.

— Минек кузтемлангсо ули мандо... Ансяк сон сыр-каень, — мерсь Оля.

— Паряк, макстано минек ловняськентень клюшка, — мерсь Коля.

— Клюшка, клюшка! — кецязь рангстасть ялгатне.

Коля ношкстась клюшканзо мельга.

— Судояк, сельмтькак эрявить, — мерсь Оля ды сыргась кудов.

Антоша тусь кудов уголия мельга — эрявсть ловняськентень сельметь.

Курок ловняськесь «оршазель-пурназель». Ваканось, теке шляпа, прысонзоль.

— Клюшкась а путови, — мерсь Ванюша. — Ловняськеть клюшка марто а эрсить, мезекс те тензэ?

— Ды кие хоккейсэ шляпасо налкси? — мерсь Антоша.

— Оргодть тестэ, — кежейстэ мерсь Коля.

Цёрынетне сёвнозевсть ды стувтызь Олянь, кона якась кудов пурька мельга. Тейтерькась ней аштесь веёно мандо марто ды нусманясто стамбарнэ порнесь пурьканть.

— Ков ёмсить те шкас? — мерсь Коля.

— М-м-мон, тень...

— Сэвик? — кеждясь Коля. Сон неизе тейтернень кедьстэ пельпурьканть. Антоша ды Ванюша кармасть Олянь идеме:

— Те седеяк паро: минек ловняськенть кельмесь судо прязо, — мерсь Антоша.

Коля ульнесь ацирьгадозь ёжосо ды эшкизе ловняськенть. Тона сяворсь-каладсь. Эйкакштнэ сельведь марто срадсть кудова.

Кие чумось тесэ?..

ЛОВОНЬ КИРДЕМАТ

ТЕЛЕНЬ каникулатнестэ Гришань шабрас ошто сась цёрынька, лемезэ Игорёк. Ялгатне кизэнь перть вейсэльть ды нейгак пек кецнить вастомантень, чиньперть а явнокшныть. Вейсэ якить пандо прясто кирякстнеме. Лездасть лейлангонь эенть ванськавтомсто, кирякстнить тосо, налксить хоккейсэ.

Течи пурнасть сокссо кирякстнеме вирь пандов. Ашо чевте ловонть ланга сокстнэ уезь уить. Вана велеськак кадовсь удалов. Ков а варштат — ансяк лов.

— Ванокая — трактор! — серьгедсь Игорь. — Лов сокить.

Ялгатне сыргасть трактортнэнь ёнов.

— Мезекс ловонть сокить? — кевкстнесь Гришань Игорёк.

— Лов истя кирдить — мерсь Гриша.

— Мезть сонзэ кирдемс? Тундос истякак ковгак а ёми.

— Неят, паксясь таркань-таркань ловсо апак вельтя...

— Истя.

— Те вармась салси-ускси ловонть ды пешти латкотнень. Мезекс сынст пештямс? Сынть тунда истякак пряс пешкедить ведте. Паксянтень ловось седе пек эряви. Сон а макссынзе видевокстнэнь кельмевтемс. Тунда ловось солы ды модась потясы те пек эрявикс веденть. Видевкстнэнь пек эряви летькесь, сынть лисить седе курокто.

— Истя ловось а кирдеви, — содыцякс мерсь Игорёк. — Вейке тракторось уски мельганзо мень-бути кшни пе, омбоцесь — машинань чаро...

— Истя теевить латकिनеть, пандынеть — тосо кирдеви ловось.

Цёрынетне редизь васоло паксясонть стявтнезь лазт-
нэнь, пиравкстнэнь. Сокс лангсо сыргасть товгак.

— Теяк ловонь кирдема, — ёвтнесь Гриша. — Мон Вася
лелянь марто яксинь ловонь кирдеме. Школань прыдомадо
мейле карман трактористэкс.

— Монгак, — кеместэ мерсь Игорёк.

АФРИКАНЬ ЛОМАНТЬ

ЧИСЬ пидезь пиди. Женька ды Димка Бозов лейненць чиресэ эждить киськест, кеверькшнить лембе чуварганть ды секе тев кирнявтнить ведьс. Бозов лейненць сэрэзэ апокш, ялгатне а пелить тесэ экшелямодо.

Уйнесть-пулькасть, таго лиссть.

— Э-э-э, тон, Дима, прок негрят, — ушодсь ялгазо. — Тонь рунгот раужодояк раужо.

— Тонгак прок шоколадсо ваднезят.

— Кунсолока, — мерсь Дима, — эряви оршнемс седе курок: илязтано тееве негракс. А фатятанояк, кода раужкадтано.

— Иля пеле, — оймавтызе ялгась.

— Кунсолока, Женька, мезе, бути мольтяно Африкав?

— Монь арась мелем раужокс улемс.

— Моньгак арась. Минь тосо уल्याно а кувать.

— Адя!

Ялгатне ношкстасть кудов. Эрясть сынь шабрацек, кувать вейке-вейкень учовтомо эзть карма.

— Димка, тон мекс рюкзактомат? — кевкстясь Женька. — Кияк кудосто а тукшны чавонь кедть.

Ялгатне курок пештизь рюкзакооть. Путсть пенчть-вакант, ярсамкат, оршамкат. Келейстэ эскелязь, сыргасть покш килангов. Апак учне каршост лиссь Димань тетязо.

— Тынь ков рюкзак марто? Ушосо пси, прок Африкасо, ялганк лейчиресэть, тынь ков-бути пурныде...

Димка ды Женька каизь рюкзакооть ды ношкстасть лейлангов. Бозов лейненць чиресь пешксель эйкакшто. Ялгатне кайсизь оршамость, кирнявтсть ведьс.

— Кодя вадря экшелямс! Минь тонь марто Африкав арсинек туеме, — кортась экшелямсто Женька.

— Иля кортаяк, паро, эзинек туе, — мерсь Дима. Сонсь калокс чопавтсь ведентень.

Курок ялгатне лиссть лейчирентень. Аштеть-тейсть, ды таго ведьс. Кодамо паро! Прок Африкасо!

ПЕЛЬНЕТЬ-РАКШИНЕТЬ

ЕГОРКА ды Ваня налксесть чуварсо, конань усклизе кудост малас тетяст.

Зярдояк идем ракшат некшнить? — кевкстизе Ваня Егоркань.

— Некшнинь, — мерсь Егорка.

— Кодат? — кевкстясь Ваня.

— Совак кардазс, ды тонгак тосто несуть: тувонть, скалонтъ...

— Э-э-э... Нетне кудонь ракшат. Идем ракшатне: овто, верьгиз, ривезь...

— А-а-а... Нетнень косто несуть? Зоопарксто ансяк.

— Мон оно телевизорсо некшнинь.

— Телевизорось, те мезе, зоопарксо пароль неемс.

— Паряк, модемс тенек тов?

Зярс ялгатне кортасть, пертпельксэсь апак учне полавтось. Пувазевсь варма, менельксэсь потмургадсь. Ялгатне нусмакадсть.

— Егорка, варштакая, — верев ваномсто серьгедсь Ваня.

— Се оно прок овто. Мельганзо уи верьгиз, идем лишме... — серьгедсь Егорка.

— Мон васенцекс сонзэ неия, — мерсь Ваня.

— Овтонть мон васенцекс неия. — Оно тосто неяви ривезь, — рангстась Ваня. — Эка, пулосьяк прок алкук-сонь.

Кувать ялгатне вансть менельс. Кодат ансяк ракшат эзть нее!

Пувазевсь варма. Сон пансинзе пельтнень, пертьпельксэсь таго валдомгадсь, лиссь мизолдыця чись.

— Ванды таго сатано тей налксеме, паряк, тагояк лисить менельс минек ракшатне, — мерсь Егорка.

Саизь ялгатне налкшкест ды тусть кудов.

„МОСКВИЧЕНЬ” АЗОР

ВОЛОДЬКА чинь-чоп кары машинанзо эйсэ. Нама, «Москвичезэ» аволь истямо, кодамо шабра Митрей лелянтъ. Володьканень «Москвичентъ» рамизь лавкасто. Сон теке алкуксонь «Москвич», ансяк вишкине. Ялатеке зярс теяк паро.

Володька ливтни машинанзо ушов. Ардтни кузтемапесэ лугинентъ ланга, вестъ-кавксть ютась чувар пандовантъ. Ялгатне «Москвичентъ» перька прок мекшть чарастъ. Весень ульнесь мелест ардтнемс вишка машинасонть. Кой-кинень Володька макнесь ойсемс руль экшс. Ансяк аволь кувать. Мекс а ардтнемс кудосоак?! Кудось покш, колмо нупальть. Володька озась руль экшс, лепштизе педалентъ.

— Дын-дын-дын, — кайсети вайгелезэ, ды ве нупальстэ арды омбоцес.

Бабазо нуцьканстэнь коды теленень лембе варьгинеть. Кепедизе кедензэ:

— Озавтомак, нуцькинем!

— Натъ, а неят, монъ вакссо ардыця уш ули?

Палай баба комась ды вансы: шоферэнтъ вакссо озадо Мишка овтынесь.

— Мон нейке, — мерсь Володька, — ансяк уксса тона нупалев Мишканъ, тосто сайса нумолкаентъ, мейле тонъ, бабай.

— Эно истя, нуцькам, да беш, шофер-аля.

«Москвичесь» тусь.

Кудосонть курук качакадсь тантей чине. Бабазо эждясь нуцьканстэнь ярсамка.

...Ушось чополгадсь. Менельсэнтъ кивчкадсь ёндол. Серьгедсь пурьгине. Тусь пиземе.

Володя кецязь вансь машинанзо лангс. Кенерсь гаражс совавтомонзо. Синст кудось неявсь тензэ покш гаражокс.

ПАРО ПИЗЕМЕ

КУРИНКАНЬ эйкакштнэ ушосольть, кода тусь апак
учонь пиземе. Весе орголесь кудова, сась бабанзо
ваксс Ваняяк. Нюра баба ваны вальмава ды моткоди.

— Сюкпря Пазонтень, пиземе модантень кучсь. Ней уш
весемесь сыргози, весемесь лиси, шкастонзо тусь пиземесь.
Пиземеденть мейле лисить-кепетить пангот, опёнкат, цецят,
эмежть, — мельспаросо кортась бабась. Ды эзь фатяяк, кода
нуцьказо ношкстась ушов.

Цёрынесь стясь пиземе алов ды сырк а теи. Нюра баба
неизе вальмава, пижни:

— Совак нейке, сэрсь начкат, ормалгадат.

Ваня алкуксккак кенерсь начкомо ды совась бабанзо
ваксс. Тона мурни:

— Седе курок кайсек, секень вант, сави ёвтамс тетятъ
туртов.

— Мезтькак а чарькодян, — талакадсь Ваня. — Тонсь
яла кортат, беряньстэ касан. Мон касомань кисэ аламос
аштинь пиземе ало, иля мурне.

— Эх-эх-эх, — тейсь бабазо ды вадяшизе нуцьканзо.
— Касат, оно уш зярошкат.

Цёрынесь озась бабанзо ваксс. Кудо вальмась келес
панжозель. Сынъ кавонест вансть ушов. Паро тесэ, пиземе
а токи. Кудонтень совась ванькс кошт. Ки чиреванть кап-
шасть чудикерькст.

Пиземеде мейле ялгатне пурнасть луга лангов опёнка
мельга. Опёнкадне неявисть пиже тикше потсто ашо плаш-
тинекс, кассть мельга-мельцек. Ялгатне кандсть кудов
кептерень кептерь. Кецявтызе бабанзо Ваняяк.

— Эрявить опёнкатнень седе курок ванськавтомс ды
рестамс, — мерсь бабазо. — Вана сыть тетят-ават — минь
сынст каванясынек.

Зярдо весе пуромсть, бабась кандызе пачалгонть морга лангс, саизе вельтявксонть, ды тусь кудованть тантейдеак тантей чине.

— Тантейть! — шнасть ярсыцятне.

— Опёнкатнень цёранк кочкинзе, — шнась Ванянь бабазо.

Авась лембестэ варштась цёранзо лангс ды кецязь мерсь:

— Кода тон, цёрам, касыть!

— Монгак бабанень истя кортан, сон а кеми, — кенярдсь цёрынесь. — Истя вана, бабай. Паро, стякшнынь пиземень алов!..

ЛЕЗЭВ МЕЛЯВКСТ

ГРУНЯ баба теле лангс туи ошов эйкакшонстэнь. Тосо уштомскак а эряви, кудуютконь лия мелявкстнэдеяк седе аламо. Пек кенярды тенень вишка Сашка. Алкукскак, аламонь кинь улить бабаст. Сашкань вана ули! Сонзэ марто нусмакалемс а савкшны! Зяро ёвкст, морот, содамоёвкст соды!.. Эйденъ кужовгак бабазо ветни цёрыненть, сакшны кисэзнэ.

— Бабай, мелят тон седе вечкилимик, — пеняци Саша кудов модемстэ.

— Мекс истя? — абунгадсь бабазо. — Нейгак вечктян, нуцькинем.

— Мелят тельня эйденъ кужов эзимик ветне.

— Курок тетъ школав, эряви анокстамс.

— Мон, бабай, ловномо уш маштан.

— Паро, ансяк эйденъ кужосо седеяк вадрясто тонавт-тадызь.

Сехте пек Сашка вечксынзе оймсема читнень. Сестэ сынъ семиянек вейсэть. Ялатеке бабазо Сашканень сехте малавикс ды вечкевикс. Сон зярдояк а нузялгали нуцьканзо марто налксемедэ. Течияк сынъ вейсэть. Пурнасть-тейсть ушов, Муркаяк мартост бажи, пондакш пулосонзо аволи. Катकिनенть усклизе велестэ Груня баба. Сонзэ мельс тукшны ошсо эрямось. Удси лембе батарея вакссо. Ушовгак лисни. Тей ношксты, тов ношксты. Сеедьстэ ашти канализациянь вельтявксонтъ лангсо, гулькатнень панси, тонат эйстэнзэ эрьва ёнов ёндолкс ливтнить.

Сась Сашкань ялганзо. Сынст мельс тусь Мурка. Эрвась бажи вадяшамонзо.

— Груня бабай, те таркась вечкеви аволь ансяк Мурканень, — мерсь Марина. — Минь тесэ андтано нармушкат.

— Паро те тевесь, — шнынзе Груня баба. — Тынь андынк нармунтнень ды садо миненек.

Эйкакштнэ ношкстасть кудов нармушкатненень ярсамо мельга. Курок ливтясть гулькат, озязт. Паро тенст тесэ. Лембе, ловось солась, эйкакштнэ андыть эйсэст. Нармушкатне пурнасть тантей каванямкат.

— Садо ярсамо, — тердинзе эйкакштнэнь Груня баба.

Ялгатне сыргасть Сашкамеznень. Столь экшсэ ярсамсто кадовозь сускомотнень кекшсть зепс — нармуннень.

Груня баба мельспаросо каванясь пакшатнень ды кецясь: паро ломанть эйстэст касыть.

КАЛОНЬ КУНДСЕМА

МИКА вечки штюрбадо¹ ярасмо. Вана течияк кудонь келес срадсь штюрбань чинесь. Куля баба тердизе нуцканзо ярасмо. Совась Дрига атяк — Микань покштязо, калонь кундсицясь.

— Покштяй, мекс тон зярдоак а сайсамак калонь кундсеме?

— Ды стявтан эйсэть, кодаяк а сыргозят, нуцкам, — иди прянзо атясь. — Эно паро, течи чопоньпелев вейсэ мольтяно.

Чопоньпелев покштят-нуцкат лейчиресэльт. Тевест мольсь парсте. Кедьгинест пешкедсь пряс, ведесь мик тусь ланга.

— Эхе, зяро уш понгсть, — кенярдсь Дрига атя. — Тонстеметь, Мика, зяро монень а кундавольть.

Мика кенярдомань пачк ансяк мизолдозевсь.

— Ней таргама нерятась, — мерсь атясь. Сон менстизе карьксэнтъ ды кармась ускомо нерятанть леентъ чирев. Тесэяк калтнэде байтак.

— Тесэ калов таркась, — кортась Дрига атя. — Зяро калтнэ кудов а кандовитькак. Мезе, бути теске, лейчиресэ, пидетяно штюрба?..

— Минек мезенекак арась...

— Молян бабать мельга, кудосто кандтано, мезе эряви. Тон кадовт калтнэнь ванстоמו.

Кудост аволь васоло, секень вант, покштязо сы Куля баба марто.

Ведрынесэнтъ калтнэ яхоесть пулосост. Вейкесь мик прась тосто луганть лангс. Цёрынесь кепедизе ды путызе

¹Штюрба — калонь ям

мекев. Нерятасо калтнэ ведтеметь. Вишкинькатне уш а лыкитькак. Покштнэ кургонь автезь чавить пулосост. Мика ванс лангозост нусманясто, мелявтозь.

«Ведтеме, секень вант, кулыть, — арсесь сон калтнэде. — Калтнэ учить лезкс, мон ванан-теян...».

Мольсь Мика нерятанть ваксс, юксизе, ды калтнэ прасть ведьс. Каинзе лейс ведрынестэнтъкак. Калтнэ ведьсэнтъ васня эзть лыкаяк, виест маштокшнось. Аламос аштезь ёндолкс ёмасть, неявиць ансяк цивтёрдыця пулост.

Те шкастонть лейчирентень пачкодсть Микань покштязо ды бабазо.

— Я, калтнэ косот? — абунгадсь Куля баба.

— Мекс чатьмонят, нать, ведьс нолдыть? — кевкстизе покштязо.

— Мон нолдынь сынст.

— Нолдыть? — кевкстизе покштязо одс.

— Нолдынь. Жальть тень марявсть...

Атят-бабат варштасть сельмеде сельмс.

— Мезе, сестэ аядо кудов, — мерсь нусманясто Дрига атя.

— Каштомсонть ули сывель ям, — поладызе кортамонть Куля баба.

Ды сынъ чатьмонезь эскелясть кудов.

НУМОЛКАЙНЕ

ТЕВЕСЬ ульнесь тунда. Петя ды Вася налксесь футболсо. Перькаст «ливтнесь» крендель пуло тюжа кискинест, Онгай. Сон чийнесь кевериця осканть мельга, терявтнесь сускомонзо, ансяк тень эйтэ мезеяк эзь лисе. Секскак курок тусь веёнов. Васня сэтьместэ сокарясь лапасонзо моданть, мейле варштась чадыведьга уиця эйтнень лангс ды мезе вий онгозевсь.

— Адя вансынек, мезть онги? — серьгедсь ялганстэнь Петя ды ношкстась леенть пелев.

Састь леенть чирес, вансызь: покш эй лангсо, кирьмицявозь, ашти нумолнэ.

— Эряви идемс. Секень вант, ваи эли эйтнень юткс мерькави, — эзь кирдеве Вася.

— Идемс?! — абунгадсь Петя. — Кода?

— Мон содан тарка, козонь эйтне лотксить. Тосто нумолонть сайсынек...

Ялгатне велявтсть футболсо налксемань таркантень, каподизь кавто лазнэнтень, конат аравтозельть ортань таркас, ды ношкстась пуромозь эйтнень ёнов. Мельгаст чийсь Онгайгак.

Лоткамо таркасонть эйтне кузнесь вейке-вейке лангс ды тейсть сэдень кондымо.

Учовсь нумолкайне марто эеськак. Леенть чирес эшке-вемстэ нумолкаесь цють эзь ёртово лангстонзо.

Цёрынетне зярсыя чарасть-котьмасть эйтнень перька. Кедест венстасызь — нумолкаенть видьс а сатыть, шаштыть эенть ланга седе малав — эесь увтяви. Кельме ведентень, учок, чопавтят.

— Путык лазнэнть оно се эенть лангс, — невтсь Петя ялганстэнь.

— Ва, тонсь иля экшеля, — мерсь Вася.

Петя састо айгсь нумолонть малас, кундызе пиледе ды венстизе ялганстэнь.

— Вант, Вася, иляк правто, — энялдсь Петя, — сон сэреди.

Вася саизе нумолонть ды састыне тусь нолажа ээньтэ лагсто. Кискась эзь муе тарка: баксорясь-кирнявтнесь, онгсь мезе вий.

Эйтнень лагсто Петяк чалгась леэньтэ чирес.

— Адя миненек кандсынек, — мерсь Вася, — кадык пичкси.

Истя цёрынэне тейстэкак. Нумолкайнеэньтэ кандызь кудов, нолдызь киякс куншкас. Сон сеске кекшсь чопода аксялксонтэнь. Вальмалов кадозь кискась цийнесь. Натэ, мелявтсь, мекс стувтызь сонзэ.

...Идезь нумолкаэньтэ пакшатне андэсь парсте, налксэсь мартонзо. Кизна нолдызь вирев. Нумолкаэсь васня ёнгак эзь муе, мезе теэмс, ков менемс. Мейле кодак ношксты...

СЭНЕЛЬКАЙ

МАША вечки цецят. Артсь альбомозонзо пейделька. Зярдо коськсть артомапельтне, керизе васоньпеельсэ цециненть ды стявтызе вазас. Тейсь лия цеця, колмоце, — мик пусмо лиссь.

— Парт цецятне! — мерсь покштызо. — Ансяк алкук-сонсетне седе вадрят.

Весть валске Маша ялганзо марто сыргась вирев цеця мельга.

— Покштяй, — кецязь серьгедсь тейтернесь. — Молян пурнан пусмо.

— Азё, азё, нуцькам, — мерсь покштысь. — Мон уш а молеван, мекс-бути вием арась. Ванок, вирьс пек иля сова, кадоват.

— Арась, арась, покштяй, мон ансяк вирь чирева, — оймавтсь нуцькась покштыanzo. Оршнесь-тейсь ды ношк-стась ушов.

Вирь чирева, чувтнэнь алга, летьке моданть ланга ацавсь сэняжа цецянь коцт.

Тейтерькась мольсь малав. Эскельдась, цецине чалгась. Сэнькаенть рунгозо ментявсь, принезэ новольсь. Эскельдась седе тов, таго чалгавсь цеця. Тейтернесь абунгадсь. «Эряви сезнемс аламошка, ды — кудов», — арсезевсь сон.

Венстизе кедензэ вейке цецянтень, мелезэ ульнесь сеземс ундокска. Сэнькаесь велявтызе прянзо тейтерьканть ёнов. Сон эйдинекс, авардезь, варштаксь Машань сельмс ды прок пшкадсь тензэ: «Паряк, а сезьсамак?»

Маша кедензэ венстизе лия цецькинес — таго авардия сельмть ваныть. Эзь са седеезэ сеземс вейкеяк цецька. Стясь веёнов ды мельспаросо вансь мазыйдеяк мазый

кужонть лангс. Тия-тува апак сола ловоськак мик неявсь сэнелакс. Виде рунго чувтотнень ютковаяк новольсь сэняжа шаршав. Мазычись аёвтавомашка! Шка уш туемс кудов, ансяк пильгтне а молить, кирдить тейтернень те мазый таркасонть.

— Тон мекс цецявтомо? — самодо мейле кевкстизе покштязо.

— Истяко, — а сеске мерсь тейтерькась. — Цецятне жальть марявсть, сынъ энялдозь вансть сельмезэнь.

ХОККЕИСТ

МИШАНЕНЬ лелязо усксь ошсто хоккейсэ налксемань клюшка. Цёрынесь сонзэ истя сайсы, истя аравтсы, истя кундасы — пек уш казнесь паро! Вейке берянь: телесь кодаяк а учови. Лееськак эзь кельме, ловоськак прась ансяк тия-тува.

Недлечистэ, okayники, якшавсть. Миша седе куток ношкстась Витяненъ, саизе клюшканзояк.

— Эхе, — дивазевсь Витя. — Тень косто саик?

— Лелям ошсто ускизе, — мельспаросо мерсь Миша. — Адя лейлангов.

— Адя!

Лейлангов ялгатне чиезь чийсть. Сон кельмесь, цитни суликакс. Валгсь алов. Нолажа. Тей киракстыть, тов ардыть. Паро-о-о!..

— Карматано хоккейсэ налксеме! — мерсь Миша.

— Ве клюшкасо акода.

— Тон, Витя стяк ортас, мон карман тетъ шайбанъ чавомо.

— Мейсэ кундсеме карман? Монъ клюшкам арась?

— Кундсек кедьсэ, пильгеть аравтнек клюшкантъ таркас.

Витя амельсэ сась ялгантъ марто вемельс. Органъ таркас аравтсть кельмезь мода покольть.

Вестъ, омбоцеде Миша вачкоди, шайбась а паневи. Вана Миша арась седе малас ды вачкодизе шайбантъ. Тона ливтязь ливтясь ортатнес.

— Седе тов а карман ортатнесэ аштеме, — мерсь Витя.

— Мекс?

— Арак тон.

— Мон аран, ансяк тон мейсэ кармат шайбань пансеме?

— Ключкасо.

— Тонь ключкат арась.

— Тон макссак!

— Иля арсеяк.

— Макст куш вачкодемс, мон оно зярс аштинь ортат-несэ.

— А максса. Лелям тень мерсь ванстомс ключканть. Кармат налксеме эли арась? Бути кармат, стяк ортатнес, а кармат, лия ялга муян.

Витя нусмакадозь стясь ортатнес.

Миша таго ушодсь шайбань пансеме. Вейке ёртомсто шайбась эшкевсь Витянь пильгс ды ливтясь леенть кунш-кас. Миша сыргась мельганзо. Те шкане эесь кармась ця-тордомо, сивеме. Цёрынесь чопавтсь ведьс.

Витя ношкстась ялганзо ёнов, пижакадсь тензэ:

— Венстик ключканть!

Оясь истя тейськак. Витя мезе вий усксь кельме ведь-стэнтэ ялганзо. Кодаяк а таргави.

Леенть кукшкасо човине эесь яла лазнототсь, начко ор-шамось стакалгась ды усксь цёрыненть алов. Ансяк оятне пря эзть максо. Окойники, Витя Мишань таргизе.

Цёрынетне ношкстасть кудов. Кудо икеле Миша мерсь:

— Тон, Витя, саик ключканть.

— Арась, а эряви.

— Саик, саик.

— Казезенть а казнить.

— Саик...

Цёрынесь саизе ключканть. Мишанень сеске теевсь паро. Сон ней уш эзь пеле: авазо мурнесы. Каштом лангсо аштемстэ сон яла кецясь: кода паро, бути ули алкуксонь ялгат.

ПОРКСАЗЬ КРИНКА

ВАЛЯНЬ ули ялгазо, те Мурка псакась. Кода а вечкемс мазый псакинуть! Тюжа поназо кувака, чевте, сон неяви пондакшовокс, пулозояк пондакш. А кодамо ёроков! Каштом лангс кузи — а кенерят варштамо, каськасто кундси чеертнень. Ансяк улить Муркань амазый тевензэяк. Саламонь коензэ кис авазо алтась панемс Муркань кудосто. Валя пек мелявты, кода бу авазо алкуксак аволизе пане псаканть.

Течи Муркат-Валят ськамоств. Валя ансяк озась столь экшс ярсамо, Мурка уш вакссонзо, ёзы, чаравтни-велявтни пулосонзо: истя вечкевти пря ды веши ярсамс. Псакась чарась-тейсь, мезеяк эзь учово, ды совась каштом икелев.

Апак учо марявсь вачкодъкс, мень-бути шалт. Валя ка-явсь каштом икелев. Вансы, масторо вакашке — эйсэнзэ вельтязель ловсо марто кринкась. Мурка удалце пильге лангсо кринканть вакссо, лапанть навасы — нолсесы. Вельксэнтэ нолси, мельспародонтэ мезентькак а реди.

— Оргодть тестэ, тюжа идемевсь! — серьгедсь Валя ды вачкодсь пильгсэнзэ.

Мурка истя тандадсь, ношкстась каштомлангов, мик сявордызе кринканть.

Валя седе курок сайсь нула ды кармась кияксонтэ нардтнеме. Те шкастонть кудыкеле марявсть эскедькст, совась покштязо. Тейтернесь талнозевсь, нулась прась кедьстэнзэ.

— Ды вана, тенья, чакшось тапавсь, — моткодсь сон.

— Сонсь тапавсь? — кежейстэ кевкстизе покштязо.

— Аволь, мон правтыя. Шлинь вакант ды правтыя. Валя пек мелявтсь, илязт чарькоде, кие чумось. Муркань сеске паньсызь. Чокшне Валя каштомлангсоль, покштянзо

вакссо, маласост Муркаяк. Кудонть келес марявсть част-
нэнь якамо. Валяненъ визькс ульнесь кенгелемадонть.
Сон видькстась:

— Покштяй, мон кенгелинь.

— Зярдо? — кевкстась атясь.

— Течи. Кринканть порксыя аволь мон, — Мурка. Жаль
марявсь, пелинь, тензэ понги...

— Мазый, ансяк блуди пек, — кекшизе мизолксонзо
покштязо ды вадяшизе нуцьканзо. — Паро, видькстыть, те
пек вадря теvesь — пшкадемс оянь кисэ, идемс ялганть. Вана
Муркань кисэяк пшкадить. Иля стувтне седе парсте сонзэ
андомс. Вансак, лотки ков а эряви нерензэ эцнемеде.

Валя чатьмонсь. Сон истяк матедевськак каштомлангс.
Муркаяк тантейстэ удось вакссонзо.

ЦЕЦИНЕ

ДАРЮША эзь сода: вальмалангонь цецятне сыр-
гить касомо лопинестэ. Тусь авазо шабрасто цеця
лопине ды нолдызь ведьс. Лопинесь аштесь вальмалангсо
зяря чить. Мейле Дарюша несь: лопиненьтэ песэ — ашо
суринеть.

— Авай, авай, варштакая, — кенярдсь тейтерькась, —
цецянок корёнт нолдась.

— Эрьга, кода курохто!

— Ней озавтома модас?

— Нейке, тейтернем.

Авась каясь чакшкес мода, куншказонзо сурсо сокар-
дась варине ды тонгизе тозонь лопиненьтэ. Мейле валызе
ведьсэ.

— Авай, сон цветямо карми? — кевкстизе Дарюша.

— Нама, карми.

— Кодамо тюссо?

— Сэняжа, истямо, кодамо Орька патянь цецясь, те
сон максызе лопиненьтэ. Ансяк ковшка учома, кадык вийс
сови.

Дарюша секе тев ваннось цецянтэ лангс, чинзэ ушоды-
лизе сонзэ валномасо. Ды весть редизе: лиссть кснавшка
пургондавакст. Чинь ютазь сын панжсть ды мазылгавтызь
вальмалангонть. Дарюша кецязевсь ды арсесь полавтомс
цецянтэ тарканзо.

«Мон путса чакшкентэ удома таркам ваксс», — арсесь
Дарюша ды истя тейськак.

Ансяк цецясь аламодо мендявсь. Истяк аравтсы тей-
тернесь, лиякскак путсы — ялатеке мендяви.

— Цецям ормалгадсь, — ёвтнинзе мелявксонзо аван-
стэнь Дарюша,

— Цецянтень чопода, секс сон венстизе сэрэнзэ валдон-
тень, вальманть ёнов, — оймавтызе авазо. — Тесэ сон зяр-
доак а карми видестэ касомо. Эряви путомс вальмалангс.

Дарюша айгизе шаршавонть ды путызе цецянтъ мекев
вальмалангс. Сэняжкесь одов видемя ды седеяк мазыл-
гадсь.

АЛКУКСОНЬ СОЛДАТ

ЦЁРЫНЕТНЕ налксесь футболсо. Пансть вейке вейкенень кавтонь-кавтонь голт. Секс вейкеяк ёнксонть кежензэ лиянть лангс арасельть. Вишка футболстнэ ледстнесь налксеманть ды апак учо пачкодсть пелькстамос.

Тонеть, Алёша, эряви тонавтнемс налксеме прясо, — мерсь Ваня. — Зяроксть прят велькса оскась ливтась, тон вестькак сонзэ эзик вачкоде.

— Бути монь кедьс а вачкодевель оскась — тонгак аволик чаво штрафноенть, — мерсь Гриша. — Сестэ минь лисевлинек изницякс.

Неть пелькстамотне пачтизъгак войнасо налксемас. Ялгатне чийнесь кудов, эрьвась кандсь автомат, Серёжа — мик пулемёт. Весе стясть Мишань перька, тона ловинзе-явинзе, ды налксемась ушодовсь.

— Та-та-та, — леднесь латко чирестэнтъ Алёша.

— Та-та-та, — каршонзо маряви Мишань вайгелесь.

— Серёжа, Серёжа, тон ранявить, — сеери Игорь. — Лоткак леднемеде.

Пулемётчикесь чатьмоньгадсь. Сон прась кичиресэ касыця тикшенть потс ды мерсь эстензэ: «Карман лезксэнь учомо, кияк сы тапарямон».

Леднематне эзть лотксе.

«Ялгань туртов тей самс а зярдо», — кортась эськанзо пулемётчикесь.

Окойники, ушось опамсь, «войнась» прыдовсь, Серёжа ялатеке эзь стя. Лезксэнь максомояк тензэ кияк эзь са. Марязевсть вайгельть.

«Минектне сыть», — кецясь цёрынесь.

Вайгельтне яла малавгадсть.

— Тесэ кие-бути ули, — фатясь Миша.

— Ды те Серёжа, — мерсь Алёша.

— Серёжа, Серёжа, тон мекс а стят? — кевкстизь ялгатне.

Цёрыненть сельмензэяк аламодо конязь.

— Мон ранязян, — састыне мерсь сон.

— Мезе, мезе? — мизолдозь кевкстизе Гриша.

— Мон ранязян, учан лезкс, — седеяк састо мерсь Серёжа.

— Козонь? Нать, вереть эль чуди, — згилясь Алёша.

— Чатьмонть, — лоткавтызе Миша. — Стяк, Серёжа, налксемась прыдовсь. Адя кино.

Серёжа чатьмонсь, эзь стя. Савсь ялганзо туртов саемс цёрыненть кавто ёндо.

— Адыдо седе курокто, — капшавтсь Гриша. — Кинось, секень вант, ушодови.

— Мольть эно, Серёжа, — энялдозевсть цёракайтне.

Серёжань пулемётонзо кандсь Алёша. Мольть чатьмонезь. Кассанть икеле лоткасть. Киньгак арасельть ярмаконзо.

— Мон саян весенень билетт, — мерсь Серёжа ды мольть вальминенть икелев.

— Монень сисем билетт.

Кинось тусь весень мельс. Сон ульнесь войнадо, разведчикте.

Кинодо мейле ялгатне мольть секе янганть, конань чиресэ тикшенть потсо «ранязь» учось лезкс Серёжа.

— Пароль кинось, — мерсь Алёша.

— Кодамо апельица, ёроков разведчикесь! — пшкадсь Гришайак.

— Сонзэ ёнов моли Серёжа, — мерсь Миша, — сон алкуксонь пулемётчик.

— Лоткадо лангсом пеедькшнемед, — мерсь Серёжа.

Цёрынетне прок эзь марьяк ды поладызь кортамо-
сте тов.

— Карматано ванды войнасо налксем? — кевкстинзе
Серёжа оязо.

— Карматано, карматано! — кецязь сеересть ялатне.

— Сестэ вандыс, неемазонок, — мерсь Серёжа ды
тусь кудов.

Серёжа эри Алопесэ ды кудов молемань перть арсесь:
«Кода истя ялгатне эзь чарькоде идемс сонзэ?..»

САШОК

САШОК умок эзизе нее тетязно. Тетязно ваны ревень стада веленть эйстэ васоло, кудов а сакшны кизэнь перть. Тосо ули эсензэ кудынезэ, перьканзо жолгань пи-рявкс, вензэ лангс тозонь пурнакшныть реветнень. Тол валдось — штатол, а радио, а телевизор арась. Ансяк кой-зяро газетат вачказь столъпесэ. Сашок энялдсь тетянстэнь, саевлизе мартонзо стада ванома. Тона яла алтнесь, ды яла эзь сае.

Весть сась тенст цёра ды мерсь, келя, тетязно таркас эря-ви важодиця. Озавтызе Сашань ды ускизе ревень стадань ванома таркас. Сашок кенярдозь чийсь тетянстэнь, вешизе локшонзо ды сеске, кода алкуксонь ваныця, кенярдозь каизе лавтовонзо трокс. Моли-моли реветнень юткова, цяради локшосонтъ.

— Неят, полавтыщяткак кассь, — мизолды цёрась. — Кадомскак лангозонзо стаданть а пелят.

Чись ульнесь пси, реветне эзть срадо, маднестъ ведь чирес. Шкась мольсь састо. Чокшнеёнов реветне кармасть срадомо луганть келес. Саша чийнесь перькаст, пельсь, илязт оргоде. Ожо сельме чиськак кекшсь пандо экшс. Кармась сундерьгадомо. Сашок ушодсь пириавксонтъ экшс реветнень панеме. Кувать чийнесь, ялатеке весень пурнын-зе, ортатнень пекстынзе, сюлминзе карьксэ. Ансяк озась оймсеме, пилезэнзэ каятотсь ревелевксэнь парамо.

...Чопотетсь, тетязо яла эзь са. Саша кувака локшонзо марто якась пириавксонтъ вакска. Реветне нувсестъ. Перть-пельксэсь чоподаль. Истямо чоподаль, сельмс нерькстак — а неят. Сашок совась кудыинентень, кирвазтизе штатолонтъ, мадсь таркас. Вана марятотсь ревень дубордома. Мезде

сынъ тандадсть, мекс чийнить пирявксанть? Сашок лиссь ушов. Аvasоло марявсь кискань вайгель. Сашок кармась локшосо цяраеме. Кискась эзь тандадо, реветне яла чийнеть. Сеск кие-бути кирнявть пирявтонть трокс, реветне каявсть кудыненъ ваксс.

— Эй, эй, эй!.. — кармась сеереме цёрынесь. — Ну-ка тестэ!..

Цёрыненъ вайгелезэ кайсевсь васов пертьпельга ды велявтнесь мекев гайтекс. Саша капшазь совась кудыненъ, саизе штатолонть, зяряя газетат, чийсь коське тарадтнень ваксс, конатнень рединзе тесэ чить. Кирвазтизе конёвонть, тонгизе куцянтъ алов. Аламонь-аламонь сыремсть илейтне. Толось кепететь верев, валдомтызе калданть. Неявсть тандадозь реветне. Сашок аштесь толпандянтъ вакссо, сорнось, пеензэяк мик кальцькаестъ. «Вай, кода кувать а сы тетям, — арсесь цёркась. — Палы толпандясь, совить верьгизтнэ, повсесызь реветнень».

— Сашок, Сашок! — Каятотсь содавикс вайгелесь.

Те пижнесь Сашань тетязо. Сон чийсь кудонтень, ку-роксто лиссь тосто ружия марто ды кавксть бахадсь верьгизтнэнь ёнов.

— Ружиянтъ марто паро! — кода покш ломань, мерсь Сашок, — локшонъ цяраемадонть верьгизтнэ а пелить. Тонавтомак ружиясто леднеме.

— Вантакая, цёрам, тон ней монъ куш зярдо полавтсак. Апелицякс прят невтик. Кода чарькодить толпандянь кирвазтеме?..

Сашок чатьмонсь. Сонсь ансяк содась, кода тандалесь верьгизтнэде. Кода а чарькодемс?..

Тетязо кенярдсь цёранзо кувалма.

— Эно на, вестъ бахадть, — ды максызе ружиянтъ Сашокнень. — Мон карман кирдеме, тон лепштак...

Ба-бах-х! — цярнозевсь ружиясь.

— Ней верьгизтнэ седеяк васов ношкстасть, — мерсь Саша, — молян мадян, удомам сась.

КАЛЬАЛКС

ЯХИМКАМЕЗЕНЬ кудост ашти эрькине чиресэ. Мазый покш кудонтъ кекшизь кальть ды топольть. Эрьва тунда сельме икеле панжить сынст пургондавкост, ды чувтотне сёксес аштить вельтязь ниже пацясо. Сёксня полавтсызь сонзэ тюжа тюссо. Иень перть шалныть чувтотнень прясо нармунтне. Кодат ансяк нармунть концерт а максыть! Кальтнень вечксызь грацтне. Сынст, алкукс, вайгелест аволь вадря, морамо тунь а маштыть, ялатеке ломантне тонадсть эйзэст. Чинь-чоп кандыть тарадкетъ пиззэст, витнить таштотнень, теить одт. Телень перть кежей вармась ламо пиззеть яжась. Тедеде Алопев чувтотнень пряс ливтясть лембе масторсто ламо грацть. Натъ, шнызь сыре грацтне эрямо таркаст — Яхимкамезень чувтотнень.

Течи чись нусманя. Валске марто пувась варма, сон яла виевгадсь. Пельтне чополгавтызь пертьпельксэнтъ, шкань шка пизесь пиземе. Истямоне ушосонтъ тейнемс а мезть, секскак Яхимка налксесь кудосо. Покштязо, Кузьма атя, кардазсо илейстэ кодась кептерь. Умок ушодызе, кодаяк а прядови, шказо а сатны. Ней ушоёжось кольсь, ды пиземень а токамо таркасо атясь теи тевензэ.

Вармась яла виевгадсь, вешкезь вешксь. Цёрынесь кадызе эсь тевензэ ды мольсь вальманть ваксс. Ушось истя чополгадсь, натой мезеяк а неяви. Кежей вармась чавсь вальма суликас пиземень, нурсесь куракштнень, менчесь човине чувтотнень. Мезе-бути цяторсо прась. Те шкастонть совась Яхимкань покштязо.

— Эка, варштакая, мезе ушосонтъ, — мерсь Кузьма атя. — Калентъ сявордызе.

— Калентъ? — кевкстизе цёрынесь.

— Калентъ, калентъ...

— Вай, — мелявтозевсь цёрынесь ды ношкстась кенкшентень.

— Тон ков? — кенерсь ансяк кевкстемензэ Кузьма атя.

Яхимка аштесь кузтемпесэ ды авардсь. Сась шабраст Ёга атя.

— Тон мезе сельведеть пeverдят?

— Калесь сивсь. Ней косо грацтне кармить эрямо?

— Э-э, пакша, шказо сась, секс сивсь. Минь покштятъ ды тонь марто лият озавттано.

Зярдо ушось энгамсь, атятне лиссть ушов пила марто. Яхимкань кармавтызь вешемс аванзо кедьстэ нулат-валат ды карькс.

— Те мезекс?

— Тон азё кандт, несак, мезекс, — мерсь Яхимкань покштызо.

— Калесь пек вечки летьке, оно кода касыть сынъ эрьке чиреванть. Эрьва керявксось ваднема сёвоньсэ ды нолдама модас.

— Мезекс сёвонесь? — яла кевкстнесь цёрынесь.

— Сокось эйстэнзэ илязо лисе, — каясь валт тетязо-як. — Ваднемадо мейле тапардама нуласо ды сюлмама карьксесэ.

— Те мон сеске, — ношкстась тарадтнэнь вакс Яхимка.

— Иля капша. Минек сёвоненек арась, — мерсь покштызо. — Адя эрьке чирестэ пештятано...

— Тосо, покштяй, чуваргак ули.

— Чуварось миненек ней а эряви.

Куроксто покштят-нуцькат пештясть ведрашка сёвонь ды састь каленть вакс.

— Ней ведь каяма, — тонавтсь атясь.

Яхимка амольдясь эрькестэнтъ ведь ды човоризе сёвонентъ марто.

— Ков ёмиде? — кевкстинзе Лиза баба.

— Минь покш тев ушодынек, — мерсь Кузьма атя, — кальть озавттано. Монгак зярдо-бути тетянь марто нетнень озавтнинь. Оно зярс цидярдсть! Паро те тевесь — чувтонь

озавтомась. Мазылгавтат пертьпельксэнтъ, вадря ледстнем-
кат эсь прыдот кадат...

Атят-нуцъкат ваднизь сёвоньсэ керявкстнэнь, сюлмсизь
нуласо.

Аламонь-аламонь чиськак паролгадсь, кармась уleme
седе лембе ды сэтьме.

— Мон молян варштан таркат, козонь путомс чувты-
нетнень, — пшкадсь Яхимка.

— Ужо, монгак молян мартот, — мерсь авазо, ды цё-
ранзо марто тусть кедте-кедъс кундазь.

Яхимка мельспаросо эскелясь аванзо марто эрьке чи-
реванть. Велькссэст ливтнестъ грацтне ды гайтевстэ кар-
ность, мерят, шнасть вишка азоронтъ. Цёрынентъ ёжозо
паролгадсь, якась кецнезь-кенярдозь.

Покштязо кандынзе тарадтнэнь. Тевесь тусь парсте.
Курок эрьке чиреванть стявтнезельть весе чувтынетне.

— Тарадтнэ нолдыть корёнт ды теевить чувтокс, —
кортась молемстэ Кузьма атя.

Яхимка мельспаросоль — ён тев сынъ тейсть.

ТАНТЕЙ КАЛТ

— **ТАГО** рудаз потсат, — вастызе бабазо Серёжань.

— Мон, бабай, ялган марто ушодынь чудикерькэнь пирамо, — мерсь нуцькась. — Минек венченек покшт — чудикерьксэсь вишкине, эряви пирамс.

— Те тевесь паро, ансяк понксот полавтыть, весе начкить, сэредеме иля карма... Ды чийнека кши рамак.

— Мон нейке.

Серёжа ёндолкс чарась. Куроксто полавтынзе понксонзо, муIZE венчензэ ды ношкстась ушов.

Кенярксов налксемаст мольсь чинь-чоп, Явсть ялгатне ансяк чопоньпелев.

— Те тон, Серёжа? — кевкстизе каштом икельде бабазо, зярдэ маризе кудо кенкшень панжоманть.

— Мон, бабай, — састынька мерсь цёрынесь.

— Вай, зярс араселить! Мон уш арсинь, венчсэть Равга уйнеме туить.

— Арась, бабай.

— Таго начкат?

— Аволь.

Сеганень ансяк ней ледствясь: бабазо чить кучокшнызе кши мельга, цёрынесь налксеманть пачк стувтсь теде ды кармавтоманть эзизе топавто.

Кудонть келес качадсь тантей чине, сон пек куцтясь Серёжань судонзо — пекезэ вачсь. Ней цёрынесь виздсь ярсамонь кевкстемедэ: бабанзо эзизе кунсоло, кшинь рамамо эзь яка.

«Кода ушодомс бабань марто кортамо, мейсэ тензэ лездамс?» — арсесь цёрынесь.

— Мон, бабай, тень... — ушодсь сон.

— Мезе, нуцькам? Ярсавлить, нать?

— Серёжа аламос чатьмонсь, мерсь:

— Лездан тетъ.

— Паро. Эрьга ванськавтта кавтошка чурька прят.

Цёрынесь саизе пеелентъ. Вестъ, омбоцеде коцькерди, чапамось сельмс эцеме кармась, чудить сельведтне. Серёжа пугызе веёнов пеелентъ, чурькантъ, ёзы сельмензэ.

— Мезе мартот? — кевкстизе бабазо. — Сельметъ чапаськадсть?

— Аламодо, — састо мерсь Серёжа.

— Шлик седе курук чамат. Пеелентъ кирдик кельме ведсьэ, шкань-шкань яла навсек ведсь эйсэнзэ. Сестэ сядо чурька прят ванськавтат, петнявкс сельведъ а правтат.

Сега истя тейськак. Курук ямось ды рестазь калтнэ ульнестъ анокт. Лакась чаеськак. Бабат-нуцькат пурнасть столентъ. Кудыкеле марявсть эскелькст. Серёжа сеске чарькодсь, сыть тетянзо-аванзо. Цёрынесь ношкстась каршост. Сынь мельспаросо вастызь сонзэ. Вейсэ озасть столь экшс. Каткаськак тесэль, ёзась эрвантъ пильге ёжова.

— Кодамо тантей калось! — шнасть весе ярсамкантъ.

— Кода а тантей! — мерсь бабась. — Серёжа тень лездась, секс истямо тантей.

Цёрынесь мельспародонтъ мик нолдызе прянзо.

«Нать, пеедькшни лангсон? — арсесь сон. — Эли алкукс истя? Монськак оно ярсан, пек тантей маряви...»

Калтнэ алкукс пек тантеельтъ. Ды эзь кенгеле Серёжань бабазо, зярдо мерсь нуцькадонзо. Бути ярсамопелесь пидезь-панезь паро мельсэ, сон свал ули тантеекс.

СЁКСЕНЬ НУМОЛКАЙ

КОЛЯ Маша сазорканзо марто налксесть вальмало. Течи апак учо прась лов. Истя, шкадо икеле, келя, вестькак эзь пракшно. Сынь койминесэст ванськавтсть ловонть эйстэ кузтемалангонть.

Лелят-сазорт эрить вирь маласо, вечкить якамо тов кизная, тетяст-аваст марто.

— Маша, вантая, — нумолкай! — серьгедсь цёры-несь.

Вирьстэ ливтязь ливтясь сёрмав нумолкайне ды ёмась авасоло пандыненъ экшс.

— Натъ, верьгиз чии мельганзо, — мелявтозевсь Маша.

— Паряк, аволь секс, — мерсь Коля. — Нумолось бажи шубанзо полавтомо. Ловось прась апак учне, шкадо икеле, ды кадовсь лангсонзо шубине, эряви полавтомс сонзэ ашо лангс.

Сынь кадызь эсь тевест ды ношкстасть се таркантень, кува чийсь нумолкаесь. Сон васенце ловонть лангс кадсь эсензэ викшневкст — чалгавксонзо. Сынь яла вансть виренть ёнов, кемсть, паряк, таго тосто лиси сёрмав нумолкаесь. Ансяк те эзь учовт.

Эйкакштнэ мелявтсть: илязо понго нумолкаесь кежей верьгизнэнь.

— Илядо стяко майсе, — оймавтынзе аваст. — Те ловось курок солы, сон прась а шкастонзо.

Истя ульнеськак. Омбоце чистэнтъ сонзэ эйстэ кадовсь ансяк начко тарка.

Стяко нумолкаесь истя капшась, — мерсь Коля. — Сон-гак кенери шубинензэ полавтомо.

ЗЕБРА

АВОЛЬ умок Андрейканень ошсто сась сёрма. Кучизе Миша ялгазо. Сак, келя, ошов, циркев мольтяно, мейле монгак туян мартот велев.

... Автобусось ошов ардсь а кувать. Ульцятнева модем-стэ цёрынесь весемень ваннось талнозь, сон васенцеде сась ошов.

Миколкамежень кудонтень ават-цёрат пачкодсть куро-сто.

Кузсть омбоце этажонтень, лепштизь повненть, лиссь Мишань авазо, Оля патясь. Миша мельспаросо вастызе ялганзо.

Чопоньпелев сынъ сыргастъ циркев. Чись ульнесь маней, ёжоськак эрванть паро. Ялгатне мольтъ икеле, мельгаст — тетяст-аваст.

— Ванодо, кинть трокс съкамонк илядо юта, — меляв-тозь серьгедсть покшнэ.

— Арась, — вейсэ мерезевсть цёрынетне. — Минь ютатано оно тува, косо зебрась, — мерсь Миша Андрейнень ды невтсь сурсонзо икелев.

— Мезе, мезе? — эзь чарькоде Андрейка.

— Учосынек тетянь-авань ды ютатано зебранть ланга, — кортась Миша.

— Зебранть ланга? Кодамо зебра?

— Оно кодамо, — невтсь цёрынесь асфальтонь кинть трокс ашо кикстнэнь лангс.

— Кодамо тетъ зебра? Те — ашо кикст.

— Ютамо тарканть меритькак зебра.

Цирксэ ульнестъ клоунт, гимнастт, толонь «нильницят», гуйть, овтот... ды зярыя зебрат! Андрейка вансь лангозост ды пейдсь: «Те вана зебрат...»

УЦЯСКА МЕЛЬГА

ВОЛОДЯ течі кенярдыяк, нусмакаліяк. Сон тетянзо-
аванзо марто туі ошсто велев эрямо. Ризны цё-
рыненьт седеезэ ялгатнень кисэ, конатнень кадсынзе.
Кадсынзе, ялатеке а стувтсынзе. Велесэ учить эйсэнзэ од
ялгат. Велесэяк, келя, вадря. Кизна эхшеляк — зяро мелеть,
кундсек калт. Тельня — ардтнек-кирякстнек...

Сась туема чись. Валске марто уш кудонтъ ваксс лоткась машина. Эйстэнзэ лиссь Тюма атя, Володянь покштызо. Сон сась велестэ, ков туить сынъ эрямо. — Весемесь анок? — кевкстинзе шумбракстнемадо мейле покштнэнь.

— Весемесь, — мерсть каршонзо.

Комнатасонтъ весемесь вачказель, сьулмсезель. Шабрань цѣратне лездасть кандтнемс-вачкамс улипаронтъ. Машинань кузовась курок пешкедсь. Володя аштесь ялганзо марто машинантъ вакссо.

— Володя, мекс тынь тутадо? — кевкстизе Дима. — Нать, берянь улевель теть мартонок?

— Алкукскак, мекс? — кевкстизь шабрань цёратне.

Володя чатьмонсь. Эзь сода, мезе меремс.

— Адя, озак, велень вишка эриця, — пшкадсь шоферэсь цёрынентень.

Володя озась аванзо марто кабинас. Суликань пачк нус-
манясто вансь ялганзо лангс. Машинась сыргась.

Охонькина с пачкодсть куро́ксто. Кись вадря, машинась ардсь парсте. Тесэ Володя ульнесь а весть, тетянзо-аванзо сайнесть эйсэнзэ велев. Тесэ, кода тензэ ёвтнесть, сынь чачсть-кассть. Ней ташто кудонтень кадовсть сыре бабазо ды покштязо.

— Вана пачкодинек, — мерсь авазо.

Машинанть ваксс чийсть эйкакшт, сась покш ломанть-как. Веенст лездасть кандтнемс кудос ускозенть, омбонст вансть, кортасть.

Ульцянтъ кувалт мельга-мельцек таргавсть од кудот, мелят сынъ арасельть.

Сынст кудонтъ перька, кода икелеяк, пондакш чувтот, пиже луга.

«Тесэ футболонь налксема таркась кузтемесэ», — кецязь арсезевсь цёрынесь.

— Володя, нуцькинем, мекс малазон а саткак? — марязевсь бабанзо вайгелезэ.

Бабась нуцьканзо марто вастовсть лембестэ.

— Ней, нуцькинем, тон аволь инжекс сыть, — паро мельсэ кортась бабазо. — Карматадо минек кедьсэ эрямо. Тетят-ават кармить колхозсо важодеме, тон касат, туят школав тонавтнеме.

— Карман, карман тонавтнеме, бабай.

Чокшнес Володькань покштянзо кудосо марявсь важдемань шалт: улипаронтъ аравтнесь таркаванзо.

Кувать налксесь Володяк од ялганзо марто. Ванды арсесь молеме калонь кундамо, мейле — вирев.

Володя куруксто тонадсь велень эрямонтень.

Паро Охонькина велесь, вадря тесэ эрямоськак!

ГЕРОЙ

ДИМА ней уш покш. Сон сонсь нолдтни телеви-
зоронтъ. Вана таго нолдызе. Мошь укшномань
коряс пелькстамот. Цёрынесь вечки истямо пелькстамонь
ваномо. Сон сонськак машты укшномо. Оно пряст лангс
кирнявтсть ведьс спортсментнэ. Эрьвась уи эсензэ «кива». Неяви, сэняжа шапкасоь лиссь икелев. Видеяк, лиссь
икелев, сон кармась улеме изницякс.

— Изнясь Паксяваткин минек спортсменэсь, — яво-
лявтсь комментаторось. Укшныцянтъ невтизь маласто,
экранонтъ келес.

— Оно сон, героесь, — мерсть.

— Кодя, коды? Герой? Укшныцясь герой? — кевктнесь
эсь прянзо Дима ды арсезевсь. Варштась — маласо тетя-
зо арась, лиссь удалце кудов, тосояк а неяви. Кудыкеле
марявсь молоткасо чавиця. Панжизе кенкшентъ — тосо
тетязо витни эзementъ.

— Тетяй, кунсолока, кодамо ильведькс тейсь коммен-
таторось.

— Кодамо?

— Молить укшномань коряс пелькстамот.

— Мейле мезе?

— Ды вана Паксяваткин минек спортсменэсь уизе мак-
созь таркантъ васенцекс. Комментаторось лемдизе сонзэ
героекс. Кодамо сон герой?

— Кодя кодамо? Сон алкуксонь герой. Зяро вий, маш-
томачи путсь изнямонть кисэ! А стяко изниятненень мак-
снить питней казнеть. Сон пелькстамосонтъ минек масто-
ронть ливтизе икелев. Кемеви, истямо герой-спортсменэсь
апак учне каяви ведьс ваицянь таргамояк. Теи паро тевть
эрямонзо перть лиясоак.

— Мон арсинь...

— Стяко тон истя арсить...

КИНЬ БАБАЗО СЕХТЕ ВАДРЯ?

МИТЯ школасто эскелясь умарь пиретнень малава, экше таркава. Ушосонть, саразтнэде башка, кияк ззь неяво. Ансяк шабрань кудо икеле, эчке чочко лангсо, озадолть сынст куринкань цёрынеть ды тейтерькат.

— Монь бабам сехте вадря! — кортась Миша. — Мезень теeme ансяк а машты: и коды, и вишнии.

— Кинь бабазо а машты кодамо, вишнеме, сустамо! — ззь кирдеве Коля.

— Монь бабадон парсте кияк морамо а машты, — мерсь Лариса. — Ансяк ёвкст сон зяро соды!..

— Марявлика монь бабань! — мерсь Ваня. — Сон коды-як, вишнияк, стыяк тынк бабатнеде сядоксть седе парсте.

Кияк эзь чатьмоне, эрьвась шнась эсь бабанзо. Весе ёвтнеть, кие мезень теeme машты.

Кунсолось-кунсолось Митя, мейле, кода седе покш ялгасть, кевкстинзе:

— Тынсь эно мезень теeme машттадо, лездакшнотадо-арась покштятненень?

Эйкакштнэ чатьмонсть, прясткак нолдызь алов. Алкук-скак, киньгак превс эзь са те мелесь.

— Берянь бабат а эрсить, — таго кортась Митя. — Тевесь сеньсэ: течи школасо кортамось мольсь кудоютконь тевтнеде, тонавтыцясь кевкстимизь, кие мезень теeme машты, кода лездатано покштнэнень. Минь а свал парсте прянок ветятано, амазыйстэ тейнетяно, а кунсолокшнотано, а лездакшнотано эсенек бабанок туртов. Стувтнетяно сынст сырчидест.

Весе чатьмонсть, ды истя улевель, паряк, кувать, а ношкставольгак Ваня бабанзо каршо, кона мольсь куринкаванть стака канст марто.

— Минекак кудосо ламо тевенек: пенчть-вакант шлямат, кудопотмонть пурнама, урядама, — мелявтозь мерсь Оля.

Лиятнеяк сыргасть кудов, капшасть бабаст туртов лездамо.

СЮПАВ ДАША

ДАША икельць кудосо, бабазо каштом икеле анок-сты ярсамка, тетянзо-аванзо важодема таркасот. Тейтернесь эзь тонадо съкамонзо налксеме, ялатеке теems а мезе. Озавтынзе вейке омбоце ваксс няканзо, мейле овтыненть, ривезенть, нумолонтъ ды кармась кевкстнемест, зяро ули, бути кавтос путомс кавто, кодамо ней шкась... Налкшкетне чатьмонсть.

— А-а-а... а содатадо... — кортась тейтерькась мартост.

Панжовсь кенкшесь, ды бабазо пшкадсь:

— Нуцькинем, састь ялгат.

Даша кецязь чийсь вастомост. Кенкшенть вакссо аштеть Галя, Оля ды Маня.

— Молят ушов? — кевкстизь сынъ Дашань.

— Молян, — мерсь тейтерькась.

— Аламошкас учодо, — пшкадсь Дашань бабазо. — Курок панжакаенъ кенерить, каванятадызь.

Эйкакштнэ каизь оршамост ды кармась учомо прякинеть.

— Эхе! — дивазь вайкстась Маня, — зяро тонъ налкшкеть!..

— Те мезе, тесэ аволь весе, — шнась прянзо тейтерькась, таргсинзе горобиясто весе налкшкензэ.

Ялгатне васенцеде несть истят налкшкеть, кармась ванкшномост.

— Тынь састо, ванодо, — секе тев кортась Даша.

— Кодамо тон сюпават! — мерсь Оля.

— Ды нетнеяк аволь весе, — мерсь Даша ды таго комась таргсеме налкшкеть, теке марто кармавтсь:

— Э-э-э. Састо, илинк яжа.

— Ялгатне чатьмоньгадсть.

— Моньгак налкшкенъ улить, лият сынъ. Тоньгак, Дарюша, истят арасть, — мерсь Галя.

Ялгатне нусмакадсть, чатьмонезевсть.

— Адядо прякинеде ярсамо, — тердинзе тона кудосто бабась.

Зярдо неинзе нусманячист, дивазевсь:

— Ды тынь мекс истяттадо?

— Мекс, мекс, — ушодсь Галя. — Даша прянзо шны, келя, пек ламо налкшкензэ. Налксемс вана а максы.

— Моньгак улить налкшкенъ, — мерсь Маня. — Монгак сюпаван, налкшкенъ кавто горобияс а кельгить.

— Илядо пелькта, — мерсь сыре ломанесь. — Тынь весе сюпавтадо.

— Кода истя? — кевкстизе Оля.

— Сюпавчись аволь налкшкесэ, сюпавчись ялгаксчисэ, — поладызе валонзо бабась. — Оно зяро эрванть ялганзо. Монь арась вейкеяк налкшкем, натъ, мон арась-чисэ эрян? Минек куриканъ бабатне — весе ялган. А зняро нуцкан! Эрь, адядо панжакайде ярсамо.

Ялгатне ойсесь столь экшс. Кудонть келес качадсь тантейдеяк тантей чине. Панжакайтне путнезельть столенть келес. Ялгатне мельпаросо ярсасть, коршнестъ ловсодо.

— Сюкпря, сюкпря, бабай! — ярсамодо мейле мерсть бабантень ды лездасть пурнамс-нардтнемс столенть.

— Адядо пурнасынек налкшкетнень, — мерсь Галя.

Сынъ совасть икельце кудос ды налкшкетнень кекшнизь таркаваст. Даша эрва ялгантень макссь налкшке: кинень овтыне, кинень няка, ды эйкакштнэ пурназевсть седе курук ушов.

— Мольтяно налксеме.

Насько баба вансь мельгаст вальмава ды мизолдозь арсесь: «Алкукскас, кодат сюпавт эйкакштнэ! Зяро кури-касо ялгасть!»

ЛАМОНЬ СОДЫЦЯ

БОЗОВ лейненть пиризь, ды ведесь эйсэнзэ кепететсь чирестэ чирес. Куринкань эйкакштнэ чинь-чоп налк-силь тесэ. Паро экшелямс.

Ваня, Миша ды Олег течи састь тей васенцекс. Калокс кольнить ведьсэнтэ. Экшелить-теить, лисить пиже луги-нентэ лангс, мейле — таго ведьс.

Ансяк ушось апак учо нусмакадсь.

— Туи пиземе, — мерсь Ваня.

— Стяконь валт, — мерсь каршонзо Олег. — Кавтошка пельнеть менельстэнтэ неить, ды уш пиземе туи.

— Тевесь аволь ансяк пельтнесэ.

— Эно мейсэ?

— Варштака, цянавтнэ кода алга ливтнить.

— Мезе, сын пиземень «чине» марясть, — кармась пеедькшнем Миша.

— Маней шкасто цянавтнэ ливтнить верьга, сын коштстонть кундсиль сесыть, — кортась Ваня. — Ней коштось летькемсь, экшендсь ды сесыктне валгсь алов, мартост — сынст кундсиця цянавтнэяк.

— Косто теде содат? — яла згилясь Миша.

— Покштям ёвтнесь.

— Ха-ха-ха, — раказевсь ялгатне. — Тонсь ёвтнят, покштят вейке класскак эзь прядо, сонсь эйсэть тонавты.

— Эзь прядо, сонсь ялатеке эрьва мезде соды.

Пертьпельксэсь допрок нусмакадсь. Менельксэнтэ вельясть нусманя пельтне. Пувазевсь летьке варма.

— Адядо кудов, ва, пиземе илязо туге, — мерсь Миша.

Ялгатне капшазевсь.

— Соватано миненек, — мерсь Ваня.

Цёрынетнень лембестэ вастынзе Олдай баба.

— Кува якатадо? — кевкстинзе Эня атясь. — Нетядо, менельксэсь кодамо?

Апак учо кивчкадсь ёндол, каятотсь пурьгинень зэртъ. Курок тусь пиземе. Пиземень жойнемась марявсь кудос.

— Кодамат тон, Ваня, превеят, — мерсь ярсамсто Миша.

— Те аволь мон, покштям превей, — мерсь Ваня.

СЁКСЕНЬ ЦИПАКАТ

ОЛДАЙ бабань вейкеяк саразкезэ тунда эзь нарва. Сёксь малав куконь коня, якстердиця толга саразкесь секе тев якась кардазганть клукнозь. Олдай бабань кежензэ мик сыльть. Мезе ансяк сон эзь тейне: пекстнизе клокныця саразкенть кузтема алов, озавтнize чопода каськас — весе стяко. Тестэ-тосто мукшныль Олдай баба ал марто пизэть — нарвиця саразось эзь кадо мелензэ ливтемс ципакат.

— А эрявить сёксень ципакат, — кортазыгак кортась нарвиця саразкенть марто бабась. — Ливтемаль сынст тетя седе икеле.

— Нарвиця саразкесь прок оймась. Эзь маряво кардазсонть ней сонзэ корсяня вайгелезэ, седе чуросто нексневсь сонськак.

...Сась сёксь, кияк эзь учне истят кежей вармат, якшамот, тия-тува мик прась лов. Олдай бабань Валя нуцьказо лиссь сеянтъ андомо латалов, ваны — пизэ. Варштась, мезе-бути ашолды. Венстинзе кедензэ, сурс клюкадизь. «Вай, те мезе?!» — тандадсь тейтерькась ды ношкстась бабанстэнь.

— Те, нать, каткась, — мерсь Олдай баба.

Сон каясь ланганзо покш паця, чекась ды сыргась латалов. Муизе тикшентъ ало варянтъ, ёвкстызе кедензэ. Ансяк сеске ноцковтызе мекев.

— Ды те нарвиця саразкесь! — апаркстомсь Олда баба. — Ва мон сонзэ тенстьсэ тосто!..

— А зряви, а эряви, — мерсь тейтерькась, — алонзо марявить ципакат.

— Ципакат? Сёксня?! Мезть ней мартоост тейнемс? — ацирьгалесь бабась.

Нарвицьканть сёлмо алдо алкукскак вансть ожо ципаки-
неть. Сёксень кежей вармась вешкезь вешксь, якшамоль.

— Бабай, совавтсынек кудос? — пшкадсь тейтерькась. —
Трясынек каштом лангсо.

Олдай баба чатьмонсь. Аламо шкань ютазь ливтсь
кептерь ды эйзэнзэ вачкинзе нарвицькань вишка эйкак-
штнэнь.

Истя вана каштом лангось теевсь од эрицятнень эрямо
таркакс.

ДИМАНЬ КУЗОЗО

ДИМА ансяк прядызе уроконь теэманзо, кода марясь кенкшес вачкодема.

— Совадо! — мерсь цёрынесь.

— Э-э-э, те тон, — кенярдсь Дима Мишанень. — Ютак икелев.

— Мень ютамот, адя налксеме ушов, — мерсь Миша. — Мон оно кузом лангсто весе налкшкетнень пурнынь. Адя сон-зэ латков кандсынек, ды — хоккейсэ... Монень эль усковсь.

— Козонь?

— Тынк кузтемпес. Мезекс ней сон, покш чись ютась, — идесь прынзо Миша. — Сон сэрьс коськсь, салмукст правты. А кенерят тенсемест.

— Монсесь оно зярдояк а коськени, — кортась орш-немстэ Дима.

— Те кода истя а коськени? — эзь кеме Миша. — Тон-сетесь, нать, кшнинь?..

— Аволь кшнинь — пластмассань.

— Иля кенгеле.

— Мезтькак а кенгелян, ютак, ванык!

Димамезень икельце кудонь ужосо аштесь пиже кузнэ, кодамо весень. Миша токшизе-теизе тарадонть — сон кал-годо, виде, пиже пластмассань.

— Веёндо ваномсто, мерят, прок алкуксонь, — мерсь Миша.

— Мезть аштетяно, — кортазевсь Дима. — Од иесь ютась, лангстонзо налкшкетне сайнемат, сонськак калав-тнема.

— Кодя, кода?..

— Мезе кода? Калавтнема кузось. Сон тарадонь тарад сайневи.

— Те вана да-а-а... — дивсесь Миша.

Ялгатне састыне юкснесть налкшкетнень ды вачкасть паргинес, седе мейле покшонтень пурнызь тарадтнень. Меельцекс путызь лазнэтнень, конатнень эйс стявтозель кузось, ды вельтизь паргонть.

— Вана весе, — мерсь Дима. — Путсынь шкапс сы Од иес.

Мишанень те весе марявсь дивакс: аштесь кудосонть вадря-паро куз ды апак учне ёмась.

Куроксто цёрынетне сыргасть хоккейсэ налксеме. Куз-темпесэ неизь коське кузонтъ.

— Эка, зярошка кузот, — мерсь Дима ялганстэнь. — Тон ней ков, мерят, сонзэ тейсак?

— Ков истямонтъ? Латков...

— Жаль маряви.

— Нама. Тонь оно кодамо, свал ашти пиже, зярдояк а коськи.

— Сайсынек налксема таркав, — мерсь Дима.

Цёрынетне саизь кузонтъ кавто педэ ды сыргасть лейлангов. Курок сынст неизь ялгаст.

— Кузонтъ тей мезекс? — пижнесть сынъ.

— Минь оно Миша марто арсетяно мазылгавтомс лейчирентъ, — пейдезь мерсь Дима.

— Саты лабордомс! — серьгедсть каршозост налксиятне. — Валгодо эентъ лангс.

Миша кузонтъ стявтызе ловонтъ лангс, карсинзе коньканзо.

Курок ялгатне уш эйлангсольть. Шайбась ёндолокс ливтнесь ве пестэ омбоцев.

Лейчирес стявтозь кузось Мишанень неявсь пиже пальтосо эйкакшокс. Сон аштесь ськамонзо веёно, вармась нурсесь тарадонзо.

— Сы Од иентень монгак рамавант акостькиця кузнэ, — мерсь Миша ды варьгинесэ нардызе судонзо.

ТЕЛЕНЬ ИНЖЕ

ТЕЛЕСЬ сась апак учо. Ловось вельтизе весе перть-пельксэнтъ. Ванямежень кудось ашти вирьчиресэ, мерят, ваясь лов потс.

Цёрынентъ авазо котьми каштом икеле.

— Ваня, цёрынем, кельмить капстанок, эрявольть валгстомс мацс.

Цёрынесь оршнесь, сайсь чаво кескав ды лиссь.

Панжизе латалксонь чикордыця кенкшентъ ды несъ: покш капста прянтъ вакссо нумоло. Пондакш, ашоло, стяв-тынзе пилензэ ды пелезь ванны цёрынентъ лангс. Ваняяк чатьмони.

Нумолкаесь тарск тейсь ды ёртовсь веёнов. Ансяк лисемс тензэ акува: совась кенкш алга, ней вана тесэ аш-тесъ Ваня. Цёрынесь каизе кескавонтъ ды кармась молеме нумолонтъ ёнов. Тонанень теке эрявськак. Сон кирнявтсь кенкшентень. Ваня каявсь кундамонзо. Арась, нумолонтъ а кундасак. Сон мекев лиссь кенкшентъ алга ды ношкстась вирентъ ёнов. Цёрынесь автень кургт вансь мельганзо. Кадовсть ловонтъ лангс ансяк оргодицянтъ чалгавксонзо.

Ваня валгстнесь мацс капстапрятнень ды арсесь нумолодонтъ, янксесь: кода истя эзь кундаво тензэ мейсельмесь. Оймавтсь прянзо: «Бути вестъ сакшнось, омбоцедеяк сы. Ней кись тензэ содавикс».

Валске Ваня сыргозсь шкадо икеле.

— Удок-удок, цёрынем, школав зярс рана, — пшкадсь авазо.

Ваня пурнась-сэрнясь ушов.

— Тон ков? — кевкстизе авазо. — Вант, судот-пилеть кельмевтьсыть.

Ваня прянзо теизе амарикс. Лиссь кардазов. Састо

панжизе латалксонь кенкшенть. Ды таго неIZE нумолонть. Кенкшень чикордомадонть тона кепединзе пилензэ, кург-сонзоль капста лопа.

Цёрынесь састо эскельдяся ёнонзо ды ёртызе пальтонзо лангозонзо.

— А-а-а, понгить, ней уш а менят! — кецясь сон.

Ваня лепштитзе нумолонть мештезэнзэ ды ношкстась мартонзо кудос.

Ванта, авай, нумоло кандынь. Сон, авай, сонсь сась, капстадо ярсамо, — ёвтнесь цёрынесь. — Мон сонзэ кундыя.

Ваня нумолнэнтъ нолдызе киякс куншкас. Тона кекшсь эзем алов.

— Авай, миненек эряви сонзэ кирдемс телень перть, — мелявтозь кортась цёркась. — Кудосо лембе. Андомонзояк карман тантейстэ!

...Мольсь урок. Весе кунсолость Иван Петровичень, ансяк Ванянь арсеманзо чарасть веёнга. Иван Петрович кевкстизе:

— Ваня, тон мезде арсезевить? Мекс а кунсолат?

— Кунсолан.

— Арась, а кунсолат, мезде-бути лиядо арсят.

Цёрынесь стясь таркастонзо ды ярсыя аштесь прянь комавтозь.

— Монь кудосо нумолом апак андо, — ёвтызе Ваня мелявксонзо.

— Мезеть? — дивазевсь Иван Петрович.

— Нумолкаем.

Весе эйкакштнэ раказевсть.

Ваня учизе, зярд лоткить ракамодо, ды кармась ёв-тнеме, кода кундызе нумолонть. Весе кунсолость кургонь автезь. Конат кемсть, конат пеедькшнесть.

— Вана вади, сельмсэяк а кончты.

— Тунь а кенгелян, адыдо урокто мейле, невтьса нумолом.

Ней ялгатне кемсть Ваняненъ, арсестъ, мезть тейнемс нумолонть марто.

— Сонзэ эряви нолдамс оляв, — путсь превс эйкакштнэнь тонавтыцяст.

— Кельми, вачодо кулы, весе ярсамопелесь лов ало, — кортасть эйкакштнэ.

— Стака тельня нумолотненень, нармушкатненень. Тенст эряви лездамс, — мерсь Иван Петрович.

— А бути тикше тенст максомс, нармушкатненень суро каямс? Кармить ярсамо?

— Кармить! Ды сукпря тетя ёвтыть.

Те кортамонть мейле эйкакштнэ састь мельс лездамс вишка ялгаст туртов телень стака шкасто.

Ваня нумолонзо нолдызе оляв, мацтлангонь кенкшень алов керясь седе покш варя.

Мацтлангонь кияксканть кайсесь тикшеть, капста лопат.

Телень перть сакшнось ярсамо Ванянь «столовоев» кувака пилесь.

АЛКУКСОНЬ-АВОЛЬ ЯКШАМАТЯСЬ?

УДОМА шкась эйденъ кужосонтъ ютась, ды эйкакштнэ сыргасть Од иенень кузонтъ мазылгавтомо. Кузось пештитизе залонтъ тантейдеяк тантей чинеде. Эйкакштнэ стясть пиже чувтонть перька, вейкесь токшесь салмуksкетнень, омбоцесь ваннось налкшкетнень... Весе кецясть вирень инжентень.

— Вера Ивановна, зярдо сыть Якшаматясь ды Ловнясь-кесь? — кевкстнестъ эйкакштнэ.

— Ванды, ванды сынъ сыть, — оймавтсь Вера Ивановна. — Самозост кузонтъ эряви мазылгавтомс.

Вера Ивановна аштесь табуретка лангсо ды налкшкетнень, конатнень эйкакштнэ венстнестъ тензэ, понгавтнесь тарадтнэва. Вана сась Диманъ тетязо. Цёрынесь кецязь чийсь каршонзо. Течи сонзэ мельга састъ весемеде икеле.

— Аламось аштек, цёрам, — мерсь тетясь.

Сон састо кортась Вера Ивановна марто. Цёрынесь маризе кортамост ды сеске нусмакадсь.

... Валске эйкакштнэ капшастъ праздников. Валера сеске мик эзь содавоjak. Сон ульнесь теке алкуксонь овтыне. Марюша — урнэ, пулозо пондакш, кирьгасонзо карьксесэ понгавтозь пангинеть, пиче таташкетъ. Ёвксонь эрицякс, вирень ды кудонь раkшакс оршнезельть лиятнеjak. Ансяк Дима оршазель истя, кода свал, лангсонзо ульнестъ понкст ды панар.

— Тон мекс эзить орша нумолокс? — кевкстизь оятне.

— Монь мелемгак арасель тей самс, — мерсь Дима.

— Те мекс истя?

— Мекс, мекс?.. Миненек куз ваксс алкуксонь Якшаматя а сы.

— Кода истя?

— Вана истя. Вера Ивановна исяк энялдсь тетяненъ самс течи Якшаматякс, мон мария кортамост... Тетям а сави, мерсь, сы тарказонзо Серёжань тетязо.

— Сестэ, мезень Од ие?.. — ацирьгадсь Мишаяк.

— Адядо, адядо кузонть ваксс, — тердинзе Вера Ивановна.

Весе вейсэ, шалнозь, кедте-кедьс кундсезь сыргасть залов. Панжовсть кенкштне. Кодамо мазый кузось! Сон, прок ёвкссо, цивтордсь эрьва кодамо тюссо, палсть лангсонзо толнэть.

«Кодамояк Якшаматя арась», — арсезевсь Дима.

Эйкакштнэ стякшность кузонть перька, тетятне-аватне озасть веёнов.

— Эйкакшт, кить эзть са течи минек кузонть ваксс? — кевкстинзе Вера Ивановна.

— Якшаматясь ды Ловняськесь, — серьгедсть вейсэ эйкакштнэ.

— Сынст эряви тердемс. Серьгедтяно вейсэ, гайтев вайгельсэ!

— Як-шам-а-тя, Лов-нясь-ке! — сеересть эйкакштнэ.

Панжовсть кенкштне, ды совасть Якшаматясь ды Ловняськесь.

— Шумбратадо, ялгат! — мерсть сынъ. — Минь капшинек тенк, ардынек чить ды веть, вирьга, пандо прява, ловов паксява ды вана, сынек.

Дима прок эзь маряяк весемень тень. Сон вансь Якшаматянтъ лангс. Мезезяк сонзэ эзь моле Серёжань тетянзо, Ивановъ, ёнов.

«Те алкуксонь Якшаматя», — арсесь сон.

Праздникесь ушодовсь. Ульнестъ морот, киштемат, гайгсть стихть. Пурनावозтнестэ эрьвантень Якшаматясь нуцьканзо марто макссть казнеть.

— Мезть, эйкакшт, миненек туема лия таркав, тосоjak учить эйсэнек, — мерсть вечкевикс инжетне. — Сатано тенк сы иестэ, уледе шумбрат!

— Ды тусть. Курок киштематне-морамотне прядовкшность.

— Кенгелькай, — кежейстэ пшкадсь Диманень Миша. — Якшаматясь, келя, карми аволь алкуксонь, тарказонзо сы шабрат.

— Мон, Миша, лисни, ззинь чарькоде...

Амезть покш ломанень кортамот кунсоломс.

ЧАРОВТОМО МАШИНА

ИГОРЕНЬ классонь эйкакштнэ пек вечксызь важдемань уроктнэнь. Мезть ансяк а савкшны тенст тейнемс. Истя, аволь умок картонсто ды конёвсто тейнесть ракетат, самолётт.

Тонавтницятне пек учить те уроконтъ.

Валентина Ивановна шумбракстнемадо мейле мерсь:

— Течи, эйкакшт, минь тынк марто карматано машинань тееме. Эрьга, ушодтано.

Валентина Ивановна невтизе, кода эряви теемс пластинстэ машинанть, ды эйкакштнэ кундасть тевс.

— Вадрясто теик машинанть, — шнась тонавтыцясь Кустяйкина Олянь. — Кузовась покш, чаротнеде натой кемень.

Валентина Ивановна невтизе автомашинанть весе классонтень ды журналс Олянь фамилиянть каршо путсь «вете».

Олянь вакссо озадоль Игорьь. Цёрынесь аштесь нусманясто, прянь нолдазь.

— Тонь, Игорьь, косо машинат? — кевкстизе Валентина Ивановна.

Цёрыненть чамазо якстерьгадсь.

— Игорьь... тон эзить тее машина?

Цёрынесь стакасто укстась, таргизе парта потсто машинанть ды, киньгак лангс апак вано, венстизе Валентина Ивановнанень.

Тонавтыцясь кувать ванкшнось теезенть ды, okayники, кенярдозь мерсь:

— Эйкакшт, нетядо, кодамо вадря автомашинатейсь Игорьь?

Тонавтницятне велявтызь пряст Игорень ёнов ды талнозевсть.

— Вана те машина!

— Вадря!

— Вадрясь сон вадря, ансяк чаронзо арасть, — пшкадсь кие-бути. — Чаровтомомень машина?!

— Видеяк, Игорь, косот чаротне? — кевкстясь тонав-тыцясь.

Цёрынесь чатьмонсь, мейле састо ёвтась:

— Пластилинэм чарокс эзь сато.

— Эряволь киненьгак пшкадемс, максовольть.

— Пшкалинъ — эзь максо.

— Тон мекс, Оля, эзь максо Игорнень пластилин?

Тейтерьканть чамазо якстерьгадсь.

— Сон арсесь эсензэ машинанть ладямс комсешка чарот!.. — серьгедсь кие-бути.

— Жаль тензэ марявсь! — поладсь омбоцесь.

Валентина Ивановна чатьмонезь вансь Оля лангс.

— Лоткадо пижнемеде! — оймавть эйсэст Валентина Ивановна. — Мон течи Игорнень путовлинь, паряк, кото, ансяк вана истят отметкат арасть.

Зярдю прядовсь урокось, Игорень вакс чийсь зярыя цёрынеть.

— Мекс эзь ёвта, пластилинэть прядовсь, мон бу максовлинь тетъ, — лембестэ мерсь Жея.

— Монгак максовлинь, монгак... — кайсететсь вайгельть.

Оля нусманясто аштесь партанзо эшксэ. Сонзэ вакс кияк эзь моле, кияк мартонзо эзь корта.

МЕКС МИШАНЬ ЭЗИЗЬ ВЕЧКЕ

МИНЕНЕК макссть од квартира. Весе пек кенярдсть тенень: вейке комнатань таркас улить колмо! Монь ней ульнесь эсень столом, книгань кирдема таркам.

Вейкесь берянь — савсь явомс ялгатнень эйстэ. Минь вейсэ касынек, школасо вейке классо тонавтнинец. Мон мик авардинь туемстэ.

Од школасонть озавтымизь цёрыне марто, лемезэ Миша.

Од ялганть черензэ аштеть дубушки, прок сеелень салмукст. «Сеель» понгсь кель прязом.

— Мезе сельметь тетьксят? — калгодосто кевкстимим сон.

— Истяк, — мерян.

— Мекс истя ванат лангозон?

— Мелезэнь пек туить...

— Кенгелят! — мерсь сон. — Мон киньгак мельс эзинь тукшно. Весе а вечксамизь. Тонгак а кармат вечкемень... Мондень весе мерить сеель.

Мон мезеяк ёвтамо эзинь кенере, ушодовсь урокось. Вана кодамо ялга тень понгсь! Арсинь, весе а вечксызь. Лисни — сонгак киньгак а вечки? Кодя те истя?

Уроксо кевкстизь Мишань. Сон ёвтнесь вадрясто. Ансяк вейке таркасо ильведькс нолдась. Мон салавинька ёвтык-сэлинь тензэ. Сон нерькстымим бокас. Мейле мерсь:

— Бути зярдояк снартат тень ёвтамо — прят калгаса. Эсень прям ули. Моньгак зярдояк илямак кевкстне. Эряви эстеть арсемс.

Те седеяк талакавтымим. Пелеме мик карминь шабра-

донть. Ютко шкасто сон киньгак марто эзь корта, эзь налк-сеяк. Ансяк ваннось, кода киньгак правтомс эли тейтерькат-нень черьпулодо ноцковтомс. Секс маласонзо кияк эзь неяво. Кодак моли киньгак ваксс, сеске весе туить эйстэнзэ.

— Весе пелить эйстэть, прок уксадо, — меринь весть тензэ.

Сон эзь кежиявто. Ёжомарязь мерсь:

— Ёвтынть тетя, а вечксамизь. Монгак сюконякшномо икелест а карман. Кудосояк кияк а вечксамам: а тетям, а авам, а бабам, а Света сазором. Ва, сайтян зярдояк инжекс. Тонсь несуть...

Кудов молинек вейсэ. Сон кода-бути мелявтозь прядызе кортамонок:

— Валскестэ чокшнес весе мурнить эйсэнь. Те а истя, тона аволь сынст койсэ, пильгеть мекс рудазовт, шапкат мекс аволь истя путозь. Мейсэ чуман икелест? Ансяк мон тенст а тандавтован. Кадык сёвныть, стенгазетас сёрмалить, карикатурат артыть... мон ялатеке а тандадан.

Монь мельс эзть тье Мишань валонзо. Ансяк каршонзо молеме эзинь карма.

НедлЯчистэ Миша сась миненек. Аламос аштесь, тердимим инжекс.

— Тынк паро кудонк, — кортась сон модемстэ. — Несак, тонь столетькак эсеть. Монень книга акозонь путомс. Ды тонсь несак.

— Удома таркат пурнавлик, — вастымизь мурнемасо бабазо. — Портфельтькак а таркасонзо. Школань оршамопелетькак эрьва кува ёртнезь. Мекс Онгаень тонавтык кудос? Весе кудонтэ лапаксызе. Понксот, понксот рудаз потсот, — эзь лоткаво бабазо. — Зяро рудаз кандыть! Ялгат лангс варштавлиять!

— Сон кшнань карксонтэ учи, — пшкадсь тетязояк. — Светка, вешника!

Минь седе курок совинек икельце кудос. Озынек. Миша саизе гитаранзо.

— Течи невтить паро кино, — пачтясь сон монень. —
Войнадо. Адя мольтяно.

— Адя, — меринь. — Ансяк гитаранть пудык тарка-
зонзо.

— Киносто сан ды путса.

— Адя, Светка, мартонок кино, — пшкадинь мон.

— Тейтернесь мизолдозевсь ды седе курук кармась
оршнеме.

Минь колмоненек ношкстынек автобусонь учома тар-
кав. Автобусос Миша совась васенцекек ды озась.

Садо тей, тыненкак ванстан тарка, — сеересь миненек
сон.

Мон эзинь юта. Света мольсь Миша ваксс.

— Каштмольть, визькстэме, — нерькстызе лелянть. —
Нолдык тарказот сыре ломанень.

— Озак, бабай, — пшкардсь Светка вакссонок аштиця
бабинентень.

— Мон аволь сонензэ анокстыя тарканть. — Эно озак!
Тесэяк а кадтадызь, онгозь онгить, — моткодезь стясь
таркастонзо Миша.

Кинось алкуксккак пароль. Кудов модемстэ минек кор-
тамонок ульнесь кинодонть.

— Вай, кода пекем вачсь! — мерсь кудо малас пачко-
демстэ Миша ды ношкстась ваксстонок.

Светка тердимим сыненст.

Миша уш столь экшсэль. Ярсылъ ожань илештязь.
Авазо озавтымим моньгак.

Ялгам ярсась капшазь, цямкаезь. Ямось пенчстэнзэ
петнясь.

Миша нардызе ожасонзо кургонзо ды ношкстась икель-
це кудов.

Косо гитарам? — кежейстэ кевкстизе бабанзо.

— Тарказонзо пудыя, — машнететсь бабазо.

Миша одс таргизе гитаранзо.

Света марто ярсавинек, ёвтынек сюкпря каваницянтъ туртов.

— Миша, кшинек прядовсь, молевлить, рамавлиить.

— Монень азярдо, сеद्याмо ансяк ушодынь, — ёртсь каршо валт Миша.

Кшинь рамамо якинек минь Света марто. Сынек, кудосонтъ таго сёвнома.

— Тон куш урокозот кундавлиить, саты бренькаемс, — кежейстэ кортась Мишань тетязо.

— Азярдо, — мерсь каршонзо Миша. — Сизинь.

— Икелевгак теждентъ эряви мелявтомс, — саизе тетязь кеждьстэнзэ гитарантъ ды калгодосто мерсь:

— Озак урокот анокстамо!

— Мезе, мешан тетъ? — моткодсь Миша. — Ванды Людмила Васильевна ялатеке а кевкстясамам.

Мон сыргинь кудов. Миша эзь лисе ильтямон, паряк, монь лангскак кежиявтсь. Ильтимим Света.

— Тон иля апаргадо Миша лангс, — сэтъместэ, чумонь марязь, кортась тейтернесь. Сон аволь берянь. Косто-косто стяко сёвнотано эйсэнзэ.

Минь кавто иеть тонавтнинек Миша марто. Сон эзь полавтово, мекевлангт, седе калгодкстомсь. А ялгатнень, а тонавтыцянтнень Миша эзь кунсоло.

Лездась апак учонь тев, кона лиссь кизэнь каникуласто. Чись псиль. Эрявсь ютамс тенек зярыя вайгельпетъ. Шкась ульнесь обедтэ мейлень. Пильгенек эль усковить, истя сизинек. Миша сайсь мартонзо велосипед, арсесь, седе паро ули. Ансяк савсь модемс тензэ мартонок вейсэ. Кись паксянь, каворев. Лиссь апак учонь тев: кинть чирестэ неинек ёжовтомо ломань, сизьгеменьшка иесэ. Мештесэнзэ ордент, медальть. Седеезэ зярс чавсь.

— Эряви тердемс «скорой помощь»! — мерсь тонавтыцясь.

Миша каизе копоре лангсто кескавонзо:

— Мон ардтнян, ёвтан врачтнэнень.

Алкукскак, ваксозонок куроцто ардсь якстере крёст марто машина, шкань ютазь сась Мишаяк. Атяньт саизь, мерсть, путсызь больницяс.

— Карми эрямо? — мелявтозь кевкстясь Миша.

— Ней карми, — мерсь врачось. — Бути аволиде са кисэнек, куловоль. Сюкпря тонеть. Паро седееть.

Машинась тусь. Миша кувать вансь мельганзо. Теде мейле сон допрок полавтовсь.

Нать, шнамонь валтнэ лездасть.

ТЕЛЕНЬ ЧИСТЭ

ЯКШАМОТНЕДЕ тонавтницятне зярыя чить школав эзть яка. Ушось чевтемсь, ды эйкакштнэ эрва ёндо капшазевсть тонавтнама тарказост.

Миколка ды Женя мельспаросот вастовомаст кувалма. Зяро шкань перть эзть нее вейке-вейкень. Молить — сынсь ёвтнить-пачтить кулят.

— Ванока, кинь-бути кардазсто менсь скал, — Женя лоткась мик.

Миколка варштась тона пелев, ков невтсь Женя, натой серьгедевсь:

— Ды те сярдо!

Цёрынетне мольсть тюжа инженьть вакс, тона эскель-дясь эйстэст веёнов. Сярдось вансь лангозост оланя сельмсэ. Сон ульнесь кодамо-бути аволь ёроков, рунгозо шкань-шкань соракалесь.

— Сярдось, неяви, сэреди, — ушодсь Женя. — Сави панемс сонзэ кардазс.

Ялгатне кармасть сярдонть куроомо, ансяк тевест цяк а лисни. Цёрынетне — тов, сярдось — лия ёнов.

— Кунсолока, адя покштянь тердьсынек, — мерсь Миколка. — Сон вирень эрийтнень коест содасынзе. Теде башка, охотник.

— Мезекс миненек охотникесь, жаль чавомс сярдонть...

— Кияк а арсияк чавомонзо. Мерян, покштям ламо мезе соды ракшатнеде.

— Покштяй, а покштяй, — ве вайгельсэ серьгедсть ялгатне кудос совамсто.

— Мезе? — макссь вайгель каштом лангсто Тюма атя. — Ансяк сутяминь, мерян, аламось оймсян.

— Верепесэ сярдо кельмси, — ушодсь Миколка. — Эряволь лездамс тензэ.

— Ней мезе, каштом лангс ваксозон кузтемс.

— Мень тетъ пеедькшнемат? Тосо сярдось кулома лангсо, сон пеедькшни, — авардезь кортась Миколка.

— Минь снартниек сонзэ панемс тынк кардазс.

— Лисни, а кенгелетядо, — кортась Тюма атя. — Мон арсинь, тувталт вешнетядо, кода школав а молемс.

— Нуцкам, — пшкадсь атясь каштом лангсто валгомсто, — зярс пурнан, лато алдо сайтяя тикше.

Ялгатне капшазь лиссть кардазс, мельгаст — Тюма атяяк.

— А кеман, цѣрат. Кодамо сярдо те шкас карми учомонок, — яла моткодсь сон.

Цѣрынетне эскелясть капшазь, атясь натой эзь кенере мельгаст.

— Мон меринь, а карми учомонок, — кортась Тюма. — Адядо куш аштема тарканзо невтинк.

— Оно косо, оно косо, — кенярдозь серьгедсь Женя.

— Косо?

— Оно, чувтгнэнь вакссо, — невтсь сурсо цѣрынесь эчке калътнень ёнов, конат кассть Верепесэ кичиресэнтъ. Сынь састъ сярдонть ваксс, тонась тарск тейсь, ансяк эзь сырга. Нолдызе прянзо ды яла аштесь якшамосо, вармань а токамо таркасонть.

— Каинк тензэ тикшень, — мерсь Тюма атя.

Сярдось комась, никстизе тикшень, кармась пореме.

— Эряви ванстомс сярдонть, лездамс тензэ. Алкукскак, кодаяк сонзэ эряви панемс кардс. Тон, Женя, саик тикшень ды мольть кудоёнов, минь мельгат карматано панеме, — поладызе кортамонзо атясь.

Окойники, сярдось састыне сыргась Женя мельга. Куринкань ломантне абунгадозь вансть молицятнень лангс. Тюжала инжесь панезель кардс. Ялгатне ношастась школав. Састыне панжизь классонь кенкшень.

Урокгнэ эль прядовить, тынь ансяк удомсто стиде! — мерсь Ирина Тихоновна тонавтыцясь.

— Минь, тень, сярдо панинек Миколкамезень кардс.

— Ха-ха-ха! — каятотсь классонть келес.

Цёрынетненень эзть кеме.

— Тынь фантазёрт, — мерсь Ирина Тихоновна, — тердинк ванды школав тетянк-аванк, кортатано мартост.

— Васня тынк ветявлидизь...

— Ков? — керязь керизе кортамонть тонавтыцяст. — Ёвтнек, ков ветявлимизь?

— Минь ветявлидизь сярдонь варштамо, — поладызе кортамонть Женья.

— Кодат сярдот! — мурнесь яла тонавтыцясь. — Ули меленк тонавтнемс — озадо, арась — кудов.

— Ирина Тихоновна, Ирина Тихоновна, — энялдозевсть эйкакштнэ. — Адядо сярдонть вансынек.

Те шкастонть гайгстась баягинесь.

Классось пурнась куруксто, эйкакштнэ мольсть Миколканень.

Тюма атя панжизе икелест кенкшенть. Сярдось стясь, вансь сазтнень лангс.

— Вана сон, вирень мазыйкась, — мельспаросо кортась атясь.

— Кода сонзэ кундынк?

— Те оно Миколкат-Женят... — ушодсь атясь.

— Минь ансяк неинек, — мерсь Женья, — тезэнь панемензэ лездась тенек Тюма атя.

Те чистэнтъ саезь эйкакштнэ кармасть тукшномо сярдонть каванямкат: кие салсо почодозь кши кочом, кие модамарь ватксевкст, кие тикше...

Тундо малав сярдонть ёжозо вадрялгась ды класснэк ракшанть ильтизь вирев.

ОХОТАВ

РАХИМ раужо черь, теине сельме. Эрзякс кортамо а машты. Тетязо узбек. Авазо эрзява, Окся бабань шабрань тейтерь. Кортыть, сон одсто тусь Ташкентэв ды тосо лиссь мирденень узбекнень. Чачсь Рахим.

Ялгатнень ютксо стакачись ульнесь вейке: савсь кортамс рузокс. Ялатеке вейкест-вейкест чарькодсть.

— Тезэнь кадовт, — кортась тензэ Вася. — Минек куринкань футболонь командась лавшомсь. Хоккеень командасонть каявицякс аравттан, мон — командань капитан.

— Кодат хоккейть? — дивазь видькстась Рахим. — Мон тосо эйгак эзинь некшне, конька лангс эзинь стякшно, аволь хоккейсэ налксеме...

— Тонадат, — мерсь Вася.

Чинь-чоп ялгатне вейсэльть. Чить лей лангсольть, чопоньпелев налксильть футболсо. Рахим налксесь вадрясто, ялатеке велень цёрынетнень мельс седе тукшность сонзэ оршамотне. Истят тесэ зярдоак киньгак арасельть: понкстнэва кикст-кикст ды сёрмадовкст. Майканть лангсоак сёрмадовкс.

Рахимень мельс вана тусь экшелямось, ведьсэнтъ ютавтыль ламо шка.

— Минек тосо леенек арась, — кортась сон. — Арыксэ а экшеляват.

Укшномо Рахим эзь машто, секскак яла шолдорясь алкине таркасо.

— Минек лейнесь апокшке, улить эйсэнзэ домка таркаткак.

Истямо ули ташто ведькевенть вакссо. Састь тов Рахим марто Васят. Зярс Вася кайсесь, Рахим чопавтсь, сэрей чирестэнтъ.

— В-в-а-а-с-я-я... — каятотсь вайгелезэ, — н-ныряю!

Седе тов Рахим эзь маряво, эзь неяво. Вася чопавтсь. Рахим уш лейпотмаксоль.

Вася прячерде кундызе ды таргизе лейчирес.

Рахим уш эзь лексеяк. Вася седе курок комавтызе цёрыненть — ведесь валоволь потстонзо, мейле ушодсь лексевтемензэ: лепштясы мештензэ ды нолдасы, лепштясы ды нолдасы...

Окойники, Рахим лексезевсь.

— Ты почему не нырнул ко мне долго, — ульнесть васенце валонзо. — Я кричал «ныряю».

— Если бы ты кричал «тону», я прыгнул бы быстрее, — кортась Вася.

— Давай будем маме не сказать, а то купать не пускать будет, — энялдозевсь Рахим.

— Не скажем, — мерсь Вася.

Ковонь ютазь Рахимень авазо тусь Ташкентэв, Рахим цёрыненть кадызе аванстэнь.

Ялгатне ней учость теленть, Вася пек бажась тонавомс Рахимень конькасо киярктнеме.

Сёксень пиземетнеде ды канзёрктнэде мейле прась лов. Ялгатне кенярдсть тенень, сехте пек, нама, Рахим. Сон васенцеде несъ лов.

Рахим сёрмадсь сёрма эсь ялгатненень. «Шумбратадо, Камиль ды Султан! Садо велев эрямо. Тесэ ули лембе каштом ланго, ашо лов, кодамо тынь эзиде нее. Сон чевте ды ашо, прок вата, ланганзо киярктнить сокссо ды салазкесэ. Лейтне ды эрькетне вельтязь эйсэ, тува минь киярктнетяно конькасо, налксетяно хоккейсэ».

Омбоце кизэстэнтъ састъ кавто цёрынеть — Камиль ды Султан. Сыньгак телелангс кадовсть эрзянь велес, Окся бабань кедьс.

Вестъ Вася тердинзе ялганзо вирев, охотав.

Паро, виресь веленть эйстэ авасоло. Цёрынентне мольсть тов сокссо.

— Ванока, кинь-бути чалгавкст! — серьгедсь Камиль.

Весе варштасть сонзэ ёнов. Алкукс, од ловонть лангсо ульнесть апокш матравкст.

— Неть, нать, овтонь, — мерсь Султан.

— Сонензэ понгиндерят, ловажаткак мерькасынзе, — талнось Камиль. Вирень сэтъмесэнтъ мезе-бути марятотсь.

— Те — овто! — таго тандадозь серьгедсь Камиль, ды сынъ ношкстасть кие ков понгсь.

— Тынь ков? — бажась ялгатнень оймавтомо Вася.

Ансяк тандадомань пачк кияк сонзэ эзь маря.

— Камиль, Султан, Рахим! — сеересь Вася ялгатнень.

Кияк эзь максо каршо вал.

«Сыргам вешнемест, виресь покш, ёмить», — арсесь Вася ды сыргась пильге чалгавкскаст.

— Сул-та-а-ан! Ка-ми-и-иль! Ра-а-хи-и-им! — сеересь Вася.

Васолдо марязевсь:

— Тей, тей сак, минек ёнов сак.

Вася ютась пельвайгельпешка, вансы, куро ало пекест лангсо пракшнозь аштитъ Султан ды Рахим.

— Стядо седе курок, — мерсь Вася.

— Арась, а стятано, овтось несамизь.

— Камиль косо? — кевкстась Вася.

— Кекшсь овтодонть, — тошкась Рахим.

— Ка-а-ми-и-иль!.. — серьгедсь Вася.

— Вай, вай, вай! — аволь васоло каятотсь вайгель.

— Те — Камиль, те — Камиль, — кенярдозевсь Султан.

Ялгатне чийсть тов, косто марязевсь вайкстнемась. Камиль озадолъ комель лангсо, сорновтнесь кедензэ ды пувсесь лангозост.

— Мезе мартост? — кевкстась Вася.

— К-ке-еде-ень... кельместь, — ниреждсь Камиль.

— Нейке эждясынек, — мерсь Вася, — каподсь коморо лов ды кармась ёзамо Камилень кедензэ. Мейле омбоце коморо сайсь, таго ёзась. Якстерьгадсть Камилень кедензэ, суртнэ кармасть менчевеме.

— Ней тонсь ёзак, ёзак эйсэст ловсо, кельмемась юты, жарс каятыть, — тонавтсь Вася.

— Варьгат косот?

— Ёмасть варьган, — видькстась Камиль. — А содан, казонь ёмавтынь...

Ялгатне састо сырғасть кудов. Мольсть капшазь. Эрь-вась арсесь каштлангодо.

Вармась вешксь ды вачкoesь чамас.

АЛКУКСОНЬ ЯЛГА

МИША эрязаство чийсь ловонть алдо штадозь луганть ланга. Крендель пуло Шарик велясь перьканзо. Вана сынь пачкодсть Штирьма леенть чирес, кузсть лов шушмо лангс, кармасть налксеме. Миша мольсь шушмонть чирес, ловось кармась туеме пильгензэ алдо. Сон ёртовсь удалов. Шарик туеме эзь кенере, прась леентень ловонть марто вейсэ.

— Шарик, Шарик! — тандадозь сеересь Миша.

Кискинесь уш лейкуншкасоль. Чадыведьстэнтъ неявсь ансяк судозо. Миша вансь лангозонзо ды авардсь:

— Вай, кискам!..

Авардэзь ношкстась кудов.

— Меze мартот? — тандадозь кевкстизе покштязо.

— Ш-ш-ш-а-а-рик, — цёрынентень ниреждемань пачк эзь ёвтаво валось.

— Тон моразь ёвтык, меze лиссь, моразь, — кармавтсь покштясь.

Мишань кежензэяк састь покштянзо лангс. Келезэяк панжототсь:

— Тосо кискам ваясь, тон — морамо кармавтат. Штирь-мас ваясь, — пачтизе апаронзо Миша.

— Ковгак а вай, — оймавтызе атясь. — Эзь вая.

— Ва-и, — икнетезь мерсь Миша. — Адя, покштяй, таргасынек, мон машинань чаронь камера лангсо уян, таргаса ведьстэнтъ.

— Адя эно, идесынек, — мерсь атясь.

Покштят-нуцъкат сыргасть Штирьма леенть ёнов. Миша кевердсь икелензэ резинань чаро.

— Ваясь, ваясь Шарик, — нернесь молемань перть цёрынесь.

— Эзь вая, — кемевтсь покштязо. — Бути вай, сайтяно од. Темень киска, бути а машты укшномо?!

Эть кенере леенть чирес пачкодеме, марясть кискань онгома. Пулосонзо яхоезь, ваксозост ардсь Шарик.

— Вай, Шарик! — серьедезевсь Миша. — Эзь вая, эзь вая!

Шарик стясь удалце пильгензэ лангс, икельцетнень пугтынзе Мишань мештес, вансь сельмезэнзэ, прок кевкстнесь, те истя кода тон зыянс кадымик?

— Меринь теть, кискась а вай. Несак, эзь вая. Лисни — алкуксонь киска, — ёвтызе валонзо покштязо.

— Ков тон? — серьгедсь Миша. — Велявт!

Шарик эзь кунсоло. Сон сасызе осканть ды кармась нерьсэнзэ тулкадемензэ лейчирентень. Панизе чирентень ды эзь лисе ведьстэнтъ се шкас, зярс Миша эзизе сае осканть кедезэнзэ. Зярдэ лиссь, сорновтынзе понанзо, эйтэнзэ эрьва ёнов ливтнесь ведьбайгеть.

— Адя, Шарик, — мелявтозевсь Миша, — ормалгадат... Ялгатне чиезь тусть кудов.

— Тон истя мезть сокарят тосо каштом лакгсонть? — кевкстизе Мишань авазо.

— Те аволь мон, те — Шарик, — мерсь Миша.

— Шарик? — дивазевсь авазо. — Истя мекс сон кузсь каштом лангс?

— Понанзо кости. Сон течи, авай, оскам мельга чады-ведьс чопавтнесь, пелян, илязо ормалгадо.

Тундонть полавтызе пси кизэсь. Шарик эзь кадно азоронзо. Сырги Миша вирев, Шарик мартонзо. Сырги экшелямо, таго серьгедьсы кискинтень. Шарик виемсь, кассь покш кискакс, понась лангсонзо валакадсь, кармась цивтёрдомо.

Миша ды Вася ялгазо мольсть экшелямо. Тикше потмова менчевезь яннэванть цёрынетнень икеле чийсь Шарик. Сон псидентъ автизе кургонзо ды ливтизе келензэ.

Штирьмань ведесь цитнесь чинть каршо. Вейке песэнзэ кассть сэрей чейть, омбоцесь ацазель кевне марто чуварсо.

Тесэ налксесть эйкакшт, экшелясть. Мишат-Васят кайсесть ды — ведентень. Шарик кадовсь лейчирес. Сон ве сельмен-зэ конизе, омбоцесэнтъ ваннось экшелицятнень мельга.

Мишат-Васят булдорясть чирентъ маласо.

— Пельтядо васов уеме, — пейдсть лангсост седе покш цёрынетне.

— Мезе, паряк, уйтяно, — мерсь Миша ды сыргась леентъ куншкав.

— Тон ков? Велявт мекев, — серьгедсь Вася.

Зярдс Миша уйсь куншка видьс, кармась маштомо вие-зэ. Велявтсь мекев. Сон яла седе сеедытэ аволясь кедьсэнзэ, ансяк цёрынесь пулькась ве таркасо.

Миша тандадомань пачк пижакадсь. Шарикнень теке эрявськак. Сон онгозевсь ды ёртовсь ведентень, уйсь Мишань малас. Миша сеске кундась пулозонзо. Кискась тусь уеме берёконтъ ёнов. Мишанень сась вий: потась тандадомась, аламонь-аламонь уйсь икелев, Шарик лездась тензэ.

— Шарик, минь тонь марто козоньгак а ёматано, — мерсь сон, кода лиссть тикшентъ лангс. Перьканзо пуромсть весе, кить ульнестъ лейчиресэнтъ.

— Те вана киска, те вана ялга, — شناсть Шарикень. — Тон, Вася, берянят ялгась, ззить уе лездамо.

— Тыньгак аволь партнэде, тыньгак эзиде лезда, — мерсь ялганть идемга Миша.

— Кунсолок, Миша, — максык монень Шарикень, — знялгась Вася.

— Мезе? — дивазевсь Миша.

— Ну, миик.

— А максса, а миса. Те истя кода ялга миемс?

— Ха-ха-ха... Кодамо ялга кискась? Ниле пильгсэ ялгат а эрсить.

— Эрсить, ды пек паро ялгат. Моньгак Шарикесь истямо. Арась, а максса, а миса.

СЕРЁЖАНЬ КАНИКУЛАНЗО

СЕРЁЖА эри ошсо. Покштязо ды тетязо важдит заводсо, цёрынесь зярс тонавтни, ламо ловны, ошсонть малав весе музейтнень ютынзе, яки театрав ды кино. Весть киносто несь, кода эрить велесэ. «Кодамо паро тосо: келей паксят, вирть, пандот, умарьпиреть... Куш весть неемс те мазычинть эсь сельмесэ, маласто, чишка эрямс тосо!», — арсесь Серёжа.

Весть тонавтнемадо мейле покштязо сайнизе нуцканзо Велень хозяйствань выставкав. Теде мейле сон кармась энялдомо чис-кавтос велев молемадо.

— Вана прядови тонавтнема иесь, ды ардтнетяно, — кемевтизе покштясь нуцканть.

Ансяк эзь саво топавтомс те меленть. Ормалгадсь тельня атьась ды кулось. Серёжа пек авардсь кисэнзэ, сон пек вечкилизе покштянзо.

— Тонавтнек, цёрынем, седе парсте, — оймавтсь Серёжань бабазо. — Сы иес касат седе покшсто, седе ламо кармат чарькодеме. Тосо неявомо карми.

Серёжа тонавтнесь ды велев бажамонтькак эзизе стувтне. Сась весть прызонзо арсема: модемс тов съкамонзо. «Аркадий Гайдар кемготово иесэ командирэкс ульнесь, — арсесь цёрынесь. — Покштям кемзисемге иесэ тусь войनाव...»

Прядовсь тонавтнема иесь. Каникулат! Серёжа мольсь кудов ялганзо марто. Весе ёвтнесть, арсесть, косо ютавтсызь кизэнтъ.

— Мон авань марто молян иневедь чирев, — шнась прянзо Иринка.

— Мон — оймсема лагерев, — пачтясь Юра.

— Мон теске кадован, — мерсь Саша. — Дачанок маласо ули эрьке, карман калонь кундсеме, экшелямо.

Серёжа чатьмонсь.

Каникулань омбоце чинь валскестэ таргизе рюкзако́нзо. Путсь эйзэнзэ оршамопель ды ярсамка. Рюкзако́нь сюлмамсто совась баба́зо.

— Ков пурнат? — дивазевсь сон.

— Туян велев, кизэнь перть тосо карман важдо́ме.

— Косо кармат эрямо? — мелявтозевсь баба́зо.

— Кияк яла нолдасамам, — оймавтызе Серёжа сырь-каензэ.

Обедтэ мейле сон сыргась килангов. Столензэ лангс кадсь сёрмине: «Тетяй ды авай! Мон туинь велев. Учодо эйсэнь сентябриянь васенце чинтень. Илядо ризнэ, сан шумбрасто».

Баба́зо эзь карма кирдемензэ, максь тензэ ярмакт, ильтямсто кутмордызе. Мейле кувать вансь мельганзо вальмава. Серёжа ардсь велев поездсэ. Удалов кадовсть велеть, зярыя станцият. Цёрынесь теке педясь вальмантень, сон васенцеде несь лия эрямо: пижелдыця паксят, кие соды ков ветиця менчевезь кить, велеть, асодавикс ломанть.

Чопотетсь, цёрынесь мадсь. Валске сыргозсь чинзэ мартто. Кевкстясь, кува ардыть. Поездэсь, ва, Чаунзас пачкоди. Серёжа ледстизе, косо те станциясь. Валгсь. Неи — аштить машинат. Энялдозевсь, саевлизь сонзаяк. Озавтызь. Кись мольсь келей паксява. Розесь сэреель, лымбакстнесь, неявьсь пиже-ожо иневедекс. Вана апо́кш лейне. Сон таркань-таркань кекшни чей потс ды парсте а неявияк, чиреванзо касыця каль кура́кштнэ комасть вельксэ́энзэ...

Машинась лоткась покш велепес. Серёжа валгсь. Сон састо мольсь ку́ринкаванть. Кинть чиресэ чельксэ́нтъ потсо э́кшелять сара́зт. Кудотне апо́кшт, вальмаст мазылгавто́зь чувто́нь налишниксэ, умарьчувто э́кштэ а неявитькак. Сэрей каль ало, эчке чочко лангсо, оймсесь шержей а́ят, вансть Серёжа́нь пелев, арсесь сода́мс, кинь те ну́цькась. Лисьмалангсо́як аватне ма́рявиксстэ кортасть: «Ванодоя, кинь-бути ну́цьказо сы оймсе́ме. Кинень, каня, сови?»

Кинень сова́мс, Серёжа сонс́ькак эзь со́да. Мо́лемстэ ва́рштавкссо вешне́сь, кинень сова́мс. Пачко́дсь та́што кудо

видьс. Паряк, тесэ эри сыре ломань... Ташто лазонь кудо-
прясь кува-кува пандтнезь, кардазось чиремсь, пирявксось
сяворема лангсо. Серёжань мельс пек тусь лисьмакаргось,
кона аштесь кузтемпень маласо. Цёрынесь менстизе
рюкзаконзо, путызе кузтемалангс ды эзь цидярдо, молись
лисьманть вакс. Кундызе нерь ладсо новолезь жолгинень,
конань песэль ведрась, ды таргась ведь. Таргамсто увтя-
мось чикордсь. Серёжа мельспаросо вансь ведрасо ванькс
ведентень, косто, прок чавачамасо, несь прынзо. Ансяк
комавтызе ведранть, кода каятотсь:

— Эй тон, цёрынька!.. Мезть тосо тейнят? Ва, иля пра
лисьмантень! — серьгедсь вальмастонть сыре баба. — А
содаваткак кинь.

— Мон, бабай, аволь тестэнь, мон ошто сынъ... —
пшкадсь цёрынесь.

— Кода тезэнь понгить?

— Сынъ вана велев важдеме, — виздезь ладсо мерсь
цёракаесь.

— Лездамо? — дивазевсь бабась. — Мень тон лезды-
цят?!

— Кососяк яла маштован.

— Эно, эно. Тев, нама, муеви. Кизна велесэ важдицят
эрявить. Велетнестэ ошов яла оргодить, тон — ошто, — кор-
тась бабась. — Тон кинень валгить? Раськеть тесэ кить?

— Китькак арасть. Кияк, паряк, нолдасамам эрямо.
Мон аволь стякодо.

— Совак эно монень, кудось чаво, ансяк аволь уш пек
вадрятнень эйтэ, — кортась бабась.

Серёжа панжизе чикордыця кенкшенть ды совась. Ку-
дось покшоль ды пельсчаволь. Кенкшенть эйтэ вить пеле
аштось удома тарка, стенанть кувалт кувака эзем, ужосонть
покш столь, лангсонзо розень кши ды салдырькс. Вана весе
кудопотмонь сюпавчись. Стенасонть зярыя фотот.

— Те вана тейтерем, неть нуцкам, — ёвтнесь ды нев-
тнесь сурсонзо бабась. — Сынъ эрить васоло, монень пек
а сакшныть, тевест, келя, ламо, шкаст арась.

Бабась пурнась столъ.

— Истя, мерят, оймсеме велев сыть? — кевкстизе цёрынентъ.

— Аволь оймсеме — важодеме, — кеместэ мерсь Серёжа.

— Паро важодицясь парсте ярсы, — пейдезевсь бабась, — мон ванан, беряньстэ ярсат.

Кудосо те шкане семиянек мелявтсть Серёжадо. Ловнызь сёрманзо, эзть сода, мезе арсемскак, косто сонзэ вешнемс.

Серёжа сеске кундась тевс — витнизе эмежпирень пирявксонтъ, керсинзе кудонтъ икельде зыянов тикшетнень. Пиципалакстнэ, кирмалавтнэ сявордозельть, ды цёрынесь лиссь вальмалов футболсо налксеме. Велень цёрынетне нармункс ливтясть ваксозонзо.

— Карматано налксеме? — пшкадсь од ялгатненень Серёжа.

Налксемстэ цёрынетне теевсть содавиксэкс, эрвась бажась содамс, костонь сыцясь.

— Мон сынъ велев лездамо, — мерсь Серёжа. — Ванды молян вешан тев.

— Э-э, тесэ минек тевтнеде байтяк, — кармась ёвтнеме Миша. — Школасто эйсэнек кучить эмежпиресэ, умарьпиресэ, вирень питомниксэ важодеме. Икелевгак викториясь кочкама. Сон уш кенереме кармась.

— Монъ сайсамизь? — энялдозь кевкстясь Серёжа.

— Сайтядызь. Вана колмо чить оймсетяно — ды тевс. Невтьсынек тетъ велентъ, умарьпирев мольтяно. Тосо ка-сыть умартъ, сливат, атямартъ, грушат.

Невтизь Серёжанень тесэнь нешкепирентькак.

Вестъ пшкадсь тензэ сакалов атя.

— Парсте тон теить — сыть миненек лездамо, сюкпря тетъ, — мерсь сон ды сявордызе кедензэ.

Эйкакштнэ ойсестъ машинава, ардсть вирев. Экше, нармунтне вирень келес гайгевтитъ жой морост. Вирьсэнтъ марявсть эйкакшонъ гайтев вайгельть. Цёрынетне керсестъ

алга тарадтнэнь, тейтерькатне кандтнестэ эйсэст, вачкасть машина малас. Серёжа бажась а кадовомс ялгатнеде.

Серёжань тетязо-аванзо сырмиксэльт вешнемензэ. Те шкане кандстэ сёрма. Сон ульнесь велестэ. «Нина Викторовна ды Андрей Петрович! Илядо ризнэ Серёжань кисэ. Сон эри монь кедьсэ. Важоди велесэ. Пек паро, превей цёрыненк. Моненьгак пек лезды. Тунь илядо мелявто. Мон мернинь тензэ кудов сёрмадомадо. Мекс-бути эзия реда, сёрмадсь эли эзь. Аютко тензэ. Адресэнк монень ёвтызе. Секс вана сёрмадан. Илядо ризнэ. Андан эйсэнзэ парсте. Сентябрянь васенце чинтень арды кудов. Бути мертядо, молян ильтямонзо. Уледе шум-брат. Сюкпря марто тенк, Евдокия Пахомовна Камбразова».

— Вай, сюкпря паро ломанентень! — каподизе сёрманть Серёжань авазо. — Нейке ардтано кисэнзэ....

Серёжа ялганзо марто важдостэ вирьсэ. Кудов молементэ несть «Москвич». Серёжа содызе эсест манинать.

— Серёжа-а-а!.. — серьгедсь Нина Викторовна ды чийсь цёранзо ваксс. — Цёрынем, Серёженька, — кутморясь эйсэнзэ авазо. — Мекс оргодить?

— Тунь эзинь оргоде, туинь велев важдоде, ды весе. Сёксня сан кудов, — кеме вайгельсэ кортась цёрынесь.

— Сёксес? — кевкстнесь авазо.

— Тесэ сёксес? Кияк тонь тезэнь а кадтанзат, — ушодсь мурнемензэ тетязо. — А мезть превстэ лиснемс. Нейке озак машинантень.

— А озан, ялган марто тарад лангсо ардан, — мерсь Серёжа ды кузсь тарадто пешксе кузовантень.

— Монень мезе, куш кабинанть пряс озак! — кежиявтсь тетязо. — Кудосо мон канжамот киртысынь.

«Москвичесь» сыргась. Мельгаст — Серёжамезтькак грузовиксэнтъ.

— Пурнак кудов, — кежейстэ мерсь тетязо велев самодост мейле.

— Мон меринь, сан ансяк сентябрюнтень, — кеместэ мерсь Серёжа.

— Адя, куш кавто-колмо чис, — энялдозевсь авазо.

— А молеван. Ванды монень стада ваном. Ваныцясь ормалгадсь. Пичкамозонзо минь карматано реветнень мельга якамо.

— Ков? Стада ваномо?! — ацирьгадсь авазо.

— Валске стямс тень пек рана.

Серёжа эзь саеве тетянстэнь ды аванстэнь, истяк эрясь ды важдось велесэ...

Сентябрясто Серёжань классо сёрмадсть сочинения: «Кода мон ютавтъя кизэнтъ». Ёвтнемс ялгатненень иень те мазый шкадонть ульнесь мелезэ эрванть. Серёжа кепедизе кедензэ сехте верев.

— Ней кунсолынк Серёжань сочинениянзо, — мерсь тонавтыцясь.

Серёжа стясь партанть экшс, саизе кедезэнзэ тетрадензэ ды кармась ловномо. «Кизэнь каникулам мон ютавтынъ велесэ. Якинъ од ялган марто вирев коромокс тарадонъ анокстамо...»

— Ха-ха-ха! — каятотсь ракамо.

— Тон вирьсэ чочкт эзить пильсе реветнень туртов? — згилясь Петя.

Серёжа чатьмоньгадсь.

— Кода порнесызь тонъ тарадот? Ды мезекс сынъ, зярдо лия коромдонть певтеме? — мизолдозь кевкстясъ Вераяк.

Класснэк вансть Серёжа лангс ды мизолдсть.

Серёжа пря эзь максо. Сон курооксто ёвтнизе, кода вельть эряви тарадонъ коромось.

— Истямо кортамось, монъ койсэ, тунъ а эряви, — пшкадсь Аня. — Мекс стяко керсемс чувттнэнь? Кадык касыть, зяро мазычи эйсэст!

Апак учне кенкшентень вачкодсть. Совась Людмила Васильевна.

— Минек школав сась сёрма ды посылка... Мон ловноса, мезе сёрмадыть.

Серёжань седеезэ тарск мерсь.

«Кучан Митяев Серёжанень поздоровт тонавтнема иень

ушодоманть кувалма ды казне кизэнь каникуласто велесэ парсте важедеманть кисэ. Фермерэнь хозяйствань прявтось Иван Васильевич Сезьганов».

Ловномадонть мейле Людмила Васильевна венстизе посылканть ды сёрманть Серёжанень.

Панжизь яштикенть. Сон пешксель якстере умарде.

Весе пурнавсть Серёжань перька. Цёрынесь покш мель-спаросоль. Сельмензэ цивтёрдсть. Умартнень сон явнынзе ялганстэнь, кудовгак сатотсть.

НУМОЛ МИША

МИША сыргозсь ранаяк. Мадемстэ сон марясь: тетьязо моли ошов. Уш зяроцеде тетянстэнь энялды саемс мартонзо, се яла алтни. Келя, вишкинят, вана касат, сестэ сайтян.

— Тон, цёрам, уш стить? — кевкстизе авазо.

— Стинь, — мерсь Миша.

Сон шлясь-нардась, тапардась конёвпотс кши кочом.

— Те кинень? — кевкстизе авазо.

— Эстенъ. Молян калонь кундсеме.

— Ярсавлить васня.

— Азярдо.

— Кода азярдо? Иля пеле, калот кияк а кундсесынзе.

Оно пачалкседе ловсо марто ярсак, — кортась авазо.

Миша ярсась капшазь ды капшазь лиссь ушов.

Кардазсо аштемс кувать тензэ эзь саво. Марязевсь машинань ардома. «Те тетянь ЗИЛ-эсь», — арсезевсь цёрынесь ды прась лато алов, илизь нее.

Тетьязо лоткавтызе машинанть ды совась кудос. Цёрынесь те шкастонть тейсь эсь тевензэ: састо лиссь кардазсто, кузсь кузовантень, конасонть аштестъ ящикть, эйсэст кудонумолот. Тонат венстнестъ нерест варятнева ды никсестъ асодавикс инженьт. Кальцьк тейсь кудо кенкшесь. Цёрынесь седеяк комась.

— Мишанень мезеяк рамак, — кортась ильямсто авазо.

— Иля мелявто, — мерсь тетьязо ды озась кабинас.

Машинась сыргась. Удалов кадовсь велесь, виресь. Кармась неявomo ошось. Миша шкань-шкань кепсесь прянзо, ваннось ошонть. Истят сэрей кудот ды уськс кундазь

автобуст сон зярдоак эзь некшне. Ошканть сынъ ардсть акувать. Пурдасть витев, кшнинь ортатнень ёнов, конатнень вельксэ сёрмадозель «Сывелень комбинат».

Тетязо тусь конторав. Те шкастонть кодат-бути цёрат кармасть машинастонть ящиктнень сайнеме.

— Вантаяк, ды тесэ вейке кроликесь эйкакшке, — дивазевсь асодавикс ломанесь.

Миша эзь сода, мезе теемс. Туемс аков, тейнемс ульнесь амезе.

— Тон, цёрам, кият? Кодат тезэнь понгить? — кевкстнеть эйсэнзэ лелятне.

— Мон тетянь марто сынъ, — ушодсь Миша пелезь ёвтнеме. — Сельведтне анокольть туеме сельмстэнзэ.

— Те кода истя: тетят ардсь кабинасо съкамонзо, цёразо — кузовасо. Тесэ мезе-бути аволь истя, — кортасть сынъ Мишанень.

— Кадынк эйкакшонть. Косто? Мезе?.. Вана вередемиде, — мерсь вейкесь. — Паро, жив, эзь томбаво. Сы тетязо ды весементь ливтьсы лангс. Валгт, цёрам, — пшкадсь сон Мишанень ды саизе кедезэнзэ. — Кодат леметь?

— Миша.

— Вадра лемесь. Монень мерть Яков леляй, — мерсь сон Мишанень.

— Учок аламось, минь ящтиктнень кандтнесынек.

Миша стясь веёнов. Сонзэ майсевтсть эрвя кодат арсемат. «Мезе ули, зярдо тетям сы? — мелявтсь сон. — Эряви туемс тестэ, мейле туян кудов автобуссо, чокшнес пачкодян, се шкас тетянь кежензьяк ютыть...» Варштась Миша, лелятне эсь те-вест теить, а неить эйсэнзэ, ды ношкстась. Ортатнева ютамсто лангозонзо онгозевсь ванстыцянтъ кисказо. Цёрынесь тунь эзь тандадо эйстэнзэ, сынст велесэ аволь истят улить!..

Ломантнеде улыцяванть молить зняро, зяро арасть сынст весе велесэнтъ. Веенст капшить тов, омбонст — лияв. Кона ёнов сонензэ молемс? Миша вансь ардыця машинатнень мельга. Кодат ансяк арасть! Сон мольсь улыцянтъ кувалма. Вачочись карась уш пекензэ, ансяк эрявсь цидярдомс. Сон

эзь фатя, кода куруксто кармась чопотеме. Экшеньгадсь. Миша совась кшинь лавкас. Арась веёнов. Тетядонзо арсематне превстэ эзь лисне. Тетязо, нать, ней вешни цёранзо.

Алукскак, сон вешнесь Мишань. Цёратне васня педькшнеме ушолесть, келя, тон миненек кавто пильгсэ нумолкай ускить...

— Кодамо нумолкай? — дивась шоферэсь.

— Цёрынеть муинек ящиктнень ютксто.

— Монь цёрам?

— Тонь, кинь эно?!

— Монь цёрам кудосо.

— Ульнесь кудосо, ней ошсо, — кортасть важодицятне.

— Оно тия, комбинатканть, кува-бути яки.

— Кодя сон тезэнь понгсь, — Мишань тетязо яла эзь кеме ялгатненень.

— Нать, цёрат а содасак: ашоло, кудряв пря...

«Те сон», — арсезевсь-мелявтозевсь тетясь. Косто сон ней муема?..

Миша те шкастонть лиссь лавкастонть, мольсь ошонь улыцяванть ды арсесь озамс уське марто автобусос. Мольсь автобусонь озамо таркас, стясь ломантнень юткс. Кувать учомс эзь саво. Панжовсть кенкштне, Миша лиятнень марто совась автобусос. Сон ардсь озамо таркас кундазь. Ломантне совить-лисить. Миша яла арды ды ваны. Уське марто автобусось таго лоткась. «Паряк, лисемс?» — арсезевсь цёрынесь. Ансяк кенкштне мекс-бути эзь панжово. Совасть кавто ават, кездеэст сюлмазь якстере панкст. Анокстынк билетэнк, — серьгедсь вейкесь автобусонть келес. Пачкодсть сынь Миша ваксс.

— Тонь билетэть, цёрам, косо? — кевкстясь эйстэст вейкесь. — М-м-монь арась, — мерсь цёрынесь, — ярмакомгак арасть.

— Кодя истя арасть? Лисни, тон нумолат?..

«Те косто соды кроликтнень марто тей самодон?», — талакадсь Миша.

— Тон школав якат? — кевкстизе вейке авась. — Бути якат, содат, ардоманть кис эряви пандомс.

— Минек велесэ а пандокшныть, — ушодсь Миша, — автобусткак тосо арасть.

Ломантне мизолдозевсть, лиятне пейдезевсть.

Мишанень марявсь: весе ваныть сонзэ лангс. Чамазо якстерьгадсь, седеезэ кармась пек чавомо.

— Косто ярмакт саи тенк эйкакшось? — пшкадсь кисэнзэ вейке авась.

— Кадык аванзо-тетянзо пандыть кисэнзэ, — мерсь билетэнъ вешицясь. — Кинь те цёрынесь?

Кияк каршонзо эзь пшкаде.

— Мон ськамон, — мерсь цёрынесь.

— Паряк, сон кадовсь тетянзо-аванзо эйстэ? — пшкадсь лия ава. — Истя, цёрам?

— Истя, — пелезь мерсь Миша.

— Адя сестэ мартонок, — саизе цёрыненть билетэнъ вешицясь.

Троллейбуссто лисемстэ Миша неIZE «милиция» сёрмадовкс марто машинанть.

— Кундыде нумоло? — пеедькшнезь кевкстясь руль экшсэ озадо милиционерэсь.

— Кундынек, — мерсь аватне.

— Вишките нумолось.

«Теяк уш соды», — кежень пачк арсесь цёрынесь.

— Ардт участкав, — мерсь аватне.

Машинась сыргась. Сынъ ардсть ошканть акувать. Лоткасть колмо этажсо кудонтъ икелев. Лиссть вейсэ ды совасть тозонъ.

— Салыця ветятадо? — кевкстясь милиционерэсь.

— Аволь, те нумоло, — мерсь аватне.

— А-а-а, оно мезе. Тей сонзэ, тей.

— Монъ ярмакон арасть, бути улевельть, пандовлинь ардоманъ кисэ, — кортась Миша.

— Те цёрынесь кадовсь тетянзо-аванзо эйстэ, сонсь велестэ, — кортасть аватне.

— Вастомазонк, нумолкай, вастомазонк, — мерсть туемстэ сынъ.

Мишань мельс «нумолкай» валось истя эзь тукшно, натой каршост эзь пшкадеяк.

— Сак озак ваксозон, нумолкай, — мерсь милиционерэськак.

«Тьфу, теяк истя мери», — арсесь цёрынесь.

— Леметь кода?

— Миша.

— Тетялеметь, фамилият?..

— Лияськин Михаил Степанович.

— Пекеть эзь вачо, Михаил Степанович?

Миша чатьмонсь: меремс эзь — кенгелемат, меремс вачсь — визькс. Милиционерэсь нуртась чай, макссь пряникть. Мишань ков тусь виздемазо?! Капшазь прядызе весе ярсамканть. Милиционерэсь каванясь Мишань чатьмонезь.

— Сюкпря, — мерсь цёрынесь.

— Ёвтнек, кода тезэнь понгить?

— Мон вестькак араселинь ошсо, — а сеске ушодсь цёрынесь. — Тетям сакшнось кроликень усомо, мон — мартонзо.

— Те кода истя: тетят саинзеть ды кадынзеть?

— Сон эзимим сае, мон монсь, кекшинь кузовасо ящиктнень юткс.

— Лисни, тетят а содыак.

— А соды, — мерсь састо Миша.

— Зярдо те лиссь?

— Течи.

— Лисни, аумок. Ялатеке ней кудосо тетят-ават прят-пильтгь чавить, лайшить-авардить кисэть?..

Миша чатьмонсь, содась: тейсь авадрасто. Милиционерэсь кепедизе трубканть:

— Алло, те кроликень ферма?.. Милициясто звонить. Течи сась тенк кролик марто машина, шоферэсь Лияськин косо? Тердинк, инескетъ, телефонс.

— Тон, Лияськин?

— Мон.

— Монь вакссо тонь цёрат.

— Алкукс? Мон нейке!..

— Иля сакшно, учомак фермасо, монсь ускса, ялатеке
тень молема Килейбуев.

— Паро, суюпря тетъ, мон карман учомо.

— Курок сы полавтыця, ды минь сыргатано.

Милициянтъ марто сынъ сыргастъ Килейбуев уазиксэ.
Фермантъ малас пачкодемстэ вановтост прасъ кичиресэ
аштиця цёрантъ лангс.

— Те тетям, — мерсь Миша ды чиезь тусь тетян-
стэнь.

Тетят-цёрат сыргастъ кудов. Тердизь инжекс милицио-
нерэнтъкак, ансяк сон эзь моле, аютколь. Молемань пертъ
Миша ёвтнесь, косо ульнесь, мезе тейсь ошсо.

— Миша, — пшкадсь тетязо. — Кенгелемась — берянь
тев. Ансяк течи сави манямс авать. Мертяно тензэ, тон
ульнить мартон. Илязо ризнэ-мелявто.

Кудонтъ малас пачкодемстэ Миша васенцекс неизе
кузтемалангсто аванзо.

— Авай! — серъгедсь Миша ды ношкстась сонензэ.

Тона кутмордызе цёрканзо.

— Тынь те шкас косолиде? — кевкстнесь сон цёрат-
нень. — Мекс-бути седеем ризны, учан эйсэнк.

— Минь ошсо кирдевинец. Вешнинец Мишанень
портфель.

Миша чатьмонсь. Сон ансяк ней чарькодсь, кода бе-
ряньстэ тейсь.

ИЗНЯМОНЬ ЧИСТЭ

ТЕЧИ — покш чи. Велесь мазылгавтозь флагсо, шарсо, плакатсо. Гайги музыка. Ломантне парсте-мазийстэ оршазь эскелить велекуншкав, косо ашти памятник — кевстэ теезь солдат.

Талнозь оршни Митькань покштязояк.

— Шумбрат, покштяй! — пшкадсь цёрынесь совамсто.

— Шумбрат, шумбрат, нуцькам!

— Изнямонь чинть марто тонь!

— Сюкпря. Шкань апак таргсе азё сезть кузтемпестэ цецят, ды сыргатано.

Цёрынесь ёндокс лиссь, сон кецясь: покштязо стяконь таркав а сайсы. Курок совась мекев цеця марто.

Сынь вейсэ лиссть. Пертьпельксесь ульнесь маней. Чись, мерят, од тейтерь, вансь верде ды мизолдсь. Шкань-шкань пувась лембе вармине. Куринканть кувалт ютамсто цёрынесь яла вансь молицятнень лангс: вейке атинесь моли кромождозь, омбоцесь оно кедтеме. Сон кода-бути седе икеле сынст эзинзе некшняк.

— Варштакая, покштяй, оно вейкесь лездыця пильге марто моли.

— Те Сёма атя, неть костыльть кавалалонзо.

— Мезекс?

— Кодя мезекс?... Лездыть молемс. Вейке пильгензэ кадызе войнас.

— Нать, стувтызе?..

— Арази пильгеть стувтсыть? Ранявсь пильгес, ловажанзо штельксэнь штелькс тусть. Те паро, истя лиссь, ламот оно тюремань паксяс кадовсть — чавовсть. Весе вийсэст ванстась вечкевикс масторост...

Митька покштянзо марто путызь цецянь пусмонть солдатонтъ пильге алов. Памятникентъ малас ломантне яла мольсть ды мольсть. Састь сыретькак, одткак. Мейле школань прявтось являвтсь Изнямонь чинть а стувтомга килейнень озавтнамадо.

Весе кундасть тевс. Веенст чувность латкинеть, ом-бонст валясть, лиятне валность. Курок килейнетне венстизь ёлганя тарадкест маней, сэтьме менелентень.

— Кодамо течи паро чись! — кецязь мерсь Митька.

— Алкукс, нуцькам! — корсяня вайгельсэ пшкадсь покштязо. — Ванстодо те сэтьме мазычинть.

Сонзэ чамава ксनावокс певердсть сельведть.

— Тон, покштяй, мекс?

— Те мезеяк, неть уцяскань сельведть...

Митька кутмордызе покштянзо, ды сынъ чатьмонець сыргасть кудо ёнов. Кувать а стувтови цёрынентень те чись.

ТЕЛЕНЬ КИЗЭ

Уш зяроце тарго¹ ков чи якшамо ды якшамо. Лиясто вармась пуви истя кежейстэ, прок керязь кери, вешкезь вешки, ламо ловдонть пувась-кандсь. Тарьксэсь теи эсь тевензэ, ютыцятнень чамас сускозь сускони. Секскак ушосо ютыця чуросто неят. Эйкакштнэ истямо якшамоне школав а якить, тетятненень-аватненень вана ялатеке молема важдодеме. Секскак ламо тонавтнициятне ютавтуть неть читнень покштыст-бабаст кедьсэ.

Игорнень ды сонзэ Алёна сазорканстэнь паро. Сынст кавто бабаст, кавто покштыст. Куш кинень молить неть якшамо читнестэ.

— Течи мольтяно Сергей покштыянк ды Люба бабанк туртов, — мерсь тетяст завторкамсто.

— Ура-а-а! — вейсэ серьгедсть лелят-сазорт.

— Владик марто Людат тосот уш, — поладызе тетяст.

— Ура-а-а! — эйкакштнэ таго серьгедсть верьга вайгельть.

Шкань апак таргсе лелят-сазорт ушодсть пурнамо, аламо шкань ютазь уш оршазельть.

— Машинась анок! — совась мельгаст тетяст.

Семиянек лиссть ушов, капшазь озасть машинас.

— Кунсолодо покштыянк-бабанк, — ардомсто кортась аваст. — Ва, илядо озорова тосо. Сынь уш сыреть, виест аламо, лездадо тенст.

— Паро, — каршо мерсть эйкакштнэ.

Кинть лангсо таркань-таркань понгонесть ловонь кандовкст. А шождаль ютамс, ялатеке ардсть сынь а кувать.

— Вана пачкодинек, — курок мерсь тетясь.

¹Тарго — неделя

Сынъ вейсэ лиссь машинастонть ды капшазь совасть кудос.

Тосо сынст лембестэ вастызь покштыт-бабаст ды Владик марто Люда.

— Мекс истя кувать? — шумбрактнемань таркас кевкстизе Игорень Владик. — Монень а ки марто ульнесь налксемс.

— Эно минь тутано, — мерсть Игорень ды Алёнань тетяст-аваст.

— Ярсавлиде, прякан варчавлинк, — пшкадсь Олдай баба.

— Мейле кодаяк, важоме капшатано, — мерсть тонат каршо ды сыргасть.

Атят-бабат кадовсть нуцъкаст марто ськамост.

— Мезе, эйкакшт, прякатне, койсэнъ, анокт, — ушодсь бабаст.

Эзь кенере келес панжомо каштомкургонть, кудонть келес качадозевсь тандейдеак тантей чине.

— Садо эно лездадо! — серьгедсь сон нуцъкатненъ.

Сынъ ливтязь ливтясть каштомикелев.

Покштыт эрвантенъ макссь ваканнэ, козонъ бабаст путсь прякань-пряка.

— Кандынк столь лангс, — тонавтсь покштыт.

— Садо тагояк! — серьгедсь мельгаст Люба баба.

Мейле покштыт кандсь самовар. Путызе столенть куншкас, ваксозонзо — кото кружकिनеть.

— Атя, а атя! — серьгедсь бабась. — Сак, саик панжакаенть.

Аламо шкань ютазь покштысь лиссь каштомикельде лазнэ лангсо якстере цеця ёнов молиця панжакай марто.

— Вай, ведеськак лаказевсь, — кецязь мерсь сон. — Эряви тантей чине тикшине эйзэнзэ каямс.

— Атя, таргак холодильникстэ пангот.

Тона седе курук панжсь салтозь пангот.

— Ды аволь салтозь, кельмевтезтнеде, кадык солыть,

чокшне модамарь марто рестасынек... Эрь, нуцькат, эно ушодтано! — пшкадсь бабась эйкакштнэнень. — Неть вана кувакинетне — пангонь. Кирьксала прякатне — кстыень-мастумарень. Атя, керсик панжакаентькак.

Тона састыне керсизе, явшесь палонь-пал нуцькатненень.

— Ярсудо чай марто, — толковась сон. — Чаесь — вирень тикшестэ.

Ушодсть чайде корштнеме.

Ушосо вальма ваксс понгавтозь лазонть лангсо озязтнэ ярсасть тенст почодозь кши паморькстнэде. Клюкадить зярокстькак, чопавтсызь нерест ловс ды варштыть викшневкстнэнь пачк кудазортнэнь лангс.

— Монень, бабай, оштё умарень, монень — кстыень, — марявсть нуцькатнень вайгелест. — Покштяй, нуртяк монень чай.

Ушосонть марявсь вармань вешкема, шкань-шкань — кудоужонь цятнома. Эйкакштнэнень покштяст-бабаст кедьсэ ульнесь лембе. Кстыень тандейдеак тантей чинесь ледстватынзе кизэнь лембе, мазый ды сюпав читнень.

— Ярсудо, ярсудо, нуцькиненек, — каванясть атят-бабат.

— Саты, сюкпря, — ярсамодо мейле мерсть нуцькатне. — Пешкедсть пекенек.

— Эно паро, — мизолдозевсь Люба баба. — Чокшне лиясо-мейсэ каванятадызь.

Арась масторлангсонть седе покш уцяска: неемс шум-бракс нуцькат ды каземс тенст кеняркс.

ПОНДАКШ ИНЖЕ

СЁКСЬ, чись ялатеке эжди, прок кизна. Валске марто куринкатнень кувалт веле куншкав эскелить пакшат — тесэ ашти школась. Течи васенцекс пачкодсть Денис ды Игорьь — сынь дежурнойть. Истямо темень тееме васенцеде кармавтызь. Мелявтыть-талныть оятне. Совамо кенкшенть малас путсть парта ды кавто стулт, анокстасть конёв ды ручка.

— Киньгак а нолдатано полавкс карсемапельтеме! — яволявть Денис.

— Кой-кинь нолдасынек, — седе чевтестэ ёвтась Игорьь. — Кода а нолдасак Диманонь, сон мейле компьютерсэ налксеме а сайсамизь...

— Кода а нолдасак? Кода весень.

— Вант, теवेशь тонь, — эзь моле каршо Игорьь.

Тесэ кенкшесь панжовсь, ды совась Вероника Вячеславовна, сынст классонь ветицясь.

— Шумбратадо! Тынь шкадо икеле сыде, те паро, — шнынзе цёрынетнень. Мон нейке.

Алкуксак, курок сон кандсь якстере панкскеть, сюлминзе кедезэст.

Аламо шкань ютазь губолсо кармасть совамо тонавтницятне. Тонавтыцяст марто Игорть-Денист вансть, полаватыть-арась карсемапелест.

— Киньгак илядо нолда ушонь карсемасо, — кармавть Вероника Вячеславовна. — Куш ушосонть коське, ялатеке киякстнэ челькиить¹...

¹Челькиямс — покрыться пылью

Гайгстась баягинесь. Весе совсесь эсь класскаст. Оятне таго кадовсь ськамош.

Сэтьмечинть шкань-шкань колсесь тонавтыцянь ды тонавтницянь вайгельть.

Игорь панжизе кенкшенть келес ды нежедизе. Ушостонть совась ванькс кошт.

— Мяу, мяу... — апак учне марятотсь псакань мавкстне-ма.

— Варштака, Денис, кие тосо? — кецязевсь Игорь.

Тарчксонт¹ трокс стамбаро² эскельдась тюжа пондакш псака. Молись цёркатнень вакс ды кармась ёзамо Игорень пильгес.

— Те кинь псакась? — кевкстась Денис.

— А содан.

— Монгак эзия некшне.

— Паряк, азорозо вешни эйсэнэ?..

— Сонськак, маряви, вешни кудонзо...

Ялгатнень кортамост сезизе гайтев баягинесь. Цёрынетнень вакс пуромсть малав весе пакшатне. Эрьвась бажась вадяштамс пондакшкенть.

— Мон кудов сайса, — мерсь Ира.

— Кие тонеть макссы? — стясь каршонзо Денис.

— Азорось кастызе-тризе, тон саевлик!.. — мельга поладсь Игорь.

— Кие азорозо? — кевкстась Ксюша.

— Ки соды, — ве вайгельсэ мерсть Игорть-Денист.

— Зярс а муеви азорозо, паряк, монень макссынк? — знялдозевсь Лариса.

— Арась, кадык сон эри теске. Весенень мельспаро канды, — аравтызь цёрынетне.

— Сестэ монень левкс макстадо, зярдю левксий, — яла знялдсь Лариса.

— Моненьгак, моненьгак! — пижакадсть лиятне.

¹Тарчкс — порог

²Стамбаро — тихо

— Мезе явтадо? — кевксясь школань завхозось, Вася леля, кона те шкане ютась малава.

— Варштадоя, варштадоя, кодамо мазый псака сась школав! — кецнесь Лариса.

— Мон сонзэ таргошка кода андан, — ёвтась Вася лелясь. — Кузтемало эри.

— Левксьи, мон саян левкс, — таго мерсь Лариса.

— Мон кавто! — серьгедсь Ира.

— Кодат левкст? — пейдезевсь Вася лелясь.

— Псакань, кодат... — талность эйкакштнэ.

— Сон атяка, — мизолдозевсь завхозось.

— Кодат атяка? — абунгадсть пакшатне.

— Истя вана.

— Пекезэ оно кодашка, — эзь пота Ира.

— Пекезэ, пекезэ... вадря ярсамось истямокс теизе.

Левксэнь учицятне нусмакадсть, пряст нолдызь алов.

— Тынь, нать, матедевиде? — кевксясь косто а косто саевезь школань завучось Иван Петрович.

Сон лепштитизе стенасо плаштиненть — школанть келес гайгстась баягиненть дилендема.

Эйкакштнэ сралесть класскаст. Пондакшось кадовсь дежурнойтненть ваксс, венемсь партанть алов. Шкань ютазь матедевсь, нать, чарькодсь: тесэ сонзэ тарказо, весе кармить вечкемензэ.

КУВАКА ПИЛЕ

МЕЛЯТ Наташанень чачома чистэнзэ казсть налкшке — нумоло. Тейтернентень налкшкесь вечкевсь сеске. Сон ульнесь прок алкуксонь: пондакш, чевте ды, кода весе нумолотнеяк, нурька пулыне ды кувака пиле.

Тейтерькась удсеськак налкшкенть марто, эйденъ кужовгак сайнизе. Тосо весе пурнавкшность перьканзо, бажасть токшемс, вадяшамс Ашолкаень — истя сонзэ лемдекшнize Наташа.

Весть оймсема чистэ тейтернесь кода-бути нусмакадсь. Сон вансь Ашолкаень лангс ды арсесь: вечкевикс налкшке-зэ ней аволь истямо ашо, ие тензэ топодсь — кияк аволь баняв, ваннавгак эзизе сайне.

— Эрьга монсь шляса! — сась превезэнзэ.

Совась шлямо нупаль¹, нолдась кранстонть лембе ведъ, ушодсь нумолкаенть сапонъ марто шлямонзо. Човось истя ламоль, тона натой эзь неявояк потстонзо. Мейле Наташа ёрвалдызе човонть.

«Мезе ней теемс мартонзо?» — арсезевсь вишка азоравась. Тесэ сонзэ мельс ледсь, кода авазо понгавтни муськематнень верьга венстезь карьксэнтъ ланга.

Тейтернесь таргизе нумолкаентъ очкосто ды венстизе карьксэнтень — эль сатотсь сэрэзэ. Кемекстызе кавто пиледе карьксэнтень, ды начко нумолостонть поцёрсо чудезевсь ведъ. Тейтернесь мельспаросоль: Ашолкай шлявсь ды теевсь ашодояк ашокс, мазыйдеяк мазыекс.

Апак фатя панжовсь кудо кенкшесь, ды совась Наташанъ авазо.

¹Нупаль — комната

— Вай, тейтернем, тон уш стить? — кевкстясь сон кудос совамсто. — Мон вана лавкав якинъ, кой-мезе ярсамс раминъ.

— Мон Ашолкаень шлия! — прянь шназь мерсь тейтерькась.

— Кинь-кинъ?

— Нумолкаем, — толковизе Наташа. — Эйденъ кужосо тензэ, секень вант, аволь Ашолкай, Раужкай кармавольть мереме...

Авась седе курок совась ваннойс. Зярдэ неIZE пиледе понгавтозь налкшкентъ, лембестэ мизолдозь варштась тейтернензэ лангс:

— А мекс пиледе понгавтык, тейтернем? Сонзэ пилензэ истякак оно кодат покшт.

Наташа зярс-бути чатьмонсь, мейле мерсь:

— Сонзэ, лисни, а вестъ истя понгавтнизь, секс пилензэ истят кувакат? Эно покш билетне киненьгак те шкас берянь эзть тее: карми марямо седеяк парсте!

КАВТО КУДОТ

СЁГА атянь вальмалов свал пурнавкшныть куринокань сыре ломантне. Тесэ кизэнь пси чистэяк экише. Куз-темпесэ касыця пондакш куракшось, мерят, каясь пряванзо покш паця, кона идияк пидиця налtnэде. Те тарканть вечксы сонсь Сёга атяяк. Озы чочконтъ лангс, пештясы цилимензэ махоркадо ды апак капша тарги.

— Я, тон тесат? — кевкстизе ваксозонзо самсто Ёга атя.

— Косо эно монень улемс, — пшкадсь Сёга атя.

— Мон марян кардазсот мень-бути чавомат, арсян, мезеяк лазпанксто теят.

— Кодат узересэ тевть миненек теевить? Кудонь ванстыцякс маштовтано, сеяк вадря.

— Истямс истя.

— Те нуцькам кардазсо письмаркудо теи.

— Кие-кие?

— Сегорка, нуцькам, — мерсь Сёга атя гайтевстэ.

— Письмаркудо, мерят?

— Письмаркудо, письмаркудо, — пилезэнзэ мерсь Сёга атя. — Тон уш, ялгай, тунь а марят.

— Тонсь эно седе парсте марят, — аламодо кеждязь пшкадсь Ёга атя. — Письмаркудо, мерят... Кизэнь паро куншкат?.. Ха-ха-ха!

— Теньсэ берянесь мезеяк арась, — ушодсь Сёга атя. — Нурдотнень анокстак кизна, ридвантнэнь — тельня.

— Мень нурдодо ды ридвандо кортат?

— Вана мень: мелят шкастонзо эзинек тее письмаркудо, тундось сась — письмартнэ ливтнестъ-тейстъ таштонть велькска ды тустъ. Ней оно цёрам кудыкелев лавсят чавсь, кадовикс лазпанкстнэнь эйстэ нуцькам пурны письмаркудо, — яла кор-

тась Сёга атя. — А содан, кикс сон тусь: истямо превей, ёроков кедь, тевтеме тунь а ашти.

— Нурькинестэ — мастер.

— Мастер, ды кодамо! Мезес кунды — тейсы.

— Паро, мезесь вадря, се уш вадря. Монь нуцькаськак ёроков кедь. Эка, аволь кедть эйсэнзэ!.. Исяк чинь-чоп тейсь Онгаень туртов кудыне. Стявтызе кузтемпес. Ней пиземене-вармане кискась эсь лато ало карми аштеме. Алкукс, зярс сон мекс-бути а сови кудыненень.

— Паряк, визди?

— Паро лабордомс, мень виздемат кискатне содыть? Те сон а тонады кодаяк.

— Истя улияк.

— Кунсолока, адяка варштыка, — тердизе Ёга атя ялганзо, — чей а васов ютамс.

Ялгатне сыргасть кудыненень варштамо.

Кузтемпесэ кудыненень рисьме¹ вельде содозель кискась. Сон лембестэ вастынзе сыцятнень: содызе Ёга атянь.

— Паро кудынесь, — мерсь Сёга атя малазонзо пачкодемстэ. Кедьсэнзэ тия-тува токшезь, сон ютась кудыненень перька. — Кунсолока!

— Мезе?

— Мезе, мезе... Кудынесь кенкштеме!

Ёга атя келейстэ эскельдясь кудыненень ваксс:

— Эли а неят?

— Косо?

— Онот... Вай, алкукс варя арась!

— Секс, ялгай, кискась омбоце чи чары кудыненень перька, соваволь — а совави.

— Стувтсь Ёгине керямс кискантень кенкшке-вальмине, стувтсь... — оймавтсь прынзо атясь. — Эно зыянось а покш, те витеви.

— Витеви, витеви, — кармась оймавтомонзо Сёга атяяк.

— Ней, ялгай, адя тарказонок.

¹Рисьме — цепь

— Адя, оймсетяно, таргатано цилимень-цилим.

Сынь чатьмонежь сыргасть каленть алов.

— Сонсь мастерэсь косо? — кевкстяся Сёга атя таргамсто.

— Кие-кие?

— Мастерэсь, нуцкят.

— Тусь калонь кундсеме.

— Лисни, штюрбадо куток ярсат.

— Секень вант, истямо мастерэсь андтанзат.

— Покштйай, а покштйай! — сезизе атятнень кортамост кардазсто лисиця Сегорка.

— Мезе?

— Козонь ёмсить?

— Оно Ёгинень теевть кискань кудыинень ванномо якинек.

— Мон письмаркудонть прядыя, козонь стявтома?

— Козоньгак зярс а эряви, — мерсь Сёга атя, — азё пуктык латалов, мейле, мейле.

Сонсь кедьсэяк аволясь нуцканстэнь — тонанень эзь чарькодеве, мекс покштйась пани эйсэнзэ.

— Адя, ялгай, варштасынек кудыинень, — пшкадсь Ёга атя.

— Ужо, аштек, мезть ванат, тундось сы — несак, — Сёга атянь арасель мелезэ ванномс нуцканзо теевть письмаркудыинень.

— Тундос кие соды ки эйстэнек эрямо карми.

Ялгатне сыргасть письмаркудыинень ванномо. Сёга атя амельсэ панжизе келей ортанть, ды совасть кардазс. Сегорка пуктызе кудыинень мукорь лангс — седе вадрясто неявозо. Ёга атя весть, омбоцеде ютась перьканзо.

— Мезеяк а мерят: мезесь вадря, се вадря, — мерсь сон.

Сёга атя неть валтнэде мейле кувакасто таргизе оймензэ.

«Нуцкам эзимим правто визьксчамас», — арсесь сон.

— Арсекая, кодамо ёроков кедь нуцкят! — яла шнась шабрась. — Мик тараднэяк кудыинентень чавсь, кадык нармунтне лангсонзо оймсить, морсить.

Сегорка покштянзо марто чатьмонсть ды мельспаросо кунсолость шнамо валтнэнь.

Ёга атя истя варштасы, истя токасы кудыненть, кеде-зэнзаяк саизе, секень вант, сайсы мартонзо.

— Кунсолока, Сегорка, те кудынесэнтъ письмартнэ тельняк а кельмить, — мерсь сон. — Сёксня саить ды кадовить, а туить лембе масторов. Тезэнь оно зяро нармунть кельгить!... — тесэ Ёга атя чатьмонезевсь.

Канкстомсь Сёга атяк.

— У-у-у-ужока, а тень, косо варинесь? — кокнузь ладсо кортазевсь Ёга атя.

Атятне ней уш кавонест таго ванкшнызь-токшизь весе кудыненть — варине эзть муе.

— Кува письмартнэ совсеме-лиснеме кармить? — ала-модо казямосто кевкстизе нуцьканзо Сёга атя.

Цёрынесь чатьмонсь.

— Эно мезеяк, те витеви, — ней уш оймавтозь ладсо мерсь атясь.

— Иля мелявто, Сегорка, монсеськак тонь кондямо мастер: Онгаень кудонтень эзь кадо варя, — пейдезевсь Ёга атя.

Сегорка аламодо мизолдозевсь.

— Мезть, шабра, — поладызе кортамонзо Ёга атя, — тебенек таго раштасть: витнема нуцькатнень-мастертнэнь мельга. Молян Онгаинень варя теян.

— Миньгак кудынентень варине керятано. Истя Сегорка? — пшкадсь нуцьканстэнь Сёга атя.

— Истя, — эль марявиксстэ мерсь цёрынесь.

— Чопоньпелев садо штюрбадо ярсамо, Ёгине туекшнесь калс, — уш веёндо серьгедсь Ёга атя.

— Сатано, сатано, — пшкадсть покштят-нуцькат.

Аламось аштезь марязевсь шалт: шабратне керясть кудынетнес стувтозь варятнень.

Курок Ёгамезень вальмало ули одс аравтозь кискань кудо, Сёгамезень кардазонь пирявксонтень стявтыть письмаркудо. Ды аволь кодаткак, алкуксонь: кенкшке-варине марто.

СЕЛЬВЕДЬ МАРТО КАЗНЕ

КУРОК Сегоркань чачома чизэ. Сон эрва валске менчи сурт, лови, зяро чить кадовсть, — эрва чись цёрынентень маряви ковонь кувалмосо.

— Ура-а-а-а!.. Вейке чи! — серьгедсь сон течи кудонь келес. — Те, лисни, ванды.

Школав туемадо икеле цёрынесь озась столь экшс ды таго таргизе сёрмадовксонзо.

«Авам мерсь, кеменде ламо а тердемс, — ледсь мелезэнзэ. — Монь жо тесэ малав комсь. Ансяк кинь вана черькстамс: Денис парсте ашти орталангсо, Максимка кадык полузащитник, сонтемензэ а команда, Владик — центральной нападающей ды оштё шабрам... — арсесь цёрынесь. — Эрьга, мон тейтерькатнень а тердьсынь, сынь а футболсо, а хоккейсэ мартон а налксить, а автомат, а пистолет кедезэст а сайнить... Кудов а тердьсынь, торт школав кандан, тосо каванясынь...»

...Сегорка эзь удо, ловт, веньперть. Чачома чистэнтъ жо сонзэ сыргозтизе прякань тантейдеяк тантей чине.

«Истямо тантей чине яла эрси велесэ бабань чувтонь кудосонтъ, — ледсь цёрынентъ мельс, — зярдс сон каштомсо пани панжакайть. Ансяк истямо якшамоне бабам велестэ ошов а сы...»

Цёрынесь ансяк стясь, чалгамо эзь кенере, кода удома таркань чикорксонтень ношкстасть семиянек.

— Чачома чи марто! Чачома чи марто, Сегорка! — сеерезь сеерестъ тетянзо-аванзо, сазорозо ды бабазо!

Кона кутморясь, кона палсесь, кона лепштнесь Сегоркань кедензэ. Зярошка кеняркс ульнесь тензэ! Сон сехте пек кецясь бабанстэнь.

— Сегорка, минь казненек казьсынек мейле, зярдо сыть весе ялгат, — мерсь тетязо ярсамодо мейле.

«Таго учнемань-майсемань тевть», — арсезевсь цёры-несь.

— Те вана тортонть сайсак школав, каванясыть тонав-тниця ялгат ды Таисия Васильевнаны, — мерсь авазо ды венстизе тензэ якстере лентасо сюлмазь тапарксонть.

— Тесэ физруконтеньгак саты, Павел Васильевич-нень, — мизолдозь кортась цёрынесь.

— Нама, саты, — эзьт моле каршо лиятнеяк.

...Окойники, течис меельцеде гайгстась баягинесь, ды Сегорка сырғась ялганзо марто кудов. Тосо семиянек учость вишка инжетнень. Цёрынетне сеске ойсесть морганть перька. Сельметне палозь палыть: мезе васня саемс, мезе мейле?

Ялгатне эзьт стувто казнедентькак.

— Сегорка, минь команданть пельде ёвтатано теть по-здоровт, — ушодсь Владик, — ды казьяно весе ялгать ды Павел Васильевичень пельде хоккейсэ налксемань клюшка, шайба ды конькат.

— Минь вейсэ арсинек, мезе каземс, — ушодсь Сегоркань тетязо, — семиянок пельде казьяно хоккеистэнь оршамопельть.

— Моньгак ули казем, — ушодсь сазорказо. — Мон казян эсь кедьсэ викшнезь пачине.

Ашо коцт ланга викшнезь якстере цецятне ды кстыйтне неявишь прок алкуксонь.

— Ней монь казнень сайть, нуцькинем, — ушодсь ба-базо. — Мон лавкав а якан. Кодынь сеянь понасто носкат, варьгат ды шарф... Лембе теть улезэ тельня, а кельмевлить налксемадо мейле.

Бабазо мольсь нуцьканзо ваксс ды максынзе тензэ чевте казнензэ. Мейле лембестэ палызе, кеместэ лепштизе меш-тезэнзэ, ды мекс-бути поцёрсо тусть сельведензэ.

— Пазось максозо теть шумбрачи, — кортась сон сельве-день пачк, — уцяска, парсте тонавтнемс, вадря ялгат улест...

Сегорка кавто кедьсэ кирдсь казнетнень ды талакадозь арсесь, мекс аварди бабазо.

— Авай, авай, — пшкадсь Сегоркань авазо, — тон эдь оштё панжакайтъ ускить.

— Ускинь панжакайтъкак, ловсоjak, ды, пелян, истямо каванявксто ошонь эйкакштнэ ярсамо а кармить.

— Кода а кармить?

— Карматано, карматано! — сеерестъ цёрынетне.

Курок столь лангс кандозь панжакай марто ваканось чамсь. Мейле, кода эрси эрьва чачома чистэ, инжетне симсть торт марто чайде. Седе тов эрьвась мусь эстензэ теv. Веенст вансть спортонь передача, омбонст варчнестъ виест морамосо, лиятне ванность «Хоккей-футбол» журналонтъ...

Сегорка кенерекшнесь улемс тесэjak, тосоjak, ансяк прястонзо эзь лисне кевкстемась: мекс сонзэ чачома чистэ бабазо авардезевсь? Кодамо тувталось? Эдь тедеде сонзэ дневниксэ аволь ансяк кавтот, колмоткак пек аламо. Тонав-тыцясь зярдоjak эзинзе тердтне тетянзо-аванзо школав...

Паряк, неть ульнестъ уцяскань сельведть?

КНИЖКИНЭНЬ ИМЕНИНАНЗО

МИНЕК куринокань Яхимка цёрыненть телень кани-куластояк тевензэ а маштнить. Нейгак сон аноксты клюшканзо, коньканзо — пурнась хоккейсэ налксем. Ансяк оршась-тейсь, кенкшентень кие-бути вачкодсь.

— Совадо, совадо, — пшкадсь цёрынесь.

— Те мон, — мерсь совамсто сынст классо тонавтниця Таня тейтерькась ды венстясь Яхимканень конёвпанкс. — Кандынь теть тердема. Туян, капшан, Верепев тень молема.

Тейтерькась пекстызе кенкшенть.

Яхимка ильтямонзояк эзь лисе, талакадозь аштесь конёвонть марто. Кармась ловномонзо: «Вечкевикс ялгай! Тердяно эйсэть течи 15 чассо школав Книжкинэнь именинас».

Яхимка варштасть понгавтозь частнэнь лангс.

«Шкась зярс ули, — арсесь сон, — ансяк кие те Книжкинэсь?.. Паряк, шабра классос аумок сазь од тонавтницясь?.. Паряк, аволь се?.. Пек уш курок: тарго а тонавтни, тензэ уш чачома чи тешкстыть, ды мик школасо...»

Аламос аштезь кармась оршнеме.

— Эка, допрок стувтыя, — лоткавсь Яхимка. — Именинав казневтеме а якить.

Савсь велявтомс мекев.

Сон мелявтозь арсезевсь, састыне ютавтызе вановтонзо кудонть потмова. Лоткась книгань лавсиненть лангс. «Анна Ивановна яла корты: книгась — сехте паро казне. Паряк, саема книга?» — сась цёрыненть превс, ды сон саизе эйтэст вейкенть.

— Никул Эркай. «Од родня»... Эка, тень мон монськак эзия ловно. Эно кадык, ялатеке казьса, мейле зярдояк вешса ловномс, паряк, макссы.

Саи́зе книганть ды э́цизе пальтонзо потс: кияк илязо нее ды ушосо ловсо́як илязо па́цькаво.

Школа́в пачкоде́мстэ уш ве́ендо сон ма́рясь вайге́льть. Алку́кскaк, потсо ульне́сть пек ла́мо э́йкакшт. Яхи́мка понгавты́зе пальтонзо, ша́пканзо ды тусь залов. Кавалалонзо кирдсь книганть. Оза́мо э́зь кене́ре, ко́да гайгста́сь му́зыка ды сце́нанть ла́нгс лиссь Ми́тя, сынст классо тона́втни-цясь. Кады́к сон орша́зель аламо́до ли́я оршамосо, про́к бал-маскара́дов, Яхи́мка ялганзо я́латеке со́дызе. Со́дызе ды а́цирьга́дсь: «И́стя уш э́но мере́вельтька́к: ча́чома чи́сь Авта́йкин Ми́тянь».

Ми́тя сце́нанть ла́нгсто я́ла корта́сь:

— Течи́нь Кни́жкинэ́нь имени́натнесэ вансы́нек, кие зя́ро кни́гат ловно́сь. Ма́ксодо каршо ва́л литерату́рань коря́с кевксте́ман ла́нгс...

«Ли́сни, Кни́жкинга́к сце́нанть ла́нгс лиси́», — арсе́зевсь Яхи́мка.

Ми́тька юта́втсь пурна́возтне́нь ма́рто литерату́радо, сё́рмады́цядо э́рва ко́дат на́лксемат, ма́кснесь кевксте́мат. Яхи́мка ча́тьмонсь, кады́к ла́мо мезе́нь со́дылизе́як. Ме́кс-бу́ти меле́зэ́нзэ весе́месь э́зь туе́: арсе́сь, алку́ксонь имени́нат, те́сэ оно́ мезе.

— Ми́нек вастово́мась прядово́ма ла́нгсо,— шкань юта́зь ме́рсь Ми́тя.

«Те ва́на Авта́йкин!.. — са́сть Яхи́мкань ке́жензэ. — Ська́монзо сце́нанть ла́нгсо ча́рась, а Кни́жкин, а ли́я кие ара́сельть...»

— Не́й се́тне́не́нь, ко́нат се́хте па́рсте со́дасы́зь лите́рауранть, ма́кстано ка́знеть, — я́ла корта́сь Ми́тька. Ды карма́сь те́рдеме изни́цятне́нь.

Э́йкакштнэ́ вейке об́моце ме́льга лисне́сть сце́на ла́нгс. Э́рья́нтень ульне́сь ка́зезь кни́га.

«Мо́нень те́сэ а ме́зть те́йне́мс, ту́ема», — те́шксты́зе Яхи́мка. Ле́пшти́зе кавалалонзо кни́ганть ды сы́ргась.

— То́н ко́в? — кевксти́зе ке́нкш ва́кссо а́шти́ця фо́то-графо́сь.

— Мон...

— Тон, тон, весень...

— Мон аволь...

— Весе изницятнень снимасынек.

— Мон...

— Мон, мон... Весень вейсэ, — фотографось валгак эзь максо меремс Яхимканень.

— Монь а мезень кисэ, — Яхимка таго эскельдась кенкшенть ёнов.

Фотографось кундызе кедте ды аравтызе стена ёжос.

— Стяк вана тей.

Те шкастонть састь книга марто лия тонавтнициятнеяк.

— Стякшнодо малацек, вишкинетне — икелев, — кор-
тась фотографось ды аравтнесь эйкакштнэнь. Яхимкань
ствявтызе куншкас.

— Прянть верев кепедик, аволь кежей баранокс аштек,
— мурнесь лелясь Яхимкань.

— Ды мон...

— Ней чатьмонеде.

Те шкастонть снимицятнень ваксс пурнавсть зярыя
ваныцят. Яхимканень марявсь, весе ваныть сонзэ лангс.
Чамазо якстерьгадсь, толокс палсь.

Фототграфось арась веёнов:

— Вадря, весе ванодо аппаратс, вана тестэ нармунесь
лиси, мизолдозеведе... Весе. Сюкпря тенк.

...Яхимка кудов мольсь ськамонзо. Эскелясь стакасто,
пильгензэ эль усковсть. Истя сон а сизекшни хоккейсэ
налксемстэяк. Молемань перть мелявтсь: «Кода ней улемс?
Фотографось теи карточка, ды Анна Ивановна эйстэст вей-
кень, секень вант, кельгстасы стенгазетас. Сестэ школанек а
кадсамизь, мерить: прянзо изницятнень юткс эцизе. Паряк,
фотографонть муемс, кадык монь тосто нардасамам? Зня-
роксть тензэ пшкалинь снимамодо икеле, кунсоломонгак
эзь карма... Икелепелев карман содамо, мезе те истямось
«Книжкинэнь именинатне», прянть анокстаса кода эряви,
алкуксонь изницякс лисевлинь».

ГРИНЬКАНЬ КАНИКУЛАНЗО

МИНЕК школась — пандыне прясо. Уроктнэнь ют-ксо оймсема шкастонть вальмалксозо тейневи прок мекшень кудо. Седеяк пек — таштамковонь ушодкссто, зярдो читне манейть, лембеть ды эйкакштнэ бажить седе ламо улемс ялгасть марто, конатнень эзизь нексне кизэнь перть. Кортамотненень сестэ пе арась.

Школань сехте вадря футболистнэнь вечкевикс таркаст— пондакш килеенть ало эземнетнень лангсо. Течи тей, экше таркас, сась Дмитрий Иванович тонавытцясткак. Ваксозост капшась Гринькаяк.

— Шумбратадо, — пшкадсь цёрынесь весенень.

— Шумбрат, шумбрат, Гринька, — лембестэ весень кисэ мерсь тонавытцясь.

Лиятне марикскак эзть тее. Вейке омбоцеде гайтевстэ ёвтнестъ кизэнь оймсема шкадост.

— Мон уш оймсинь! — кортась Мика. — Колмо ковт ульнинь иневедь чирень лагерьсэ. Чинь-чоп пулькинек ведьсэ, кеверькшнинек чувар лангсо.

— Те, нать, оймсема, — прянь шназь сезизе Тимка. — Мон оно каникулань перть кундынь, койсэнь, тонна калт.

— Ха-ха-ха, — гайгстась вейсэнь ракамо.

— Мезть ракатадо, — эзь максо пря цёрынесь. — Бути эрва чистэ кундат вана истяшкат, — келемтинзе кедензэ, — сестэ, нама, зняро пурнави.

— Истяшка калтнэ ульманедентькак синдсызь, — эзь кеме Оха.

— Илядо пек мурне ялганк, — пшкадсь Дмитрий Иванович. — Калтнэ эно, паряк, аламодо седе вишкинелть, ансяк, кемеви, Тимка калонь кундсеманть вечксы. Гринька, тон мезть чатьмонят? — Тонь, паряк, каникулаткак арасельть?

— Сон кизэнь перть ошсо эзь неяво, — мерсь кисэнзэ Яшка. — Улема, ковгак оймсеме якась.

— Мон алкукскак кизэнь перть ошсо араселинь, — састо ушодсь Гринька.

— Мон мерян... — эзь цидярдэ Яшка.

— Мон бабань кедьсэлинь, велев тензэ якинь, — кармась ёвтнеме цёрынесь. — Кизна велесэ тевтнеде пек ламо. Велень эйкакштнэнь марто якинь бабань сеянзо туртов теле лангс лопав тарадонь анокстамо. Тикшеяк лединь. Ялгань марто витниек пирявксонзояк. Содавлидеяк, кода паро стадань ваномс!..

— Те мезе, стадань ваномояк якить? — кевкстизе Энька.

— Тосо ваньгь мельга-мельцек чинь-чоп, — толкови-зе Гринька. — Зярдэ чиполась¹ пачколесь бабанень, мон якинь Охрим покштянь марто ваномо. Кизэнь прядовома ёнов бабань марто важдодинек умарьпиресэ. Зяро сонзэ умарензэ! Зярыя кескавт макссь эйденъ кужов ды школав. Телень перть сатыть умартне!

— Те мезе, тон тунъ эзить оймсе? — ачарькодезь кевкстизе Дёма.

— Те, ялгат, улияк оймсема, — кеместэ мерсь Дмитрий Иванович.

— Мон велесэ аволь ансяк важдодинь, ялгацек якинек лейлангов экшелямаяк, калонь кундсемяк, футболсо налксемс шкаяк мукшнынек, — поладсь Гринька.

— Э-эй, э-эй! — школань кузтеманть ёндо марязевсь Мария Степановнань вайгелезэ. — Тынь, натъ, баягиненть-как эзинк маря?..

Цёрынетне весе вейсэ капшазь стясть ды сыргасть школанть ёнов. Мольсть чатьмонезь. Паряк, весе арсестъ Гринькань каникуладонзо, кода парсте ды лезэвстэ цёрынесь ютавтынзе кизэнь читнень.

¹Чипола — очередь

ЛЕЗДЫЦЯТ

ОКОЙНИКИ, гайгстась баягинесь. Тонавтницятне класстнэстэ лиссть кить коридоров, кить — ушов. Уроктнэнь ютксо кувака оймсема шканть вечксызь, паряк, весе тонавтницятне. Сонзэ самонтъ свал учить Ивашка ды Миколка ялгатнеяк. Паро, налксемейк, ярсамояк кенерят.

Ялгатне арасть лиятнеде веёнов, капшазь ярсасть умарде.

— Вана нетне, якстеретне, седе тантейть, — кортась Ивашка.

— Ожолатнеяк а берянтъ. Паряк, течи тагояк мольтяно? — кевкстась Миколка.

— Течи а эряви, кадык умарьпирень ванстыцясь аламос оймси, — ёвтызе мелензэ Ивашка. — Ансяк исяк мельганок чийсь. Зярыя чить ней удомояк а карми.

— Истямс истя... Тонь зярояк умареть кадовсть? — таго кевкстась Миколка.

— Вейке ансяк.

— Таргик, кавтов сэвсынек.

Ивашка таргизе зепестэнзэ умарентъ, сусксь эйстэнзэ ды венстизе ялганстэнь.

— Варштакая, кие сы! — абунгадсь сон те шкане не-ездентъ.

Миколкаяк прок канкстомсь.

— Ды те умарьпирень ванстыцясь, Тёпа атя!

— Нама, сон.

— Мезть ней тейнемс?

— Мезть, мезть?!? Мезе иля тее, сон эскели школав.

Пиресэ эзимизь кунда, школасо Антонина Петровна мери тенек, ды минсь тензэ мольтяно.

Дильнезевсь баягинесь, ды весе тонавтнициятне кадызь налксемаст, ношкстасть школав. Веёнов кадовсть ансяк кавто ялгатне.

— Шкадо икеле иля мелявто, Миколка, адя, — оймавтсь Ивашка. — Паряк, миненек а сови. Арсят, содавинек тензэ ды эзимизь стувто?

Цёрынетне састо сыргасть классонь кенкшенть ёнов. Потот марявсть кортамот-шалномат.

— Антонина Петровна зярс эзь са, — кецязевсть сынъ.

Панжизь кенкшенть ды совасть класс. Капшазь мольсть эсест партаст ваксс. Эзьт кенере книгасть-тетрадесть таргамо, кода панжовсь кенкшесь: совасть Антонина Петровна ды Тёпа атя.

— Меринь, тей сы, содымизь, — салавине мерсь Миколка.

— Ней чишка ужосо стядо кирдьсамизь.

— Ва, тетянок-аванокак тердьсызь.

— Озадо, эйкакшт, — мерсь тонавтыцясь.

Ялгатнень седеест кармасть чавомо седеяк сеедьстэ, чамаст якстерьгадсть.

— Течи тыненк, эйкакшт, инъекс сась минек велень умарьпирень ванстыцясь Степан Дмитриевич. Сон сась энялдома марто.

— Мон вана мезень коряс, — мерсь Тёпа атя ды ютавтызе вановтонзо цёрынетнень лангс. — Весе содасызь минек умарьпиренть. Тедеде иесь пек норовов¹. Паряк, сатадо мартонок пурнамо, тынськак зяро эряви ярсатадо, теле лангс школань столовоевгак пурнавлиде? Тонавтыцянкак молить мартонк урокто мейле. Мольтядо?

— Мольтяно! — серьгедсть класснэк.

— Эно карматано учомонк. Сатадо, сестэ толковасынек тенк, кода эряви пурнамс умартнень. Зярс, арсян, аволь весе содатадо, кода эряви тень теемс, — мерсь умарьпирень ванстыцясь ды таго варштасть цёрынетнень лангс.

¹Норов — урожай

Миколка ды Ивашка сеске нолдызь пряст.

— Зярыя умаринань тарадтнэ синдтрезь, алксост ацазь умарьсэ, нать, сорновтнизь китькак... Эно вастомазонок, эйкакшт, — мерсь меельцекс Тёпа атя ды тусь.

Урокозь ялгатненень марявсь певтемекс. Превезэст мезеяк эзь сова. Окойники, сон прядовсь. Весе шалнозь кармасть пурнамо, куро́к школанек эскелязевсть умарь-пиренть ёнов.

...Велень те школасонтъ мон ульнинь тельня. Шказо чикуншкаль, ансяк вайгельть эзть маряво.

— Косот тонавтнициятне? — кевкстия мон Антонина Петровнень.

— Тусть ярсамо, адя, тоньгак каванятадызь, — тердим тонавтыцясь.

Минь совинек школань столовойс. Эйкакштнэ уш прядсть ярсамост. Меельцекс сынъ ярсасть умарде. Вакант-нэсэ путозельть якстере, ожола умарть, сынъ теке ансяк сезезельть чувтосто. Эйкакштнэ ярсасть мельспаросо, н-той минек совамонтеньгак эзть фатя. Ярсыциятнень ютксо ульнестъ Ивашка марто Миколкаяк.

— Озадо, ярсадо, — мольсь ваксозонок пициясь.

— Сюкпря, мон мездеяк а карман ярсамо. Вейкешка умарь ансяк вана варчавлинь.

— Инескетъ.

Пициясь куро́к путсь икеленек вакан умарть. Сынст эйстэ качадсь тантей чине. Вейкесь омбоцеде мазыель, тантеель. Мон сайнь вейке ды кецязь арсезевинь: кодамо паро те тевесь — вейке-вейкенень лездамось.

ИДИЦЯ

ТЕЧИ Онгай кудос таго кадовсь ськамонзо. Азорозо цепс сонзэ а понгавтни, кеми лангозонзо. Ютась-тейсь сон кудонтъ перька кавксть-колмоксть, ды тевтне весе прядовсть. Ютыцят арасть. Велентъ келес вайгельгак а марят: ломантне весе паксясот. Кудонтъкак апак вано кадсак — мезеяк а лиси. Сыргась Онгай лейчирев. Леесь чуди малава, велень кудотне аштить чиреванзо. Амезть тейнемадо кармась вейке сильдей¹ ваксто омбоцес чийнеме. Вань: леентень валги аваломань. Паряк, калонь кундсиця?

Авась ёртсь ведентень кодамо-бути тапаркс ды капшазь тусь. Онгай ношкстась тона ёнов, кармась ваномо ёртозь тапарксонтъ лангс, кона, секень вант, ваи. Потстонзо марятотсь прок цийнема. Онгай ёртозь ёртовсь ведентень. Сон ёроковсто уйсь тапарксонтъ ваксс ды каподизе сонзэ кургозонзо. Уйсь мартонзо чирентень, путызе мода лангс ды сорновтызе сэрэнзэ. Ёртовксось ульнесь ташто юдма², эйсэнзэ — кискалевкст. Левкскетне ульнесь начкот, цийнесь, мерят, авардезь авардсть. Онгай таго сусксъ тапарксонтень ды ношкстась мартонзо ломанентъ мельга.

Курок пачкодсь Кузьмань кудонтъ ваксс. Кузтемпесэ озадолить нинзэ марто Кузьма атя. Маласо кискань куды-несэнтъ мадезель ашола пондакш киска. Онгаень неемстэ сон сеске мольсь малазонзо. Онгай путызе тапарксонтъ, ды авака кискась вечкезь кармась левкстнэнь нолсеме.

— Те таго мезе? — кевкстась атясь.

— Те тенья... а сеске ушодсь бабась. — Кисканок течи

¹Сильдей — кочка

²Юдма — сумка

левксаясь, оно зяро. Мезекс миненек, теяк туво ладсо ярсы.

— Те юдмась косто саевсь?

— Те минек, нать, а ледстясак?..

— Кардаз удало, некак, ёртозель.

— Истя, истя, мон тосто саия, левкстнэнь путынь эй-зэнзэ ды ёртынь лейс. Мезекс миненек...

— Эх, чавола. Нать, истя тейнить? Мон арсян, мекс кискась чинь перть кудынесэнзэ а лиси? Мекс ёртомс истямо сюпавчинть?

— Эрьва иестэ кеменень-кемень карми левксаямо, ды весе карман кадномоть?

— Миненек вейкеськак саты, левкстнэнь явшема пароманнень.

— Мезекс озямотне? Ваявольть — ды весе. Мезекс те кискась мекев кандынзе? Ведьстэнтъ, нать, таргинзе? — кежейстэ моткодсь бабась.

Кузьма атя эзь кунсолояк сонзэ. Седе эрязасто таргинзе юдмастонть левкстнэнь ды путынзе кудынесэнтъ ацазь коське нуланть лангс. Тонат эцестъ аваст ваксс ды а пештивиксстэ потясть ловсонть.

Онгай кувать тесэ эзь аште, ваннось-тейсь ды ношкстась эсест кудост ванстомоть.

— Тон, баба, молевлить школав, — ушодсь атясь. — Кадык эйкакштнэ кавтошка чинь ютазь сыть кискалевкс мельга.

— Тонь ладсо эно улезэ, молян. Кодаяк ёмавтнемат, — мерсь бабась ды капшазь тусь школав.

Кавтошка чинь ютазь левкскетне совить вийс, улить вадрят-парт. Кеман, школасто ламот сыть мельгаст. Капшак тонгак, вишка ялгай, паряк, кенерят, тонетькак саты овчаркалевкске.

„БЕШЕНОЙ” КРАН

УШОДОВСЬ меельце урокось. Охань течи весть-как эзизь кевкстне. «Паро чись», — кецязь арсесь цёрынесь.

— Карматано ловномо, — ушодсь Мария Дмитриевна ды ютавтызэ вановтонзо тонавтницятнень ланга.

Веенст кепедсть кедть, омбонст чатьмонсть. Оха комавтызэ прынзо седе тов а ков, мик партас токась.

«Паряк, течи а кевкстясамам, сы уроконтень анокстан», — Оха зяроцеде уш максы эстензэ вал, тевесь ялатеке моли икеле ладсо.

«Мезе теят, исяк таго чоподас савсь осканть пансемс, — арсесь яла цёрась. — Туевлинь — минек куринокансетнень монтемень изнявлизь».

— Ловномо лиси-и-и... — ускозь усксь Мария Дмитриевна вайгелензэ, кона, марявсь Оханень, пилеть кери. — Лиси Автейкин Афанасий.

Неть валтнэде Охань потмова прок гуй ютась. Седеезэ седеяк токнозевсь, чамазо якстерьгадсь. Оха састо стясь.

— Тей, тей, Автейкин, икелев, — тердизе Мария Дмитриевна.

Оханень те вайгелесь ней марявсь седеяк а вечкевик-сэкс. Сон саизе книганзо ды пильгень ускозь мольсь тонавтыцянтъ ваксс, велявтсь классонтъ ёнов.

Муизе эрявикс лопанть ды ушодсь пупорькшнезь, коконозь ловномо.

— Те мезе, Автейкин, лисни, урокот эзик анокта?

Оха чатьмонезь кунсолось, мейле шкань апак таргсе, илизь озавто мекев, таго поладызе ловноманзо:

— П-покш с-с-стал-монь ке-пе-де-ме строи-тель-тне-нень ней л-лез-ды бе-бешеной кран...

— Ха-ха-ха, — сеске каятотсь классонтъ келес.

Мария Дмитриевна сеске оймавтызе классонтъ, сон свал сёвны ломань лангсо пеедькшнеманть кисэ.

— Ловныкая таго, — кармавтызе Охань.

— Покш с-стал-монь кепедеме строительтненень ней лезды бе-бешеной кран.

— Кодамо кранось?

— Бе... аволь, башенной, — витизе манявксонзо Оха.

— Вана кода эрси, зярд а тонавтнесыть урокот.

Оха таго нолдызе прянзо, прок безьмень¹.

— Озак. Истя улезэ меельцеде, — мерсь тонавтыцясь.

— Кинь ули мелезэ ловномс?

Кедест кепсизь ламот. Малав весе ловность парсте ды кияк Оха ладсо эзь манявкшно.

...Кудов Оха эскелясь прянь нолдазь, мольсь ялгатнеде башка. Эзь кенере кудокенкшентъ панжомо, каршонзо чаво ведра марто лиссь авазо:

— Сат, цёрынем?

— Ага.

— Минек важодема таркасто течи шкадо икеле кудов нолдымизь, — ёвтась авась. — Азё, азё, совак.

— Кевстнидизь течи тонавтыцятне? — пшкадсь сон уш ведь ведра марто совамсто.

— Ага.

— Мезень, мезе путсть?

«Мезе, мезе?» — кежейстэ арсезесь цёрынесь, аван-стэнь видькстась:

— Ловномань коряс кевкстнимизь, мезеяк эзть путо.

— Те кода истя? А мезе путомс, нать, беряньстэ лов-
ныть?

— Башенной кранонтъ таркас ловнынь бешеной.

— Те кода истя? — мизолдозь кевкстась авазо. — А со-
даткак, кодамо крансо важоди ават? Молят ванды мартон?

¹Безьмень — весы

— Молян! — кецязь мерсь Оха.

Окойники, учовсь вандынь чиськак. Сынь пачкодсть ошонть пес, косо стявтсть од кудо.

— Вана те сонсь башенной кранось, — авазо невтизе Оханень кшнинь ки лангсо аштиця каргонть. — Неть куз-тематнева минь кузтяно-валгтано. — Оно тосо, вере, минек тарканок, тосто минь ветнетяно налонтъ.

Те шкане налось новольсь масторов, кавто цёраломанть понгавтсть эйзэнзэ бетононь покш плита, ды кранось кепедизе верев, венстизе стявтовиця кудонтень.

Цёрынесь кувать вансь кранонтъ мельга, эськанзо ладизе: «Касан, монгак карман авань ладсо бе... вай, башенной крансо важодеме».

НАДОБИЯ

СЕГОРКА уш зяроце чи ашти нусманясто: сэреди вечкевикс бабазо. Школасояк, ялга юткстояк — косо илязо уле, свал мельсэнзэ сон. Эрьва кода арси цёрынесь: паряк, а самальгак тензэ велев эрямо, ды мезть тейневель бабазо ськамонзо?

Течи валске сыр'каесь мик эзь стявояк нуц'канзо шко-
лав пурнамо, ёжозо ульнесь пек стака. Цёрынесь оймавтсь
эйсэнзэ:

— Иля мелявто, бабай, мон монсь...

Алкукская, Сегорка сонсь пурнась-ярсась ды сыргамодо
икеле мерсь:

— Мон туян, бабай, курок сан.

Сонензэ эль учовсь уроктнэнь прядовомаст. Учось
нуц'канзо самонт' бабаськак. Ансяк марятотсь кенкшень
чикордомась, сон арсезевсь: «Те Сегорка».

— Те тон, нуц'кам? — кевкстась сон сеске.

— Мон, бабай, — мерсь цёрынесь. — Кода тонь ёжот?

— Аберянь, — стакасто мерсь каршонзо бабась.

— Ярсавлить, паряк, мон модамарт' пидян?

— Арась, а моли. Тон эстет' пидевлитель...

— Нать, а содат: минек андыть школасо.

— Вай, стувтокшняя, кандт сестэ монень симемс ведне,
валскенсесь уш прядовсь.

— Мон нейке, — мерсь цёрынесь ды саизе удома тарканть
вакссо аштиця табуретканть лангсто кедьгинент'¹. Амольдась
каштомикеле аштиця ведрастонт' ведь ды кандызе мекев.

— Эсет', нуц'кам, кода теветь? — кевкстизе бабазо.

— Монь? Монь пек парт. Течи эрьва уроксто кевкстни-

¹Кедьгине — тесэ: кружка

мизь, — ушодсь цёрынесь ды озась бабанзо ваксс. — Математикань, келень ды ловномань. Содат, бабай, кодамо мон стихотворения ловнынь?

— Кодамо?

— Кунсолосамак?

— Нама.

Сегорка шкань апак таргсе ушодсь:

Пиже луга лангов
Налксем мон сынъ,
Пиже луга лангсто
Цецинеть неинь.
Ожот ды якстереть,
Ашназат ды сэнтъ.
Покш кенярксокс эрить
Мазыйкатне нетъ.
Ваныть сынъ ды лексить,
Тунъ а маднить чить,
Теке, мерят, кевкстнить:
— Мекс минек сезнить?..

— Пек паро стихотворениясь. Ловныкак вадрясто.

— Тонавтыцяськак шнымим. Сон путсь тень вете. Ваньк, бути а кемат, — мерсь цёрынесь ды таргизе портфельстэнзэ дневникентъ.

— Э-э-э, алкукскаяк вете. Паро, — мельспаросоль сыр-каесь. — Марят, нуцькинем, паряк, каят кардазсо сеятненень лембе ведне.

— Мон нейке!

— Ансяк полавтыть оршамот.

Сегорка истя тейськак. Берякшке оршамосо сон лиссь сеинетненень ваксс, каясь тенст симемс ведь, ярсамс тикше.

Бабай, паряк сеятненень керсемс модамартъ, якстерькайтъ? — кевкстясъ сон, кудов совамсто.

— Иля, зярс тенст саты, мейле монсь уш кодаяк андсынъ.

...Удось Сегорка кеместэ. Натъ, сизекшнесъ тевтнеде.

— Нуцькам, Сегорка, стяк, — каятотсь цёрыненть пилес валске марто.

Сегорка сыргозсь, варштась — алкукскак, прянзо вельксэ бабазо. Пацянзо алдо неявить ашолдыця черензэ. Икеле ладсо цивтёрдыть сэнь сельмензэ.

«Пичкась», — кецязевсь цёрынесь.

— Стяк, стяк, нуцкинем, курок уш школав теть сыр-гама.

Сегорка пря а васькавтни, шка а таргсекшни. Нейгак сеске кирнявтсь, шлясь-нардась, оршнесь-тейсь ды вана уш анок.

— Пачалксеть теть панинь, — ушодсь бабазо. — Варчитяя.

— Мон сынст пек вечксынъ!

Сегорка ярсась мельспаросо.

Мейле саизе портфелензэ ды сыргась школав. Куля баба мольсь кузтемпес ильтямонзо. Сэредемадо мейле сон лиссь ушов васенцеде. Мельспаросо вансь нуцьканзо мельга семс, зярс тона эзь кекшеве сельмензэ икельде.

Уш кудов совиксэль, те шкане серьгедсь шабразо, Олдай баба:

— Аштекая, ялгай. Тон мекс а некшневат?

— Моцем арасель.

— Кодя?

— Сэрединь.

— А-а-а... Теня, доктор тердема.

— А эряви. Мон уш пичкинъ.

— Кие лецинзеть?

— Нуцькам, Сегорка.

— Тон яла мезтькак лабордат.

— Мезтькак а лабордан, видестэ кортан.

Олдай баба мезеяк эзь чарькоде. Ды косто сонензэ чарькодемс: сон ськамонзо, мартонзо вейкеяк нуцьказо а эри. Секскак а соды нуцькань пельде а мелявкст, а кеняркст.

Сегоркань паро оценкатне, прянь вадрясто ветямось, лембе валтнэ — весе те лездась Куля бабанень изнямс орманть, кандсь тензэ вийть.

ПИТНЕЙ ПАРЬ

ЛЮСЯ эри ошсо. Тедеде сон тусь школав. Тейтерькась лумок уш мерсь тетянзо-аванзо туртов: сёксень каникулатнень ютавтсынзе велесэ, покштянзо-бабанзо кедьсэ. Сон эрси тосо эрва кизна, велесэ улить ламо ялганзо.

Окойники, те чись сась. Люсянь ускизь велев. Покштянзо-бабанзо апокш чувтонь кудынесь сеске пешкедсь велень эйкакшто. Сыретне кецясть пакшатнень кувалма. Окся баба пона кирензьяк веёнов путызе — сон кодазь нуцканзо туртов теленень носкат. Панжизе паренть ды путынзе тозонь пона суренть ды кодамо уськетнень. Пекстамонзо эзь кенере, кода ваксозонзо чийсть эйкакштнэ.

— Эге-е-е!.. — цитнезевсть Люсянь сельмензэ, зардо неинзе парьстэнтэ эрва кодат улипаротнень.

— Те мезть тесэ? — кевкстасть ялгатне.

Окся баба кармась таргсеме эрва кодат палят, пацят, носкат, варьгат, удома таркань ацамот ды лият-мезть — лангсост эрва кодамо тусонь толокс палсть мазый сурсэ викшнекстнэ. Сон вейке омбоце мельга путнесь эйсэст удома тарканть ды эзementь лангс. Кудопотмось сеске теевсь прок цецяв луга.

Вишка инжетне кувать ванкшность улипаронтэ. Окся баба ульнесь мельспаросо.

— Те вана монь од порань эрзянь оршамом, — ушодсь сон. — Сонзэ анокстамо мон ушодынть тынк эйшка улемстэ. Тесэ весемесь теезь эсень кедьсэ: коцтоськак, викшнекстнэ-як... Тень эйсэ вана мон венчинь, — толковась Окся баба седе тов. — Нетне кудояткова якамонь оршамон ульнестэ.

Вишка ялгатне цитница сельмесэ ванность пулаентэ, палятнень...

— Нетнень вана аволь умок прядынь, — невтинзе бабась кырьксала¹ кодавксетнень, — сынь путневить кенкш икелев, удома ды озамо таркатнень ваксс.

Весенень мельс тусть ревень понасто кодазь носкатне ды варьгатне. Эйсэст, нама, кодамояк якшамосто тельня а кельмат, ды, теде башка, сынь мазылгавтозь эрьва кодамо викшневоксэ.

— Вана тенк картъ, — мерсь Окся баба ды таргинзе парь потмакссо картнень. — Нетъ — семеричка картъ, сынь сисем рядонъ, секскак лемест семеричкат. Весе од порам истямо карьсэ ютавтйя.

Вейкесь, омбоцесь саизь кедезэст, кой-кить пильгезэсткак тонгонизь. Весенень сынь ладить. Ашназа-ожолат, мазыйть, прок налкшкетъ.

— Бабай, а бабай, — пшкадсь Люся, — тон весе нетнень а казъсыть монень?

— Мезекс? — ачарькодезь кевкстизь ялгатне.

— Палятнень потс тон ёмат, — мизолдозь мерсь Лена ялгазо.

— Мон аволь эстенъ... Мон саевлинь сынст минек школань музеев, — панжизе мелявксонзо Люся.

— Те паро, кадык весе несyzь седикелень оршамон, — мерсь Окся баба.

Те шкане кудыкельксэнь кенкшесь калыцк тейсь, ды марявсь кияксонтень мезень-бути стакань путома.

— Те покштят сась, — мерсь Окся баба Люсянень.

Панжовсь кудо кенкшесь, ды совась шержей черь атя.

— Шумбрачи, эйкакшт, — пшкадсь сон муюконзо² витнемадо мейле. — Вана якинъ лейчирев, керсинь илевть, эряви од кептеръ кодамс, се уш таштомс.

— Минь тесэ икеле шкань улипаро ваннынек, — мерсь бабась.

— Теяк эряви, — кувакасто лекстясъ атясь, седе тов поладсь:

¹Кырьксала — круглый

²Муюк — усы

— Шкась — чинь седей. Ярсамскак паро улевель.

— Мон нейке, — капшазевсь Окся баба.

Эйкакштнэ састо, апак капша кармасть ладсеме ули-паронть мекев. Курок каштомикельде качадозевсь тантей чине.

Столенть лангс, кона вельтязель мазый викшневокс марто ацавкссо, бабась путсь эрзянь пачалксеть — покшт, эчкесть, чевтеть. Кринкасо кандсь чапамо ловсо ды поза.

— Озадо, ярасадо, — лембестэ мерсь сон эйкакштнэ-нень.

Вишкинетнень марто атят-бабат сынськак озасть. Умок те кудосонть арасельть зняро инжеть!

Ярсамодо мейле ялгатне тусть ушов налксеме.

Окся баба нусманясто вансь паренть ёнов.

— Ёвтгя валом, меринь, максса, — видькстась сон. — Ансяк теке седейстэ лутан эйсэнзэ.

— Мезекс ней сынъ тонеть маштовить?.. — мерсь каршо атясь.

— Маштовомс а маштовить, нама, мезеяк мон ней эйстэст а оршан, а тонган. Ансяк эйсэнзэ монъ эрямонъ пельксэм, весе од порам. Паренть тетям тейнизе... Кедензэ ульнест сырнень...

...Кувать истя кортасть атят-бабат, сынсь нусманясто вансь паренть лангс, кона марявсь тенст питнейдеяк питнейкс. Истямо паренть теемга пилильть эчке чувто, потмонзо чамдылизь, теильть тензэ алкс ды вельтявкс. Песэ сон мазылгавтовиль керсевксэ. Ней истят а тейнить. Секс те паресь потсонзо ули-паронть марто пек кенярдовтсынзе школань музеев сакшныцятнень.

ГРУНЯ БАБАНЬ НУЦЬКАНЗО

ТАЛАЙ сёксь, якшамо. Васень ловонть ланга минек велень Удалце пев ардсть ошсто Груня бабань мельга. Кавто чить сырькаесь авардезь-лайшезь пурнась ды мекев калавтнесь тапарксонзо, кавто чить пансь цёранзо-урьванзо мекев ошов: арась мелезэ кадомс теле лангс кудонзо, туемс ошов асодавикс ломань юткс. Ансяк ведень кандтнемась, уштомась ды пенгень аулемась «пансть» бабанть «письмар-кудов», — истя сон лемди ошонь квартиратнень.

Кудосонть сэтьме. А озорови Егоркаяк.

— Мезть, паряк, сыргатано? — пшкадсь урьвась.

— Нама, сыргам, — нурькинесть мерсь Егоркань тетязо ды саинзе тапаркстнень.

Мельганзо весе лиссть ушов. Озасть машинантень ды сыргасть. Груня баба нусманясто вансь удалов, кудонзо лангс, зярс тона эзь ёма сельмензэ икельде. Зярдс лиссть асфальтонь кинть лангс, машинась тусь прок ливтязь.

Курук сынь пачкодсть.

— Оно косо кудонок, — Егорка сурсо невтсь сэрей кудонть ёнов.

Зярдс машинась лоткась, ваксозост прок мекшть лив-тясть тесень эйкакштнэ.

— Адя, бабай, — каштансто пшкадсь Егорка.

Сон мельспаросо саизе вишка тапарксонть ды кундызе инженть кедте. Бабазо пек вадря, ды цёрынесь пек вечксы сонзэ, секс ней истямо мельспаросоль.

Якшамо читнесть цёрынесь ушов эзь лиснеяк. Чарь-кодеви: бабась ёвтни тензэ ёвкст, ледстни икелень эрямо-донть. Ялатеке, мезть иля тейне, кудосо свал а аштеват.

Течи чись паро, сэтьме, лембе. Груня баба ды Егорка

листь ушов. Кудонтъ вакссо ульнестъ ламо эйкакшт, ансяк сынъ, неяви, аштестъ тевтеме.

— Мезть нусмакалетядо, нуцъкинень? — кевкстинзе Груня баба эйкакштнэнь.

Сеть чатьмонезь, виздезь нолдызь пряст.

— Паряк, ловняське тейтяно?

— Тейтяно, тейтяно! — кенярдозь шалнозевсть эйкакштнэ.

Груня баба комась, сайсь кедезэнзэ лов, лепштизе коморозонзо ды максызе маласо аштиця цёрынентень:

— Кевердть эйсэнзэ ловонтъ ланга.

Тона мельспаросо кундась тевентень. Мокшнашка лов поколесь яла покшолгадсь. Истямо жо тев макссь кавто лия цёрынетнененьгак.

— Саты, саты, нуцъкинень, — мельга-мельцек лоткавтынзе бабась цёрынетнень. — Сех покш поколесь кадык кадови тарказонзо, те карми алкс. Омбоцентъ кепединк лангозонзо, мейле — сехте вишкинень, те карми прякс. Парсте лись! Ансяк те а весе. Мезе тесэ а сатны?

— Сельметь, судо, кедть! — сеерестъ эйкакштнэ.

— Кие канды кавто раужо повт? Сельметь тензэ тешк-статано.

— Мон, бабай! — серьгедсь Олдыне.

— Кие канды судокс пурька¹?

— Мон, мон...

— Азёдо, кона седе маласо эри.

Ношкстась Охримка.

— Паряк, костояк тенстькак мутадо?

— Минек ули! — кенярдозь мерсь тюзала пря цёрынесь. — Дворникесь, Сега лелям, ташто тенстензэ миненек максызе хоккеень паксянок тенсемс, аштеде, мон кандса.

— Э-эх, прызонзояк мезеяк эряволь, истяко а лади, — кортась Груня баба.

¹Пурька — морков

— Монь ули ташто шапкам, — мерсь Микита.

— Шапканть кисэ тетят-ават мурнетядызь, мезеяк лия эряволь.

— Мон содан! — серьгедсь Варка. — Учомизь, кандан ташто вакан. Минь пурнакшнынек металлолом, ансяк сон эзь максово. Тосо улить, мон муян.

Шкань апак таргсе весемесь ульнесь пачтязь. Курок ловняськенть кармасть улеме кургозояк, сельмензьяк, судозояк... Прязонзо путсть вакан, кедезэнзэ «кундавтсть» тенсть. Груня баба стясь веёнов ды вишкинькатнень ладсо мельспаросо вансь лангозонзо. Паро ловняськесь лиссь!

— Мезть истяко аштетьдо? — пшкадсь бабась. — Кундадо кедте-кедсь, моратано ловняськентень моро.

Ушосонть гайгстась моро. Седе тов веенст кармасть ловсо ёртнеме, омбонст налксесь сасамкасо.

— Эйкакшт, шказо уш обед, адядо миненек инжекс, — пшкадсь Груня баба.

Тейтерькатне ды цёрынетне ёндолкс ливтясть Егорка-мезнень.

Квартирасонть таркась сатотсь весенень. Столь экшкак весе кельгсть. Груня баба кармасть панеме эйкакштнэнень пачалксетъ. Тонатнень мельс истя тусть — сырькаесь ансяк кенерсь столь лангс путомост. Веенст ярсасть пси пачалксетнень ой, велькс марто, омбонст — варения, ловсо марто.

— Монень саты! — Окойники, максызь вайгелест эйкакштнэ.

— Монгак пешкединь!

— Сюкпря, бабай, тантейстэ андымизь, — мерсть вейке омбоце мельга.

— Ней адядо ушов, — ёвтызе мелензэ Охримка.

— Адядо, адядо! — пшкадсть лиятнеяк ды шалнозь пурнасть, лиссть ушов.

Эзть кенере ушодомо налксемаст, кода ваксозост таго лиссь Груня баба.

— Нуцькан, паро ёжонк — пекенк пешксетъ, кие, каня, нармунтнень андсынзе?..

— Минек улить кудосо чиньжарамонок, — мерсь Олдыне.

— Монь кудосо попугаень коромдонть зярыя, — видькстась Дёма.

Курок ловняськенть вакссо столенть лангс эйкакштнэ каясть эрва кодат видьметь, кши паморькст. Эзть кенере туеме — тей ливтясть озязт, варакат, гулькат, сезьгант... Эйкакштнэ мельспаросо вансть нармунтнень лангс, конат капшазь пурнасть видьминетнень.

— Те кинь бабась? — кевкстась малава ютыця шабра кудонь цёрась.

— Монь, монь! — вейке омбоце мельга пижнест эйкакштнэ.

— Монь, миненек сась! — эзь цидярдо Егорка.

— Эхе-е-е, зяро бабанть нуцьканзо, — арсезь мерсь цёрась.

— Содавлитя, кодамо сон вадря!

— Кодат пачалксет вадрят сон пани!

— Те мезе, ловняськентькак сон миненек лездась те-емс!

Эйкакштнэ эрва ёндо шнызь бабанть.

— Нуцькинень, чопотеме кармась, — лоткавтынзе Груня баба. — Азёдо кудов, ванды таго вастовтано, нармушкатненьгак андсынек.

— Вастомазонок, бабай! — мерсть эйкакштнэ вейке омбоце мельга.

Егорка саизе бабанзо кедте, ды сыргасть кудов.

Весе эйкакштнэ явовсть паро арсема марто, вадря ёжосо.

Вана кодамо сырькай усксть велестэ эйкакштнэнь! Бути тынк арась истямо бабанк, садо минек ваксс!

ТЕЛЕНЬ ЧУРЬКАТ

— **ТАГО** ямсонть чурькат... — кольнесь столенть экшсэ Сегорка. — А карман ярасмо, чурькатне кодат-бути сэпейть...

— Чурькавтомо мень ям, — оймавтсь эйсэнзэ Куля баба.

— А вечкан, ды весе! Керязь кери кургом. Улевельтькак пиже чурькат, сетнеде истякак ярсавлинь. Нетнеде — а карман!

— Пиже чурькат, мерят? — ёжовсто мизолдозевсь сырькаесь. — Кармить тетя пиже чурькат.

— Алкукс? — эзь кеме цёрынесь.

— Алкукс! — таго кеместэ мерсь Куля баба. — Ансяк аламос эряви цидярдомс, кастомост карматано вейсэ. Истя?

— Истя.

Бабась кандсь каштомикельде теине курго кедьгине, каясь эйзэнзэ ведь. Мейле кандсь чурькапря, путызе кедьгинентень, ундокс ёнксось токазо ведсь, ды кандызе кедьгиненть вальмалангс.

— Монсесь анок! — мерсь сырькаесь ды пшкадсь нуцьканстэнь. — Ней тон путт эстеть чурька.

— Мон? — талакадсь Сегорка.

— Тон.

Шкань апак таргсе цёрынесь кундась тевс. Весеметь тейсь сырькаензэ ладсо. Каясь кедьгинес ведь, мусь покш чурькапря — илязо пра ведентень. Путызе кедьгиненть вальмалангс, сырькаенсенть ваксс.

— Вансынек, кинь чурьказо седе курок касы, — мерсь Куля баба.

Эзь кенере цёрынесь вальманть вакссто туеме, кода панжовсь кудо кенкшесь, совась ялгазо, Егорка.

— Сегорка, ушов молят? — кевкстась ялгась.

— Молян, — кецязь пшкадсь Сегорка.

Сон ёндолкс пурнась, ды аламо шкань ютазь сынъ уш ушосольть. Илить терде — секень вант, чокшнес кадовить, судонь кельмемас.

— Сегорка, а Сегорка! — серьгедсь кузтемпестэ баба-зо. — Шка кудов совамс.

Ялгатне амельсэ явовсть вандыс...

Истя, ялгакчисэ, налксезь, ютасть вейке чи мельга омбоце, колмоце... Весть валске марто Сегорка стясь тантей чинеденть — сыркаяезэ пидесь ям.

— Ва, чурькат тозонь иля кая, — сеске мерсь Сегорка.

— Кода иля кая, мон уш каинь, — видькстась Куля баба.

— Вай, сестэ тонсь ярсак, — кежиявтсь цёрынесь.

— Монгак ярсан, тонгак кармат.

— Мон а карман!

— Кода а кармат? Тонсь кортат, пек вечкат пиже чурькат.

— Пижить вечкан...

— Мон пижить керсиньгак.

— Монень кенгелеме а мерят, тонсь вана манчат.

— Мон тунь а манчан.

— Кода а манчат, косто пиже чурькатнень сайть?

— Кода косто? Вальмалангсто. Натъ, стувтык: минь тонь марто озавтнинец?

Цёрынесь капшазь мольсь вальмантень. Айгизе шаршавонтъ, варштась, алкукскак — чурькапрятне нолдасть лопат.

— Тон иля кежиявтне, — ваксозонзо модемстэ ушодсь Куля баба. — Мон сезинь эйстэст кавто-колмо лопинеть тантей чинень кисэ. Лопинетне зярс вишкинеть, курок покшолгадыть. Эряви ведест полавтомс.

— Мон монсь, бабай, — капшазь мерсь Сегорка ды ушодсь кедьгинетнестэ веденть полавтомо.

— Вай, монь тосо лаки, ямом стувтыя, — Куля баба капшазь тусь каштомикелев.

Курок бабат-нуцькат аштесть столь экшсэ ды тантейстэ ярсась пиже чурька марто ямдо. Сынсь шкань-шкань мель-спаросо ванность вальманть ёнов, косо телень якшамосо викшневьть суликанть маласо кассть пижелкаест.

МЕЗЕКС САМОЛЁТОНТЕНЬ ЧАРЫТНЕ

ЦЁРЫНЕТНЕ пуромсть лугалангс футболсо налксеме. Читне псить, секскак сынъ сакшныть тей ансяк чопоньпелев. Явовсть кавто командав, кармасть налксеме. Кодаяк киненьгак гол а паневн: виест вейкетъ. Пстиеть-пстиеть оскантъ, сизесть.

— Др-ри-риньк, — гайгстась судьянтъ, Сеганъ, вешк-стамозо: прядовсь налксеманъ васенце пельксэсь.

Весе пуромсть эркинентъ чирес. Вееенст ойсестъ, ом-бонст маднестъ, лиятне шлясть чамаст ванькс ведьсэнтъ.

Апак учне марязевсь самолётонъ увнома.

— Оно косо ливти! — Миколка невтсь сурсонзо верев.

Весе кепедизь пряст. Самолётось неявсь допрок маласо.

— Э-э-э, кода алга ливти, — мерсь Миколка, — чарын-зэяк неявить.

— Ха-ха-ха! Кодат чарыть? Мезекс сынъ самолётон-тень? Сон ливтни, аволь ардтни. Ха-ха-ха, — весе пейдсть Миколканъ лангсо.

— Улить самолётонтъ чарынзэ, — тагояк кеместэ мерсь цёрынесь. — Те самолётось тезэнь сась паксятнень удо-брениясо почодома.

— Мейле мезе, почодома? — згилязевсь Дригине. — Натъ, почодомсто чарытне эрявить?..

— Эх, тыненк а толковави, — яла кортась Миколка. — Ванды сон карми почодома, эрь, мольтяно сонзэ валгонема таркантень.

Цёрынетне таго кармиксэльт налксеме, ансяк те шкане марятотсть ракшанъ вайгельть: новольсь стадасть.

— Монень туема лездамо ревень пурнамо, — мерсь Сега ды ношкстась.

— Моненьгак, моненьгак, — каятотсь эрва ёндо, ды цёрынетне чиезь тусть кудотнень ёнов.

...Омбоце чистэнтъ сынъ вастовсть вирьпулонтъ вакссо, ков валгонесь самолётось. Тесэ лугась покш, виде.

— Тынь тия мезть якатадо? — кевкстинзе колхозонь бригадирэсь, Тёпа лелясь.

— Минь ваномо сынек, — мерсть ялгатне.

— Ванодо, ванодо, ансяк малав илядо моле, — мерсь лелясь.

— Минь, Тёпа леляй, тень... — ушодсь Миколка.

— Кортак, кортак, мезе тенк эряви?

— Миненек мезеяк а эряви, ансяк вана содавлинек, улить-арастъ самолётонтъ чарынзэ.

— Улить, нама, улить. Адыдо малав, зярс эйсэнзэ пештить удобрениядо.

Цёрынетне сыргастъ Тёпа лелянтъ марто самолётонтъ ваксс. Алкукскаск, сон чары лангсоль.

— Чарытне эрявить самолётонтень мода ланга ардомсто, сыргамсто, — толковась Тёпа лелясь.

— Эй, тынь тесэ мезть кургонк нармунекс автнинк?! — серьгедсь асодавикс цёраломанесь. Оршавксонзо коряс сон явовсь лиятнень эйстэ.

— Те, нать, сонсь лётчикесь, — тошкстась Миколка.

— Саты, сыргама! — серьгедсь цёрась.

Весе айгсть веёнов.

Самолётось увнозевсь, нерьсэнзэ чарамкась чаразевсь. Аламос аштезь сёлмовось састынькине сыргась ардозь моданть ланга. Аламонь-аламонь сон кузь седе верев ды верев. Цёрынетне каштмолезь вансть весементъ мельга. Самолётось ливтнесь аволь пек верьга ды почодсь паксят-нес удобрения.

— Эно вастомазонк, вишка лётчикть, — каятотсь цёрынетнень пилес Тёпа лелянтъ вайгелезэ. — Монень эряви удобрения мельга модемс.

— Сюкпря тетъ, Тёпа леляй!— мерсь Миколка.

— Сюкпря, сюкпря! — сеерестъ лиятнеяк.

Курок эйкакштнэ мельспаросо сыргастъ леентъ ёнов.

— Паро улевель ливтямс самолётсо... — Ёвтызе мелензэ Энъка.

— Мон, ялгат, лётчикекс улян! — мерсь Миколка.

— Монгак, монгак! — пижакадсть лиятнеяк.

Ды весе кецязь ношкстасть экшелямо.

ВИРЕНЬ ПАНДОПРЯСО

ЕГОРКА ды Сегорка ялгат. Оймсема читнестэ сынъ свал вейсэть. Тельня вечкить киракстнеме сокссо вирь чиресэ пандыненть прясто.

Течи сынъ саизь соксост ды таго састь киракстнеме. Паро, пандонть алов ливтязь ливтят! Апак учо виренть ёндо каятотсь ловонь чикордома. Ялгатне тандадсть. Ансяк стяко. Тусто вирьстэнтъ сокссо лиссь шабра Миколь лелясь. Сонзэ лавтовонзо трокс понгавтозель ружия, кутьмересэн-зэ — кескав.

— Киракстнетядо, цёркат? — шумбракстнемань таркас мерсь сон.

— Кирякс... — Сегоркань келезэяк кундатотсь, кода неинзе цёранть юдмасто нумолонь билетнень.

«Таго нумоло ледсь», — апаркстомсь цёрынесь.

Миколь лелясь сыргась кудо ёнов.

— Сегорка, мезе мартот? — кевкстизе ялганзо Егорка.

— Эрьва чистэ бути истя карми нумолонь леднеме, весе виренть чамдасы, — пеняцязь ушодсь Сегорка.

— Паряк, мольтяно тензэ кудов, энялдтано, илязо чавно ракшатнень?

— Адя.

Ды сыргасть Сегоркат-Егоркат эсь энялдомаст марто Миколь лелянтень.

Теде мейле зярыя чить ульнесь пек якшамо, мейле пувазевсь кежей варма, кепететь давол. Секскак ялгатне вастовсть ансяк кавто таргонь ютазь. Сынъ мельспаросо саизь соксост ды таго сыргасть эсь вечкевикс пандынесть пряс.

— Егорка, варштакая, — кецязь серьгедсь Сегорка, — нумолкайт тия чийнить!

Алкукскак, весе пандочамась ульнесь прок викшнезь нумолонь пильгетешкскесэ.

Лисни, Миколь леясь ней а яки охотямо, а ледни, а тандавтни нумолотнень. Секс ашолкайтне апак пеле тия чийнить. Ды неть викшневкстнэньгак кадызь тей суюкпрянь таркас.

КИСКАТ-КАТКАТ

СЁКСЕНЬ чись эждысь прок кизна. Куринкань сырь-кайтне пуромсть рацяня каленть алов. Вакскаст ютась канст марто Матрёна баба.

— Тон, Матрё, мезе истя кандат? — кевкстизь сонзэ аштицятне.

— Вана ванынк, — сырькаесь кармась калавтнеме тапарксонтъ. Паргонть потмакссо нулыне лангсо кырмицязь удось кискалевкске, сельмензэяк зярс парсте эзь панжово.

— Те мезекс тетъ? — кевкстясь Груня баба.

— Берянь съкамон эрямс, секс вана кандан ялга.

— Псакась тетъ аламо, киска оштё, — ёвтызе мелензэ Окся баба.

— Кадык, вейсэ седе ён, — пандынзе валонзо Матрёна ды поладызе эсь кинзэ.

Кавто чинь ютазь Окся баба токась вакска ютамсто Матрёна бабанень, нуцьказояк мартонзоль.

— Кодя, Матрёна, касы сюпавчинь ванстыцясь? — мизолдозь кевкстизе сон азорованть.

— Касы, кода эно, — каштансто мерсь тона.

— Бабай, а бабай, — пшкадсь Окся бабанень Ваня нуцьказо. — Кискинесь пскалевксцентъ марто вейсэ потить псаканть потестэ.

— Те кода истя? — талакадсь сырькаесь, сыргась нуцьканзо мельга.

Алкукскяк, Мурка псакась мадезель кузтемлангсо, эйсэнзэ потясть пскалевкс ды вишка кискалевкске.

— Те апарс, — моткодезевсь Окся баба. — Зярдю истя ульнесь, псака потявтоволь кискалевкс?

— Мезде-бути эдь эряви тензэ симемс-ярсамс, — со-
дазь мерсь Ваня.

— Истя, истя, вишкинькатненень ловсо эряви, — прок
эстензэ кортась Матрёна баба.

— Паряк, скалонь ловсо кандомс? — кевкстась цёры-
несь.

— Скалонсесь, нама, седе ладяволь, — бабась вадяшизе
цёрыненть.

Тона чиезь тусь кудов. Курок сон сась ялганзо марто,
кандсть ловсо. Матрёна баба ливтсь вакан, каизе эйзэнзэ
ловсонть. Левкскетне кавонест капшазь кармасть лекамо.

— Минь, Матрёна бабай, чистэ карматано кандтнеме
ловсо, — мерсь Ваня.

— Тынь, нуцькинеть, савлиде вестькак умарень пур-
намо, — энялдозевсь Матрёна баба. — Тедеде эйстэст пек
ламо, а кенерян пурнамо. Стяко ёмсить-наксалить.

— Сатано, — мерсь Ваня.

— Зярыянек сатано, — кемекстынзе валонзо оязояк.

...Матрёна бабань умарьпиресэ гайгить кенярксов
вайгельть. Эйкакштнэ сезнить умарть, кандтнить эйсэст
кептерсьэ, пештить паргова.

— Неть умартне весе тынк улест, — лембестэ мерсь
Матрёна баба.

— Кодя истя минек? — талакадсь Ваня.

— Мон сынст тыненк макссынть. Эстенъ а сэзевить,
эйстэст пек ламо. Школанек ярсадо.

...Эзь марявояк, кода ютась сёксесь, мейле телесь. Таго
сась маней тундось. Эйкакштнэ эзизь стувто Матрёна ба-
бань, сынъ капшить тензэ лездамо.

Сырькаенть кудозо кекшевсь панжиця умаринатненъ
потс, сынъ прок вельтявсть ашо човсо. Кудонтъ вакссо
чийни Онгай кискась, кона, инжетненъ неезь, кецязь юхаи
пулосонзо. Кудо вальмаванть лембе чинть каршо ваны уш
покшто касозь левксэнзэ марто пондакш Мурка.

ЕГОРКАНЬ ЛЕЗКСЭЗЭ

ЕГОРКАМЕЗЕНЬ кудост маласо автобусонь лотксе-
ма тарка. Эрьва валске сынь ардтнить тестэ эйденъ
кужов.

— Тетяй, тетяй, оно сы ветеце троллейбусось, — ке-
нярдозь пшкадсь цёрынесь. — Те минекесь?

— Истя, истя, цёрам, — мерсь тетязо.

Егорка зярдоак а ойси. Сон свал арды суликасо пирязь
ветицянтъ вакссо, косо аравтозь кассась. Тестэ весемесь
парсте неяви. Теде башка, цёрынесь сезни ардыцятненень
билетт. Ансяк, зярс а машты ярмаконъ ловномо.

— Тетяй, зяро билетт сезема? — кевкстизе сон тетязо.

— Кавто.

— Вейке, кавто, — суронъ менчезь ловны цёрынесь.

Ды истя — килангонъ перть, зярс эзть пачкоде эйденъ
кужонтъ видьс. Эрьвась тензэ ёвтась суюкпря.

— Лоткамо таркась «Эйденъ кужо», — яволявтсь ве-
тицясь.

— Эх, кись нурькине, лиятнененьгак билетт явшевлинь,
— мелявтозевсь Егорка ды лиссь тетязо марто троллейбус-
стонть. — Зярдо касан, карман троллейбусонь ветникакс!

— Паро, — мерсь тетязо. — Ансяк вант, кужосо прят
ветяк парсте.

Чопоньпелев сынъ таго кедте кундазь эскелясть лоткамо
таркантень.

— Тетяй, ветеце троллейбусось! Минекесь? — кевк-
стясъ цёрынесь малас самстонзо.

— Озатано! — мерсь тетязо.

Икеле кенкшесь ней эзь панжовояк — ардыцятнеде ла-
мольть. Тетят-цёрат совасть куншкасо кенкшканть. Паро,

озамо тарка тенст макссть. Ансяк Егорка ялатеке нусманяль: сонензэ вечкевсь ардтнемс ветицянтъ маласо.

— Цёрам, пелик, инескеть, талоном, — пшкадсь вейке сырькайнесь Егоркань тетянстэнь.

— Мон, мон, тетяй! — Егорка ноцковтызе тетянзо ожадо.

Ды таго килангонь перть цёрынесь «важодсь», ды эрьвась ёвтась тензэ сюкпря. Кудов цёрынесь эскелясь мельспаросо. Сон арсесь: куш косо ардомс вадря, бути марят эрявиксчить.

ПОКШ ЧИ

СЕГОРКА ды Егорка — вейке куринкань ялгат. Сынь вейсэть ушосоак, школасоак. Вейкеть сынст налкшкесткак, якитькак вейке класос. Ансяк тевест то-навтнемасо молить аволь вейкетьстэ. Егорка тонавтни седе лавшосто, а кунсолы. Те канды мелявкс весенень: классонтеньгак, тонавтыцянтеньгак ды, нама, тетянтэнь-аванстэньгак.

Течи Мартонь 8-це чи. Цёрынетне школав эзть моле, ойм-сема чи. Сегорка аванстэнь казнень максомодо мейле сыргась ялганстэнь. Егорка зярс кеверькшнесь таркасо. Оршамканзо ды карсемапелензэ масторольт. Ваксост ульнесь мерьказь портфелезэак, учебниктне ёртнезельть столенть ланга. Эзь неяво ансяк дневникезэ. Чарькодеви, Егорка кекшизе: аволь умок тензэ путсь кавто ды тейсь прянь беряньстэ ветямо-донзо сёрмадовкс. Кудосонть потмураль, чоподаль.

Те шкане совась Егоркань авазо. Сон оршазель кудуют-конь оршамосо. Чамазо нусманяль, сизезь.

— Шумбрачи, Оря патяй, покш чи марто! — мизолдозь пшкадсь тензэ Сегорка.

— Кодамо уш шумбрачи, кодамо покш чи, истямо кудос кенярксоськак а сови, — аволь сеске, састо мерсь авазо ды ютась каштомикелев.

Цёрынесь эзь карма кевкстнемензэ, весемесь истякак чарькодевсь.

— Стяк эно, стяк седе куроксто, — мерсь сон ялган-стэнь ды мейле мезть-бути тошкась пилезэнзэ.

Егорка кирнявтсь таркастонзо, ды курок ялгатне лиссть ушов. Шкаськак ютась аволь ламо, сынь велявтсь мекев. Егорка кандсь цецянь пусмо. Ялгатне сынст сезнизь шко-лань парникстэ, косо класснэк эйсэст кастыть.

— Покш чи марто, авай! — талнозь пшкадсь Егорка.

Авась лиссь каштомикельде, нардынзе кедензэ, витизе пацянзо ды абунгадозь вансь цёранзо лангс, эзь учне пельдензэ истямонтъ.

Сегорка састыне тулкадизе ялганзо. Тона эскельдясъ икелев, максызе пусмонтъ аванстэнь ды палызе сонзэ.

Авась авардезевсь, мейле чевтестэ мерсь:

— Ютадо столь экшс, прякатне пиема лангсот.

Зярс авась анокстась ярсамс, цёрынетне путнизь тарка-васт Егоркань ёртнезь оршамонзо-книганзо.

Курок кудопотмось пешкедсь прякань тантей чинеде. Весе озасть ярсамо. Егоркань авазо мельспаросо варштнесь столентъ куншкас путозь цецятнень лангс. Сынь мазыйстэ цивтолдсть-кувтёлдсть каршонзо. Те шкане невтизе прянзо чиськак, сон мизолдозь венстинзе вальмавантъ лембе на-лонзо.

Кадык покш читне эрсить аволь эрьва чи, кемтяно, Егорка ней истякак карми кецневтеме аванзо прянь вадря-сто ветямосонзо.

ЦИРКАЧ

МИНЕК куринкань цёрынесь Митя аволь умок якась тетянзо-аванзо марто ошов инжекс. Ков ансяк эзизь сайне вишка инженьть ошонь малавикстнэ! Пачколесть циркевгак. Митя цирксэ васенцедель. Мелезэнзэ весемесь тусь, сехте пек — пикс ланга якицятне. Эрьга, аренанть ве пестэ омбоцес таргавозь пикс, ды артистнэ вейке омбоце мельга ютыть ланганзо, прок масторга. Лиясто мик кирнявтыть пиксэнтъ лангсо, тей-тов велявтнить. «Эх, маштовлиньгак истя!» — арсесь цёрынесь.

...Ошо цёрынесь ульнесь а кувать. Кизна велесэ тевтне-де певтеме, секс сын курок велявсть кудов. Зярдэ Митянь тетянзо-аванзо тусть тикшень ледеме, сонзэ кадызь кудонь ванстомо. Цёрынесь андынзе-симдинзе ракшатнень, лия кар-мавтоматнень топавтынзе. Чикуншкава псидентъ лексемскак кармась стака, сон эзь цидярдэ — сыргась экшелямо.

Леев ветиця яннэсь юты бабанзо эмежпире вакска. Пачкодсь цёрынесь пирявксонть видьс ды арсезевсь: «Паряк, варчамс неть жолгатнень ланга ютамс?»

Кузсь Митя верце жолганть (жердь) лангс ды састыне сыргась. Ютась вейке палманьстэ омбоцес, аламось аштесь-тейсь, таго сыргась. Истя цёрынесь апак капша ютась зярыя юткот. Тесэ марязевсть вайгельть — Алопень эйкакштнэ чийсть лейчирев.

— Ванодояк, те кие истямо циркачось? — веёндэ уш серьгедсь Варакань Маша.

— Те, некак, Охань Митя.

— Сон, сон, — макссть вайгельть лиятнеяк.

Весе састь малас. Ялгатне мельспаросо вансть цёры-нень лангс.

— Эрьга, кода парсте эскели, — шназь мерсь Лариса.

— Косо, каня, тонадсь? — поладызе кортамонтъ Никита.

— Ошсо циркев якась, — тевень содазь толковась Даша.

— Эно сыргатано, — мерсь Вадим, ды весе ношкстасть седе тов.

Митяк кадызе тевензэ, сыргась весень марто.

...Жолга ланга якамось Митянь мельс истя тусь, на-той удомо эйсэнзэ эзь кадо. Омбоце чинь валскестэнтъ тетятне-аватне ансяк тустъ ледеме, цёрынесь таго сась «ареназонзо». Икеле ладсо кузсь верце жолгантъ лангс ды якась ней уш прок алкуксонь циркач. «Мекс минек велесэ арась цирк? Монь нейке тов саевлимизь», — арсесь сон. Апак пеле якась вейке палманьстэ омбоцес, те тевесь ко-даяк тензэ эзь налкставо. Тесэ марясь кежей вайгель.

— Эй-эй-эй, кие тосо озорови?! — серьгедсь кардазу-далдо Олдай баба.

Митя варштась тона ёнов, те шкане ве пильгезэ менсь, ды сон прась. Паро, правольгак масторов, ансяк прамсто панарозо понгсь моргос, ды цёрынесь ней понгавтозель прок безьменсь. Бабась яла малавгадсь.

— Понгить, салыця?! Пазось наказынзеть, — мурнесь сон. — Кодак оно саян теть пиципалакт...

Митя аштесь чатьмонезь, прок келезэяк кундатотсь, прянзояк эзизе кепсе.

Бабась ноцковтызе панардо, ды сон прась масторов, панарозо сезевсь.

— Вай, Верепаз, — ознозевсь Олдай баба, — те, никак, монь нуцкам.

— М-м-мон, б-б-бабай, — пшкадсь тона.

— Ды тон кода тезэнь?.. Натъ, истяк а максовлинь теть куярт? Ней тиринь бабать туртов саламо сыть.

— М-м-мон, бабай, аволь куяронь кисэ... — ушодсь Митя.

— Эно мезень? Тон, натъ, сеят, капстат теть эрявить?

— Монень мезеяк а эряви, — мерсь цёрынесь стямодо мейле.

— Кода истя а эряви, сестэ мезть тия лытат?

— Мон тень... циркачокс тонавтнян.

— Кода-кода?

— Циркачокс.

— Цирькунокс?

— Цир-ка-чокс.

— Те кода истя, саевлить панарпотмо куярт, ды кияк а неевлинзеть?

— Мон аволь клоунокс тонавтнян. Мон пикс ланга якицякс улевлинь. Ошсо циркев сайнимизь, тосо неинь, кода артисттнэ якить пикс ланга. Мон ушодынь тонавтнеме тонь жолгатнень лангсо...

Те шкане марятотсть вайгельть.

«Нетъ минек куринкансетне сыргасть экшелямо», — арсезевсь цёрынесь ды кекшсь пирявксонть удалов.

— Олдай бабай, тон эзик нее Митянь? — кевкстять ютыцятне.

— Арась, арась, — савсь кенгелемс бабантень.

— Минь кудовгак тензэ якинек, арась. Кодак несак, мерть, кадык сы экшелямо. Мейле минек куринкась карми Верепе марто футболсо налксеме, сон тенек пек эряви.

— Ёвтан, ёвтан, — мерсь Олдай баба.

Эйкакштнэ сыргасть седе тов, ды Митя стясь бабанзо малас.

— Тон эзить томбаво? — кевкстизе тона. — Мон путытинь куяронь салыцякс, тон оно мезть пирявксон лангсо тейнят.

Митя прок эзь марьяк эйсэнзэ. Сон прамодо сэредьксэнтъкак уш стувтызе, кецясь: ялгатне эзизь нее панардо жолгас понгавтозь. Мейле велень келес раксевлизь. Ней жо сон арси поладомс тебензэ.

Паряк, юты зярыя шка, ды минь несынек Митянь циркстэ. Тенень кемезеваткак: пек уш покш бажамозо цёрыненть. Зярдю пек бажат ды ули мелеть — арсемат топавтовить.

ЧИНЬЖАРАМОТ

ТЕДЕДЕНЬ кизэсь истямо пиземев, натой ушов ли-семскак мель арась. Митькань бабазо стувтызе уш, зярдэ пиземесь валсь истя кувать. Истямо шкане ёжоськак кодамо-бути а вадря, весе нусманят.

Митька ды бабазо озадот вальма вакссо, чатьмонезь ваньть ушов. Пиземесь чавозь чави латонть ланга. Модась истя летькемсь, ведесь эйзэнзэ а сотавияк, лангсо ашти. Ушованть вейке ютыця а неят. Жучкаяк нерензэ а венсти кудынестэнзэ.

— Ва, эмежтнеяк наксадыть ведьсэ аштезь, — мелявтьс бабазо. — Ней уш сёксеськак эль сы, берянь ули, бути сон поладсынзе кизэнь пизементнень...

Митька яла чатьмонсь. «Паро шкасто зяро налксемат ялгань марто ушосо налксевлинек», — мелявтозь арсесь сон.

— Митька, чиньжарамопря, паряк, сезят? — апак учне пшкадсь нуцканстэнь бабазо.

Цёрынесь амельсэ стясь таркастонзо ды варштасть лия вальмаванть. Пирявксось, конань сырькаезэ умок уш тейнизэ тарадсто, неявсь тейтерьявань раужо черьпулокс. Вакссонзо касыця чиньжарамотне нежедизь эйзэнзэ покш пряст.

Митька каясь лангозонзо седе лембе оршамопель ды ношкстась пирев. Сон стясь чиньжарамотнень ваксс ды эзь сода, конань сеземс — вейкесь омбоцеденть вадря.

Цёрыненть тюзала прязо те пиземев чистэнтъ неявсь вишка чипайнекс. Бабантень, лангозонзо ванозь, марявсь, прок пиземеськак аламодо лоткась. Сон панжизе вальманть ды венстинзе кедензэ ушов. Лангозост прасть зярыя ведьбайгинеть. Пиземесь алкуксккак прядовома лангсоль.

Цёрынесь мизолдозь варштасть бабанзо лангс. Тонась мизолдозевсь. Митька сезизе сехте покш чиньжарамонтъ

ды совавтызе кудос, путызе сонзэ вальмалангс. Кудосонть сеске кода-бути валдомгадсь, лембелгадсь. Бабась озась нуцьканзо ваксс ды кеместэ кутмордызе сонзэ.

— Вантака, Митька, пиземеськак лоткась, — нуцьканзо прянтъ вадяшамсто мерсь сон. — Те тон лоткавтык сонзэ.

Митьканень теевсь мельспаро. Сон автордызе чинь-жарамопрянтъ ды ношкстась ушов. Курок весе куринокань ялгатне пуромсть вейс.

ОЦИНИЦЯТ

ЗЯРДО Алёша сыргозсь, Митя лелязо кудосо уш
арасель.

— Сон таго тусь оцинямо, — пачтясь тензэ сырькаезэ.

Цёрынесь сельведень кирдезь кармась удома тарканзо
пурнамо, сонсь моткодсь:

— Ялатеке мезеяк а леди монтемень.

Сон арсесь кортамс лелянзо, сонзэяк саевлизе мартон-
зо. Шкась мольсь седе а ков састо. Ансяк чикуншка малав
кудыкельксэнь кенкшесь, окойники, чикорк тейсь.

«Те — лелям», — арсезевсь цёрынесь.

Алкукскак, панжовсь кенкшесь, ды мизолдозь совась
Митя.

«Эка, кренчкак эзь леде, сонсь мельспаросо ашти», —
кортасть эськанзо Алёша.

— Эх, те вана охоталь!.. — ушодсь прянь шнамо Митя.
— Виресь пешксе ракшадо, нармунде. Кодамо мазый вирь
чиресь, зяро цецят!..

«Те уш ковгак а маштови: оциница, сонсь цецядо кор-
ты», — яла «сэвтнесь» лелянзо Алёша. Сонсь коня алга
вансь мельганзо.

Митя понгавтызе ружиянзо стенас.

— Озадо ярсамо, — пшкадсь сырькаест, ды лелят-
ялакст чатьмонеэзь озасть столь экшс, ушодсть ямдо кор-
шамо.

— Тон ней зярдояк арсят моньгак мартот саеме? —
окойники, пшкадсь Алёша.

— Вишкинят зярс, — нурькинеэзэ мерсь Митя.

— Вишкинян... а тон покшат? — эзь максо пря Алёша. —
Зяроце чи оно чавонь кедть сакшнат.

— Кода истя чавонь?..

— Истя оно.

— Несак, а чарькодят, вишкинят. Пелян, сизят, кадоват,
— эзь пота Митя.

— Леляй, а леляй, паряк, сайсамак? — яла энялдсь
Алёша, ярсамонзояк кадызе.

— Эно тонь ладсо улезэ, сайтян, — чевтемсь покшось.

— Нейке? — кецязь кирнявтьс таркастонзо Алёша.

— Цидярдт валскес, — оймавтызе лелясь.

...Алёшанень чись эль ютавтовсь. Чокшне удомаськак
тензэ кодак эзь педя.

— Эй, тон, оциния, стяк, — валске марто стявтсь
сырькаесь Митянь.

Стясь Алёшаяк. Сон ёртозь ёртовсь удома таркастонть,
ёндокс оршнесь.

— Тон ков? — абунгадозь кевкстясь сырькаезэ.

— Кодя ков — оцинямо, — кенярдозь мерсь Алёша.

— Оцинямо?... — мизолдозевсь сырькаезэ. — Эно васня
ярсавлиде.

— А зярдо, — кеместэ мерсь Алёша.

— Кенертядо лытамо, вачо кияк а яки, вий пурнадо...
— кортась нуцканзо марто сыркаесь.

— Минь а кувать, — оймавтыксэлизе Митя.

— Вай, тунь а кунсолить, — апаркстомсь тона. — Мар-
тонк эно мезеяк саевлиде.

Митя ружиянзояк уш каякшнызе лавтов лангс, кода
сырькаезэ венстясь тенст пидезь алт ды чевте кши кочом.

Цёрынетне кецязь эскелясть веленть кувалт, модемстэ
ярсась бабаст каванямкадонть.

Курок сынь мольсть уш паксянь киванть. Ков иля вар-
шта — розь. Сон лымбакстнесь, прок ожо иневедь¹. Пот-
мованзо тесэ-тосо кассть сэняжа цецят. Зярдо пачкодсть
эрькинетнь малас, цёрынетнень икельде ливтясть идем
галат. Митя седе курок саизе лавтовонзо лангсто ружиянтъ
ды аравтызе галатнень ёнов.

¹Иневедь — море

— Т-т-тон мезе, ледевлишь? — ацирьгадозь кевкстизе Алёша.

— Иля пеле, — оймавтсь лелязо.

— Кодя иля пеле, тонсь оно аравтык ружият?!

— Ды те монь фоторужия.

— Кодя-кодя?..

— Ру-жи-я, кона тейни фотоснимкат.

— Снимкат?

— Снимкат, фотографият.

— Эрьга, истяткак эрсить?..

— На, кирдть.

Алёша пелезь саизе ружиянть кедезэнзэ.

— Кунсолока, сон алкукс а леди?

— Алкукс, алкукс. Варштак пертьпельга.

— Ней мезть ванат, галатне уш тусть.

— Сынь васолот, ансяк тон несуть, эряви пурдтнемс вана те чарыньканы.

Алёша кепедизе фоторужиянть.

— Неят?

— Арась... ага, вана карминь нееме, неян, неян, парсте неян. Эка, кодат мазыйть галатне. Сынь ливтить мекев эрькенть ёнов.

— Бути мелезэть тусь те кадрась, лепштик повненть.

Фоторужиясь штёлк тейсь.

— Вана истя, мейле тейтяно фотография. Ули мелеть модемс вирев? — кевкстясь Митя.

— Адя.

Вирьсэ лелят-ялакст снимсесь цецяв кужот, чувтопрясо нармунень пизэть...

— Паряк, течис саты? — пшкадсь Митя.

Алёша аволдась прясонзо, ды сынь сырگاсть кудов.

Апак учне каятотсь кашторкс. Цёрынетне тандадсть, лоткасть. Каштмолезь кармасть ваномо пертьпельга. Каштордомась яла малавгадсь ды малавгадсь. Цёрынетне арасть эчке тумо эхкс. Веёно неяви сюракшов пря, мейле лиссь весе рунгось. Те ульнесь сярдо. Сон састыне эскелясь кужонть трокс

ды мольсь чувтотнень ваксс. Чувтотнестэ порнесь чова лопава таракдеды апака капша каволясь эйсэст. Лелят-ялакст пелезь ладсо, ялатеке мельспаросо вансть тюжа мазыйканть мельга.

— Венстикая монень, — састыне пшкадсь Митя ды саизе фоторужиянть.

Шкань апака таргсе весть, омбоцеде снимизе сярдонть ды понгавтызе ружиянть лавтовонзо лангс.

Сярдось кувать эзь аште кужосонть, эскельдясь чувтотнень ёнов ды ёмась тусто виренть потс.

Сестэ цёрынетнеяк сыргасть кудов. Велесь виренть эйстэ а васоло, сексак сын пачкодсть курока.

— Те мекс истя кувать, мезеяк эзь тееве? — ризнэзь-мелявтозь вастынзе сыркаяст.

— Мезеяк эзь лисе, мезеяк, — кортасть каршонзо нуцкятне.

— Эр, паро эно, адыдо совадо, — чевтестэ пшкадсь сыркаяст.

Цёрынетне капшазь ярсасть ловсо марто панжакайде ды кармасть фотографиянь тееме. Митянен аволь умок ошто рамизь весементь, мезесь зряви тень туртов. Цёрынетне зярс-бути чоподасо карасть-пулькасть ведь ды конёв марто, ды шкань ютазь путсть столенть лангс зярыя аламодо начко фотографият. Вишка оциниятне мельспаросо ванкшность сынст. Оно вейкесэнтъ тюжа мазыйка сярдось, пижесэнтъ неявить галатне, лиянть эйсэ — мазыйдеяк мазый цецят...

— Стяко якиде, — мольсь нуцканзо ваксс Олда баба. — Вишкинетядо зярс оцинямонтень...

— Меньгак а вишкинетяно, — мерсь сыркаяенстэнь Алёша. — Неят?

— Неян. Якасть овтос — кандсть фотографият, — кортасть яла сыркаясь. — Мезеяк а чарькодян.

— Монгак, бабай, а сеске чарькодинь, — видькстась Алёша.

...Пароль Алёшань ды Митянь оцинямост. Ней сын ялгасть туртов аволь ансяк ёвтнесызь, мезе несть, невтезьгак невтьсызь: фотографиятне курока коськить, улить анокт.

ПАРО КАЗНЕ

ОЙМСЕМА чи. Охримка чары-поксари кудосо — муевесть эрва кодат тевть: сюлмась соксозонзо од карькскеть, витнинзе-петнинзе ташто книгатнень.

«Паро улевель те книганть тагояк ловномс, — арсезевсь цёрынесь. — Мон уш стувтыя мезде». Велявтсь вейке лопа, мельганзо омбоце — ледсь мелезэнзэ, мезде сон. Охримка мельспаросо ютась мартонзо диванонть ёнов ды уставась ловномо.

Апак учне кальцькадсь кузтемань кенкшесь, кудыкельганть марятотсть эскедькст. Совась Митька.

— Тон, Охримка, мезтькак содат? — сеске кевкстась совицясь.

— Арась.

— Монь течи чачома чим! — кенярдозь мерсь ялгась.

— Те паро. Течи, мерят?..

— Течи... аволь течи, ванды, ансяк авам мерсь, тешкстама течи. Течи оймсема чи, ды миненек састь инжеть, мик Тумкинасто ды Килейбуестэ. Эрь, паро эно... Куроксто пурнак, монень молема Эньканень ды Иванканень, — мерсь цёрынесь ды ношкстась.

Охримка аштесь абунгадозь. Сонзэ мелявтсь вейке арсема: мезе каземс сех малавикс ялганзо туртов. Сельмесэнзэ ютынзе книгань лавсинень, столь лангонть — мезеяк истямо арась.

«Авам кудосо улевельгак, мезеяк муевель, превть максоволь», — арсесь цёрынесь.

Шкась молись. Охримка кармасть оршнеме. Курок ульнесь анок, ансяк казнесь зярс арасель. Венстизе кедензэ кемензэ мельга ды тесэ токавсь конёвонь паргинес. Комась

ды ускизе сонзэ — эйсэнзэ ульнесь машина, конань аволь умок казизь Охримканень.

«Паро казнесь улевель, — арсезевсь цёрынесь. — Ансяк кода сонзэ казьяк: сон аволь од. Ташто налкшкеть кияк а казни...»

Охримка истя варштасы машинанть, истя путсы.

«Мезе, прок од, — седе кеместэ мерсь эстензэ. — Коць-кердявкскак арась лангсонзо, коробкаськак апак мерька. Сайса».

Сайсь газета ды тапардызе муевксэнтэ эйзэнзэ. Мейле карсинзе кемензэ ды капшазь сыргась Митькамеэзень. Пельсь, а кенери, весе лия ялгатне эрить седе маласо.

Кенкшенть панжомсто цёрыненть седеезэ седеяк кармась чавомо. Мелявтсь: туи а туи мельс казнесь. Совамонзо кияк эзизе маря: кудосонтэ инжетнеде ламольть, марявсть гайтев морамот, кортамот.

Састо эскелязь, инжесь совась икельце кудос.

— Ба-а-а! — серьгедезь серьгедсь столь экштэ вейке авась. — Те кинь истямо нузяксось, зярэ эзь саво?

— Те монь ялгам, — кеместэ мерсь оянзо ваксс молементэ Митька. — Те — Охримка.

Цёрыненть ёжозо тунь берякадсь, чамазояк ловташ-кадсь.

— Охримка те, Охримка, — чевтестэ пшкадсь Митькань авазо, Клавдя патясь. — Те минек Митькань паро ялгазо.

— Секс меельцекс сась? — згилясь секе авась.

— Сон эри васоло, Удалце песэ, — пшкадсь ялганзо кисэ Митька.

— Минь минсь чумотано: шкастонзо эзинек ёвта, — тагояк максызе вайгелензэ Клавдя патясь.

— На, Митька, те тонеть, — Охримка, венстизе кандовксонзо оянстэнь.

— Адя паро, мень казнеть, — мерсь тонань авазо. — Тон тонсь прок казне.

Митька саизе тапарксонтэ, калавтызе. Панжизе коробканть ды таргизе тосто машинанть.

— Эрґа, кодашка машина кандсь! — келемтинзе кедензэ столь экшсэ секе авась.

— Те — КАМАЗ. Сон сонсь ардтняк, — ней уш Охримка тунь эзь визде.

— Эрґа, невтика, — пшкадсь инжетнестэ конась-бути.

Охримка саизе КАМАЗ-онтъ, пурдтнизе икельде чарамкинентъ, ды машинась урнозь сырґась ардомо.

— Ды сон, паряк, сталмояк уски? — ней уш лия вайгельсэ, чевтестэ, кортась се патясь.

— Нама, уски, — мерсь машинантъ од азорозо, Митька.

— Эрґа, вачкинка нетнень, — патясь саинзе столентъ пестэ книгатнень, конатне казезельть Митьканень, ды путынзе кузовонтень.

Машинась сталмонтъ мартояк шождасто ардсь кудонь ве ужосто омбоцес.

— Вадря казнесь! — шнызе патясь.

— Вадря, паро, — кортасть лиятнеяк.

— Митьканень сехте покш казнесь — тынк самонк, — мерсь Клавдя патясь. — Сюкпря тенк, ломанькс ловимизь... Эрґ, паро кортамс, пси каванямкат кандан.

— Ойседе куроксто, — мерсь Яхим лелясь, Митькань тетязо.

Курок весе ойсестъ столь экшс, ды чатьмонемасонтъ марятотсть ваканс пенчень калыцькаемат.

Ярсыцятне, сехте пек вишка инжетне, шкань-шкань мельспаросо ванкшность машинантъ ланґс. Кенярдсь Охримкаяк — вадря казне кочкась Митьканень!

НЕСШКЕВЕЛЕ

ВАНЯНЬ покштязо — стадаваный¹. Ваня арси: стадань ваномась — сехте покш теv, секскак максызь ансяк сонзэ покштянстэнь. Цёрынесь ламоксть энялдсь икелензэ, саевлизе мартонзо. Покштясь яла потась: пиже зорят, келя, стямс эряви, ды истякак стадань ваномась аволь эйкакшонь теv. Ансяк весть седеезэ каладсь:

— Вадря эно, ванды, зярдэ стят, сак лугалангов, мон тосо улян...

Ваня пек кецязевсь, Маша ялганзояк тердизе мартонзо. Чинь перть цёрынесь мелявтсь, кода а удовомс ды шкастонзо молемс покштянстэнь лездамо.

Мелявкстнэ ульнесть стяконь. Сон стясь шкастонзо, совась Машань мельга, ды сынь сыргасть Ванянь покштянстэнь лездамо.

Скалонь стадасть веледенть а васололь, покш пандонтъ ваксоль. Эйкакштнэ куроцто пачкодсть малазонзо. Чизэ уш верель, секс скалтнэ эзть ярса, сынь пуромсть вейс, аштесть прянь нолдтнезь. Зярыя скалт совасть латконь летьке потмаксонтень, кекшнесть чиденть каль куракштнэнь потс. Тосо седе эцше, чись а токи.

Стадань ваныцясь озадоль луга лангсо, локшоцо путозель пильгепесэнзэ, сонсь нувсесь. Лездыцятненень кенярдозевсь, мерсь:

— Мон аламось сутяман, тынь ванодо скалтнэнь мельга.

Ялгатне озасть чудикерькске чирес ды кортазевсть исень кинодонтъ. Весемесь мольсь ладс, скалтнэ аштесть сэтьместэ. Ансяк апак учне сынь прок азаргадсть, паразевсть, кепедизь пулост ды ношкстнесть кона ков понгсь.

¹Стадаваный — пастух

— Покштяй! — пижакадсь Ваня. — Скалtnэ ор-
годсть!

— Кодя истя оргодсть? Мекс? — тандадозь кирнявтсь
атясь.

Те шкане малавасть бизнэзь-лажнозь ливтясть мекшть.

— Те нешкевеле, — мерсь покштясь. — Секс скалtnэ
бизакадсть. Мекшетнень эрявить валгстомс. Эрьга, Маша
тейтерькам, понгавтыка ашо пацят калькуракшонть ланга.

Маша вельтизе куропрянтъ пацясонзо.

Мекшетне сыргастъ ливтямо пацянтъ ёнов.

— Ага! — кенярдозь серьгедсь Ваня.

Нешкевелесь састыне ливтясь ашоланть ёнов, лоткась
вельксэзэнзэ ды валгсь лангозонзо.

— Вана мезе, эйкакшт, а мезть сатстнемс шканть. Ней-
ке мезе виенк чиеде нешкепирев, сон вирьколканть¹ тона
песэ, мерее мекшень кирдиця Вася лелянтень: мекшензэ
менсть, минь сынст кундынек, сазо мельгаст...

Эйкакштнэ ношкстасть ды курокто велявтсть мекев
Вася лелянтъ марто. Сон кандсь парго, раужо вельтямо ды
качамоень нолдтнемка.

Вася лелясь курокто пурнынзе мекшетнень паргон-
тень, нолдась лангозост качамо, ды тонат оймасть. Мейле
сюлмизе паргонть раужо вельтявкссонть ды мизолдозь
мерсь:

— Мезе, мекшень кундыцят-лездыцят, адыдо монень
инжекс, каванятадызь медте.

Эйкакштнэ кецязевсть, стадасткак стувтызь.

¹Вирьколка — лесочек

АРСЕМС ШКА АРАСЕЛЬ

ШКОЛАВ минь яксетяно шабра велев, кона минек
Инелейденть ашти котошка вайгельпень тарка.

Мольсть таштамковонь¹ меельце чить. Ушосонть лем-
бель, кадык менелесь копачазель пельсэ ды косто-косто пу-
васть экше вармань коволнэть. Минь Митя марто молинек
кудов. Ютамсто кортынек тонавтнемадонть, ютазь чиденть,
вечкевикс книгадонок, хоккейде, конасонть пек вечктяно
налксеме. Монь ёжом пароль: те чистэнть получинь кавто
вететь. Митя аламодо нусманяль: сонензэ рузонь литера-
турань уроксо Татьяна Николаевна путсь ниле.

— Весть ансяк манявиньгак, — мелявтсь сон.

— Иля ризнэ, — бажинь оймавтомонзо. — Сы уроксто
витьсак.

— Витеманть витьса, виздян ансяк, покштям варшты
дневникезэнь. Тон эдь содат, мон арсян улеме журналистэкс.
Покштям тень кис пек шны эйсэнь. Сеедьстэ корты: «Келенть
ды литературанть теть пек парсте эряви содамс, лиякс вадря
журналистэкс а улят». Секс свал ванкшны тетрадень...

Митя эль кенерсь валонзо прядомо, кода пилезэнек кая-
тотсь аваломанень пижнема ды эйкакшонь авардема. Минь
талакадозь чувтоминек тарказонок. Васня эзинец чарькоде,
кона ёндо марявить вайгельтне, ды ансяк сень неезь, кода
икеленек молиця тейтерькатне ношкстасть кинть лангсто,
варштынек удалов.

Веленть ёндо, косто минь сылинек, кополсо ардсь
крандазс кильдезь гнедой лишме. Крандазсонть авась
ождятнесэ бажась сонзэ лоткавтомс. Ансяк виезэ, неявсь,
эзь сато, секскак сон пижнесь, вешсь лезкс. Эйзэнзэ кавто

¹Таштамков — сентябрь

кедьсэ кундазь, пиже-ожо вайгельсэ рангсь вишка тейтерне. Мельгаст ардсь грузовой машина, секе тев бибикистнесь.

Лишмесь прок азаргадозь ардсь ёнонок... «Мезть тей-немс? — арсезевинь мон. — Стямс каршонзо — чалгсез-тянзат». Ды мон арынъ веёнов. Митя кадовсь тарказонзо, кинть куншкас.

Мон ноцковтыксэлия Митянь эсень ваксс, ансяк сон ношкстась ардыця лишмень каршо.

— Тон ков?! — тандадозь пижакадынъ тензэ.

Митя ульнесь уш лишмень вакссо. «Маштовсь!» — кивчкадсь пряван, ды тандадомадонть натой конинь сельмень. Зярдэ панжинь, Митя уш ульнесь кундазь пан-стонть, а кувать усковсь лишмень вакссо, мейле кедензэ менсь, ды сон прась лишмень пильге алов.

Лишмесь эскельдась троксканзо, аламо таркань ютазь лоткась. Мон ды маласо лия ютыцятне чиинек Митя ваксс. Сон ульнесь ёжовтомо, паряк, понгонесь чары алов. Лезды-нек тензэ. Сон панжинзе сельмензэ ды прок чумонь марязь пейдзевсь. Снартнесь стямо — стакасто кувсезевсь, мекев сяворсь моданть лангс.

Крандазстонть валгсь учётчицась, Маша патям. Эйкак-шось нейгак кавто кедьсэ кундазель аванзо эйс, тандадо-мадонть эзь кортавоак, ансяк састо ниреждсь¹.

Те шкастонть ваксозонк лоткась машинаськак, шофе-рэсь кевкстась:

— Живтядо?

— Живтяно, — машнетезь пшкадсь каршонзо Маша патям. — Варфул марто тынь чумотне. Эрявсь тенк ютам-стонок тракторонть нолдамс. Ней адя велявтт мекев. Митянь эряви ускомс больницяв. Светаньгак невтьса врачнэнь. Ванат, а кортавияк.

Мон саия ялгань портфелензэ ды сыргинь кудов. Куш кияк берянь валгак тень эзь ёвта, Митянь икеле маринь прям пек чумокс. Визькс тень ульнесь...

¹Ниреждемс — всхлипывать

Митянь паро тевдензэ куроосто марясь весе школась. Мейле кулясь срадсь кавонест велетнева. Весе шнасть эйсэнзэ. Аволизе лоткавтояк лишменть, кие соды, мезе улевель аванть ды эйкакшонть марто: минек велентень совамсто кись моли сёлт¹ чирева, конань берёконзо пек сэрейть, истя ардомсто, секень вант, сяворевель тов крандазось.

Зярдэ Митянь ёжозэ седе вадрялгадсь, минек нолдымизь сонзэ содавтомо. Сынек класснэк, мартонок классонь ветиенекак, Вера Николаевна, ды тейтерьканзо марто Маша патям. Кандынек книгат, газетат. Митянь кедезэ тапарязель, вить пильгезэ гипсэсь. Сон пек кенярдсь эйзэнек.

— Митя, кода истя тон эзить тандадо кундамс лишменть панстто? — кевкстия мон сонзэ.

— Покштям тень ёвтнекшнесь, паро лишме зярдояк а чалги ломань лангс, — мерсь сон. — Гнедоеськак эдь монь эйс эзь вачкодеве, ансяк пек ардомадонть мейле сеске эзь лоткаво.

— А тон эзить пеле? — кевкстизь лия ялгатне. — Ютавольгак лишмесь лангат, весе мерькавлинзеть.

— Монень теде а кона шкане ульнесь арсемс, ансяк марявсть тень авардемаатне.

...Седе мейлеяк минь эзинец стувтне ялганок. Чистэ кияк ды сыль содавтомонзо. Кандылинек учебникть, книгат, ёвтнинек тензэ школасо ютазденть.

Курок Митя виемсь, пек содавиксэкс теевсь, ансяк зярдояк эзь покшкавтне.

¹Сёлт — пруд

ТЕЛЕНЬ ИНЖЕТЬ

— **ЗяРДО** эно сы телесь? — таго нусманясто кев-кстнесь бабанзо Эленушка.

— Ней уш курок, курок, — оймавтсь нуцьканзо Наталь баба.

— Исякак мерить курок, теченияк...

— Курок уш, — яла кортась бабась. — Стяк, шляк-нардок ды — ярсамо.

— А стян, а шлян, — кольнезевсь тейтерькась.

— Истя паро тейтерькат а тейнить, истя а лади.

Дзинь, дзинь, — апак учне марятотсь вальмас чова вачкоема.

Эленушка ёртозь ёртовсь таркастонзо, чийсь вальмантень. Ваны ды эсь сельмезэнзэ а кеми: вальманть тона ёно — тынгайт¹. Вейке омбоцеде мазый: пекинесть якстердить, прок тантей умарть кеверькшнить ушо ёно вальмаланганть. Вейке омбоце мельга молить суликантень ды нерьсэст весть, омбоцеде дзинькадить...

— Эленушка, нуцькам, — пшкадсь каштомикельде сырькаезэ.

— Ш-ш-ш... — невтсь сурсонзо тейтерькась, — састо, неят, кить тесэ?

Бабась капшазь мольсь вальманть ваксс. Нармушкатне тандадсть ды ливтясть маласо умаринанть лангс. Нуцькат-бабат мельспаросо вансть штапо чувтонть лангс, кона ней прок пешкедсь якстере умарде.

— Ней уш алкукс, нуцькам, курок телесь сы, — толковась Наталья баба. — Якшамось панинзе вирьстэ нар-

¹Тынгай — снегирь

мунтнень, амезде тенст тосо ярсамс, секс сынъ састъ тей лезкс мельга.

Тейтерькась куроксто кармась оршнеме.

— Тон истя ков? — талакадсь бабась.

— Мон курок, молян Миколь лелянень, — пшкадсь тейтерькась ды ношкстась ушов.

Нать, лезкс мельга тусь: телень инжетненень эряви те-емс ярсамо тарка. Секень вант, течи-ванды пры лов, мезе сестэ ули инжетнень марто? Эряви тенст лездамс.

ЛЕДЕЗЬ НУМОЛКАЙ

ТЕТЯНЗО-АВАНЗО марто Сегорка учось автобус. Автостанциясонть ломантнеде ульнесь аволь ламо, секс цёрынентень кортамскак а кие мартоль. Вишкинькат допрок арасельть. Сон а весть уш ютась автостанциянтъ перька, шкась кодаяк эзь паневе.

— Тетяй, а се оно мезе? — невтсь Сегорка аволь васоло аштиця лазонь кудыненъ лангс.

— Се — тир, — мерсь тетязо.

— Те мезе истямось?

— Леднема тарка.

— Леднема тарка?

— Истя.

— Мон пек вечкан леднеме! — кецязевсь цёрынесь. — Кудосо автоматон оно зяро, наганомгак ули.

— Сестэ адя, — тетязо саизе кедте, ды тусть тирэнтъ ёнов.

Тирэсь чаволь. Кенкшентъ вакссо озадоль сыре аваломань.

— Инескетъ, инескетъ, совадо, — чевтестэ пшкадсь сон тенст. — Те, улема, вишка охотник?

— Истя, истя, — мерсь тетязо.

— Тесэ ули мезе ледемс, варштадоя, зяро ракшатнеде!

Васоло стенантъ икеле аштеть ривезть, нумолот, верь-гизт, овот...

Тетязо пандсь авантень ярмакт ды сайсь винтовка. Анокстызе, максызе Сегорканень. Цёрынесь весть, омбоцеде эйстэнзэ ледсь — эзь понго. Пистонтнэ прыдовома лангсольть уш, кода чийсь Сегоркань авазо.

— Оно косот сын! Адыдо куроосто, автобусось, секень вант, туи, нать, стяко зярс учинек...

— Ужодоя, меельцеде монсь ледян, паряк, нумолонть эйс понган, — мерсь тетязо.

Ледемась гайгстась тирэнтъ келес, ды нумолкаесь ко-
мась алов.

Тетязо саизе Сегоркань кедте, ды капшазь сыргасть автобусонтень.

Ардомань перть цёрынесь нусманяль, чатьмонезь вансь вальмава.

— Тон, Сегорка, аволь ормалгадыть? — мелявтозевсь авазо.

— Арась, — амельсэ мерсь цёрынесь.

— Тирэсь мелезэнзэ тусь, а туиксэль, нать, тосто, — пейдезевсь тетязо.

... Велев пачкодсть куроосто. Сегоркань мельга совасть ялганзо, ды сынъ тусть ушов. Чокшнес Сегорка налксесь тосо, эль тердевсь кудов.

Сиземадонть сеске матедеземаль, ансяк удомась кодаяк эзь педя. Сегорка секе тев велявтнесь таркасонзо. Сельмен-
зэ икеле аштесь тирсэ ледезь нумолкаесь.

«Мекс автобустонть эзинь кадово? — янксесь Сегорка. — Молевлинь нумолкаенть вакс, тапарявлия лапинензэ, паряк, вельмевель. Те шкас верезяк уш чудесь, паряк, ку-
лось. Мезекс тетянень эрявсь ледемс нумолкайненть?..»

Арсематне, мелявтоматне певтемельть. Окойники, сель-
мензэ конявсть. Матедевсь цёрынесь. Ансяк онстонзояк
неизе ледезь нумолонть. Сон эзь сода: тирсэ ракшатне
аволь алкуксонь — кшнинь, жестень.

Паряк, толковасынк тензэ, бути вастасынк?

ВИКШНЕВКСТ

МАША, Дима ды Коля — вадря ялгат. Сынь вейсэ якить школав, вейсэ чийнить ушоваяк.

Вана течения сынь вейсэ озадот Димамезень кузтемпесэ касыця килеенть алов путозь кувака ды келей эзементь лангсо.

— Неинк монь авань портретэнзэ Почётонь лазсто? — кевкстясь Маша. — Сынь сехте ламо пурнасть паксясто ламбамо якстерькайт.

— Те мезе — кастомс якстерькайт, — эзь цидярдю Коля. — Монь авам важдо тракторсо. Тунда — соки-види, кизэнь перть валны эмежть ды ванськавты сынст тикшеде, сёксня тарги модамарть ды якстерькайт. Тонь авать якстерькайтненьгак сахаронь заводов сон ускинзе.

— Те кода истя: вейке тракторось сонсь сокиак, видияк, таргияк? — кевкстясь Маша.

— Тракторось кадови теке, ансяк удалонзо понгавтневиця лездамопельтне полавтневить, — мерсь Коля.

Маша ды Коля ламо ёвтнесь авадост. Кортасть седе, кода ды косо сынь важдоить, кодамо эрявикс сынст те-вест.

— Тон, Димка, мекс чатьмонят, мекс мезеяк а ёвтнят авадот? — пшкадсь Маша.

Димка аламнес чатьмонемадо мейле нусманясто мерсь:

— Монь авам ковгак важдоде а якси, сон кудазорава.

— Ха-ха-ха! — вейсэ раказевсть Маша ды Коля.

— Эрьва авась кудоютконь тевть тейни, — мизолдозевсь Маша.

Те шкане ялгатнень малав сась Нина, шабрань тейтерькась. Сон колмошка иеде седе покш корязост.

— Тынк аволь мезеяк теевсь? — пшкадсь сон.

— Мезеяк эзь тееве, — уктасть Дима.

— Ды вана тень... — виздезь ладсо ушодсь Коля. — Минь кортынек седе, кинь косо важоди авазо. Димка мерсь, сонзэ авазо косяк а важоди.

— Виде, Олдай патям важодеме а якси, — кармасть толковамо Нина. — Сон ламо эйкакшонь ава, шказо эль-эль сатны эйкакштнэнь перька чарамс ды кудуютконь, кардазонь, эмежпирень эрьва кодат тевтнень топавтомс. Теке марто Олдай патям ютко шкасто викшни, коды ды сты, Саранскойстэяк сакшныть викшневоксэнзэ мельга.

Ялгатне мельспаросо кунсолость Нинань. Димаяк вельмезь вельмесь.

— Ди-и-има-а-а! — каятотсь вайгель. — Ярса-а-амо-о!

Те истя Димкань тердсь авазо.

— Адядо, оят, миненек, — тердинзе ялганзо цёрынесь.

Тонат эзть покшкавтне. Кудосо азоровась вастынзе сынст мельспаросо. Сон таргась панжакайтть, мартост эрьвантень кружкас нуртась чапамо ловсо. Ярсамодо мейле эйкакштнэ кармасть налксеме. Кудось пешкедсь шалномадо. Уш сундерьгадамо ланга инжетне тукшность кудоваст.

Димка те чокшнестэнтъ кувать эзь матедеве, сон яла арсесь ялгатнень марто кортамодонтъ. Сон неизе, кода авазо кирвазть вишка лампочкине, састо панжизе горобиянзо, таргась тосто эрьва кодамо тусонь суреть ды ашо нардамо. Мейле озась ды кармасть викшнеме. Истят викшневокст Дима, нама, некшнесь икелеяк. Кудосост ламо викшнезъ нардамот, тодовлангакст... Лисни, весе сынст анокстынзе авазо? Сон кувать вансь тиринзэ мельга, зярс, okayники, эзь матедеве.

Омбоце чистэнтъ эйкакштнэ таго пурнавсть килеентъ ваксс. Те шкане Димкамезень кудонтъ икелев ардсь машина.

— Течи мекс-бути шкадо икеле сыде, — мизолдозь мерсь каршост лисемстэ Олдай патясь. — Седеем марясь,

капшинь, тевем уш исяк чокшне прядыя. Учодо, нейке ливтьсынъ теевксэнь.

— Сюкпря тетъ, Олдай патяй, — мерсть сыщятнестэ вейкесь. — Од тев ускинек, нетнень вана эряви теемс нуьрка шкас. Тейсыть — пачтят вал. Вастомазонок!

Машинась тусь ардозь. Димканъ авазо мизолдозь совась кудос. Натъ, мелезэнзэ ульнесь паро эсь тевензэ кис.

Ней эйкакштнэ вадрясто чарькодсть: Димканъ авазояк а ашти важдемавтомо. Ансяк сонзэ тевезэ лия, истямо, конанъ топавтомо маштыть аволь весе.

Димкаяк аштесь покш мельспаросо. Ней, зярдо сынъ таго кармить кортнеме аваст-тетяст тевде, сон прянь кепедезь мери тенст: «Монъ авам истят викшневокст аноксты, кодат киненьгак а викшневить! Сон мик покштянь портретэнзэяк викшнize. Кинь аванстэнь те тееви?».

СЕХТЕ МАЗЫЙ

СЕГОРКА удома таркасо часошкаль уш, ансяк кодаяк эзь матедеве. Прясонзоль велев кизэнь каникулав туемась.

Сон састо стясь, оштё весть парсте ваннызе пурназь спортивной рюкзаконзо.

«Прок весемесь теске, — мерсь эстензэ, — оската, картузось, «Спартак» сёрмадовкс марто футболкась...»

Пекстызе рюкзаконзо ды, койники, матедевсь.

Онтнэ ульнестъ текеде: мельспаросо вастызь велень ялгатне ды сеске ушодсть футболсо налксеме. Капитаноль Сегорка. Вана сон осканть марто ортатнень вакссо. Пстидизе осканть, ды сон ливтясь пек верьга, орта велькса.

«Эка тон, варака, аволь прявт!» — серьгедсть ваныцятне-сэредицятне.

Теньсэ онозояк сезевсь. Цёрынесь мик ливезькадсь. Седеесь токнозевсь. Ули мезень кис: голось эзь паневе, визькс.

Сон капшазь варштась частнэнь лангс.

Совась авазо.

— Тон, цёрам, мекс истя рана? Удовлитель... Электриканть туемазонзо оно оштё зяро!

— Мон бу спортонь кулятнень вановлинь! — мерсь Сегорка. — Мелем — туемадо икеле парсте чарькодемс «Спартаконь» манявкстнэнь. Кода уш пряст максызь?

Шлямодо-нардамодо мейле цёрынесь озась морганть экшс, кармавтызе телевизоронть ды ярсазь вансь.

Мейле ават-цёрат вейсэ пурнызь моргинентъ ды сыр-гастъ килангов.

...Сегорка аванзо марто мольсь пижелдыця куринак-ванть мельспаросо.

«Велесэ седе мазый! — оймавтсь прянзо цёрынесь. — Футболонь паксиненть маласо Жой лейнесь, авасоло — паксят, цецяв лугат!...»

— Вана пачкодинек! — мерсь авазо, — озак, цёрам, тезэнь, курмот-кармот путыть ваксозот. Мон те шкане саян билетт ды ярсамка.

Цёрыненть маласо панжадолъ келей кенкш, косо неявсть столь экшсэ компьютерсэ налксицят. Марявсь эрва кодамо музыка, ракшань вайгельть — налксемань шалт-гайтъ. Цёрыненть сельмензэ сявадсть, седеезэ токнозевсь-ризнэзевсь. Сон састыне стясь, саинзе улипаронзо, эскельдясь нупалентень. Чавольть ансяк кавтошка столть. Вейкенъ экшс озась сон. Лепштинзе кавто-колмо плаштинетнень, ды экранось валдомгадсь. Лиссть футболсо налксицят. Цёрыненть сельмензэ кецямондонть палозь палсть. Сон налксеманть марто эзизе маря мик поездэнь самодо-туемадо яволявтоманть.

Авась велявтомадонзо мейле эзизе мие эйкакшонзо кадозь таркастонть ды арсезевсь: «Нать, монстемем озась поездс? Паряк, вагонсто вагонс яказь муса».

Вагонга якамось стяколь. Сегорка косоак арасель...

Инелейкасо электричкасто лисемстэ авась сеске неизе учицяно — Сегоркань бабанзо, кона шумбракстнемадо мейле сеске кевкстизе, мекс эзь са нуцказо.

— Сегорка марто явовинек, — толковась авась. — Паряк, лиси кодамояк вагонсто.

Ансяк учоматне ульнестъ стяконъ.

— Иля ризнэ, авай, мон саян такси ды туян мекев ошов, паряк, вокзалсо.

— Пазось мартот.

Ошсо вокзалсо налксемань нупальсэнтъ Сегорка вакс мольсть кавто полицейскойть.

— Тонь, цёрынем, кода леметь? — кевкстизе эйстэст вейкесь.

— Сегорка, — кеместэ мерсь сон.

— Кадынк налксеме, — уш веёндось серъгедсь налксема

комнатань азорось. — Течи минь ютавттано акция: каникулань васенце чистэ эйкакштнэ налксить стякодо.

— Зярс оштё можна налксемс?! Тон, цёрыне, кинь марто? — кевкстизе полицейскоесь.

— Авань марто. Сон тусь лавкав килангс ярсамкань рамамо. Мон те шкане — компьютерсэ налксеме.

— Ды те шкас рамси? Поездэсь умок уш тусь. Вокзалоськак чамсь. Адяка, цёра, мартонок полицияв.

Полициянь комнатась тескель, вокзалсоль. Погонсотне ялатеке лездасть кандомс Сегоркань улипаронзо. Сынь пачкодсть сеске. Сегорка озась чевте диванонтъ лангс, пильгензэ вакссолить канстонзо.

Полицейскойтнень эйтэ вейкесь таргась конёвт ды ручка. Сёрмадызе цёрынентъ фамилиянзо, лемензэ, адресэнзэ...

— Монь койсэ, зярс а эряви ковгак пшкалемс, вана курук сы электричка, паряк...

Вокзалонтъ келес радиорупорстонть гайгстась вайгель: «Васенце кинтень сы электричка...»

Полицейскойтне Сегорка марто лиссть перрононтъ лангс. Ломантне ламолгадсть: веенст вастасть сыщятнень, омбонстнэ бажасть туеме.

— Эрь, невтик, конась тонь ават? — кевкстизе вейке полицейскоесь.

Сегорка тей-тов варштамодо мейле аламос аштезь гайтевстэ мерсь:

— Конась сехте мазый!

Полицейскойтне мизолдозь варштасть вейке-вейке лангс.

Машинань лоткамо таркантень ардсь такси. Эйтэнзэ лисиця авась тей-тов ваномато мейле капшазь эскелясь перрононтень.

— Сегорка! — серьгедсь сон мезе вий.

Электричкась нолдызе «вайгелензэ» ды састыне сыр-гась. Перронось чамсь. Кадовсть ансяк сынь ават-цёрат ды кавто полицейскойть.

— Кодя истя тон, Сегорка?.. — ушодсь авась.

— Кодя, кода, — эзь цидярдю полицейскоесь, — ике-лензэ зяро налксемат!..

— Весе, — пшкадсь омбоце полицейскоесь. — Паро, прядовсь вадрысто. Ней ков?

— Мон уш гайгстынь мирдем туртов, сон мельганок сы.

Сюкпрянь ёвтамодо мейле авась саинзе улипаронзо ды налксемань вечкиця цёранзо. Ават-цёрат совасть «Учомань нупальс». Эзь кенере парсте кортамо, кода совась Сегоркань тетязо. Сон мизолдозь кедте-кедьс шумбрактнесь цёранзо марто ды эзь озаяк:

— А мезть шка таргсемс, адыдо седе курок велев, бабат тосо ризны-мелявты...

...Колмонест машинасонть ардсть чатьмонезь. Сезизе кортамонть авазо:

— Сегорка, паряк, велявттаномекев, а молят велев?..

— Молян, — пельсавардезь пшкадсь цёрынесь.

— Сестэ эряви прясь ветямс парсте. Кунсоллома покш ломанть, сехте пек бабать. Ва, илядо тейне мелень ладсо: кадынк ялгацек бабать эмежпирензэ апак пекста, сеясь поринзе малав весе капстанзо. Тынть пандынк кеженк: куроцынк пире ужос ды нарынк сакалонзо. Каня истя налксить? Тынсь симтядо ловсодонзо, тынсь лангсонзо нарьгатадо...

— Сон, сон бабань весе эмежпирензэ...

— Сон сея, ракша. Сея ваксс прят иля путне.

Сегорка нолдызе прянзо, ялатеке вансь ушов, косо ульнесь кизэнь аёвтавишка мазычи.

Велесэ те шкане уш весе ялганзо марясть: ошсто сы Сегорка.

Сонсь цёрынесь зярс эзь сода: тосо секе тев нусманясто карми ледстнеме аванзо, кона сехте мазый.

ВЕЛЕСЭ

ЧИТНЕ лембелгадсть. Кичиретне оно уш пижелгадсть. Чувто тарадтнэсэ тия-тува пургондасть пиже лопинеть-пацинеть. Вармась чевте, лембе.

Неть читнестэ ушосо важомемась лаказы лаки. Ломантне веленек, прок коткудавт, сокарить кудост перька.

Тедеде велесэ важдицятнеде седеяк ламо. Ютазь сёксня тей ветясть асфальтонь ки, ды те ламолгавтынзаяк ошсто ардыцятнень. Сехте пек — оймсема читнестэ ды покш читнестэ.

Кортамост коряс чарькодеви: кой-конат арасельть тиринь велесэст талайде. Тень кувалма эль содавить. Эрси, а содавитькак.

Вана веленть куншкас таго сась ошсто автобус. Эйстэнзэ лиссть байтак ломанть. Вастыцятне лангозост ваньты:

— Вай, те кие?

— Кона?

— Оно се, ашкола понксось. Шумбрась, куявось.

— Те, нать, профессорось улиак.

— Кодамо оштё профессор?

— Кодамо, кодамо... Минек велестэ лисевть. Митрей Григорич, келя.

— Ды кинь те Митрей Григоричесь?

— Кинь, кинь... Гришкань Митрей!

— Истя меревлителькак. А содавияк.

— Нама, а содави. Школань прыдомадо мейле кода тусь ошов тонавтнеме ды те шкас, келя, яла тонавтни ды тонавтни.

— Истя мекс кувать? Нать, аламодо а сатныть?..

— Мезе? Аволь а сатныть, мекевлангт, пек ламо. Сонсь тонавтни, вейке учёноень лем мельга омбоце иди ды одт тонавты.

— Кода, кода?

— Университетсэ, мерян, тонавты од ломанть. Студентт.

— Сонсь аволь одгак, варштака, перьканзо зяро эйкакшонзо, нуцьканзо.

— Монь койсэ, неть улицькак самай студентэнзэ.

— Тей сынь мезекс?

— Вай, ялгай, тон уш, нать, райононь газетанть тунь а ловнат.

— А мезекс ловномс?

— Тосо сёрмадозельгак. Минек велев университетэнь тонавтницянзо марто практикав сы земляконок. Превейкин профессор.

— Кодамо уш минек велесэ практика? Кодат тесэ превть пурныть?

— Кода кодат? Сехте вадрят. Веенст, келя, кармить морот-мезть сёрмалеме, омбонст — улипаронь пурнамо: очкот, парть, ларть, кептерть...

— Вай, монь истямодонть аволь аламо.

— Моньгак латалксось пешксе.

— Ванокая, оно Варкань вальмалов лоткасть. Ванкшныть петькель марто човаронт¹. Те мезекс тенст?

— Сынст коряс кармить седе вадрясто содамо икелень шканть.

— Оно мезе! А Варкань эйкакштнэ-нуцькатне ошсто састь кизэнь ютавтомо ды те човаронт¹ валгстызь кудопрясто кузтемпес шукшпрянь таркас. А сон, лисни, питней оштё, эрявикс. Эзить маря, кувать-аволь кармить улеме тесэ?

— Таргошка, арсян, сехте аламо, кармить улеме. Те профессорось миненек роднякс сави, виде, васолга. Инжекс, арсян тердемензэ, тонавтницянзояк каванясынъ. Ды аволь ансяк мон. Сынъ, келя, школасо кармить эрямо. Кизна сон чаво. Андомост кармить школань столовойсэ. Ната пидицясь вачо а кадсынзе. Эрзянь каванямкатнеяк а ёмить.

... Чись ютамо лангсоль. Кармась чопотеме. Школанть ваксс, прок клубов, састь одткак, сыретькак. Марязевсть гайтев кортамот, мейле — морамоткак.

¹Човар — ступа

ЯКШАМАТЯ

АРТЁМКА сыргозсь шкадо икеле. Панжинзе сельмензэ. Удома таркастонть апак стя вансь вальма ёнов. Ушосонть таго прась лов.

«Те вадря, ловов пандопрясто телень перть карматано киякстнеме!» — арсесь цёрынесь.

— Артёмка-а-а!.. Стямо шкась сась! — серьгедсь шабра нупальстэ авазо.

— Мон уш стинь, авай!

Шкань апак таргсе цёрынесь ношкстась чаманзо шлямо. Сон ней уш покш цёра. Эйденъ кужов яки меельце ие. Сёксня — школав.

Пидема-панема нупальсэ авазо морга лангс путнесь ярсамопельть, каванясь Артёмкань тетязо. Сон уш капшазь симсь чайде.

— Артёмканень куш пидек, куш иля, валске марто а ярсни, — кортась авась мирдензэ марто. — Вечки кужосо ялгацек ярснеме.

— Окойники течи анокстамонь меельце чи, — кувакасто лекстась тетясь.

— Нать, налкстыть? Те чей эйкакштнэнь мельспарост кисэ.

— Эзинь налкста, шкась тунь арась, — толковась тетясь. — Важоме таркасо ламо тевть, иесь прядовома лангсо.

— Шумбра валске! — чевтестэ пшкадсь тенст Артёмка.

— Шумбрат, Артёмка! — мизолдозевсть каршонзо тетязо ды авазо.

Цёрынесь ёроковсто ушодсь оршнеме-карсеме.

Курок тетят-цёрат лиссть ушов. Кузтемпесэ машинась аноколь. Артём прок покш цёра, озась тетянзо ваксс.

Ардсть а кувать. Эйденъ кужонтень эрва ёндо тетятне-аватне ветясть эйкакшост. Веёндон сон неявсь коткудавоны пизэкс.

Тетят-цёрат совасть нупалентень, цёрынесь кайсесь, полавтынзе оршамонзо...

— Эрь, цёрам, чокшнес, — туемстэ мерсь тетязо.

— Чокшнес, тетяй!

Ды тетязо капшазь эскелязевсь нупаленть ёнов, косо свал эрсить кужонь киштемкатне-морамкатне. Тува, натъ, лисема кись седе нурькинель.

...Чись ютась куруксто. Эйкакштнэ кувать тонавтнестъ валост, конатнень кармить ёвтнеме ванды куз вакссо. Аволь вестъ киштизь киштемасткак.

— Паро, — шнась тонавтыцяст, — бути истя тейтядо вандыяк, сайтядызь ошонь кузонть вакссо покш чинтень. А уш тон, Артёмка, вадрядояк вадря нумолкаят, а сасават верьгизэнтень.

— Бути сон карми сасамон, Вера Александровна, мон кузонть алов эйстэнзэ кекшан.

— Минек сценариентъ коряс тынь теевтядо ялгакс, кундатадо кедте-кедьс ды весень марто карматадо кузонть перька чарамо, моронь морамо.

— А-а-а... Паро, — чарькодсь цёрынесь.

Апак учне совась Валентина Алексеевна эйкакшонь ваныцясь, кармась морга ланга путнеме-ладсеме ярсамкат. Эйкакштнэ апак мере чарькодсть: сась чокшнень ярсамо шкась. Сынь мельга-мельцек шлизь кедест ды ушодсть пекест пештямо. Те шкане пельдест вал а марят, ансяк пенчть калыцькаить.

Ярсамодо мейле, кода свал, эйкакштнэ лездасть пенчтнень-вакантнень пурнамо.

Тетятне-аватне аламось-аламось кармасть сайнеме эйкакшост кудов. Курок Артёмка кадовсь ськамонзо. Цёрынесь нолдызе прянзо, нусмакадсь.

— Иля нусмакале, Артёмка, — оймавтсь эйсэнзэ Вера Александровна, — курук тетяткак сы. — Эрьга, зярс Од иень валот ледстясынек.

— Мон, Вера Александровна, содасынь, ансяк, паряк, седе куруксто эряви тень верьгиздэнть чиёмс?..

— Чият парсте, ансяк валот илить стувто.

— Шумбра чокшне! — совамсто гайтев вайгельсэ шум-брактнесь Артёмкань тетязо.

Цёрынесь ношкстась каршонзо ды сеске капшазевсь оршнеме.

— Эрьга, Игорь Артемьевич, — пшкадсь Вера Александровна, — кода моли анокстамось?

— Весе парсте.

— Косотадо тынь, тосо — тевть. Кеман, казтядо эйкакштнэнень покш чи.

Артём эзь чарькоде, мезде моли кортамось, сон эзь эцне покш ломанень тевс.

...Валскестэнть цёрынесь стясь икелень чидентькак рана. Кода а кода, кужосост покш чи.

— Тон, авай, молят течи эйденъ кужов? — кевкстась цёрынесь.

— Нама, молян.

— А тон, тетяй?

— Мон авать марто тынк усктадызь ды туян важоме.

— А куз ваксс?

— Авать марто тень мейле ёвтнесынк, кода ютась покш чись. Игорь лелят весементь сёрмадсы видеос, теи кино, ды минь вансынек сонзэ кудосо.

— Паро, — оймась цёрынесь.

...Семиянек кужов пачкодсть рана. Паряк, мик васенцекс. Авазо орши Артёмонь нумолкаень оршамосо.

— Вай, тон, Артёмка, прок алкуксонь нумолат! — шнась Вера Александровна. — Пилеть покшт, кувакат, стядо аштить. Те оршамонть косто раминк?

— Авам стызе! — прянь шназь мерсь цёрынесь.

— Артёмка, — пшкадсь тонавтыцясь, — тон верьгиз-

дэнтъ пек иля чие, а сасават тензэ. Сасатанзат ды тердтянзат весень марто куз перька киштеме.

— Тынь, Вера Александровна, теде монень сядоцеде уш мертядо, — пейзазевсь цёрынесь.

...Нупалесь аламонь-аламонь пешкедсь. Эйкакштнэнь марто састь тетяст-аваст, патяст-сазорост. Курок весе инжетнень тердизь куз марто нупалентень. Зярдэ весе мукшнызь таркаст, гайгезевсь музыка, ды эйкакштнэяк мельга-мельцеков совасть тов. Сынст озавтызь вальма малава эземтнева. Ваньцытне вастызь цяпась.

Нупалесь теевсь прок ёвксонь кужокс. Кузось цитнесь эрва кодамо валдосо.

Лиссь Якшаматя. Покш, шумбра, телень оршамосо.

— Шумбратадо, эйкакшт ды покшт! — ушодсь сон.

Артёмкань сельмензэ прок кирвазсь. Сон пштиствэ ванозевсь, арсезевсь, кунсолозевсь...

— Кадык од иесь канды тенк шумбрачи, уцяска, изнявкст! — поладызе кортамонзо Якшаматясь.

— Кода од иенть вастасак, истямо сон...

— Тетяй! — гайтев вайгельсэ серьгедсь Артёмка ды ношкстась Якшаматянтъ ваксс. — Те тон, мон содытинь!

— Вай, вай, кирдинк! Тон ков, Артёмка? Мезе истя теят... — талакадсь Вера Александровна.

Эйкакштнэ абунгадсть: те кода истя, якшамо масторсто нурдос кильдезь лишмесэ сазь Якшаматянтъ ули эйкакшозо ды натой сынст ютксо?

Артёмка кеместэ кундась Якшаматянтъ цётмарозонзо. Ваньцытнень ютксто лисезь авазо снартнесь саемензэ, ансяк Артёмка эзь саеве, куш тона ускозь усксь эйсэнзэ мик нумолонь кувака билетнедеяк.

— Сыречим лангс апак вано мон кецязь вастан мартонк од иенть, — поладызе кортамонзо шержей сакало Якшаматясь. — Эрва, моратано моро. Эряви пурнавомс тенек кузонть перька, кундамс кедте-кедсь. Кие тень лезды?

— Мон! — серьгедсь Верьгизэсь ды эскельдась Артёмкань ёнов.

— Азё тестэ, мон тетянь эйстэ ковгак а туян.

— Те аволь тетят, те — Якшаматя, — толковась вирень инжесь.

— Мон седе парсте содаса, кие те, — кеместэ мерсь цёрынесь.

Весе ёвксонь откертне аламонь-аламонь пуромсть вейс ды гайтевстэ моразевсть.

— Ней, вишка ялгат, кие тень моры, кишти, сенень казян казне. Оно зярошка кедьсэнъ кескавось! — пшкадсь Якшаматясь.

Весе мельспаросо морасть, киштсть. Якшаматясь явшесь казнеть. Артёмка яла сонзэ вакссольт, шкань-шкань лездась казнень явшемс.

— Ней, эйкакшт, явовтано, — мерсь Якшаматясь. — Монъ эйсэ учить лишметне, конат усксамизь эйденъ лия кужов, тосоак течи Од иень покш чи.

— Мон, тетяй, мартот, — энялдозевсь Артёмка.

Кедьсэнзэ аволязь, Якшаматясь тусь. Артёмка кундась цётмарозонзо. Авазо кадовтсь эйсэнзэ, тона эзь максо прынзо, авардезевсь.

Якшаматясь совась эйденъ кужонъ прявтонтъ нупалезэнзэ, мельганзо чийсь Вера Александровнаяк. Артёмка аванзо марто кадовсть кенкшентъ тона ёнов. Куш кенкшесь пекстазель, ялатеке марявсть покш ломанень кортамотне:

— Те кода истя лиссь, Вера Александровна? — кежейстэ ушодсь кужонъ прявтось Галина Никитична. — Весе покш чись колавсь. Натъ, эзиде муе веёндо Якшаматя? Эрьва ков Гребёнкин ды Гребёнкин... Важдема таркасо зяро тевензэ, тесэ тенек зяро лезды... Кадынк ломанентъ оймсеме. Истя карминдерятадо эйзэнзэ педсеме, допрок яви эйстэнек, вестьяк а лездыяк.

...Артёмка кудов ардсь тетянзо-аванзо марто. Элесэнзэль Од иень тантей казнесь.

Кие чумо лисезьсэнть? Эли кияк а чумояк? Те эдь налк-сема, Од иень мазый ёвкс, телень покш чи.

ПИЗЕМЧИРЬКЕ

ЧИСТЭ чис яла седе лембелгады ды лембелгады. Чипаесь лисни куш а кувать, яла теке сонзэ лембе мизолксозо вечкеви. Пертьпельксэсь коське, чувтнэ уш аламодо пижелгадсть, нолдасть лопинеть. Истямо чистэ арась мель аволь ансяк тонавтнемс, школав якамскак.

Течи Денис школав сась нусманя дояк нусманя. Мольсь састо, пильгень ускозь. Меельце уроконть прыдомадонзо мейле сась Людмила Васильевна классонь прявтось.

— Эйкакшт, ванды ды вандыде мейле покш чить, мейле оймсема чи, — ушодсь тонавтыцясь.

— Ну и мезе? — эзь цидярдэ Яхимкин Стас.

— Мезе, мезе. Лисни: оймсетядо колмо чить.

— У-ра-а-а-а!.. Класснэк сергедезевсть вейсэ.

Стас васенцекс ношкстась класстонтъ, лисемстэ цютъ эзизе лута кенкшентъ.

— Колмо чинь перть ютавтодо шканть ушосо, лездадо тетянк-аванк туртов дачасо, — максь превть Людмила Васильевна. Ансяк сонзэ валонзо шалтонть эйстэ эзь маряво, эзь чарькодеве.

Кенярксов шалтось марявсь мик вальмалов. Аламонь-аламонь весе лиссть ушов, косо явовстькак. Тусть кудов: веенст ве микрорайонов, омбонст — лия микрорайонов.

Менельксэсь ульнесь потмура. Чись ансяк лиясто пельтнень экштэ невтнесь якстере конянзо. Шкань шкат пургсесь човине пиземе. Ансяк весе те эзь нусмакавто ёжо. Кенярдовтсть лия тувталт: ушосонтъ тундо ды оймсема читнеде мик колмо!

Ошонтень тундонь самодо тешкс тейсть тесэ-тосо ведь-сэ налксиця фонтантнэяк.

Васенце оймсема чистэнтъ Денис удось кувать. Школав а молема, секс кияк сонзэ эзь стявтояк. Удома таркастонть стямодо мейле сон сеске ношкстась вальмас пертьпелькэнь варштамо. Ёжозо сеске берякадсь, тосо пиземесь поцёрсо поцердсь. Кись рудазоволь, нолажалъ.

«Истямоне кодат футболсо налксемат?! — Арсесь цёрынесь. — Питней, од оскась истямоне рудазсто а муевияк...»

— Шумбра валске! — лембестэ шумбрактнесь авазо. — Пачалксетне столангсот.

Денис ношкстась столь экшс.

— Ков, ков? Чамань шлямо ки карми?

— А-а-а... Алкукскак, — визделгадсь цёрынесь.

Ваннасо шлясь-нардась ды — столь экшс. Ярсась ловсо марто. Лембе, тантей пачалксетнень сон нильнезь нильнинзе.

— Ушосонтъ пизи, — кецязь кортазевсь авазо. — Тундонъ пизементъ питнезэ певтеме.

«Кодат тесэ питнеть? — Арсесь цёрынесь. — Нетъ колмо читнес ульнеть питнейдеяк питней арсемат: витнемс футболонь паксянтъ ды налксемс од оскасонть. А тесэ поцёр-поцёр пиземе...»

Те пиземев чистэнтъ кудосо сон тевтеме эзь аште. Налк-сесь ноутбуксонзо, мейле ловнось ёвтнемань пусмо — сонзэ сёрмадыцясь, келя, пек маштыця сёрмадей, минсенек.

Пусмось прядовома лангсоль.

— Дзинь, дзинь, — марявсь кенкшестэнтъ.

— Те эштё кие? — аволь чевтестэ кевкстась авась. — Истямо чистэ паро азорось кисканзояк а нолдасы ушов.

Денис тейсь амарикс. Сон ловнось седе тов.

«Марь Степановна берянь кинига уш а максы», — кортась Денис эськанзо.

— Дзинь, дзинь, — таго маряви.

— Денис, панжовлик кенкшентъ, — пшкадсь авазо. — Мон ваннасо муськемат лопавтнян.

Денис сеске ношкстась кенкшентень.

— Шумбрат, Денис, — пшкадсь сыця Дима ялгазо.

— Шумбрат, шумбрат, — шумбракстнестъ ялгатне покш цёра ладсо, кедень лепштызь.

Инжесь каизе летьке оршамонзо, юкстинзе карсемапензэ ды ютась Денисэнь нупалев.

— Ба-а-а, тонь, лисни, ули ноутбукот, — дивазевсь Дима. — Те шкас чатьмонят.

— Аволь умок тень рамизь, — ушодсь Денис. — Те — бабань пельде казне. Тетям якась велев, бабам макссь тензэ ярмакт. Мерсь рамамс мезе мелем.

— Тонеть паро, ули велесэ бабат, — ушодсь нусманясто Дима.

— Вана панжиковось прядови, ушодыть кизэнь каникулатне ды туян велев, бабанень, — ёвтызе мелемзэ Денис.

— Монень оно тетям рамась мобильной телефон, — ушодсь прянзо шнамо Дима ды таргизе зепстэнзэ рамавксонть.

— Те телефоносъ паро.

— Парось паро, ансяк.., — ушодсь Дима.

— Таго мезе?

— Мезе, мезе. Тетям мерсь: те казненъ кис монень эряви прядомс тонавтнема иентъ «колмовтомо». Мезть тейнемс?

— Мезеяк арсетяно, — мерсь кеместэ Денис.

— Мезе арсят, тонавтнема иесь уш прядовама лангсо. Рузонь келентъ коряс журналсо эрва клеткасонть ансяк «колмот».

— Те, нама, уш а витеви. Казнесь уш саезь, мекев жо а велявтсак, — оймавтсь Денис. — Макст вал: омбоце иестэ «колмот» а улить.

— Паро. Истя теянгак.

— Эряви кортамс Явкина Марина марто, кадык сон карми тетъ лездыцяс, — толковась Денис. — Ва, иля сёвно Явкина марто, иля усксе эйсэнзэ черьпулодо.

— Кодат сёвномат, кодат черьпулот?! — Согласясь Дима. — Мон, Денис, тонеть сынъ мобильником коряс. Тонь мобильникеть умок уш ули, невтик, кода тевс нолдамс.

Денис саизе телефонотъ ды ушодызе «тонавтоманзо».
Невтизе, мезекс эряви эрва повнесь.

— Гайневтт монень.

Дима истя тейськак. Курок гайнезевсь телефонозо.

— Ванстасынек номерэнтъ.

Телефонотъ коряс «урокошь» прыдовсь, мобильникесь
вадря, ансяк Димань, невясь, ёжозо аволь вадрятнестэль.

— Адя, Дима, ушов, пиземесь прыдовсь, ардтнетяно
велосипедсэ.

— Монень велосипедэнтъ мельга кудов молема.

— Вейкеськак саты. Васня мон ардтнян, мейле тон,
мейле таго аламошкас мон, аламошкас тон...

— Вадря.

— Кунсолока, Дима, тон неик кодамо течи мазый ды
покш пиземечирьке менельсэ лиснесь?

— Эзия.

— Адя минек кудо вакссо фонтанотъ ваксс.

— Мейс?

— Кодя мейс? Тосо мон тонеть невян пиземечирьке.

Ялгатне мольсть фонтанотъ ваксс. Се мольсь кенерезь
ожо цецянь пондакш пря ёнов.

— Неят?

— Неян.

Фонтанотъ ведесь чавсь эрва ёнов. Сонзэ велькссэ не-
явсь мазыйдеяк мазый, эрва тусонь пиземечирьке.

— Те оштё а весе, — ушодсь Денис ды таргизе вело-
сипедэнь рамастонть насозонть. Мольсь фонтанотъ ваксс,
насозонть пензэ навизе фонтанотъ ведентень, потясь ведь
ды лепштизе. Насозстонть ведесь ливтязь-ливтясь ды сонгак
невтсь вишка пиземечирьке. Мейле истя жо тейсь Димаяк.

Ялгатне мельспаросольть. Ардтнестъ велосипедсэ
мельга-мельцек фонтанотъ перька.

— Адя, Дима, миненек.

— Минь тонь кедьсэ уш ульнинек.

— Ну и мезе? Авам течи пансь пачалксетъ, истят тан-
тейть, ансяк велень каштомсо бабам истят панси.

— Адя.

Ялгатне велосипедэст марто курокто кудосольть уш.

— Авай, пекенек вачсть, — пшкадсь кудов совамсто Денис.

— А мон уш арсинь тынденк, — мерсь Денисэнь авазо. — Шлядо-нардадо, мон те шкастонть эждясынъ пачалксетнень.

Ялгатне озасть столь экшс. Аламос аштезь столанг-сольть пачалксеть, кружкасо ловсо, тарелкасо варения.

— Тантейстэ ярсамс тенк! — чевтестэ мизолдозь мерсь Денисэнь авазо.

Ялгатне чатьмонесть ярсать тантей пачалксетнеде.

— Сюкпря, — малав вейсэ мерсть ялгатне.

— Денис, мон уш стувтыя, кода мезенть лепштыам мобилкасонть.

— Адя, невтьса тетъ одс.

Денис таго ютавтсь вейке «уроку» ялганзо марто.

Апак учо гайгстась кудонь телефонось. Трубкантъ кепедизе Денисэнь авазо. Кортамось марявсь:

— Тесэ, тесэ, минек кедьсэ. Аволь вачо, каванинь пачалкседе. Седе икеле ушов лиснестъ, ней тонавннить мобильной телефонга кортамо. Паро, мерян тензэ. Иля мелявто.

— Дима, гайгстась ават, мелявты кисэть, келя, кудов модемс шка, чопотеме кармась.

— Паро, сырган. Сюкпря тенк, — мерсь туемстэ Дима.

— Вастомазонк!

— Вастомазонк! — мизолдсть явомсто ялгатне.

— Дима, пачкодят кудов, гайгстак монень мобилкастот, — мерсь Денис.

— Паро.

Димань ёмась мелявксонзо-ризнэманзо. Истямо ялга марто, кодамо Денис, а ёмат.

Денисэньгак ёжозо пароль. Оно зяро вадря тейсь ялганзо туртов!

— Тон, Денис, лездак Диманень, — седе тов мерсь авазо. — Сонзэ те шкас трясь авазо съкамонзо, секскак кой-мезезэ арась, ламо «колмонзо»... Ней ули од тетязо, секскак тень коряс сон мелявты-ризны...

— Нама, лездан! — Денис кеместэ максызе цёрань валонзо.

...Чопотетсь. Денис пурнась мадеме. Гайгстась мобильной телефонзо.

— Денис, те мон, — марявсь Димань вайгелезэ. — Ванды сак монень, тетям тень рамась оска, мерсь, карми мартонок футболсо налксеме. Рузонь келень «колмонтъ» коряс эзимим сёвно. Сонзэ, келя, эсензэяк школасо тонавтнемстэ зярыя колмонзо ульнестъ... Ды оштё. Тетям кандсь чарошка торт. Минь аламошка эйстэнзэ сэвинек. Пелешказо кадовсь, путыя холодильникс. Сак ванды, чинь перть тенек саты. Паряк, эштё мезеяк рами. Сон макссь аванень зярыя ярмакт. Келя, отпускнойть кодат-бути получась...

...Цёрынетне кеместэ матедевсть вандынь футболсо налксемадонть арсезь. Кеместэ удомсто свал неят паро он. Цёрынетне, паряк, онстост несызь тундонь сисем тюсонь пиземечирькенть!

ВИРЬКУЖИНЕСЭ¹

ЭРЯСТЬ-АШТЕСТЬ Бозаёвонь Верепесэ сакалов-
доjak сакалов Охрим атя ды мазыйдеjak мазый Элена
баба. Куш иест ульнест аволь аламо, ялатеке шумбрачист
а берянель. Сексак кирдсть сея, конань лемезэль Машка,
овчарка киска, лемезэль Байкал, ды алаша — Гнедой.
Охрим, келя, од порасто служась Байкал ине эрькенть
чиресэ, теде ледстнемга кискантькак истя лемдекшнize.
Сеянть лемдизе низанянзо² лемсэ, алашанть — тюсонзо
коряс. Кудосо сyпавчинть ванстась лемтеме тюжа псака,
кона ульнесь Ламад вирень ривезешка.

Куш тикшень ярсыця ракшаст ульнест кавто, теле лангс
анокстась коромось лиясто эзь сатноjak. Сеясь телень перть
сэвсь верблюдо ламо, алашантенъгак зярыя эрявсь.

Тикшеденть башка, атянтъ прянзо сэредстась теле лангс
пенгень анокстамось.

«Ужокая, весть молезь кавто тевть теян, кавто нумолот
ледян, — арсесь эськанзо атясь. — Молян Ламад вирев,
тосто аламошка пенгетькак, тикшеjak ускан. Кавто-колмо
чинь ютазь таго молян. Истя теленть самс аламонь-аламонь
пурнавить».

Сон ливтизе Гнедоень кардаз ортатнень ваксс, кармась
кильдемензэ. Байкал вакссост чарась-велясь, аволясь крен-
дель пулосонзо.

— Охрим, тон ков? — кевкстизе Элена баба.

— Молян Ламад вирьга ютан, — састо ушодсь атясь.

— Аламошка тикше ледян, кавто-колмо чочкот ускан.

— Мезеjak сускомс саевлить, — мелявтозевсь бабась.

¹Вирькужине — полянка

²Низаня — тёща

— Ды мон а кувать, мекев-васов, — толковизе аться.

— Пси чистэ важоместэ ламо вий эряви, — мерсь бабась.

Зярс аться сайсь лато алдо пелюма ды узере, Елена баба ливтсь паця потс сюлмазь суликаны кедьгесэ ведь ды течинь пиदेветь кшикочом.

Аться мельспаросо сайнзе ды озась ридванс. Ваксозонзо кирнявтсь Байкалгак. Сон ёжов, а карми алашанть мельга чиеме!

Лиссть велестэнтъ пакяс, тосто а васоло Ламад виреськак. Ансяк совасть вирентень, Охрим атя лоткавтызе алашанть:

— Тпру, тпру, Гнедой!

Превей алашась лоткась сеске. Кужось мазый, валдо, таркась ламо. Тикшесь — кумажа видьга! Коське чувтот-недеяк аволь аламо. Сынь пенгекс маштовить.

Аться перьгавтызе алашанть, тонась сеске ушодсь пиже тикшень порнеме.

— Ярсак, ярсак, — прок ялганзо марто, кортась Охрим атя. — Мейле ветятан лейнентъ чирев. Сон малава чуди, оно кода жойни, — ды варштасть тов, косто марявсь жойтеть.

Байкалгак кеняркшнось пертьпельксэнтень. Чийнесь кужованть нимияв мельга, секе тев онгс.

Охрим атя ушодсь ледеме. Чашк, чашк марявсь пелюмазо. Мельганзо кадовсь сяворезь тикшень тешкс.

— Эх, — уктасть аться ды нардызе ожасо чаманзо.

Озась мукорь лангс, таргизе ведь марто кедьгентъ ды кавкстешка копордась.

Седе мейле кундась узерентень. Ве коське пиче сяворды, омбоце, вейке тумо сяворды, омбоце...

— Оштё вейкешка сявордан, ды саты, — мерсь аться эстенэ.

Те шкане марятотсь нармунень мазыйдеяк мазый морамо. Аться мольсь аволь эчке, коськана чувтонть ваксс. Мезе вий вачкодсь эзганзо. Узересь эйстэнэ ёртозь ёртовсь. Мо-

рось седеяк гайтевстэ марязевсь. Атясь таго весть вачкодсь — узересь а пезны. Малазонзо сась Байкал, кармась онгомо. Нармунень морамось яла седе виевгадсь ды мазылгадсь. Атясь нолдызе узеренть, озась чувтонть алов.

Гнедойть-Байкалт сыргасть лейненть ёнов. Охрим атя вадяшинзе ливезденть начкозь сакалонзо ды тусь мельгаст. Ракшатне симсть леень ведтенть, атясь шлизе чаманзо, мейле вейсэ сыргасть мекев. Ков седе малав пачкодсь атясь секе чувтонть малас, тов седе гайтевстэ марявсь нармунень морамось. Сон кепедизе прянзо ды несъ тарад лангсто нармунень пизэ.

«Оно косто моротне гайгить! Секс Байкалгак онгсь-лоткавтсь эйсэнь чувтонть керямсто, узереськак эзь пезна», — арсезевсь Охрим атя.

Сон аламонь-аламонь вачкинзе ридванс чочкотнень, лангозост путызе тикшенть. Гайтевдеяк гайтев моротне яла гайгсть вирьганть. Алашанть кильдемадо мейле Охрим атя сыргась ашожда сталмонзо марто кудов. Кискантень ней савсь ардозь ардомс.

Атясь мельспаросоль: чись течи пароль, лезэвель.

«Зняро паро теезь! Тикшень-пенгень анокстазь, нармунень пизэськак ванстовсь», — арсесь сон.

СТАКА ПОРТФЕЛЬ

ОКОЙНИКИ, гайгстась баягинесь. Эйкакштнэ шал-нозевсть, кармасть пурнамо кудов. Охаяк панжизе портфелензэ. Састо, прок стака кырпецть, вачкась сон вейке омбоце мельга книганзо, ручканзо, карандашонзо. Весе уш тукшность, зярдэ сонгак окойники пурнавсь. Пильгень ускозь сыргась кудов.

Оха эзь капша сасамо ялганзо, конат гайтев вайгельсэст пештить куринканть. Прянь нолдазь кандсь лавтовонзо трокс понгавтозь порфелензэ. Сон течи мекс-бути пек стака.

— Тон, нать, кавтот кандат? — корсяня вайгельсэ кевкстизе каршонзо молиця Андрей атя.

Цёрынесь прянзояк эзизе кепеде, ансяк арсезевсь: «Нать, портфелень пачка неи».

Кузтемпес пачкодемстэ сон кувать эзизе венсте кедензэ кенкшкундамонть.

«Кода ней сован, мурнесамизь таго», — ливтнесть пряпотсонзо мельтне.

— Я, нуцькам, пачкодить? — кевкстизе сырькаезэ, зярдэ тона совась кудос.

— Ага.

— Тон мекс истямат? Аволь чей таго пуло мартогнень кандыть?

Цёрынесь стакасто каизе лавтовонзо лангсто портфеленть ды кувать вансь лангозонзо: кодаткак кавтот а неявить, кода эно весе содыть?..

— Озак эно, кавтонь кандтница, ярасмо, — пшкадсь сырькаезэ. — Ва, сыть тетят-ават, варштасызь дневникеть.

Нетъ валтнэде цёрыненть пекезэяк сеске «пешкедсь». Сон ялганзо марто налксемаяк эзь моле, яла нусманясто вансь портфелензэ лангс. Сырькаезэяк сонзэ мекс-бути кадызе эзем лангс, эзизе совавто икельце кудос: натъ, ал-кукскак пек стака. Оха таргинзе книганзо-тетрадензэ ды озась столь экшс уроконь тееме: лиякс, секень вант, ванды портфелесь седеяк стакалгады, мейле уш а кандовияк.

СВЕТОТЕХНИК

СЕРЁЖА мольсь куринкава тетянзо марто. Ошонтъ лангс валгсь чокшнесь. Кудотневаяк, палмантнень пряваяк кирвазсь валдо. Толнэтне палсть сырнень тештекс. Мазыекс неявсь те шкастонть цёрынькантень ошось.

— Тетяй, а тетяй, — пшкадсь Серёжа, — Московсо эрицятненень лиякс мерить москвичть, Саранскоень эрицятненень — саранчат?..

— Аволь, — мизолгадсь тетязо. — Миненек мерить светотехникть. Саранскойсэ теить-нолдыть эрва кодат электричествань лампочкат, тештинеть, прожекторт... Улить спицькань пряшкат, улить чарошкат. Сынь зрявить эрва косо. Саранскоень лампочкатне валдомтыть мик Московсо Кремлянтъ, Якстере площадентъ!

Цёрынесь сэтьместэ кунсолось тетянзо ды мельспаросованнось пертьпельга.

— Тетяй, — таго пшкадсь Серёжа. — Лисни, монгак светотехникан?..

— Нама, цёрынем, — мизолдозь мерсь тетясь ды чевтестэ вадяштызе цёрынентъ прянзо. — Тон вишка светотехникат.

Эрхст-аштесть
Бозаёвсо

Ёвкт

КАЛОНЬ ЧИ

ТЮЖАЛКАЙ псакась Бозов лейненть чиресэ апок-шке кудынесэ эрясь-аштесь сыре азоронзо марто.

Течи Тюжалкай (истя лемдизь тюжала понанзо кисэ) сыргозсь удомсто чинь лисема шкасто. Кода свал, шлясь-нардась — нолсизе кувака начко кельсэнзэ рунгонзо, венстизе сэрэнзэ. Чаво пекесь эзь кадо оймамо: мезде, каня, пештямс? Чеертнеде ярсамось налкставсь, ды вачонь пекеть виеськак арась сынст мельга чийнемс.

— Ужокая, паряк, калс молян? — мерсь эстензэ Тюжалкай.

Кармась ульмань вешнеме. Тей варшты — ульмась арась, тов варшты — арась.

— Эряви кевкстемс кудазортнэнь, — арсезевсь Тюжалкай.

Тей моли — арасть атят-бабат, тов моли — арасть.

— Тикшень ледема шкане арази кармить кудосо аштеме, — оймавтсь эсь прянзо псакась. — Куш ракшасткак вейке — сея, ды сонензэяк теле лангс зяро эряви. Эка, паро ули, бути азортнэнь самс мон кептерышка калт кундан Вирень лейстэ! — мельспаросо арсесь Тюжалкай. — Ярсатано вейсэ калонь ямдо!

Окойники, муизе ульманть. Сон ульнесь кудыкельксэнь кенкшпрясо. Кептеренть вешнемс эзь саво, сон лавсялангсоль.

— Ней сукст тень эрявить, — мерсь эстензэ Тюжалкай.

Сон ёндолкс ливтясь кардаз удалов, косо модась седе чевтель. Ансяк баксордасы моданть — вейке-кавто сукст муи. Курок кедьгинезэ пешкедсь.

— Весемесь анок! — кецязь мерсь калонь вечкицясь.

Ливтинзе кудосто весе ули-паронзо, путызе сукс марто кедьгиненть кептерентень, кепедизе лавтов лангс ульманть, понгавтызе эйзэнзэ кептеренть ды сыргась.

Моли истя курункаванть, мерят, алкуксонь калонь кундсиця. Паро, Пазось тензэ сэрь ды вий макссь, истяко зняро сталмонть алдо а неявольгак, ды те весемесь тензэ а кепедевелигак.

— Тюжалкай, тон истя ков сыргить? — кевкстизе сэдь ланга ютамсто лейчиресэ эриця Миявось¹.

— Ков, ков, — чевтестэ пшкадсь каршонзо Тюжалкай. — Ульма марто ков яксить? Нама, калс!

— Паро, паро, тон уш монь лемскак вейкешка калнэ кундак.

— Вадря, — мерсь псакась ды сыргась седе тов.

Курок сон пурдась Алопев.

«Тия Вирень леесь седе маласо!» — арсесь сон.

Курункаанть пачкодезь, Тюжалкаень седеезэ кармась чавомо, прок церьковань баяга. Тесэнь кискатнеде улкоть сон ливтязь ливтясь. Ве Пазось соды, кода прязо ванстовсь.

«А лиси, каня, нейгак истя? Зняро сталмо марто мон икелень ладсо а чиеван», — мелявтсь калонь вечкиця псакась.

Ансяк неть мельтне ютасть пряванзо, орта алдо венстизе чакшошка прянзо Байкал.

— Тон, Тюжа, ков? — кевкстизе кежейдеяк кежей кискась.

Тонань седеезэ кочкаряс валгсь. «Пе тень сась! — ютась пряванзо. — Ансяк пелемам а невтема».

— Кода ков? Ульма марто ков яксить? Нама, калс, аволь эхшелямо!

— Калс? Те вана Тюжалкай! А мон арсинь...

— Зярс веенст арсить, омбонст уш калт кундсить...

— Ужокая, тон вейкешка кал мекев ютамсто а максат?

— Бути кундан ламо, аволь вейке максан.

¹Мияв — бобр

— Эно азё, Пазось мартот. Тосо, келя, ламо кискат чинь-чоп пивтить, бути мезе — пшкадть.

...Куринканть песэ кинть куншкасо рудазов ведте пешк-се латкосо кеменьшка левксэнзэ марто экшелясь пандошка авака туво. Сынй истя мельспаросо пулькасть ведьсэнтъ, на-той эзизь нее ваксозост пачкодиця ульма марто псаканть.

Тюжалкай а сеске чарькодсь, кить неть, сон те шкас некшнесь ансяк ашо тувот.

— Эй, тынь, раужкайтъ, — пшкадсь тенст, — аламос лоткадо пулькамодо, нолдамизь, секень вант, рудазов ведьсэ начтасамизь.

— А тон, пондакш, сак ваксозонок, вейсэ экшелятано, — мерсь тензэ авака тувось.

— Теке кадновсь, мон чей аволь тынк кондямо чаволан, истямо мазый, чевте оршамом начтомс рудаз ведьсэ!

— Ков, каня, ялгай, истя оршнить-пурныть?

— Калонь кундсеме.

— Калонь?

— Нама.

— Сестэ минек лемскак кундак!

— Паро, — алтась псакась ды састыне ютась экшели-цятнень вакска.

Седе мейле Тюжалкай молись теине янга, кона прок локшо менчевсь тей-тов.

Окойники, лееськак!.. Сон ульнесь сынст велева чуди-цянть эйстэ ков седе покш.

Чирезэнзэ пачкодемстэ Тюжалкай каинзе лавтовонзо лангсто ули-паронзо. Кептерентъ путызе ваксозонзо, витизе ульманзо ды кармась сэтъместэ ваномо ульмаповнентъ лангс. Тона малав сеске кармась чопавтнеме. Тюжалкай кундызе ульманедентъ кавто лапасо ды ноцковтызе. Псакась эсь сельмезэнзэяк эзь кеме: кечказнэнтень¹ понгсь кедьлапашка кал. Олякстомтызе.

Сонзэ истя тевезэ тусь, эль кенерсь ульмасто калтнэнь кайсемест.

¹Кечказ — крючок

Курок кептересь пешкедсь. Тюжалкай саиксэлизе — а тей, а тов. Аволь кандомс, таркастонзо эзь сыржавтово.

Озась Тюжалкай кептерень ваксс ды ушодсь калтнэде ярсамо. Вейке, омбоце, колмоце... Тантейть!

«Паряк, саты? — арсезевсь пекензэ вадяшамодо мейле. — Эряви кадомс, оно зяронень калт алтынъ, кудовгак азортнэненъ штюрьбас кадома».

Сон тапаризе ульмасурень, каизе ульманть лавтов лангс, саизе ней уш ве лапасо кепедевиця кептерень ды сыргась кудо ёнов.

Тюжалкай мольсь теке кияванть. Моткодсь-мурнось эстензэ: «А стувтомс киньгак, максомс калт весенень, кинень алтынъ».

Вана пачкодсь веле пес. Тесэ кинть чиресэ учось эйсэнзэ левксэнзэ марто авака тувось.

— Хрю-хрю-хрю, — вастызе тувось псаканть, — учотано, Тюжалкай, алтазь калт.

— Мяу-у-у, алтынъ — кармить. Вейке, кавто... — ушодсь ловомост псакась.

— Мезть ловат, — лоткавтызе покшось. — Некеть, кемень эйстэст, монень уш кал а эряви.

Тюжалкай апак капша таргась кептерьстэнзэ кевейкее кал.

— Ансяк вейкень-вейкень тенк, — мерсь сон. — Кадома эйстэст лиятнененьгак.

— Сюкпря, Тюжалкай, тень кисэяк.

Тувось левксэнзэ марто цёторсо ушодсть калтнэнь порнеме. Псакась пурнынзе ули-паронзо ды тусь седе тов.

Омбоце курункасонть Тюжалкаень учось вачо пеке Байкал. Псаканть неемстэ сон ношкстась каршонзо.

— Мезе эно, кундыть?

— Кундынь, ды натой зяро!..

— Максат тень?

— Кода эно, чей ве песэ эрятано! — эзизе синде велень сехте кежей кисканть мелензэ ды сявордсь кептерьстэнтъ ветешка калт.

— Сюкпря тетя, — мельспаросо мерсь Байкал. — Ансяк мон верек калт а пек вечкан, вана сыть азорон тикшень ледемстэ ды пидить эйстэст ям. Сестэ уш ярсан!

— Эно паро, вастомазонк! — мерсь Тюжалкай ды сыргась седе тов.

— Тюжалкай, тон косто? — лейчирестэ вастовомсто пшкадсь тензэ Миявось.

— Эли стувтык, валске марто ильтимик калонь кундсеме?

— Вай-вай-вай, чаво пря, стувтокшныя, — видькстась Миявось.

— Вана тетя зяро-бути кадовсть кептеренть потмаксос.

— Вай, сюкпря истямо казненить кисэ.

Седе тов Тюжалкай мольсь курокто — кептересь чамсь, шождалгадсь.

Эсест кузтемпесэ эзementь лангсо учость эйсэнзэ атят-бабат.

— Тон, Тюжалкай, ков ёмсить? — ушодсь бабась. — Тон-теметь чеерь потс ёматано, весе коромонок кольстасызь...

— Мон калс якинь.

— Ков-ков?..

— Калонь кундсеме. Мон якинь калс Вирень леев, — ушодсь Тюжалкай. — Тосо калтнэде — пе арась.

— Косот эно калот? — кевкстизе бабась.

— Мон сынст явшинь.

— Кинень?

— Кинть куншкасо латкосо экшелица туволевкстнэ-нень, Байкал кискантень ды минек леень Миявонтень.

— А эстенек?

— Миненек мейле... Мон тенст алтынь максомс оштё калонь кундсеме туемстэнь. Кода а максат, бути алтыть?

— Истя, истя. Кемтяно, — мерсь атясь сакалонзо вадя-шамодо мейле, — минь вейсэ мольтяно калонь кундсеме. Тон, ванан, калонь таркат уш содат... Азё, баба, калонь кундыцантень куш сеянь ловсо каяк, сизесь, неяви.

— Кодат монь азорон превейть, чарькодицят, — кецясь Тюжалкай ловсодо симемстэ.

ТОНАВТНЕМЕ АНОКСТАМО

ЭРЯСЬ-АШТЕСЬ тусто Ламад вирьсэ, конань алга жойсэ чуди Бозов лейнесь, Сёрмав верьгиз.

Вирьсэнтъ сонзэ ламот уш содасызь. Сон сыре, иензэ ламо, ялатеке лавшо понкс. Уш а мерят, тунь чавола, ялатеке прок аламодо а сатыть сонзэ колгансонть.

Пачкодсь верьгизэсь вирькужос, озась эчкедеяк эчке, келейдеяк келей мукорь лангс. Лангозонзо прыть сёксень эрва кодамо тусонь лопат.

Ашти-ашти Сёрмав, нолдасы вирентъ келес корсяня вайгелензэ: у-у-у... Кие соды, мезень кувалма. Паряк, содаст: сон зярс яки модамасторонть ланга, ледстни лиятненень, кие вирьсэнтъ азорось, эли истя пекезэ вачомсь...

Апак учне куракштнэнь экиштэ лиссь Ёжовне. Вирьсэ-нек сонзэ весе умок содасызь кода ёжов ривезентъ, нать, секскак тензэ педявтсть истямо лем. Сон мольсь Сёрмавонь ваксс прянь кепедезь, каштансто. Ялатеке те сонензэ икеле ладсо эзь тееве: сыречись сайсь эсензэ. Ды шкаськак ней сёксь. Те шкане ривезтне идемевсте амазыйть: лангсост пондакш оршамось прок сезневсь, олась...

— Шумбрат, азор! — чевтедеяк чевтестэ пшкадсь ривезесь.

— Шумбрат, шумбрат, Ёжовне!

— Кода эрят-аштят?

— Ды прок а беряньстэ, — ушодсь верьгизэсь. — Кода весе сыретне. Тонсь косто лыкат?

— Вана тия-тува ютынь.

— Шабра велев саразс якить?

— А мекс?

- Мекс, мекс... Саразтнэ питнейстэ иляст ся.
- Эли кармасть эйсэст вирень лавкасо микшнеме?
Сёрмавне, мон уш стувтыя, мезе, мерят, тесэ теят?
- Мезе, мезе... Школав анокстан.
- Ков-ков?
- Школав.
- Тонь эли нуцькат улить?
- Нуцькатнеде ламо, весень уш тонавтневтинь, ды монсь кадовинь образованияавтомо.
- Истямо сыренть кие школав сайсы?
- Улест ярмакот, ярмакто тонавтгадызь.
- Истямс истя, ансяк бути прясь чаво...
- Мезе мерить?
- Мерян, тень, пертьпельксэсь паро, — лиядо кортазевсь Ёжовне. — Кунсолок, стяко ярмакот варма мельга илить ёртне. Эрьга, монсь мартот важдолян.
- Стякодо?
- Кие ней стякодо важдодекшни? Аламошка пандат — саты. Лиятнень коряс кавксть седе аламо саян. Эно мезе, ушодтано? — чевтедеяк чевтестэ кевкстясь «тонавтыцясь».
- Ушодтано эно, — кецязевсь Сёрмав.
- Математикасто ушодтано.
- Э-э-э, те стака наукась.
- Стака, ды эрявикс, — макссь превть Ёжовне. — Апак тонавтне тон а кармат содамо, зяро реветь таргонь перть салыть, зяро сеят баксордыть, зяроцекс велепестэ ашти кардазось, конасонть эрить тантейдеяк тантей саразт, реветь, барант...
- Э-э-э, барандо мон пелян, — соракадсь Сёрмав, — мон вечкан реветь, сеят, ваздоаяк а отказан... А тонавтнема программась тонь, Ёжовне, косто?
- Косто, косто... Эрямось казизе.
- Кие?
- Эрямось.

— А-а-а, оно кода...

— Тонь, Сёрмав, пильгеть вакссо кептерьсэнтъ мезть?

— А?

— Мон мерян, кептерьсэнтъ, конась пильгеть вакссо, мезть пештязь?

— Тосо?

— Тосо, тосо.

— Ды, тень, ламбамо умарть. Нуцькан туртов анок-стынь.

— Паро. Эрьга монень вейке.

— Ансяк вейке?

— Истя, ансяк вейке.

Чавола верьгизэсь таргась кептерьстэнтъ вейке умарь:

— Кирдть.

— Зяро монь кедьсэ умартнеде?

— Вейке?

— Истя, вейке, — мерсь Ёжовне. — Вантая, кодамо превеят!

Ривезесь цёторсо кармась пореме умарентъ. Вачо верьгизэсь вансь-вансь, кечешка кургостонзо сельгензэяк кармасть чудеде.

— Ульнесь вейке, ней зяро кадовсть? — кевкстизе Ёжовне сыре верьгизэнтъ.

— Вейкеяк арась.

— Виде, вейкеяк арась. Несак, превиямо кармить, — шнась Ёжовне ды сайсь кавто умарть.

— Ней кедьсэнь зяро умартнеде?

— А содан.

— Кода а содат? Кармат содамо! Керш кедьсэнь вейке умарь, вить кедьсэньгак вейке умарь. Вейсэ улить... кармить уледе... кармить уледе...

— Кавто! — мерсь Сёрмав.

— Виде.

— Ур-ра-а!.. — вирень келес серьгедсь тонавтницясь, мик тумонь коське тарадось сивсь ды прась лангозонзо.

— Ванок ней, — мерсь Ёжовне ды цяторсо поризе васня васенце, мейле омбоце умаренть.

Верьгизэсь кургонь автезь вансь ривезенть лангс.

— Зяро кадовсть умартнеде? — кевкстясь тонавтыцясь.

— Зярояк арась.

— Нама, зя-ро-як.

— Ур-ра-а!.. — кецязь рангстась Сёрмав. — Мон тонадынь!

— Те а весе, тон зярс а весементь содасак, — толковась тонавтыцясь. — Эрьга, ловсынек, зяро умарть кадовсть кептерентень, — мерсь Ёжовне ды сявордынзе умартнень луга лангс. — Ловт мартон.

— Вейке, кавто, колмо...

— Лисни, уроконь ютавтомсто минь сэвинек...

— М-м-мон эзинь сэве вейкеяк, — сезизе кортамонт Сёрмав.

— Те жо математика, наука, сон вечки ловомо, чарькодить?

— Чарькодинь, чарькодинь, — мерсь верьгизэсь.

— Лисни, уроконь ютавтомсто минь сэвинек...

— Мон эзинь...

— Чатьмонт!

— А-а-а, паро.

— Лисни, уроконь ютавтомсто минь сэвинек колмо умарть, — поладсь тонавтыцясь. — Кадовсть... Ловносынек.

— Вейке, кавто, колмо... — Тюжалкаенть мельга ловнось Сёрмав. — Тосо кептерьсэнть оштё вейке ули!

Ёжовне венстизе нерензэ кептерентень ды таргизе кадовозь умаренть.

— Зяро кедьсэнь умартнеде?

— Вейке!

— Виде, вейке.

— Ура-а-а!.. — рангстазевсь верьгизэсь.

— Тон, Сёрмав, сельме икеле превейгадат, — шнась эйсэнзэ Ёжовне ды ушодсь те умаренть цёторсо пореме.

Верьгизэсь кургонь автезь, сельмень тетъкезь вансь мельганзо. А пештявикс ривезесь пелензэ умаренть уш сэвекшнize, сон энялдозевсь:

— А монень? Паряк, кавтов?..

— Вейкесь кавтов а явови! — кеместэ мерсь Ёжовне ды капшазь прядызе ламбамкаенть. — Кунсолока, Сёрмав, бути ули мелеть седеяк превейгадомс, ванды поладсынек тонавтнеманть.

— Паро улевель, — кецязевсь чавола верьгизэсь.

— Сестэ ванды, теке шкастонть, теке таркасонть, — толковась Ёжовне. — Эрь, аламодо эзия стувто: путт те кептерентень ветешка саразт. Монь сараз марто урокон кода-бути седе парсте лиснить.

— Те ней косто мон тонеть саразтнэнь сайсынь?

— Мон тонеть тарка ёвтан.

— Эрьга, эрьга!..

— Алопесэ лейстэнтэ саезь колмоце кудосонть карда-зось пешксе сараздо.

— Истя, колмоце, мерят?..

— Колмоце. Лангс ваномс кудось берякшке, ды карда-зось пешксе сараздо, — вадяшазь вадяшась чевте вайгель-сэнзэ ривезькесь. — Ансяк чопоти, вансак, толост азортнэ мадстизь, апак визде, апак пеле совак.

— Кода-кода мерят?

— Мерян, сайт кептерь ды совак. Аволь вете, куш ведьгемень саразт тосто сайт.

— Саразтнэ монень, натъ, кундсевить?

— Сынь истякак ливтнить кой-кода, а чоподасо аштить прок кевензась, — тонавтсь Ёжовне. — Мездеяк, кидеяк иля пеле! Атят-бабат удить кеместэ, бути нетядызгак — а сасават, сынь сыреть уш. Оштё весть мерян: саразтнэде тосо — пе

арась. Алкукс, монсь тов эзинь яка седе мейле, кода тона пень кискатне кутьмерем раздизь, тон эно кискадо а пелят, бути мезе, ве лапасо оймавтсак онгицянтъ.

— Истямс истя, — мизолдозевсь Сёрмав.

— Сестэ эно вандыс. Саразтомо иля сакшно. Тонавтнем-стэ эрявить наглядной пособият. Эно вастомазонок!

— Вастомазонок!

Теньсэ явовстькак чавола тонавтницясь ды ёжов тонавтыцясь. А содави ансяк, ули ванды урокось эли а ули: секень вант, раздесызь Сёрмавонь Алопень кискатне эли саразтнэнь атят-бабат печкизь уш теле лангс. Кадык эно варчи, паряк, мезескак тонады.

ОД ЭРЯМО

ЭРЯСТЬ-АШТЕСТЬ Ламад вирьсэ, конась Бозаёв маласо, ламо ракшат, ансяк вейкест-вейкест эйсэ сынъ малав эзть некишне. Бути лиясто кой-конат эйстэст вастневстькак, свал яла кода-бути сёвнолгалестъ.

Эрямост те вирень ракшатнень ютась стакасто, нус-мамясто. Чиськак аволь истя эждысь, цецятнеяк а истя панжсть.

Тундонь песэ вейке пародояк паро чистэ сыре Овтось тонавтсь нуцьканзо чувтопрява кузнеме. Васня сонсь эчке тумованть кузсь малав тэкшонтень, мейле, вейкенъ-вейкенъ — нуцькатне.

Тонавтомась уш прядовама лангсоль, кода ваксозост мольсь Ривезь.

— Кунсолока, Овто, — ушодсь сон, — тон кода а кода вирень азор, паряк, витеви тетъ теvesь?

— Кодамо таго тев?

— Кодамо, кодамо?! Истя кежейстэ, вейкенъ-вейкенъ апак сода, апак лезда, апак пшкале эрятано. Кода-бути а мазый.

— Монъ, сыре овтонть эйстэ, мезе эряви? — эзь чарь-коде Овтось.

— Паряк, промкс ютавтома эли мезеяк лия?..

— Мезеяк лия?.. Монъ оно ванды иень топодить, минек вирень весе ракшатне садо тень!

— Паро, пек паро!

— Сестэ ванды чикуншкане теке таркасонть...

Ривезесь ливтязь ливтясь. Чудикерьксэнтъ ваксс моле-мстэ сон вастовсь Сезьган марто.

— Кунсолока, Сезьган, мон кортынь Овтонть марто...

— Мон содан.

— Косто?

— Кода косто? Мон ульнинь чувтопряс, зярдо тынь кортыде. Мон весемень неия, весемень мария ды вирень весе нармунтненень уш ёвтния. Весе мерсть: неть арсематне пек парт. Весе кецязь максызь валост: сыть.

— Монень, лисни, сави вирьганть чийнемс, весе ракшатненень ёвтнемс.

— Нама, тонеть, Ривезь, тондеть башка акинень.

— Эно ёвтнян весенень... — сезизе Ривезесь Сезьганонть кортамонзо. — Ансяк чачома чинь тешкстамо чавонь кедть кода-бути...

— Иля мелявто, мон тень коряс уш кортынь Овтонть нинзэ марто, — поладызе кортамонзо Сезьганось.

— Ды те тон кона шкане? — абунгадсь Ривезесь.

— Кона шкане? Зярс тон кортыть Овтонть марто. Монень те акувать. Вирень нучк-пачк содаса, мон уш умок тесэнь кулятнеде ёвтнян.

— Эно мезе Овтоавась мерсь?

— Сон мерсь: Овтонть сехте паро казнесь — тынь. Сатадо — седе покш казне а эрвияк.

— Паро, — шождасто лексясь Ривезесь. — Сестэ тевесь ансяк инжетнесэ. А карман шканть таргсеме. Вастомазонк!

— Неемазонк! — седейшкава мерсь Сезьганось ды ёндопкс тусь ливтязь.

«Эрья, те вана Сезьган, — эськанзо арсесь Ривезесь. — А стяко тензэ мерить вирень почтальон».

Зярс Овтось тонавьсь нуцьканзо, тюжа пулось ардтнизевесе вирень, эрвантень пачтясь кенярксов кулядонть.

...Омбоце чистэнтъ уш валске марто вирькужонтень кармасть само инжеть: верьгизт, ривезть, нумолот, селеть... Ракшатне ойсестъ пиже парсей тикшентъ ланга. Нармушкатне мусть таркат чувтопрява.

Чикуншка малав тусто чувтотнень экшстэ невтизе прянзо Овтось, икелензэ сон кевердсь парь.

«Медь, медь!» — кортазевсть инжетне эсь ютковаст.

Зярдо Овтось лиссь кужонтень, весе стясть, цяпазевсть

лапасост, тарад ланга аштиця нармунтне — сёлмосост, весе нолдызь вайгелест...

Овтось мельспаросоль — зняро вирень ракшат ды нармунть састь! Сон аволдась лапасонзо ды озась эчкедеяк эчке мукоренть лангс.

Инжетне кармасть тапарксост калавтнеме, кандозь улипарост таргсеме. Овтоськак панжизе парензэ ды весенень явшесь медь. Вирькужось пешкедсь тантейдеяк тантей чинеде. Натъ, медесь ульнесь цецянь.

Кужосонтъ мольсть кортамот-басямот, нармунень морамот. Куш инжетнеде ламольть ды эрвась кортасть эсензэ ладсо — весе вейкест-вейкест парсте чарькодсть. Ояксчинь келесь, марят, весенень содавикс.

Мейле инжетне стякшность таркастост, кундасть лападо-лапас ды саизь Овтонть куншкас, кода свал тейнить чачома чистэ...

Виренть вельксэ пельтне ёматотсть. Лиссь чипай. Сонзэ сырнень налонзо чувтотнень юткова пачкодсть кужонтень, ды пертьпельксэсь седеяк мазылгадсь ды lembelгадсь.

— Сюкпря тенк, паро инжеть! — ушодсь Овтось. — Ней мон аволь ансяк эсень чачома чиззнь карман тердтнеменк, истякак!

— Ванды садо монень! — серьгедсь Ривезесь. — Мон прядыя кудом-пизэм теэманзо.

— Мон жо зярс а тердтядызь, — нусманясто мерсь Миявось.

— Мекс истя? — марявсть вайгельть.

— Монь зярс эзь прядово кудом.

— Иля мелявто, — оймавтызе Ривезесь. — Минь лездатано!

— Паро! Лездатано! — каятотсь эрва ёндо.

Овтось мельспаросо вансь весементь мельга. Сон кецясь: вирень эрицятне кармасть эрямо ояксчисэ.

Чись сырнень чарокс аштесь кужонтъ вельксэ, сонгак прок мизолдсь-кецясь весень марто.

Паро Ламад вирьсэ эрямось!

МЕКС ПСАКАСЬ ДЫ ПУРЦУЗОСЬ¹ ЭРИТЬ БАШКА

ЭРЯСТЬ-АШТЕСТЬ Бозаёв минек вишка велине-сэнтъ Миколь атя ды Наталь баба. Мартост пингест печтясть Катя тюзала псакась, петак судо пурцузкесь, эли, кода сынъ лемдясть эйсэнзэ, Петак, ды Сакалов (истя атят-бабат мерсть ловсонъ канды сеяст туртов). Тундосто саезь сёксес атят-бабат шкаст ютавтсть эмежпиресэ, кона мейле андсь эйсэст телень перть. Сюпавчист ульнесь теке: эмежпиресь ды колмо ракшатне.

Зярс атят-бабат важдость пиресэ, ракшатне эсь тевест тейсть. Псакась яла кундсесь-пансесь чеерть. Васня куз-ниль кудопряс, мейле валгониль каськав, седе тов — кардазов молиль, утомов... Важодема тарканзо сатность. Лиясто тензэ эрявьсь пек кувать чатьмонежь учомс, зярдэ чеересь прянзо невьтсы, мейле мельганзо ношкстамс. Эрсесь истяк: чинь-чоп Катя учи, чинь-чоп чийни, ансяк вейкеяк чеерь а кунды. Сестэ тензэ ульнесь пек визькс. Истямо апаро чистэ Катя кудов мик эзь совсе, кельмсесь ушосо, куш азортнэ а чумондовлизь.

Лиясто, алкукс, истямо чистэ сон совсесь кудыкелев ды удомань самс арсесь-мелявтсь, зяро зыян кандыть апештявикс вишка чеертне. Нучк-пачк яла керсесызь теле лангс анокстазь коромонть. А уш бути коське тикшенть юткс понгить ксनावонь эли викань недькст — ве олгине а кадыть. Ды аволь ансяк те зыянонтъ сынъ теить. Пекест пештямодо мейле сынъ сеедьстэ совситъ каськас эли мацтс

¹Пурцуз — туволевкс

ды сокарить тосо моданть, тейнить варят. Бути шкастост а кундасыть, ушов мик пельсызь варятнень, ды тельня, сень вант, кудосонть кельмат. А бути вариявтсызь мацтот, сестэ теле лангс тозонь путозь весе эмежеть кельмить. Лисни, каткантень важомемась сатны.

Пурцунонть вана ков седе аламольть тевензэ. Чинь-чоп ансяк учнесь, зярдо азортнэ каить ярсамс. Мейле кармилъ учомо пиземе. Пиземе шкане кардазсо латкиненень пурнави ведь, сон сови тозонь ды истя седейга экшели, рудаз ансяк эрва ёнов ливти.

Аволь умок Петак совась эмежпирес ды весе пандятнень пряст лангс велявтынзе, весе пиренть сокизе. Теде икеле пире маласо тикшенть правтызе мода ёжос. Те тарканть атят-бабат яла ванстыть сеяст туртов, кизэнь перть сакалов ракшась тосо порни. Сёксь малав ледьсызь, костясызь тикшенть ды — лато алов. Сеясь мелят телень кавто ковт порсь эйстэнзэ. Ней азортнэненень сеяст савсь ветнемс кудо удалга чудиця Жойница леенть чирев.

...Весть чись уш прядовама лангсоль, азортнэ яла кодаяк эзть са кудов. Петак вачомсь ды совась кудос. Весе столь алкстнэнь, эзем алкстнэнь ютынзе — косояк мезеяк ярсамс арасель. Вана мусь вакашке, тосо — тюрят. Кармась шлёп-шлёп поремест.

— Эй, Петак, те монь ярсамось! — човине вайгельсэ серьгедсь Катя. — Монень а жаль, ярсак, ансяк састо, тон оно ваканонть вакссо весе кияксонть валнык. Ужо, лездан тетя!

Каткась мольсь ваксозонзо ды кармась киякса валнозь ловсонть нолсеме. Эзть кенере кавто ялгатне ваканонть чамдомо, совась азортнэ.

— Тынь тосо мезе тейтядо? — кежейстэ кевкстась Миколь атя.

Наталь баба сеске мольсь ваксозост.

— Розбой, тесэ мезе! — рангстась сон, зярдо неизе столь алксонть.

Каткась ёндолкс ливтась каштлангс. Петак пупордявсь

ды удалце пильгесэнзэ сявордызе вакашкенть. Кадовикс тюрятне валовсть.

— Варштакая, атя, мезть сон теи!

— Те ковгак а маштови, — апаркстомсь тона.

— Тунь прянзо ветямо а машты, — поладсь кортамонзо бабась. — Вай, варштадоя, ды сон весе кияксонтъ шешкизе. Таго тев тень...

— Азёкая, Петак, тон кардазов, — ёвтызе атясь валонзо ды панжизе кенкшенть.

Пурцюзось сэрсь якстерьгадсь, сехте пек петак судозо, ды амельсэ тусь кардазов. Ансяк неIZE кардаз куншкасо латкинесэ ведентъ, чопавтсь эйзэнзэ. Мелезэ сеске витевсь. Сон истя пек пулькась, рудазов пургавкстнэ ливтясть кардазонь келес.

Катя те шкане каштлангсоль. Сон тосто прянзояк виздсь невтеме, кекшсь седе удалов.

— Катя, а Катя, косат, кис-кис-кис... — вешнесь эйсэнзэ бабась.

Псакась а сеске невтизе прянзо.

— Мяу-у-у, — окойники, максызе вайгелензэ ды кирнявтсь масторов, кармасть ёзамо боканзо Наталь бабань пильгес.

Бабась саIZE псаканть элезэнзэ ды вадяшизе пондакш рунгонзо.

— Вадря, атя, псаканок! — мельспаросо ушодсь сон. — Ансяк вейке берянь: эмежпиресэ тенек а лезды...

— Тон уш, баба, тунь чаволгадыть, — ушодсь сёвно-монзо атясь. — Ней теке кадовсь, чувномо мартот карми, куяронь валномо. Сеяк паро — ве чеерь эзь кадо.

— Видеть валот, — поладызе кортамонть бабась, — вейкеяк эйстэст а неяви. Оно Марфань тикшензэ чеертне нучк-пачк керсизь. Сельведьс пачкодсь, коромтомо кадызь. Секень вант, сеязо вачо кадови.

— А кадови, — сезIZE кортамонть атясь.

— Кода а кадови?

— Минек коромонк сатышка, макстано зярояк.

— Истя, эряви лездамс. Я, шказо уш сась, сеянтъ ветяма,
— ледстизе бабась.

Миколь атя валонь апак мере стясь ды тусь сакалов
трицянтъ мельга.

— Цидярдт, цидярдт аламос, Катя. Ловсось саты весе-
нень, миненекак, тонетькак. Ды Петакненьгак. Ансяк ней
тынь вейсэ эрямо а карматадо...

Се чистэнтъ саезь каткась кадовсь кудос, пурцузось —
кардазс.

ВАСЕНЦЕДЕ ЛЕЙЧИРЕСЭ

ЭРЯСЬ-АШТЕСЬ Бозаёв минек вишка велинесэнтъ, кона ашти Бозов лейнентъ чиресэ, Олдай баба. Бабини кода бабине, велесэ сонзэ кондятнэде певтеме. Ульнесь сеязо: покш, пондакш, чевте ды мазый пона, одарозояк ведрашка. Истямо сея велесэнек киньгак зярдояк арасель! Нама, сон лезэв эрва мезень коряс: максы ламо ловсо, пона, ды те аволь весе — левксыякшны кавтонь-кавтонь. Тедеде — мик колмо. Те кармавтызе Олдай бабань арсемс: «Те апарс, сеятне левксыякшныть вейке эли кавто. Миема, сыредськак уш...».

Рамиця муевсь сеске. Сыре сеянтъ ды кавто левксэнзэ рамизь покш ярмакто. Вейкенъ, конась рамицянтень неявсь озоровицякс, аксунокс, кадызь азоравантень. Мее сеинесь, истя лемдизе сонзэ Олдай баба, кардазсонть кадовсь съкамонзо. Съкамот нусманячи сайтязат, а кинь ваксс модемс, а кинь марто бокат ёзамс, а кинь марто касыця сюринетнесэ тостяемс. Олдай баба мейсэ ансяк эзь каваня эйсэнзэ — паро коромось, лембе ведесь икельдензэ эзть маштне, ды Мее аламось-аламось тонадсь съкамонзо эрямонтень.

Вестъ истя парсте ярсамодо мейле сон пурнынзе пильгензэ алонзо, кирьганзо венстизе ёжованзо, конинзе сельмензэ ды сутямсь. Ансяк матедевсь — кардо кенкшесь чикорк тейсь. Мее сыргозсь.

«Те азоравась таго ярсамс канды», — арсезевсь сеинесь.

Алкукскак, ваксозонзо мольсь Олдай баба. Ансяк ярсамкань таркас кедьсэнзэ ульнесь пикс, вейке пентень понгавтозь туло, омбоцентень — крендель ладсо теезь сюлмо. Мее сеске стясь ды мольсь азораванть ваксс. Сон вечкезь нолштызе бабанть кедензэ ды вестъ-кавксть ёзолдызе пиль-

гензэ. Олдай баба чевтестэ вадяшизе сонзэ качамо тусонь пондакш принензэ ды лангозонзо ванозь мерсь:

— Мезть, сеинем-мазыйнем, сась шка ветнемс тонь лугалангов. Саты коське олгодо ярсамс, ней тонсь прят тряк, пиже тикшинеде порть.

Неть валтнэнь лангс Мее эзь кежиявто. «Алкукскак, пиже ярсамкась аволь кода коськесь, аместь тень кизэнь вадря-паро чистэ лужалемс кардазсо», — арсесь сон.

Олдай баба тонгизе пикс сьулмонть сеянть кирьгас, туло марто пенть саизе кедезэнзэ, мусь молотка, панжизе ортанть ды пшкадсь сеинентень:

— Адя, Мее, лугалангов.

Тонанень кирьгасонзо пиксэсь эзь вечкеве, сон прок лепштысь кирьгапаренть. Ансяк аламонь-аламонь ялатеке сыргась. Сынь мольсть менчевезь теине янганть, кона ветинзе лугалангс. Тесэ уш ульнесть велень зярыя вазт ды сеят. Сынь весе вансть Мее лангс. Васенце тувталось — сон од, а содавикс, омбоцесь — Мее ульнесь пек мазый, лиятнень ёнов а молиця.

Олдай баба чавизе тулонть модас, вадяшизе Меень чевте пондакш понанзо ды туемстэ мерсь:

— Туян, вечкевиксэм, порнек, пештть пекинеть, курок сан симдеметь, таркат полавтомо.

Мее кувать вансь азораванть мельга. Ансяк нусмакалемс азырдоль: пекесь вешсь ярсамс, ды чиськак калязь калясь. Мее тестэ, тосто сези тикше — пекесь а пешкеди. Ваны, латко чиресэнть касы седе пиже ды сэрей тикше. «Тов пароль молемс, лият, ва, сонзэ илизь порне!» — мелявтозевсь Мее.

Мельтне-арсематне ульнесть стяконь: пиксэсь васов эзь нолда.

«Ялатеке молян, мезе те пиксэсь монень», — кеместэ мерсь эсензэ потмова сеинесь ды кармась тулонть тостяеме. Поты, поты удалов, ношксты мекев ды мезе вийть тостядьсы тулонть. Истя тейсь весть, омбоцеде, колмоцеде... Прязояк кармась сэредеме. Арсесь-тейсь ды ушодсь тулонть лиякс

таргамо: васня моли ваксозонзо, мейле ношксты эйстэнзэ. Истя зярыяксть ноцковтсь — тулось аламонь-аламонь лавшомсь ды таргавсь. Мее кенярдомань пачк сеске ношкстась латко чирентень ды шкань апак таргсе автордась тикшентень. Поремэнзэ эзь карма — те ульнесь пиципалакс.

«Арась, а эряви тень истямо тикше, те мекс-бути кежей, пицезь пици. Эх, симемам сась», — кортась эстензэ Мее ды ношкстась Бозов леенть ёнов. Ансяк пачкодсь, сеске венстизе нерензэ. Автизе кургонзо, комась ведентень — тосто кие-бути ваны лангозонзо. Кие те, мезе? Мее абунгадсь, таймазкадсь. Седеезэяк кармась седе виевстэ чавомо. Сеинесь тандадсь. Кепедизе нерензэ ды эскельдась лия таркас. Кармиксэль симеме — ведьстэнтъ ваны теке амазыесь. Мее венстясы нерензэ ведентень седе малас — сонгак малавгады.

«Истят амазыйть а эрситькак, те Ведьятя¹!» — арсезевсь сеинесь ды вить пильгесэнзэ пстидсь ведентень. Варштась, «Ведьятясь» тоско. Совась ведентень ды ушодсь те таркасонть пулькамо, пильгесэнзэ баксорямо. Ведесь рудазкадсь, «атяськак» ёмась. Ансяк аламо шкань ютазь ведесь ваньскадсь ды «Ведьятясь» таго появась. Сеинесь тандадоманзо-пелеманзояк стувтызе. Сон яла вансь ведентень ды арсесь, кода бу весть-кавксть тостядемс те «атянтъ».

«Кодат ансяк моданть лангсо а эрсить, — арсесь сон. — Прясь эйсэнзэ чарошка, сельметне алшкат, судось плаштяшка, конясонть — сюрот, поназо ашти чеченакс², а сакалонзо... неть арази сакалот — моцюдалкс³. Лия тевесь — оно монсетне!.. Мон тунь сонзэ ёнов а молян! Те оно кодамо... Амазый пона, ды весе! Сон — тандавкс! Молян седе куроқ ёвтан азораваентень».

Мее мезе вийть ношкстась кудов. Мельганзо усковикс туло марто пиксэсь ёртневсь тей-тов. Ардсь сон прянь-

¹Ведьятя — водяной

²Чечена — щетина

³Моцюдалкс — пакля

полдань синдезь ды... эшкевсь ведрас, конань эйсэ Олдай баба кандсь Меенень симемс ведь.

— Вай, ормазкадыть, нать! — ацирьгадозь мерсь бабась.

Сеинесь нолдызе прянзо. Ведесь валовсь, эйзэнзэ каязь кши кочомтне ды почтось кадовсь луганть лангс. Мее вансь каванявксонзо лангс, сельгензьяк чудезевсь.

— Мекс нолдык безьмень прят? Мезе лиссь?

— Ме-е-е... — ушодсь сеинесь ломанень вайгельсэ кортамо, — т-т-тень, т-т-тосо оно, лейсэнтъ, Ведьятя.

Бабинесь мизолдозевсь:

— Арази эрсить Ведьятят?

— Эрсить, монсь неия, — кармась кемевтемензэ Мее. — Молинь симеме лейлангов, ведьстэнтъ, кона таркантень а молян, ваны те, кода уш лемезз, Ведьятясь. Адя, адя, азоркай, вансынек. Панема сонзэ тосто, икелепелев илязан куло ведтеме, апак симе кыргапаремгак коськсь.

— А мезть тонеть якамс тов симеме, мон эрьва чистэ карман тетъ кандтнеме ведь. Течинсэнтъ вана, тонсь чумось, валык.

— Мезеяк а эряви, адя лейнестэнтъ паньсынек Ведьятянтъ, ва, илязо лисе ведьстэнтъ, сы тень лугалангов...

— Адя эно, — мерсь бабась, юкстизе Меень кыргасто пиксэнтъ, ды сыргастъ леэнтъ ёнов.

Сынь мольсть се таркантень, косо Мее васенцеде вастовсь асодавиксэнтъ марто.

...Теньсэ, паряк, прядсынек ёвксонтъ, ансяк мерян: мон кеман ловныцянтъ лангс, сон соды, кие вансь Мее сеинэнтъ лангс ведьстэнтъ.

ОСЁЛОНЬ ЧАЧОМА ЧИСТЭ

ЭРЯСЬ-АШТЕСЬ Ламад вирьсэ чавола а чавола, превей а превей, чевте седей Осёл. Сон течи эзь удо вень перть. Кодат тесэ удомат! Ванды — чачома чизэ. Валске мартос сон ловнось, зяро инжеть тердемс, мейсэ сынст каванямс... Певтеме кевкстематне теке чавомкасо човонензэ ланга бамкаесть. Валдомгадозь, зярдю чинь налтнэ эшксть сельмезэнзэ, сон стясь пильге лангс. Васняк ютась виренть чирева, совась потс, пертьпельга ванкшнозь, покш сельмензэ, окойники, пезнасть эрвиксэнтень.

«Те таркасонть тешкстасаяк покш чим!» — кемекстызе эськанзо тевень сыргавтыцясь.

Видеяк, седе парт а эряви вешнемскак: мазый озамокс педсек аштить зяряя мукорть, сяворезь эчке тумось моргакс маштови. Зяро эрвя кодат тикшеть ды цецят! Кие озы, кие мади цецянь те кумбанть¹ лангс. Симемат сы — теске оно кодамо чудикерькс чуди.

Покш чинь пурныцясь эськанзо ловинзе учневиця инжетнень: муюков Катканть, тюжала Ривезькенть, нурька пуло Нумолонтъ, салмуков Сеелентъ, чирь пильге Овтонть, пшти пей Кисканть, лепштязь судю Тувонть, кемень саразонзо марто якстере Атякшонть, сакалов Сеянтъ, сюрюков Баранонтъ, ёлганя Алашанть...

— Комськолмово... Эхе-е-е, неть весе а каванявить. Ды, паряк, весень эзинь ловояк, — моткодсь кувака пилесь ды уставась ловомо одс: — муюков Каткась, тюжала Ривезесь... Комськолмово улицькак. Вай, атят-сэрдят, эсь прям стувтокшныя. Лисни, комсьнилее. Мда-а, ламо... Дык тесэ минек вирень ды маласо велень весе эрицятне! Эрь, тагаяк

¹Кумба — ковёр

ловсынь, паряк, киньгак а тердема: муюков Каткиненъ, тюжала Ривезенть... Вай, кинь а тердят, кинь ялгакс а ловсак? Монсень яла свал тердтнить, свал тенень-тонанень пшкадемс савкшны. Улкоть оно ярмакон прялесь, пе тень сакшнось — Тувось идимим.

Сась учневиця чись, Осёлонть превензэ маштсь. Арсесь-тейсь, сайсь кавто кептерть ды виренть трокс сыр-гась найманов¹.

Шкась ютась куруксто. Кужось аламонь-аламонь пешкедсь инжеде: кона кавалало, кона лавтовонь трокс каязь кандсь казнензэ. Пурныцяст ансяк арасель. Тердезтне кенерекшнесь аволь весть мекев-васов ёвтнемс куляст-мелявксост, а весть маднесь чинть ало рунгост пидеме, ведьсэнтэ укшность-пулькасть. Чаво тутматне шкань-шкань ледстнесь эсест эйстэ. Мезть тейнемс?.. Аламонь-аламонь тестэ-тосто кармасть скирямо эсест казнетнестэ. Сеелесь омбоцеде кенерькшнесь сускомо умарензэ эйстэ, Кискась весе сывеленть ловажас порнизэ, Сеясь лопань-лопа ангори каштазонть², Алашась пинемензэ эль порьсы...

Вана куракштнэнь экшстэ неявиь Осёлонть прызо, мейле — кавто кептертне, конат пряс пештязельть эрва мейсэ. Сталмодонтэ пиштяканть сельмензэ лангс эль лисить, рунгозо сэрьс начколь, мерят, ансяк лиссь ведьстэ. «Моргань вельтицянтэ» неезь, весе инжетне кецязевсть ды ушодсть гайтевстэ шумбрактнеме:

- Ми-го-го, — цяхазевсь Алашась.
- Мяу-у-у, — мавкстась Каткинесь.
- Хрю-хрю-хрю-ю-ю, — рокнозевсь Тувось.
- Гав-гав-гав, — онгозевсь Кискась.
- Ку-ка-ре-ку-у-у, — гайгстась Атякшось.
- Ко-ко-ко, — котнозевсь Саразось.
- Бе-бе-бе-е-е, — паразевсь Баранось.
- Ме-ме-ме-е-е, — мекнезевсь Сеинесь...

¹Найман — базар

²Каштаз — венук

Осёлось кецяzewь — весе састь. Састыне нолдынзе карадо-каршо сюлмазь кептертнень, кармасть таргсеме ды ладсеме морганть ланга каванямкатнень, тантей чине прякатнень.

— Вана нетне — сывелень, тонатне — калонь, улить умарень, медь мартояк саинь, пинеменсетне оно сеть, чурька марто алонсетне вана неть... Ансяк, ялгат, те, нама, аламо, — визделгадсь Осёлось.

— Саты, саты! — сеересть инжетне ды кармасть морганть ланга вачказтнень почакавтомо.

Ривезесь апак порнеяк нильнесь саразонь сывелень прякатнень, Овтось медьсэ вадезтнень нолсезь нолсесь, Алашась пинеменсетнень амсорясь, саразонзо марто Атякшось ды Баранось калацятнень прядсть.

— Эй, чавола пря! — тарад лангсто серьгедсь Покш пря коршось. — Тонеть куш кияк казне максь чачома чизэть?

Осёлось нолдызе прянзо, чатьмони. Каштмолить инжетнеяк.

— Минь, тень... кода уш меремс, — ушодсь Овтось, — тонь учозь вачоминок, кандозь казненек поревсть. Сэвинек минсь, лиякс меремс.

— Ней вана тантей прякадот ярстано, — поладсь Ривезесь.

— Истя, истя, — максызе вайгелензэ Алашась. — Минь тонь чачома чинтень пек анокстынек, мелявтынек-ризнынек, таргоютко мездеяк эзинек ярса. Ды ней вана...

Инжетне варштасть карадо-каршо, мейле Осёлонь лангс, ве вайгельсэ энялдозевсть:

— Тон уш илия кежиявтне, кувака пиле, илия мурне, превейне-мазыйне! Кемть, сы иестэ прянок лиякс карматано ветямо.

Пингень чувтотнень экштэ мизолдозевсь чись. Осёлонть ёжозояк тень марто паролгадсь, сон келейстэ мизолдозевсь ды пшкадсь:

— Кадык казнекс тень ули тынк ялгакчинк, вечкеманк! Сюкпря самонк кис, шумбрачи тенк, тантейстэ ярсамс!

Пелевес вирень кужосонтэ Осёлось каванясь инжетнень, сонсь покш мельспаросоль — зяро сонзэ вечкиця оянзо!

ЛЕМБЕ ВАЛТ

ЭРЯСЬ-АШТЕСЬ покштянзо-бабанзо кедьсэ пре-вейдеяк превей тейтерька. Мазыйка Оля...

— Стяк, стяк, нуцкинем, — тейтерькиненць прянзо вадяшазь, мерсь Устя баба.

Оля панжинзе сельмензэ, сэрензэ венстемеде мейле нолдынзе пильгензэ тарканть чирева.

— Течи Илия¹, ванды тонь чачома чить. Кавто покш чить мельга-мельцек, — мерсь бабась.

— Чачома чиденьт содан, а васенцесьмень?

— Кодамень? Те медте ярсамо чи. Вечкат медь?

— Пек вечкан.

— Тетят медень таргамо тусь, те шкас уш пачкодсь.

Тейтерькась шлясь-нардась, кундась кудуютконь тев-тнес: пурнынзе-ацынзе удома таркатнень, тенсинзе киякстнень. Неть тевтнеде мейле лиссь пирев цеця мельга. Каршонзо понгсь тетязо. Кедьпесэнзэ — икельга таргавозь сееде варине вельтявкс марто ашо коцтсто стазь пряспу-томка, омбоце кедьсэнтъ кирдсь чаво кедьге.

— Вана, Олине, Илиянь чистэ медь таргиксэлинь, — пеняцязь мерсь тетязо.

— Мейсэ эно тевесь, цёрам? — кевкстязь малазост сыця сырькаесь.

— Мейсэ, мейсэ... — кеждязь ушодсь тона. — Оно, кочкизе сех паро нешкенть ды кодаяк а туи.

— Кие? — натой апаркстомсь Устя баба.

— Миша.

— Овто?.. Мезе тензэ эряви?

— Мезе, мезе? Медь. Ёртызе веёнов нешкень латыненць ды сокари кудынетнень. Навасы лапанзо — потси эйсэнзэ.

¹**Илия** — Илиянь чи, Ильин день

— Тон снартнить панемензэ? — чатьмонемадо мейле кевкстясь Оля.

— Кодак молинь, сядикс ланга моргов рицягасо цята-дия. Сон кежейстэ варштась лангозон ды поладызе тевензэ. Мон таго риштия — сон прок кевень ашти.

— Сонзэ куянтэ пачка неть эшксематне, нама, эзть марьяояк, — чевтестэ ушодсь Устя баба.

— Мон молян варштаса, — апак учне мерсь Оля ды ношкстась нешкепиренть ёнов.

— Велявтт, велявтт! — сеерезь ёртовсть мельганзо покштнэ. — Панксонь-панкс раздетязнат!..

Нешкепирентень тейтерькась пачкодсь курокто. Вансы: овтось апак пеле теи эсь тевензэ.

Оля панжизе пире кенкшенть, стамбарнэ совась потс, мольсь овтонть вакс.

— Миша леляй, а Миша леляй? — чевтестэ пшкадсь сон ды уставась овтонть вадяшамо.

Ниле пильгесэсь вечкезь варштась тейтерьканть лангс.

— Покш чи марто тонь, Миша леляй, — лембестэ мерсь тейтерькась. — Илиянь чи марто!

Овтось ломань ладсо аволдась прясонзо.

— Тон, Мишаня, инескеть, тия иля чара, миньгак медь саевлинек.

Тесэ тетязояк сырькаензэ марто пачкодсть ваксозост, сынь абунгадозь варштасть вейкест-вейкест лангс. Оля саи-зе овтонть лападо, ды сынь вейсэ лиссть пирестэнтэ, мейле сыргасть янганть, кона ветясь тусто вирентень. Колоньге-меньшка эскельксэнь трокс Оля лоткась, овтось поладызе кинзэ. Сеедьстэ касыця чувтотнень юткс совамодо икеле Миша варштась Оля ёнов, мейле прок ломань стясь удалце пильгензэ лангс, икельце лапасо аволдась тейтерькантень. Оляяк аволязевсь. Теде мейле овтось чиремкшнезь совась тусто вирентень.

Цёранзо марто Устя баба кургонь автезь вансть «оят-
нень» мельга, конаяк ве валгак эзь ёвтаво...

Нама, овтось превей ульнесь. Оляяк превейне: вадря-
сто, чевтестэ кортась, валонзо седейстэ лиссть. Оно, натой
Мишань мельс тусь.

ПРЕВЕЙ ЧАВОЛА

ЭРЯСТЬ-АШТЕСТЬ Бозаёвонь Верепесэ Сега атя ды Олда баба. Лиятнень коряс сынь сюпавсто эрять: кудост покш, пичень, керсевксэ-налкшкесэ мазылгавтозь. Умарьпиресткак покш. Кардазосткак вадря. Тосо эрвя кодат кудоракшат. Сехте покш мельспарось — алашаст. Ашо, ёлганя, мазый. Теште лемезэ. Сон лездась тееме кудуютконь весе тевтнень.

Сюпавт сынь эйкакшонь коряскак — колмо цёраст, — ансяк леззсь конань эйстэяк арась — вейкесь омбоцеденть чавола. Ковгак кучомс а маштовить. Чинь-чоп лужалить, теке айгорт. Икеле тетяст-аваст сынсь весементь теилизь, эрвя ков кенерильть, ней лия тевесь, сыредсть.

Ушосонть цят якшамо, пенгетне прядовама лангсот — цёратнень седейтне ризкс а марить.

— Марят, атя? — каштомикельде пшкадсь бабась.

— Мезе, Олдынем?

— Мезе, мезе. Сакалонь-муюконь витнемась паро, пенгетнеде вана кие карми арсеме? Чи-кавто, ды прядовить.

— Истямс истя. Ломаннень лезкс мельга пшкадема.

— Ломанде визькс, — пельсавардезь корты Олда баба. — Мерить: оно верьгиз цёраст кадык пенгес кучсызь.

— Минекетне арази ковгак маштовить? Ярсамо ансяк.

— Мольтяно, мольтяно, — каштлангсто серьгедсть цёратне.

— Адя уш, чатьмонеде, — лоткавтынзе тетяст. — Мелят Оха якась пенгес — алашанть вирьс кадызе, сонсь сась кавалало тарад марто. Паро, лишмесь превей, кудонть сонсь муизе. Миколь ютазь кизна тикше марто крандазонть чеядавксос¹ эцнизе. Паро, лишмесь превей — лисевсь. Сонськак тозонь ваяволь. Митрейгак а седе превей...

¹Чеядавкс — болото

— Адя уш, колмонест чавот, — эзь кирдеве Олда.
— Нать, стувтык, кода улкоть каштомикельде чапакс вачанонть ливтизь кардаз куншкас? Кардазсо ракшатненень покш чи тейнесть, семиянть вачодо каднызь.

— Мон пенгес молян, — таго пшкадсь каштлангсто Оха.

— Чатьмонтъ, меринь, — эзь цидярдо аваст.

— Мезе чатьмонтъ? — эзь кирдеве атыськак. — Кадык моли, паряк, те шкас превиясь, вансак — пенгеть уски.

Чись ансяк ушодовкшнось, секскак Охань кармасть пурнамо вирев. Авазо тапарясь паця потс ярсамка, тетязо кильдизе Тештень. Оршизь цёраст, озавтызь нурдос. Оха кургонзояк автеме эзь кенере, кода айгорось цяхазь ношкстась.

Вана виреськак, ансяк Оха эзь лоткавто айгоронть. «Виренть потсо чувотне, паряк, седе човинеть», — арсесь сон.

Косто-бути каятотсть ломанень вайгельть. Оха куломазонзо тандадсь. Ваны — кинть лангс лиссь атя. Сон яла малавгадсь ды малавгадсь.

— Мезе тетъ эряви, мекс прок палмань стить кинть лангс? — кежейстэ кевкстась Оха. — Иля меша, натъ, а неят, Оха пенгень анокстамо арды!

— Пекем вачсь, цёрам, кши кочомнеть арась? — энялдозевсь атысь. — Кудосто мартон ламо эзинь сайне, кеминь, курокто велявтан...

— Ули, ды аволь тонеть сон анокстазь. Монськак сонзэ сэвса, — мерсь Оха ды лоштизе лишментъ.

Атянть сельведенззяк эль эзть лисе. Сон айгсь кистэнтъ ды кувать вансь покордыцянзо мельга.

Оха ардсь-ардсь, кельмеме кармась. Лоткась эчке тумо ваксс. Вансы-тейсы, весе чувотне эчкетъ, виезэ керямс а саты — эряви ярсамс, пурнамс вийть. Юкстизе пацянтъ ды ушодсь пекензэ пештямо. Васня сэвизе кши марто тувонь куянтъ. Вадря! Вансы-тейсы, чувотне эзть човалгадо — таго ярсамо кармась. Саизе модамарень панжакаентъ, сусксъ ве пестэ — омбоцентень пачкодсь. Паро! Ансяк чувотне яла-теке эзть човалгадо. Курок пацяпотмось чамсь — пекесь, маряви Оханень, эзь пешкеде.

— Э-э, тесэ вачо а мезть тейнемс, — арси сон, — кши паморьсккак эзь кадово. Озась нурдонть ды велявтызе лишменть кудо ёнов.

Чополгадокшнось уш, тол кудосост палсь, зярдо пачкодсь. Оха эзь кенере валгомо, каршонзо лиссть тетянзо-аванзо.

— Вай, нучк-пачк кельмесь, — тандадозь мерсь Олда ды капшазевсь цёранстэнь. — Стяк, стяк нурдотнестэ.

— Пенгеть косот? — калгодосто кевкстизе тетязо.

— Адя, атя, чатьмонтъ, паро, сонсь пачкодсь, — лот-кавтызе бабась.

— Стяко алашанть чинь перть кирдизе, паро ломаннень максовлия, миненекак кавтошка чочкот усковоль, — эзь пота Сега атя.

Чокшнесь ды весь ютасть кельме кудосо. Семиянек вень перть якшамодонтъ калыцькаестъ пейсэст. Кадовозь колмо цюркинетнень бабась ванстынзе омбоце чинтень. Валске марто путынзе сынст каштомс, лангозост кувать ваномато мейле кирвазтинзе, ды толось кундась пенгетнес кежей гуекс. Курок марятотсь цятнома. Цёратне ёртозь ёртовсть каштлангс эжнеме.

— Прядовить пенгетне, мезтнеме карматано? — ацирьгадозь кортась атясь. — Миколь, молевлитель вирев.

— Адя чатьмонтъ, атя, — эзь цидярдо бабась. — Кучник исяк вейкенъ, теяк тев а теи.

— Мекс а теи? Теян, — идесь прынзо омбоцесь.

Атясь лиссь Тештень кильдеме, бабась те шкастонть пурнась цёранстэнь ярсамка ды оршамопель. Курок весемесь ульнесь анок. Атят-бабат озавтызь цёраст, ды тона тусь.

Ардоманъ перть Миколь штюпсесь тапарксонтъ. Седе-есь эзь цидярдо, яла эли пряка, эли кши сускомо кургонтень пути. Тапарксось яла вишкалгась.

Шканъ ютазь пачкодсь тусто вирентъ потс. Керяк пенгть, зяро эряви! Ансяк узересь мекс-бути цёрантень стака маряви, а кепедевияк. Вестъ Миколь вачкоди, омбоцеде — чувтось а лыказевияк.

— Тьфу, — сельгсь Миколь. — Пек эрявить монень неть пенгетне. Те аволь чувтот — кшнить, узереськак эйзэст а пезны. Туян кудов, секень вант, Оха марто Митрей те шкас кудосо весе кулаганть прядызь.

Озась нурдонтень, пурдызе лишменть веле ёнов, ды Теште тусь кополсо ардозь. Лоткась ансяк вирьстэ лисезь, пандочаманть икеле. Тесэ цёраломань нурдо марто аштесь.

— Кунсолока, ялгай, — пшкадсь цёрась, — лездавлиять тень. Пенгетнеде байтак вачкинь, а кузтевить.

— Вешнек чаволат лия таркасто, — нардызе судонзо Миколь. — Ёртнить пелест — пандопряв нурдось сонсь сырги...

— Атя, варштака, Миколь сась, — пельскельмезь вальмаванть ваномсто мерсь бабась.

Атят-бабат лиссть ушов.

— Вай, теяк чаво нурдо марто велявтсь, — ацирьгадсь бабась.

— Валгт нурдостонтъ, нузякс идемевсь, — кежейгадсь Сега атя. — Стяко ансяк Тештень пансить.

Авась совась чавола цёранзо марто кудов, атясь перьгавтызе лишменть ды пекстызе кардос.

— Ванды мон пенгеть ускан, — алтась Митрей, колмоце цёраст.

— Адя чатьмонтъ... — лоткавтызе атясь.

...Вентъ таго ютавтызь кельме кудосо. Валске марто васенцекс стась Митрей.

— Тетяй, а тетяй, стяк, эряви алашанть кильдемс, — сорновтни сон атянтъ.

— Кинень? Ков?

— Кода кинень? Монень.

— Натъ, кардазга эйсэнзэ ардтневлить?

— Атя, иля згиля цёранть лангсо, — эзь цидярдо бабась.

Атясь чатьмонезь лиссь ушов, Митрей — мельганзо. Тетят-цёрат кильдизь алашанть, бабась те шкане пурнась ярсамка, паця потс тапардызе. Пурнызь-теизь цёраст ды ильтизь вирев.

Теште тагояк ливтязь ливтясь секе кияванть. Ансяк кенерсть вирентень совамо — каршост кавто цёрат.

— Ялгай, а ялгай, — пшкадсть сынъ чевте вайгельсэ, — идевлимизь.

— Мельспаросо! — кецязевсь Митрей.

— Вачоминак, аламошка ярсамканок ульнесь — сэ-вевсь.

— Эка, тевеськак мезе. Монъ вана пацяпотмо мик. Саинк.

— Ков тень весе? Эстетъ кадт.

— Мон кудосто туемстэ парсте ярсынъ.

— Минь тонетькак кадтано ярсамс, тон косо улят?

— Мон молян Бозов лейнентъ малас, — серьгедсь Митрей уш ардомсто.

Курок сон несъ алаша вакссо аштиця. Малавгадомсто чарькодсь: те ульнесь сыре ломань.

— Кунсолока, цёрам, — пшкадсь сон Митрейненъ, — локшот а максак? Эсенсентъ ёмавтця. Истяко кодак алашам пенге марто нурдонть а уски.

— Саик, — мерсь Митрей ды венстизе локшонть.

— Тон косо кармат анокстамо?

— Мон молян Бозов лейнентъ малас, — мерсь Митрей.

— Мон тонеть мекев пачтяся локшонть, — алтась атясь тензэ.

— А эряви, монъ Тештинесь превей, истякак кунсолы.

Митрей озась нурдонтень ды сыргась Бозов лейнентъ ёнов. Пачкодсь, вансы: лейнентъ чиресэ тесэ-тосо сяворезь чувтот.

«Те, нать, вармась, янгинзе», — арсезевсь Митрей ды сыргась сынст ёнов.

Сон уш анокстакшнось зяряя чочкот, кода каятотсть вайгельть:

— Оно, оно косо сон!

«Муинь паро тарка — мельган састь. Ней весе паро чочкотнень пурнасызь», — арсезевсь Митрей.

— Лездамо тетъ сынек, — мерсь атясь, — локшоткак кандыя.

— Монгак лездан, — пшкадсь омбоце цёраломанесь. — Кадовозь ярсамопелетькак кандыя пацянтъ потсо.

Атясь ды цёрась валгсть нурдостонтъ, саизь узерест. Вейке, омбоце чочко кандыть...

Зярдэ сизесь, озасть чочко лангс, калавтызь тапарксонтъ ды ушодсть ярсамо. Оймсемадо мейле тевест седеяк вадрясто сыргась.

Ды вана пенге нурдо марто кавто алашат мельга-мельцек сыргастъ велентъ ёнов. Пандочамавантъ састыне кузевсть, седе тов кись видель.

— Вай, вай, вай! — вайкстнезевсь Митреень авазо.

— Минь уш арсинек, цёранок ёмась, — эзь кеме тетязо.

— Ков ёми, виресь эсенек, содавикс, минь оно тензэ лездынек, — мерсь лездыщятнестэ вейкесь.

Вейсэ вачкизь чочкотнень кардаз ваксс.

— Ливтть, бабай, пила, — пшкадсь седе одось.

Важодемась одс лаказевсь. Охат-Микольтькак лиссть кудосто. Веенст пилясть, омбонстнэ лазность...

Бабась уштсь каштомо ды пансь панжакайтъ. Кода эно, инжеть састъ!

Курок весень тердизь кудос. Моргантъ аравтызь кудокуншкас, перьканзо — эземтнень. Таркась ды каванямкатне весенень сатотсть — превейтнененьгак, чаволатнененьгак.

Валске веленек марясть: Сега атянь ды Олда бабань Митрей цёраст пенгеть усксь. Истямонтъ марто, келя, а ёмат.

САЛМУКСОНЬ КАЗИЦЯ СЕЕЛЬНЕ

СЕЕЛЬНЕ кеместэ удось пизынесэнзэ. Маднесь пеке-лангс, лиясто полавтнесь боканзо, менчесь рунгонзо, те-евкшнэсь прок салмукссо вельтязь оскакс. Пизынесэнтэ сэтьме, лексеви парсте, шождасто. Тантей удоманзо сезизе вачомозь пекезэ. Варштакс ушов — тосо валдо, коштокс лембе.

«Э-э-э... те, паряк, чинь куншка уш, — арсезевсь рак-шинесь. — Лисема ушов, пекесь пеке, кувать удомань кисэ шабрам илямизь раксе. Покштям куш эзь мерне лиснемс кудосто чить, марят, охотямо эряви лиснемс ансяк чокшне ланга. Эрьга, лисян, мезе тосо ушосонть...».

Апак капша, састыне невтизе нерензэ ушов, удомадо мейле шкань-шкань автнесь кургинензэ. Эскелязевсь ян-нэванть, конань вельксэ, прок латынеть, аштеть эрьва кодамо тикшень келей лопат. Мода ёжова касыця тикшет-нень лопаст лангсольть ведьбайгеть. Сынст эйсэ Сеельне мельспаросо явавтызе симеманзо. Лембе чинь струятне пувтызь весе пертьпельксэнтэ.

«Ансяк нимиявт ливтнить, а сукст, а унжат... Тантей монь ярсамопельтне алкукс натэ чокшне ланга эрсить», — арсесь салмуков ракшинесь.

Веёно марявсть вайгельть. Те истя верьгизтнэ кундсем-несэ налксесь, оймсемстэ мик морасть, калгодо, корцяня вайгелест эйсэ таргсесь.

Зярдо Сеельне пачкодсь малас, Верьгиз максызе вай-гелензэ:

— Вай, вай, вай, ой, ой, ой ... Лапазом пшти сардо пез-

нась, косто сон саевсь? — ацирьгалесь Верьгиз. — А-а-а, те салмуks. Те тон пупик лапам, салмуksов раkша.

— М-м-мон, мон... — ушодсь Сеельне.

— Саизе ды пупизе лапам, кодамо-бути нолготуло нарьги лангсом.

— Мон, Верьгиз леляй, мезеяк а содан.

— Маринк, мезе мерсь? Эно кие лапам нучк-пачк пелизе? Кинь те салмуksось? Тондеть башка минек вирсьэ салмуksов раkшат арасть.

— Бути уш истя, тон тонсь чалгить лангозом.

— Ну, монсь. Эряволь тень омбоце лапасонтькак чалгамс, лепштявлитинь, мерькавлитинь весе. — Мезть ней тейнемс? Кодаяк чумочить пандык.

Сеельне чатьмонсь.

— Кунсолок, салмуksов, куроk сыть якшамотне, эряви теленень шубам витнемс.

— Ну и мезе?

— Мезе, мезе... Эрьга мон ветешка салмуks лангстот ноцковтан.

— Косто, косто?..

— Косто? Лангстот.

Кежей Верьгиз айгизе малазонзо Сеельненть ды ноцковтсь салмуks.

— Вай, вай, вай, кода сэреди.

— Чатьмонтъ, тонсь чумат, пупик лапам, — кежейстэ кортась Верьгиз. — Цидярдт. Оштё вейке, оштё вейке.

Верьгиз салмуksонь салмуks ноцковтнесь сеельненть кутьмерестэ салмуks.

— Верьгиз леляй, саты, тон уш котоце таргат.

— Чатьмонтъ, кемень тарган.

Истя Верьгиз ветень таркас ноцковтсь мик кемень. Мейле тусь вакстонзо.

Сеельне сорновтызе рунгинензэ, састыне сыргась икелев. Кувать молись, весе рунгозо лажнось.

Чувто ало, ундыненть вакссо, неявишь налксиця-эльница ривезькайтъ.

— Эй, Сеельне, — серьгедсь Ривезьавась сонзэ неемстэ.
— Маринь, Верьгизнэнь максыть салмукст, мик кемень.
Миненекак максовлитель кавтошка. Парот пандсынек. Ку-
вака эрямонть перть миньгак маштовтано тетя. Ков чи уш
якшамо. Ютазь вене лапан аламот эзть кельме. Эцинь уш
пекем алов. А мезе, шубам уш нулакст теєвсь... — кортась
яла валаня кельсэнзэ ёжов Ривезь.

— Жаль тень марявтадо, ривезькайть, — ушодсь Се-
ельне. — Таргак энэ кавтошка.

Ривезь шкань апак таргсе мольсь Сеельненть ваксс.

— Тон, Ривезькай, таргак лавтовом лангсто, тосо седе
кеметь салмукстнэ.

— Э-э-э, тесэ уш истят покш, кеме салмукст арасть,
натя, Верьгиз вадрятнень ноцковтнинзе.

— Сестэ вант тонсь, монень а неяви, косот вадрятне.

Ривезь ваннзе Сееленть весе рунгонзо, штюпсинзе
весе салмуксонзо. Вейке ноцковтсь, омбоце ноцковтсь.
Ушодсь колмоце салмуксонь ноцковтомо.

— Эй, Ривезькай, те уш колмоце, тон мерить, ансяк
кавто салмукст тетя эрявомо кармить.

— Кавто салмукстнэ аламо. Бути сивить, мейсэ карман
теленень шубам витнеме-петнеме? Пельскаладосонтя
теленя васенце чистэ жо кельман...

— Паро, сестэ таргсек лангстом зяро мелеть, — эзь
моле каршо Сеельне.

Ривезь ноцковтнесь салмукс мельга салмукс. Сеельне
ансяк «ой», «вай» тейнесь.

Ёжов Ривезькай пурнынзе вейс таргсезь салмукстнэнь,
кеместэ лепштинзе лапазонзо ды ношкстась ков сельмензэ
неить.

Сеельне сыргась вирень янганть икелев.

Ёжозо берянель, секс аволь ярсамс, эзь ванояк певте-
ме ярсамканть лангс. Курок пачкодсь латко чирес, косо
морсесь-налксесь нумолкаень семия.

— Шумбрат, салмуков! — серьгедсь Нумоло авась.

— Ней мон аволь салмукован.

— Кодя истя?

— Истя вана. Малав весе салмуксон таргсизь Верьгиз ды Ривезь. Сыненст эрявсь теленень шубаст пандтнемс.

— Аволь ансяк сыненст шубаст пандтнемат, миненекак. А максат вейкешка...

— Ноцковтнек зяро муят.

— Э-э-э, тесэ кадовсь пеке ёжоват ансяк кой-кодят салмукст.

— Куш нетнень ноцковтнить, паряк, маштовить.

Нумолкай таргась вейке салмукс, венстизе лапанзо омбоцентень.

— Левкском, Нумолкайнем, превейнем, ко-о-о-с-а-а-а-т? — марявсь нусманя вайгель.

— Мон, бодяй, тесан, пизёлксонть ало.

— Вай, тон, Сеельне, мекс истямат? — кевкстясь сыця Нумоло атясь.

— Сон, бодяй, вирень ракшатненень явши салмукст.

— Салмукст?..

— Истя, салмукст. Теленень минек шубатнень пандтнемс-стакшномс.

— Салмукст, салмукст... Сонсь оно салмукстому кадовсь. Кодя те истя: сеель ды салмукстому?.. Сынстемест Сеельненть кие понгсь покордасы.

Чатьмониця Сеельненть селымстэ поцёрсо тусть сельведть.

— Иля аварде, Сеельне, — оймавтсь эйсэнзэ косто а косто савезь Сезьганось, — шкань ютазь касыть од кеме салмукст. Курок тон улят алкуксонь Сеелекс. Зярс зыяндэ эсь прят ванстома, салмукстому тетя стака, покордатадызь. Тон оно зяро паро весенень теить! Зяро ракшанень максыть салмукст шубаст сустамс.

— Минь тедеде якшамо телестэнтъ а кельметяно, — поладызе кортамонтъ Нумоло. — Тонгак а кельмат кудынесэть. Минь карматано тонь эждеме седей лембесэ, паронь арсемасо. Ну, мезть, ульть шумбра, превей Сеельне, вастомазонк!

— Илядо явово, — серьгедсь Сезьган, — эрьга, мон пурнасынъ вирень ракшатнень. Зярс оштё лембе, эрьга, вейсэ, моратано, кишттяно!.. Тувталось покш, вадря — вишка Сеельне тейсь паро покш тев, лездась.

Курок вирень кужонтень пурнавсть весе тесэнь эрицятне, конатненень лездась Сеельне. Налксесь, морсесь вейсэ.

...Киштемадо-морсемадо мейле вирень ракшатне явовсть, эрьвась тусь эсензэ киява. Сеельне нардынзе сельмензэ, састыне эскелясь яннэванть пизынензэ ёнов.

«Илязамам нее кияк. Сэрьс пейдсамам. Зярс а карман лиснеме пизэстэм, — арсесь эськанзо Сеельне. — Чить неремгак а венстяса. Чокшнес вачодо а кулан. А бути мезе, пшкадян, оно зяро од ялгам, лездыть. Кудосо, кеман, чарькодьсамизь. Салмуксон максынь паро тевень теемс...»

...Нетъ арсематнень марто Сеельне капшазь эскелясь кудо ёнов. Вельксканзо ливтнесь мазыйдеяк мазый туюсонъ нимиявт, седе верьга ливтнесь морыця нармунть. Оно неяви ютксост Сезьгангак. Кие-кие, сон уш вирьсэ эрицятненень ёвтнесы, кода вишка Сеельне тейсь покш лезэв тев: явшась салмуксонзо вирень ракшатненень теленень шубаст стакшномс. Истямо ялга марто а ёмат!

Монавтозь Верьгиз

Пьесат

КАЛКУНДЫЦЯ ПСАКА

7 картинасо пьеса-ёвкс

НАЛКСИЦЯТНЕ:

ПСАКА
ПУРЦУЗНЭ МАРТО ТУВО
ПОЛКАН КИСКА
СЕЯЛЕВКС
ИШЕМНЕ

ВАСЕНЦЕ КАРТИНА

Велень кардаз. Туво анды пурцузонзо очкосто.

ТУВО (моры).

Седе курок ваканонтень,
Туволевкскем, чиеде.
Минек паро эрямонтень
Покш раськенек кецнеде.

Каванятадызь кедь лангсто,
Ансяк монь кунсолодо.
Меленк седе курок касомс —
Седе парсте памшадо!

Весе тынк вечкеме кармить
Ды ярсамо учомо.
Сехте паро чакшкеть таргить
Тынк икелев путомо.

ТУВО. Цямкаеде, цямкаеде седе виевстэ, пурцузем, илядо визде.

Пурцузнэ очконтэ вакссо седеяк виевстэ кармить цямкаеме. Сы псака.

ПСАКА. Кодэ цямкаить! Мик удомсто стявтымизь...

ТУВО. Тонь яла удомат а яви. Мезень кисэ азорось ансяк тонь анды? Тонь пельде кодамоак лезэ арась.

ПСАКА. Кодэ арась? Мон чеерт кундсян. Иляст керя норовонтэ, иляст чамдо утомонтэ.

ТУВО. Минек арасть чееренек.

ПСАКА (*прянь иназь*). Вейкенъ пес сынст кундсинъ, секс арастькак. (*Моли ваканонзо ваксс.*) Чаво? Мекс, каня? Монень свал азорось ловсо кайси. А... те тынь монь ловсонть симинк?! Вачодо кадымизь...

ТУВО. А эряволь тетя истя кувать удомс. Чеертнедеяк вейке-кавто кадомаль «раужо чис».

ПУРЦУЗТ. Авай, каня, чись эрси раужо? Сон мезе, рудазсо экшелясь?

ТУВО. Ярсадо, ярсадо, эйдинем! Илядо вано те чаула Псаканть лангс. Кастадо, тынсь весементь чарькодъсынк. (*Уксты.*) Ярсадо!

Пурцузнэ цямкаезь ярсыть.

ПСАКА (*нусманясто*). Мекс видечинть тенст а ёвтат?

ТУВО. Арась мелем од порань психикаст коламс: ёвтан — ёми ярсамо мелест. (*Машинетезь.*) Кунсолока, Псака, азё чеерень-мезень кундсеме.

ПСАКА (*ёжонь колезь*). Бути ансяк чичавт?..

ТУВО. Мекс сеске чичавт? Азё калт кундак. Калтнэ — аволь чеертъ, лейсэнтъ зярдоак а маштыть.

ПСАКА. Алкукс. Молян, саян ульма ды сукст чувнан...

Псака тун.

ТУВО. Ярсадо, эйднем. Карматадо парсте ярсамо, ка-стадо покшсто, ульядо куявт. (*Стакасто оймень таргазь.*) Азортнэ улить мельспаросот. Ярсадо.

ПУРЦУЗТ. Ярстано, авай, ярстано...

ОМБОЦЕ КАРТИНА

Сы Ишемне.

ИШЕМНЕ. Шумбра валске, шабра! Кши ды сала. (*Чумонь марязь.*) Вай, мериксэлинь: кши ды сал.

ТУВО. Шумбрат! Мезть якат?

ИШЕМНЕ. И-а, сынъ тердеменк чачома чив.

ТУВО. Чачома чив? Каванямкат мезе? Мейсэ сюпават?

ИШЕМНЕ. Мезем уш ули... Пурька, — лисни, вейке. Якстерькай, — лисни, кавто. Куярт, помидорт — колмо. Редиска ды кшумань — ниле. Кснав ды тикше — вете. Капста, — лисни, кото. Ну, тосо оштё пангт ды мастумартъ эрва кодат...

ТУВО. Капста, пурька, тикше... Те вадря, те вадря... Инжетнеде ламо кармить улеме?

ИШЕМНЕ. Ну, Сеинесь, — лисни, вейке... Тынь сисемненк, — лисни, кавто... Псакась ды кискась, лисни...

ТУВО. Псака? Тон мезе, Ишемне, тунь превтемат? Псакатне эмежде-тикшеде а ярсыть. Сынъ тикше потсо удомо ды чеерень кундсеме вечкить. Улить чеереть?

ИШЕМНЕ. Чеерть арасть.

ТУВО. Сестэ мейс псаканть тердик? Ды оштё кискантькак? Секень вант, тюрьгадыть. Весе эрьгелема чинть кольстязь.

ИШЕМНЕ. Алкукс? Вай, мезе эно теемс? (*Арсезеви, нусмакады.*)

ТУВО. Сестэ эно кона шкане тердсамизь тешкстамо?

ИШЕМНЕ. Чокшне.

ТУВОСЬ. Чокшне? (*Велявты нуцузонзо ёнов.*) Эйкак-
шкеш, адыдо мартом пирев. Ишемненть чачома чидензэ
икеле эряви тенек парсте сускомс-теемс.

Туить.

ИШЕМНЕ. Кода улемс? А тердемс чачома чив Псаканть ды
Кисканть амазый. Кадомс вачо — седеяк... (*Виевстэ уксты.*)

КОЛМОЦЕ КАРТИНА

Псака моли ульма ды ведра марто.

ПСАКА. Мезде мелявтат, Ишемне? Мекс истя стакасто
укстыть?

ИШЕМНЕ. Ды течи монь чачома чим...

ПСАКА (*Кенярдозь*). Те пек паро! Ёвтан тетя седейш-
кавань поздоровт. Сестэ седеяк а чарькодеви, мекс нусма-
нят?

ИШЕМНЕ. Арсинь чачома чизэм тонь тердемс... А
содан кода...

ПСАКА. А содат кода тердемс? Мерть: тердян эйсэть,
Псака, чачома чизэнь, кона карми уleme... Зярдэ сон карми
уleme?

ИШЕМНЕ. Течинь чокшне...

ПСАКА. Кона ули течинь чокшне... (*Чатьмонезеви.*)
Чокшне? Эрь, чокшнес вачо а кулан.

ИШЕМНЕ. Мон чачома чив арсекшнынъ Полканоньгак
тердемс.

ПСАКА. Полканонь? Те темень стакалгавты. Эрь, ме-
зеяк, паряк, а тюрьгадтано. Иля мелявто... Тердемак.

ИШЕМНЕ. А содан кода...

ПСАКА. Ишемне, ансяк тонавтытинь, кода эряви.

ИШЕМНЕ. Тонавтымик, кода эряви тердемс. Кода от-
казамс — эзимик.

ПСАКА. Отказамс? Тень беряньстэ арсик. Мельс апаро мик кода-бути... Паряк, мейсэяк покордытинь?

ИШЕМНЕ. Эзимик. Весе анокстазь каванямкам эмежде-тикшеде ашти. Ну, тосо оштё пангт ды мастумарть эрва кодат... Тынь Полкан марто истямодо а ярстадо. Лисни, а мейсэ тынк каванямс. *(Нусмакады.)*

ПСАКА *(ёжос сазь, кепедезь вайгельсэ)*. Калт!..

ИШЕМНЕ. Калонгак арасть...

ПСАКА *(ульматнень лангс ванозь)*. Молян лейчирев, кундан калт, тонетькак максан. Карми мейсэ каванямс. Азё, анокстак эрьгелема чив!

ИШЕМНЕ. И-а! Вадрят-парт теть! *(Ношксты чиезь.)*

НИЛЕЦЕ КАРТИНА

ПСАКА *(моры)*.

Калкундысь леев моли
Ды ульманзо канды.
Калкундысь парсте соды:
Течи калнэ кунды.
Чипаесь пек манейстэ
Валскень менельс лиси,
Весе кал кундамс лейстэ
Калкундынтень арсить.
Секс алкукс течи тарган
Мон лейстэнтэ ламо калт
Ды кудов эйстэст кандан.
Те аволь чаво валт.

ПСАКА. Мяу! Полкан яннэнтэ лангсо мадезь ашти. Кода улемс? Паряк, нейке меремс: «Полкан, карматано эрямо ялгакчисэ! *(Сырги кисканть ёнов.)*

ПОЛКАН *(моры)*.

Пине мон, стяко а онган
Ды кочкарязонк а кундан.
Ансяк бути апак кевкте

Каткась пирес судо эвксты.
Эли сэрей пирявкс прява
Кардаз юткс сови салава.
Сестэ карман мон ирнэме
Ды инженьтэ эйсэ мурнеме.
Паряк, карман мон онгомо,
Паряк, карман мон сускомо!

ПСАКА (ловны стихсэ).

Вана косо зыянось,
Пиресэ касозь янось!
Те аволь превей кискась
Пулом сезьсы панксонь-панкс.
Ламоксть савкшнось, мезть сёпомс,
Сондензэ чиезь тукушномс.
Чувто прява, пирявкска,
Теке салыварака.
Эрят-эрят, стувтови,
Мекс тензэ а савтови?
Чалкакшняя пулонзо?
Раздекшняя судонзо?
Паряк, мон церепкастонзо
Салыя кшикочомонзо?
Стутовсь, кона чистэнтэ саезь
Чумочи лангозон кай?
Свал лиси сёвнома тарка.
Эрятано кискакс-псакакс!

Тандадомадонть стихсэ карминь кортамо.

А несы, кода Полкан састыне моли ёнонзо.

ПСАКА. Арась, а саты вием молемс малазонзо. Пелян.
Сави леентень лия яннэва сыргамс.

**Псака састо велявты ды лиси истя: судосонзо токасы
Полканонь судонть.**

ПСАКА (*тандады*). Мяу!

ПОЛКАН. Аштемс! Те мезе? Салыть? (*Ёжовсто.*) Эли, паряк, мерят, муить? Бути а видькстат — сусктан.

ПСАКА. Свал ансяк сускомс нороват. Ульматнень саинь калонь кундамс. Кундсян ды путсынъ.

ПОЛКАН. Калтнэ тонеть мезекс?

ПСАКА. Ишемень течи чачома чизэ. Вана сонензэ казсыньгак.

ПОЛКАН. Содан. Тердезян. Ансяк ИШЕМНЕ а ярсы калдо.

ПСАКА. Мон ярсан. Тон ярсат. Казсынек сонензэ калтнэнь, сон калдо минек каванясамизь.

ПОЛКАН. Лисни, койсэть, сонензэ минек амейсэ каванямс?

ПСАКА. Ули. Пурька, — лисни, вейке, якстерькай, — лисни, кавто. Куярт, помидорат — колмо. Редискат ды кшу-манть — ниле. Кснавт ды тикшеть — вете. Капстат, — лисни, кото. Ну, тосо оштё пангт ды эрва кодат мастумартъ. Мезе тень эйстэ тон сехте пек вечкат?

ПОЛКАН (*Арсеzeви*). Псака, тон видестэ арсят. Кундака калтнэде седе ламо. Казнеяк карми улеме, вачояк а кадовтано.

Псака туи.

ВЕТЕЦЕ КАРТИНА

ПСАКА. Мда... Косо тесэ калонь таркатне? Эрэви содыця кевкстемс? (*Фати Сеялевксэнтень.*) Оно, Сеялевксэсь лейчиресэ прянзо трякшны, сон уш содасынзе калонь таркатнень.

Моли малазонзо.

ПСАКА. Шумбрат! Кодэ эрямось? А ёвтат, косот тесэ калонь таркатне!

СЕЯЛЕВКСКЕ. Вай, кода тандавтымик! Иля корта истя гайтевстэ... А содан.

ПСАКА (*кеждязь*). Кода а содат? Чинзэ чоп лейчиресэ прятрят ды а содат?!

СЕЯЛЕВКСКЕ. Лейчиресан секс, мекс симемам сась.

ПСАКА (*абунгадозь*). Мейсэ эно тевесь? Онот, зяро ведтенть — симть зяро мелеть.

СЕЯЛЕВКСКЕ (*тошказь*). Пелян ведьпотсо эрицядонть.

ПСАКА (*кенярдозь*). Калтнэде? Минь сынст нейке кундсесынек!

Псака калавтни ульматнень, эскели веденть малас.

СЕЯЛЕВКСКЕ. Иля яка тов! Ведьсэнтэ эри кодамо-бути тандавкс. Паряк, Ведьава...

ПСАКА. Кодамо тандавкс? Ведьаваткак а эрсить.

СЕЯЛЕВКСКЕ. Кода а эрсить?! Азё варштык.

Псака моли леенть ваксс, ваны ведентень.

ПСАКА (*эрызасто, гайтев вайгельсэ*). Ну, косо тонь Ведьават? (*Коми седе алов.*) Кияк арась. Сак, апак пеле симть.

Сеялевксэсь моли веденть малас, коми ды сеске кирнявты веёнов.

СЕЯЛЕВКСКЕ. Мее! Сон тосо, монь лангс ваны. Амазый истямо... Прязо ваканшка! (*Невти.*) Сельмтне ванаштят. (*Невти.*) Судось прок плаштя. Конясонзо сюракшт...

ПСАКА. Эр्या, кавонек лангозонзо варштатано...

Ваныть ведьс.

СЕЯЛЕВКСКЕ. Каня а неят? Оно, сонзэ вакссо оштё кодамо-бути псакань кондямо неяви. Тонь ёнов моли.

ПСАКА. Сеялевкске... Кода вишкинькань пряудементь а томбамс? Те, Сеялевкске, аволь Ведьава. Те — тон... Седе видестэ меремс — тонь ципельдема (ведьсэ неяви).
ПСАКА. Кодамат тон оштё вишкинят ды ча-
волат... Кирдть ульманть, кармат монень лездамо...

ПСАКА. Мазыят! Тон пек вечкевикс ракша.

ПСАКА. Мазыят! Тон пек вечкевикс ракша.

ПСАКА. Мазыят! Тон пек вечкевикс ракша.

Псака ды Сеялевкске ушодыть калонь кундсеме, мо-
рыть.

ПСАКА. Лейчирентень калкундысь

Калнэтнень учомо лиссь.

ПСАКА. Калтнэ ведь алга уить,

Чирестэнтэ а неявить.

ПСАКА. Сэтьместэ аштетяно,

Ульманть мельга вантано.

Лыказевсь ульмаповось —

Ловт, калось ульмазот понгсь!

Иля автне кургот сестэ,

Ульмасуренть ускик эстетъ.

ПСАКА (кепедезь вайгельсэ). Сеине, таргак! Ноцковтт!

Зярс Сеялевкске таргась эсь калонзо, Псакантькак
сопальказо лыказевсь. Тевесь сыргась... Калтнэ мельга-
мельцек пракшность ведрантень.

ПСАКА. Пандя! Весенень сатыть — моненьгак, Пол-
каннэньгак, тонетьгак. Да беш, Ишемнень чачома чив
молят?

ПСАКА. Казьсак сонензэ те калонтъ. Кирдть. (Мельспа-

ПСАКА. Казьсак сонензэ те калонтъ. Кирдть. (Мельспа-

росо.) Сон минек Полкан марто каванясамизь.

СЕЯЛЕВКСКЕ. А мон мезде карман ярсамо?

ПСАКА. Иля мелявто. Ишемне эрьва мезе анокстась:
пурькаткак, капстаяк...

СЕЯЛЕВКСКЕ. Вадря. Адя куроксто.

КОТОЦЕ КАРТИНА

Молить моразь.

СЕЯЛЕВКСКЕ ДЫ ПСАКА.

Вай, чизэ маней кодамо!

Минь Чачома чис мольтяно.

Тосо андсамизь тантейстэ

Покшчинь сюпав стувор эшксэ!

Минь кишттяно, налксетяно...

Килангсо вастовить Полкан марто.

ПСАКА. Несак, зняро? (*Невти ведранть.*) Кирдть.

ПОЛКАН. Сюкпря! Ней а визькс Ишемнентень чачома
чив модемс — аволь чавонь лапат. (*Моры седе тов.*)

Мартонок казне кандтано —

Аволь ламбамо сускомо,

Ялгань пельде мельванома!

Вадря ялга, кемевикс —

Эрьва тевсэ эряви!

Неяви левкс марто Туво.

ТУВО. Те тынь мекс моразевиде? Кодамо кенярксонк?

ПОЛКАН. Ды вана чачома чив Ишемнентень мольтяно.

СЕЯЛЕВКСКЕ. Казнеть тензэ кандтано.

ТУВО. Те минек пельде оштё казнеть тензэ? (*Арсеzeви.*)
Минек мезеяк арась...

ПСАКА. Лездатано тонетькак. Кирдть калт. Те улияк казнить.

Максыть тувонтень калт. Эскелить седе тов.

ВЕСЕ (*морыть*).

Вай, чизэ маней кодамо!

Минь чачома чис мольтяно.

Тосо андсамизь тантейстэ

Покш чинь сюпав стувор экшсэ!

ПОЛКАН. Ну, вана пачкодинек.

СИСЕМЕЦЕ КАРТИНА

Весе тей-тов ваннозевить.

СЕЯЛЕВКСКЕ. Эка, ванодея, Ишемне тенек зяро тантейне анокстась!

ПОЛКАН. Сонсь, каня, косо?

ПСАКА. Оно, эскели.

Сы Ишемне. Рунгованзо понгавтнезь кептерть, лапасонзо пакетсэ ловсо.

ВЕСЕ. Вечкевикс Ишемне! Чачома чи марто тонь! Ульть шумбра, каст покш ды виев.

ИШЕМНЕ. Сюкпря, ялгат. Сюкпря!

ПСАКА. Вана монь пельде тетъ казне.

ИШЕМНЕ (*казнень саемстэ*). Кал! Те паро!

ПОЛКАН. Монь пельдеак казне.

СЕЯЛЕВКСКЕ. Монь пельдеак тетъ кал.

ИШЕМНЕ. Таго кал? Вадря. Сюкпря.

ПСАКА. Туво, максык казнить...

ТУВО. Кодамо казне?

ВЕСЕ. Кал!

ТУВО. Минь сонзэ сэвинек. Тынь весе калт казиде, секс арсинек: мезекс тензэ зяронть, ды сэвинек.

ПОЛКАН. Кодя сэвинк? Те казне!

ИШЕМНЕ. Илядо кежиявтне, ялгат. Сехте покш каз-
несь — минек ютксо ялгакчись. Варштадоя неть кептер-
нетнес. Ванодоя, зяро эрва кодат прякат раминь. Ярсадо,
вечкевикс инжеть!

ИШЕМНЕ (*моры*).

Вакашканк малав путодо,

Мон тенк ловсыне каян.

СЕЯЛЕВКСКЕ.

Гармонияк таргадо,

Мон гопак тыненк киштян.

ПОЛКАН.

Монень сединк кискань вальсэнтъ,

ПСАКА.

Монень — каткань киштема.

ТУВО.

Мон пурнасынь туволевксэнь

Ды киштевтсынь сиземас.

ВЕСЕ.

Эх, весть! Ды таго!

Покш чинь тешкстамо садо!

Весе киштить.

Шаршав.

Пе.

ТОНАВТОЗЬ ВЕРЬГИЗ

Кавто невтемасо пьеса

НАЛКСИЦЯТНЕ:

АЛИСА — тейтерне

БАЙКАЛ — киска

ВЕРЬГИЗ

РИВЕЗЬ

ОВТО

МИЯВ

СЕЗЬГАН

ВАСЕНЦЕ НЕВТЕМА

**Вирень кужосо ашти мукорь. Вакссонзо — яннэ. Маряви
верьгизэнь урнома.**

ВЕРЬГИЗ (*лисемстэ моры*).

Вирьсэнтэ урномась — тандавтома!

Стака Верьгизнэнь кудовтомо.

Тынь урознэнь седеймарядо —

Кудом-пизэм ашти каладозь.

Лангсон нарьги, нарьги эрямось —

Мельсэнь-превсэнь — ансяк ярсамось!

(*Урны*). У-у-у! Вай, кода мон а вечкан, зярдо пертьпель-
кэсьсэ ожолгады ды виресь правты лопат... Сыть якшамо
вачо шкат. Мезть тейнемс, кода улемс? Паряк, удомс те
шканть перть? Удомсто пекесь а истя вачи... (*Озы муко-
ренть лангс, конясынзе сельмензэ. Аламос аштезь панж-*

сынзе.) Вачо пекемень удома?! Ков ней модемс, косто муемс ярасмопель?

Яннэнтень лиси Мияв, сон уски чочко.

ВЕРЬГИЗ. Шумбрат, Мияв! Тон монень эряваткак.

МИЯВ. Шумбрат, Верьгиз! Паро — вастовинек. Лездакая тень кандомс лейчирес чочконтъ. Мон тосо кудо путан.

ВЕРЬГИЗ. Монень ярсамс эряви, аволь чочкот кандтнемс. Косо ды зярдю истямо ульнесь: Верьгизэсь киненьгак лездаволь? Нумолотнеяк раксесамизь, пелемеде эйстэнь лоткить... Тонсь кодаяк кандык чочкот.

МИЯВ. Кандса... Ансяк тонгак, Верьгиз, лезкс мельга тень иля пшкале. Тонсь уш кодаяк... (Туи.)

ВЕРЬГИЗ. Азё, азё... Кармат тонавтомон! (Пейдезь.) Миявонтъ марто сёвнынь-теинь — ёжомгак паролгадсь. (Токии пекензэ.) Ансяк пекесь седеяк вачсь... (Моры.)

Тень эряволь ям лембине,
Яксяргине ды ревине,
Сеябараннэ, сеине,
Ансяк паневть кшикувине.

Яннэванть юты Ривезь. Сон уски мельганзо покш кескав.

РИВЕЗЬ. Верьгиз!

ВЕРЬГИЗ (тандадомадонть пры мукорентъ лангсто). Вай, Ривезь, кода тандавтымик! А содаваткак... Мекс-бути аволь мазыят: шубат сезнезь, мерьказь...

РИВЕЗЬ. Шказо талай сёксъ, Верьгиз! Ракшатне пона каить. Вана монгак полавтса оршамом, таго мазыйкакс улян, таго тетъ а содаван.

ВЕРЬГИЗ (несы кескавонзо). Мезе, Ривезь, кандат? Саразт?

РИВЕЗЬ. Паро улевель! Мон теленень коське лопат

ды тикшеть анокстан. Ацасынь сынст кудыневан ды сехте якшамо читнестэяк а кельман. Паряк, лездат тень кандомс кескавонть?

ВЕРЬГИЗ. Тон, Ривезь, мезеяк ды ёвтат! Каня мон допрок чаволан — тикше марто кескавт кандтнемс? Тонсь кодаяк пачтясыть лопат кудо видьс.

РИВЕЗЬ. Пачтясынъ, ков эно молян. (*А марямга.*) Мон тень кодаяк тонеть ледстяса... (*Туи.*)

ВЕРЬГИЗ. Ёжомгак лопанзо марто кольстизе! (*Урны.*) У-у-у! Косто саемс охотничамс вийть? Нейке мезеяк сэвема! (*Ванны пертьпельга. Маласто неи пизёлкс.*) Овтось тикшеде ярсы — ды мезеяк, шумбра. (*Синди пизёлксонь тарад, ушоды порнемензэ.*) Вай, кодамо тантей! Вай, кодамо тантей!

Ливти Сезьган.

СЕЗЬГАН. Верьгиз, тон мезть тейнят?

ВЕРЬГИЗ. Ярсан, Сезьган. Вай, кодамо тантей!

СЕЗЬГАН. Кие истя ярсни? Весе пизёлксонть синдтрик. Зняро а сэват, зяро мерькат!

ВЕРЬГИЗ. Кадомак, Сезьган! Вай, кодамо тантей!

СЕЗЬГАН. Кода истя кадомак? Тондеть мейле нармунт-ненень теле лангс мезеяк а лияды.

ВЕРЬГИЗ. Кодаяк печтясынк теленть. Мон арсинь, тон паро куля кандат, ёвтат маласо аштиця ревень стададо эли чувто ало кекшница нумолкайде... Тон — сёвномо. Азё тестэ седе васов!

СЕЗЬГАН. Мон тонъ лангс Овтонтень пеняця. (*Туи ливтязь.*)

ВЕРЬГИЗ (*сези пизёлт, каясынзе кургозонзо*). Вай, кодат сэпейть! Теньсэ Сезьганось чумо — ярсамом кольстизе. Мезе ней... Сави модемс велев, куш мелемгак арась... Тосо истят кежейть кискатне! (*Моры.*)

Эрямось — зыянов пиштема.
Мелеть эрямс — пекенть пештема.
Кинень эрявить пеняцямот?
Нейке молема охотничамо!

Маряви тарадонь цятордома.

ВЕРЬГИЗ. Састо! (*Кунсолы.*) Кие истя стакасто моли?
Паряк, нумолотне Ривезенть эйстэ орголить? Ужо, монгак
кекшан. Вейкешка, паряк, кундан.

Верьгиз кекши куракш экшс. Вирень кужос лиси Овто.
Кутьмересэнзэ — нешкекудо.

ОВТО. Нучк-пачк сизинь. Кода тосо ёвкссонть кортави:
озан мукорь лангс, сэван прякине. (*Озы.*)

ВЕРЬГИЗ (*лиси куракиштнэнь экиштэ*). Понгить, чирь
сельме!

ОВТО. Тон, Верьгиз, превстэ лисить?

ВЕРЬГИЗ (*визделгадозь*). Ды мон... тень... Тонавтнян
нумолонь кундсеме...

ОВТО. Паро, бути тонавтнят. Тонавтнемась — лезэв
тев.

ВЕРЬГИЗ. Овто леляй, мезе кутьмересэть кандат?

ОВТО. Нешкекудо.

ВЕРЬГИЗ. Косто салык?

ОВТО. Мон, Верьгиз, тонь ладсо а салсян. Те нешкеку-
донть кандан Божаёв велестэ. Ильгеньстэ (Илиянь чистэ)
тов тердтнимим Сергей покштысь. Минь аламошкас вajo-
динек нешкепиресэ, секс сон каванимим медте. Казизе тень
нешкенть — мерсь, монсь пурнавлия меденть.

ВЕРЬГИЗ. Сергей атянь ревензэ улиць?

ОВТО. Сонзэ мезензэ ансяк арасть: ревензэ, саразонзо,
яксяргонзо... Ули нуцькинезэ — Алиса. Истямо мазый,
истямо превей! А уш кодамо чевте седей!

ВЕРЬГИЗ. Кисказоjak покштянтъ ули?

ОВТО. Кисказояк ули. Алкуксонь ванстыця! Байкал лемезэ. Тон тов аволь мезеньгак саламо молевлить?

ВЕРЬГИЗ. Ды кода меремс...

ОВТО. Теде иля арсеяк! Истят вадря ломанть тонеть покордамс мон а максан. Ды Байкалгак а максы. Стяко ансяк кедеть-киськеть сезневтьсак. Тень таркас монень лездавлиять.

ВЕРЬГИЗ. Мейсэ?

ОВТО. Лездак те нешкекудонть эрямо таркам видьс кандомс. Сырединь, стака тень. Тень кисэ мон тонь медте каванятан.

ВЕРЬГИЗ. Мон медьгак а вечкан, нешкекудонь кандтне-меяк а вечкан. Тонсь кодаяк.

ОВТО. Вай, кодамат, Верьгиз, чаволат! Вант, те «кодая-кось» зярдояк эстетъ велявты... (Туи.)

Маряви яннэванть сыця. Сыщясь моры морыне.

ВЕРЬГИЗ. Кие истя мазыйстэ моры? (*Кепедезь лапанзо алдо ваны тона ёнов.*) Кодамо-бути тейтерька... Те монь карми улеме! (*Кекиши.*)

Вирень кужонтень лиси Алиса.

АЛИСА (*моры*).

Вети монь вирень янось
Те вирень кужонтъ трокс.
Тесэ свал савкшны вастомс
Ракшинеть, нармунть, ёвкст.
Миявось сёлтке сёлты,
Та-ков капши овтось,
Нумолнэ ооска ёрты, —
Тень мон неия монсь.
Тень мон неия монсь!

Велявты удалов, несы Верьгизэнь.

АЛИСА. Вай, кискине!

ВЕРЬГИЗ (*покордавозь*). Мон аволь кискине, мон —
Верьгиз!

АЛИСА (*кенярдозь*). Алкукс? Тон монь а сэвсамак?

ВЕРЬГИЗ. А содан. (*Яки тейтерьканть перька, нисси.*)

АЛИСА. Тонь пекеть пешксе?

ВЕРЬГИЗ. Аволь пек. Мезень тантей чине кептерьстэть
качады?

АЛИСА. Прякинень. Неяви, тон вачомить. Ужо, мон
теть прякине максан. Кодамо седе вечкат — капстань эли
сывелень?

ВЕРЬГИЗ (*кенярдозь*). Сывелень!

АЛИСА. Кирдть... (*Венсти сывелень прякине.*)

ВЕРЬГИЗ (*нильсы пряकिनень*). Ды... мон капстаньгак
вечкан...

АЛИСА (*венсти прякинеть*). Ярсак, пештик пекеть!

ВЕРЬГИЗ (*сэвсынзе весе прякинетнень*). Мезе, пря-
довсть?

АЛИСА. Прядовсть. Кадовсть ансяк умарть... (*Невтьсы
кептерензэ.*)

ВЕРЬГИЗ. Мон умарть аволь пек... Эрь эно, макст
умартыкак.

Алиса венстясы кептерензэ.

Ков тон молят?

АЛИСА. Сырькаень кедьстэ кудов. Вай, кирдевинь
мартот. Кудов эряви капшамс. Мон туинь!

Алиса туи чиезь. Верьгиз озы мукоренть лангс. Сы Байкал.

БАЙКАЛ. Гав!

ВЕРЬГИЗ. Вай! Косто тезэнь саевсь кискась?

БАЙКАЛ (*Верьгизэнь ёнов молемстэ*). Р-р-р! Косто
саик те кептеренть? Сон монь азорованть — Алисань!

ВЕРЬГИЗ. Сон кудов тусь. Прякинесэяк каванимим.

БАЙКАЛ. А манчат? Уроктне умок прядовсть, сон те шкас эзь са. Сыргинь вешнемензэ.

ВЕРЬГИЗ. А манчан! Кенгелеманть кисэ пингем перть тень реведе а ярснемс! Паряк, кинк аламодо явовсть.

БАЙКАЛ. Кода мон сеске эзинь чарькоде?! Тон вант, иля арсеяк кудонк пелев прят невтемс! Мон велень лия кискатнененьгак мерян, седе пштистэ ваност! Р-р-гав! *(Сайсы кептеренть ды туи.)*

ВЕРЬГИЗ *(кувакасто лексти, моры).*

Якшамо венть таго вастома,

Вачо пеке монень кандома.

Ойдем нейке анок куломо —

Апак ярса мадян удомо.

Чопоти.

Шаршавось новоли.

ОМБОЦЕ НЕВТЕМА

Валске. Сэтьместэ пры лов. Верьгиз, кирьмицявозь, уды.

ВЕРЬГИЗ *(сыргози, несы ловонть.)* Темень тамаша? Ашо карвот ливтить, эрьга... *(Кундси ловтештинеть).* Ледсь мелезэнь — истят ульнесть меляткак. Те, улема, аволь ашо карвот — те лов. Лисни, телесь сась? У-у-у!

Ливти Сезьган.

СЕЗЬГАН. Ванан, Верьгиз, васенце ловонтень кецнят, морат!

ВЕРЬГИЗ. Те мон авардян, Сезяка!

СЕЗЬГАН. Мекс истя?

ВЕРЬГИЗ. Секень вант, кельман эли вачодо кулан. Тон, Сезьган, монень а лездат?

СЕЗЬГАН. Бути ансяк вейкесэ: ёвтаса тетъ, кодамо карми пертьпельксэсь нетъ читнестэ.

ВЕРЬГИЗ. Иляк ёвта. Пелян.

СЕЗЬГАН (*дикторонь вайгельсэ*). Малавикс читнестэ Ламадонъ вирьсэнтъ учневи виев давол ды якшавтома...

ВЕРЬГИЗ. Вай, кода ней монень улемс? Макст превтъ!

СЕЗЬГАН. Иля мелявто, Верьгиз, кодаяк ютавтасак телентъ! (*Туи ливтязь.*)

ВЕРЬГИЗ. У-у-у!

Вирень кужонтень олго берёма марто лиси Овто.

ОВТО. Шумбра валске, Верьгиз! Кодат теветъ?

ВЕРЬГИЗ. Кодат тевтъ! А кудом арась, а ярсамопелем... Паряк, тонъ мезетькак ули пей алов путомс?

ОВТО. Ули медем. Ансяк тон мерекшнить, а вечкат. Мон эстенъ вана лембе удома тарка анокстан. Ваксозон путан медь парне ды якшамо телентъ перть карман медев лапам нолсеме.

ВЕРЬГИЗ. А мон?

ОВТО. Тон тень, иля пеле, кодаяк ютавтасак телентъ... (*Туи.*)

ВЕРЬГИЗ. Кодат истя — кодаяк? Ух, якшамо! Чийнемс, паряк? Седе эжан...

Верьгиз чийни кужовантъ. Юты Мияв.

МИЯВ. Верьгиз, тон киде чийнят?

ВЕРЬГИЗ. Якшамодонтъ!

МИЯВ. Иля мелявто. Мон кудо путынь эстенъ, тонгак путат. Кодаяк печтасак телентъ.

ВЕРЬГИЗ. Кельман!

МИЯВ. Важодтъ, ды а кельмат! (*Туи.*)

Верьгиз урны. Каршонзо увны вармась.

ВЕРЬГИЗ. Вай, кие истя амазыйстэ урны? Паряк, монь кондямо вачо ракша? Кекшан, зыян илязо лисе. *(Кекши.)*

Яннэванть моли Ривезь. Канды кептерь, конастонть неявиць саразонь пыльгеть. Несы Верьгизэнь.

РИВЕЗЬ. Мезть тон, Верьгиз, комадо аштят? Пангонь пурнамо шкась ютась.

ВЕРЬГИЗ. Кодат пангот, Ривезь! Мон якшамодонтъ кекшнян! *(Сы малазонзо.)* Ривезь, мень пыльгеть неявиць кептерьстэть? Саразонь?

РИВЕЗЬ *(кекши кептерентъ)*. Мезть лабордат, Верьгиз? Кодаткак неть а пыльгеть. Неть — тарадт. Мон сынст эстенъ кудов кандан, лембе улезэ.

ВЕРЬГИЗ. Ривезь, саемак монь мартот эрямо!

РИВЕЗЬ. Эстенъгак таркась а сатны, пондакш пулом ушов каднови. Иля мелявто, кодаяк ютавтсак телентъ. *(Катишазь туй.)*

ВЕРЬГИЗ. У-у-у!

Яннэванть моли Алиса.

АЛИСА. Мекс, Верьгиз, авардят?

ВЕРЬГИЗ. Якшамо монень, Алиса. Кельминь ды вачоминь.

АЛИСА. Иля аварде, Верьгиз. Мон тонеть прякат максан. Сайтъ.

ВЕРЬГИЗ. Сюкпря! *(Сай кептерьстэнтъ прякат, катишазь ярсы.)* Вай, кодат тантейть! Вай, кодат тантейть!

АЛИСА. Лембень кис вана тетъ кыргава сюлмаамкам ды пряс путомкам. *(Оршасы Верьгизэнь.)*

ВЕРЬГИЗ. Кода ней тонсь кармат сынтемест?

АЛИСА. Монь кисэ иля мелявто. Монь оршамкам капюшон марто, а кельман.

ВЕРЬГИЗ *(авардезь)*. Сюкпря тетъ, Алиса. Съкамот

седей марят тень, весе лиятне ансяк мерсть: «Кодак печ-
тасак теленть».

АЛИСА. Кода сыненст а визькс?

ВЕРЬГИЗ. Те монень визькс...

АЛИСА. Мекс тонеть?

ВЕРЬГИЗ. Мон сыненст эзинь лезда, зярдо сынъ телен-
тень анокстась. Весенень меринь: «Кодак монтемень,
кодак тынсь...».

АЛИСА. А-а-а... Те, содазь, аволь вадря. Ялатеке аволь
эряво тенст истя тейнемс.

ВЕРЬГИЗ (*прятатненъ сэвемадо мейле*). Мон ношкстан
коське олгонь вешнеме. Эряви моненьгак телентень анок-
стамс, куш шкадо мейле...

АЛИСА. Те тон видестэ арсик, азё.

Верьгиз туи чиезь. Тарад лангс озы Сезьган.

СЕЗЬГАН (*Верьгизэнь мельга ванозь*). Ков истя ношк-
стась Верьгиз?

АЛИСА. Тусь теленень кудонь анокстамо.

СЕЗЬГАН. Улема, превс кундась.

АЛИСА. Ёвтыкая, Сезьган, косто монень Овтонть муемс?

СЕЗЬГАН. Мезть сонзэ вешнемс? Оно, неяви, сонсь
тей сы.

ОВТО. Шумбрат, Алиса! Кода Сергей покштять ёжозо?

АЛИСА. Сюкпря, вадря. Ёвтыкая монень, Овто, Лама-
донь вирьсэнтъ тон-аволь азорось?

ОВТО. Мезе теевсь? Кияк покордынзеть?

АЛИСА. Монъ кияк эзимим покорда, а вана Верьги-
зэнь — весе.

ОВТО. Кода истя?

АЛИСА. Энялдоманзо каршо весе тензэ мерить: «Ко-
дак тонсь».

СЕЗЬГАН. Сон васенцекс ушодсь!..

ОВТО. Истя.

АЛИСА. Ды тыненк а визькс?

ОВТО ДЫ СЕЗЬГАН. Визькс.

ОВТО. Мезть ней теемс?

АЛИСА. Тердить ракшатнень Верьгизэнь икеле чумочинк нолдавтомо.

СЕЗЬГАН. Сынь а сыть.

ОВТО. Мерть, монь течи чачома чим, весень тердян.

СЕЗЬГАН. Меремс мон мерян, ансяк чавонь кедть а сакшныть. Казнест аволь весень улиць.

ОВТО. Ёвтак тенст, монь туртов сехте покш казнесь — сынь. Овтонть, мерть, лия казнеть а эрявитькак.

СЕЗЬГАН. Сестэ мон нейке! *(Туи ливтязь.)*

ОВТО. Инжетнень каванямга молян кандан медь.

АЛИСА. Мон прякат кандан, авам течи эрва кодат пансь. Ды Байкалоньгак тердьса.

Туить. Аламо шкань ютазь кавонест велявтыть канст марто.

ОВТО *(медь марто парьканть мукоренть лангс пustom-сто)*. Кадык вечкевикс инжетне медте ярсыть, сон тантей — тикше-люкша ланга пурназь.

АЛИСА. Вана неть прякатне — сывелень, неть — калонь. Улить умарень, ал марто чурькань, инзеень. *(Ладси прякатнень.)*

ОВТО. Я, Алиса, тон аволь ськамот сыть. Шумбрат, Байкал!

БАЙКАЛ. Шумбрат! Тонеть паро арсемань ёвтамо сынь. Саик монь пельде те ловажиненть.

ОВТО. Сюкпря теть!

Сы Мияв.

МИЯВ. Мон ламбамо ундокст кандынь. Эзинь сода, Овто ялгай, покш чидеть. Мезем уш ули.

Ливти Сезьган.

СЕЗЬГАН. Мон пизёлт ды чевгельть кандынь.

ОВТО. Сюкпря! Косот те шкас Ривезь ды Верьгиз?

СЕЗЬГАН. А содан, кува Ривезь чийни, Верьгиз вана косо... *(Невти тонаёнов, косо яла аштекини Верьгиз, ансяк се косяк а неяви.)*

**Весе кармить тердеме Верьгизэнь, се виздезь лиси ку-
жонтень.**

ВЕРЬГИЗ. Шумбратадо! Овто, ёвтан тетя чачома чить кувалма паро арсемат! Ансяк казем арась. Мон кирьгава сюлмакканть мельспаросо казевлия. Эли пряс путомканть. Ансяк эстенъгак сынст Алиса казинзе. Иля кежиявтне...

ОВТО. Те тон, Верьгиз, минек лангс иля кежиявтне. Минь тонь марто беряньстэ теинек...

ВЕРЬГИЗ. Монсь эсь шкасто киненьгак эзинь лезда.

МИЯВ. Паро эно... Кие таштонть ледсясы...

АЛИСА. Сенень медь а макстано!

Весе ракить.

ОВТО. Вана ладинекак! Мон тенк, ялгат, истя мерян: сакшнодо монень аволь ансяк покш чистэ — истякак, тувталтомо.

СЕЗЬГАН. Моненьгак сакшнодо!

МИЯВ. Моньгак илямизь стувтне!

АЛИСА. Миньгак покштянь марто тыненк пек кеця-
тано!

ВЕРЬГИЗ. Ансяк мон зярс киньгак а тердян...

СЕЗЬГАН. Мекс?

ВЕРЬГИЗ. Монень тердемскак тынк аков...

ОВТО. Минь лездатано тетя теемс вадря, лембе кудо!
Истя, ялгат?

ВЕСЕ. Истя, истя! Лездатано!

ВЕРЬГИЗ. Сюкпря, сюкпря весенень! Тынь алкуксонь
ялгат!

Весе вейсэ морыть ялгакщинь морыне.

Вейсэ важомемс вельть паро,
Вейсэ вельть паро кецнемс.
Вейсэ шаштови мик пандо,
Бути ялгатнень тердемс.

Весе вейсэ виевтяно,
Мартонок морамо стяк!
Ялгакчисэ эрятано,
А изнясамизь кияк!

Пе.

МЕЗЕ КНИГАСОНТЬ

Ю. Антонов. «Весе минь — эйкакшпингень масторсто»5

Ловтештинеть

Стихть

Тюжа	20
Мон лётчикан	21
Артыця Петя	22
Покштям	23
Мелявтыця Люся	24
Оскине	25
Кемть	26
Ловсось оргодсь	27
Мишкань артовксонзо	28
Чачома чи	29
Кода касомс	30
Телефон	31
Пичечулят	32
Усат	33
Мекевлангт	34
Бажамо	35
Газель	36
Мелявтыця Вера	37
Гараж	38
Калонь кундыйть	39
Субута	40
Учёной сырькай	41
Ёмавкс	42
Сёрмань-гезетань кандтница	43
Лавсень моро	44
Катка	45
Мурка	46

Онгай	47
Сея	48
Мекшень кирдий	49
Нумолкай	50
Куко	51
Вирень онт	52
Лайка	53
Кискалевкс	54
Каткалевкс	55
Жердя лангсо «стявтниця»	56
Раужо псака	57
Куко ды Василий	58
Покш псака	59
Сеель	60
Унжа	61
Ишем	62
Васенце классов	63
Школав ян	64
Кавто тевть	65
Упражненият	66
Апак ладсе валрисьметь	67
Мельга ускома	68
Влас	69
Кавтос тонавтниця	70
Зазнайкин	71
Сельмевелявтыця	72
Пизьгатат	73
Конёк-горбунок	74
Лездыят	75
Ловонь тештинеть	76
Кода сакшны Од иесь?	77
Шумбрат, теле!	78
Кецневтиця инже	79
Од ие	80
Васень лов ланга	81
Цирк	82
«Куракшт ашо пухс орши-теи...»	83

Ашо карвот	84
Дворникть	85
Артса Саран ошом	86
Васянь онозо	87
Галат	88
Онгай	89
Мурка	90
Авань ладсо	91
Атят-бабат	92

Кодамо тюсонь ведесь

Ёвтнемат

Лисьмапря вакссо	94
Чувто латко	98
Сашоконь валскезэ	101
Мишань ялгазо	104
Сёксень видеMAT	106
Казне	108
Ёжов ур	111
Моро	113
«Браконьер»	116
Кодамо тюсонь ведесь	119
Паро казне	120
Шумбрачинь арсиця	121
Касыця Серёжа	122
Телемастер	123
Артый Оля	124
Лембе артовкст	125
Кельмезь судо ловняське	126
Ловонь кирдемат	128
Африкань ломанть	130
Пельнеть-ракшинеть	132
«Москвичень» азор	133
Паро пиземе	134

Лезэв мелявкст	136
Калонь кундсема	138
Нумолкайне	140
Сэнелькай	142
Хоккеист	144
Порксазь кринка	146
Цецине	148
Алкуксонь солдат	150
Сашок	153
Кальялкс	155
Тантей калт	158
Сёксень нумолкай	160
Зебра	161
Уцяска мельга	162
Герой	164
Кинь бабазо сехте вадря?	165
Сюпав Даша	166
Ламонь содыця	168
Сёксень ципакат	170
Димань кузозо	172
Телень инже	174
Алкуксонь-аволь Якшаматясь?	177
Чаровтомо машина	180
Мекс Мишань эзизь вечке	182
Телень чистэ	187
Охотав	190
Алкуксонь ялга	194
Серёжань каникуланзо	197
Нумол Миша	204
Изнямонь чистэ	210
Телень кизэ	212
Пондакш инже	215
Кувака пиле	218
Кавто кудот	220
Сельведь марто казне	224
Книжкинэнь именинанзо	227
Гринькань каникуланзо	230

Лездыцят	232
Идиця	235
«Бешеной» кран	237
Надобия	240
Питней парь	243
Груня бабань нуцьканзо	246
Телень чурькат	250
Мезекс самолётонтень чарытне	253
Вирень пандопрясо	256
Кискат-каткат	258
Егоркань лезксэзэ	260
Покш чи	262
Циркач	264
Чиньжарамот	267
Оциният	269
Паро казне	273
Нешкевеле	276
Арсемс шка арасель	278
Телень инжеть	281
Ледезь нумолкай	283
Викшневокст	285
Сехте мазый	288
Велесэ	292
Якшаматя	294
Пиземечирьке	299
Вирькужинесэ	305
Стака портфель	308
Светотехник	310

Эрясть-аштесть Бозаёвсо

Ёвкст

Калонь чи	312
Тонавтнеме анокстамо	317
Од эрямо	323

Мекс псакась ды пурцюзось эрить башка	326
Васенцеде лейчиресэ	330
Осёлонь чачома чистэ	334
Лембе валт	337
Превей чавола	340
Салмуксонь казиця сеельне	346

Тонавтозь Верьгиз

Пьесат

Калкундый Псака	352
Тонавтозь Верьгиз	364

Литературно-художественной издания

ГРЕБЕНЦОВ Геннадий Сергеевич

КОЧКАЗЬ ПРОИЗВЕДЕНИЙ

Стихть, ёвтнемат, ёвкст, пьесат

Литературно-художественное издание

ГРЕБЕНЦОВ Геннадий Сергеевич

ИЗБРАННЫЕ ПРОИЗВЕДЕНИЯ

Стихи, рассказы, сказки, пьесы

Редактортнэ

Н.И. Ишуткин

Т.П. Швецова

Корректорось

В.Н. Ларькина

Дизайн-вёрсткась

Е.В. Барцаевань

Подписано в печать 24.06.2019
Формат 84x108 $\frac{1}{32}$. Гарнитура «Таймс»
Бумага офсетная. Усл. печ.л. 20
Тираж 300 экз. Заказ №

Мордовское региональное отделение
Общероссийской общественной организации писателей
«Литературное сообщество писателей России»
430005, г. Саранск, ул. Советская, 22

Отпечатано с оригинал-макета заказчика
в ООО «РТ «Красный Октябрь»
430030, Мордовия, г. Саранск, ул. Титова, 2а
E-mail: tko-saransk@mail.ru